

潜溪集

宋濂

文硕阁

wenshuoge.com

目录

关于我们

卷一

卷二

卷三

卷四

卷五

卷六

卷七

卷八

3

5

30

50

72

90

110

130

148

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

卷一

◇国朝名臣序颂

帝王之兴，必有不世出之人豪，以自赴云龙风虎之会。《易》所谓“圣人作而万物睹”者是已。我皇元受天明命，抚安方夏，天戈所指，万方毕从。是故一鼓而诸部服，再鼓而夏人纳款，三鼓而完颜氏请降，四鼓而南宋平。东西止日之出入，罔不洽被声教，共惟帝臣。虽睿谋雄断，动无不胜，亦赖熊罴之士，不二心之臣，有以诞宣天威，故功成治定，若是之神速也。自今观之，陷阵攻城，无战弗克，则有若鲁国忠武王之伦；面折廷诤，丕赞皇猷，则有若耶律文正王之属；斟酌百王，恢宏文教，则有若许文郑公之流。其他智士谋臣，袂接肩摩，殆未可以一二数。稽之于《书》，在虞则有四岳九官十二牧，以亮天功；在商则有六臣保攸有殷，礼陟配天；在周则有五臣为辅，以克修和我有夏。以皇朝媲之，未足多让。夫以明良相逢如此之盛，治功告成又如此之懿，意谓有以宣著鸿猷，勒之琬琰，昭示无极。逮兹百年，而颂声不作，非甚阙典与！汉唐之臣，本无足议，陆机、吕温尚浓墨大书，为之颂赞。况逢今日昌熙之运，安可默默？濂窃不自揆，辄取行事著明、熟于耳目者，自鲁国忠武王而下，凡二十二人，人各为颂。虽立言不文，亦颇谓能美盛德之形容。使读之者知列圣之勤劳，诸臣之忠荃，王业之成匪一朝夕，其于治道似不为无所助也。第以金匱石室之藏，远在天上，有非遐方陋儒所得窥，故其所颂止此而已，非敢有所略也。

◇鲁国忠武王木华黎

阿难之河，白气如虹，王生其中。

虎首虬须，为天下雄。光辅帝极，宪天惟聪。

如鹰之扬，如飙之发，如云之从。

右执大斧，左囊彤弓。铁垒层层，一劈而崩。

遒骏有声，诸部用平。相彼完颜，逞于淫凶。

我伐用张，旗鼓有容。僵尸百馀里，浍河为红。

太行以南，斂手就降（叶，音红）。帝录其功，锡茅土之封。

丹书铁券，与国始终，传世于无穷。

◇淮忠武王伯颜

淮王桓桓，凝峻寡言。一言之间，如雷破山。
及履上台，四国尔瞻。誓师南征，大乱汝戡。
三军飞渡，目无江南。前扼其吭，宋胆自寒。
老梟既夜遁，直捣临安。俘厥君臣，大敷帝仁。
皞皞熙熙，市肆不移。宋鼎已易，而民弗知。
崇德报功，王谦让弗居：

此天子德威，臣何能为？古有曹彬，于王见之。

◇楚国武定公阿里海涯

于维楚公，既勇且武。手挺白矛，能舂猛虎。
建谋于廷，谓宋疆可平。王师出征，公实在行。
陷阵攻城，风驰霆轰。一驾而襄鄂下，再驾而吴楚宁。
山獠洞猫，被毳荷毡，亦归王明。
士出其门，咸为国桢，能黼黻皇灵。
呜呼楚公，盖世之雄。

◇广平贞宪王玉普

倬彼武忠，驱猋驾云，来奔真龙。
无谟不宜，无战不从。有孙烈烈，劲气直节。
雷霆之下，孰不殒灭？王不震不慑。
宗藩构难，变生肘腋。帝命出师，三战三捷。

鹤驭上宾，众言沸腾。王静以镇之，神器弗倾。

玉带宝衣，用旌尔能。社稷之臣，繫王之伦。

◇河南武定王阿术

河南之先，世有大勋。列阵蟾河，强部褫魂。

火炬夜爇，回鹘乃奔。乃蹴汴京，以洗妖气。

西南夷不庭，即勒锐兵，以讨以征。

金鼓震天，跃入其城。缚段智兴，及生河南。

沈几有智，挺英毅之气。瞋目一叱，万人皆废。

顾彼江南，一弹丸之地。恭行天诛，羽书日驰，卒献馘京师。

九土茫茫，来享来王，开元祚于无疆。

◇淇阳忠武王月赤察儿

将门出将，一气之传。有如淇阳，不负其先。

威容言言，望之如神。亲属橐鞬，宿卫帝宸。

白斥大奸，拔去祸根。金山之阴，蚁附蜂屯。

王鞠其军，以绥远人。以镇北门，以靖大藩。

宠赉加厚，铸印如斗。休有烈光，千载弗亡。

◇句容武毅王土土哈

西北绝域，有山峨峨，襟带二河。

其人鸷猛，如虎负戈。况我勾容，人中之杰。

来辅真元，孰得而遏？从六军北伐，应变如神。

有坚必拔，成杭海之烈。

譬如太阿，百炼不折，无愧臣节。

◇耶律文正王楚材

惟楚有材，晋实用之。达人先知，曰千里驹。

堂堂中书，执政之枢。相我太宗，拓开鸿基。

拱立龙庭，上陈帝谟。三灵协和，万象昭苏。

舒吾阳和，脱彼剪屠。人文褰开，民猷争趋。

于变时雍，上登黄虞。厥功何如，请视鼎彝。

◇杨忠肃公惟中

西域小邦，以险自婴。帝命杨公，往宣威灵。

雷霆震惊，风云流行，孰敢不来庭？

秉越而南，椎结卉裳，惧不能兵。

恒山蘖牙，盘据大明。公仗节而呼，巢穴用倾。

鼎湖遗弓，乾纲解纽。公以两手，上扶日月。

不歆不昃，小大毕达。海外有截，卒成帝业。

◇汪义武王世显

金运之熄，亳社已屋。谁栅石门，巡阵恸哭。

时维汪王，义不负国。国亡三秋，将焉寘力？

神元龙兴，六合有恭。遂乘刚风，来朝帝侧。

出其所蕴，以效劳绩。乃截嘉陵，乃践大安。

乃擒劲帅，撤蜀之藩。

王之出矣，提戟而前，气吞三军。

王之旋矣，雅歌投壶，右琴左尊。

既武且文，懿哉元勋。

◇张献武王弘范

真人开天，时乘六龙。麾斥八极，群雄云从。

剑气上冲，日星晦蒙。宋人不恭，假息海邦。

帝命张王：汝师汝将，汝拔樊襄，

汝渡大江，汝揭义旗，以受其降。

王既受命，横槊上马，鸱击隼翔。

有夫甚武，直奋大刀，众莫敢当。

王迎刺之，应手断肱。军气益扬，大声震天。

敌有手若亡，遂籍其土疆。遗燭未息，厥势犹强。

帝壮王之威，复命往征（叶，音张）。

宝剑名甲，锡自尚方。一麾而殒，海波镜平（叶良）。

崖山苍苍，武功洸洸。

◇刘文正公秉忠

贤者在世，视时拙信。挂瓢武安，绝世离群。

幡然而起，风跃云。乃垒乃城，乃阙乃庭，乃建滦京。

滦京之封，龙冈郁冲，王气所钟。

伊刘公是庸，作皇邑土中。

敷文教万邦（叶，必容反），车书来同。

车书来同，维公之功。

◇史忠武王天泽

淳淳忠武，有力如虎。斩将搴旗，疾行如飞。

统诸侯大兵，前无坚城。马不留影，士不留行。

梟李擒葛，氛祲肃清。凶鸷既锄，残孽亦宁。

春生秋杀，以奠邦经，以严邦刑。

维忠武有勇，大敌不恐。惟忠武有慈，服即弗诛。

维忠武有节，始终弗涅。

纪功旗常，为邦之光。

◇廉文正王希宪

天启景运，挺生人豪。豹略龙韬，呼吸风涛。

英英廉公，才雄气骞。力捧潜龙，上升九天。

诞彰皇威，关陇晏然。广厦细毡，嘉猷日宣。

出镇辽霅，强宗震叠。移节荆湖，民气遂苏。

连征大猾，正气烈烈。式扬式发，则莫我敢遏。

大星煌煌，西流于堂，天下之伤。

◇窦文正公默

有卓窦公，闾闾而驯。雍雍而惇，炳炳而文。

大衣垂绅，似不能言。及摧权奸，执将排山。

纲常之陈，皦若白日。照耀天下，至今有赫。

大道既明，旁艺亦精。九箴所及，以死为生。

其学之醇，其志之忠。

宜耄矣之嗟，发自帝衷。

◇姚文献公枢

奕奕龙泉，神彩内明，视之如空。

其锋所指，无物不断，捷疾如风。

媲之文献，雄姿英发，靡有不同。

在前无古，在后无今。有志卓卓，倡道苏门。

上溯泗、沂，下探关、洛。施于有政，蔚为王佐，务尽忠谏。

立经陈纪，礼贤黜邪。风动四方，大开文明。

辇致雅乐，实自鲁邦。不杀之谏，昼夜谆谆，舌不得藏。

治定功成，浑然无迹，莫窥所存。左许右窦，三人同心。

扶乾植坤，如带如砺。信誓弗渝，永世有闻。

◇许文正公衡

濂、洛之学，传自武夷。重徽叠照，日星昭垂。

逮我许公，尊闻行知，若亲抠衣。

寒泉之槩，张皇幽眇，厘析毫丝。

如皋陶淑问，毕其情辞。如后羿注矢，不失其驰。

既入闾域，遂升堂基。横经胄监，衿佩锵如。
祛其人私，牖其天彝。释其偏歧，挽其九衢。
德成材达，昭用于时。黼黻帝治，甄陶泰熙。
明体适用，公实庶几。无德弗报，四海祝尸。
呜乎许公，百世之师。

◇吴文正公澄

紫气蟠联，神物蜿蜒，有开必先。
山川降神，自元而贞，笃生哲人。
慎斯勤斯，绝乎等夷，于道早知。
厉如秋霜，煦如春阳，何德之昌。
抱膝而居，气盖八区，阒而弗舒。
玩心神明，操觚弗停。兴卫圣经，学徒是依。
毛之有麒，甲之有龟。
璟其渊冲，以消吝封，心熙气融。
大明当轩，屡聘益尊。施教成均，北许南吴。
先后合符，人文之敷。

◇董忠献公文炳

伊龙虎君，实生群英。一吹一嘘，霜露变更。
长江天堑，其险莫前。公挟二季，破浪争先。
横行而旋，喜动帝颜，戟手指天。

焦山万艘，栲比云浮。公大呼突阵，蛟泣龙愁。

横尸蔽江，水为不流。淮城虽筑，敌气未龙。

矢石四集，贯公臂及胁。公拔去之，督战益力。

韩、彭之勇，良、平之谋。方之于公，吾不知其孰优。

◇郝文忠公经

瞻彼郝公，上师孔、颜。挺然一气，立天地间。

衔命出使，仗节弗屈。十有六龄，有如一日。

榘门塹垣，不翅狱庭。臣节甚重，万死实轻。

吐其崛奇，见于直笔。奸雄虽亡，诛之则力。

汉有苏武，啮毡海上。郝公继之，双壁相望。

◇程文献公钜夫

巍巍世祖，度越百王。义声神威，抚壹宇疆。

公起从之，仗义激昂。咸韶皇度，袞冕宪章。

乘传来南，绣衣焜煌。玉札牛溲，药笼并藏。

出而医国，小大毕张。吐握见贤，如渴得浆。

虽居銮坡，不异庙堂。以顺为期，以柔居刚。

式宪且文，于烨其光。

◇刘文静公因

先生之心，岳镇川澄。先生之操，玉温石贞。

先生之学，寤寐六经。岐阳之凤，鲁郊之麟。

和气袭人，盎然阳春。发周孔性情，挹其深醇。

或出或潜，与道周旋。九京可作，吾为执鞭。

◇皇太子受玉册颂

至正十五年春三月丁亥朔，越八日甲午，皇帝命太尉汪家奴，持节授皇太子玉册及冕服九旒。在廷臣邻，莫不骏奔东朝，恭行大礼。越翼日乙未，复诣大明殿，俯伏拜舞，举觞上千万岁寿。百僚具欣，无间小大，僉曰：我太祖圣武皇帝，茂昭宝训，预建冢嫡，嗣服继统，累叶上承灵贶，罔敢或违。今我皇帝春秋方殷，即定元良，以绍隆丕。构其神谟睿断，与雷霆同其英烈，山岳同其雄高，河海同其幽深。求之前古，曷无与比。於乎盛哉！然以万国至众，神器至重。豫定则治，否则乱。治乱所关，不翅一反掌之易。布在方策，盖可见已。奈何为人上者不尔之思，祸乱相寻，有不忍言。惟我皇帝，圣神文武，与天同运，而不以四海自私。惟皇太子，刚果温文，与圣合德，而足膺主鬯之寄。明两作离，照耀无穷。对越天地之耿光，丕承祖宗之休烈，是可以无愧者矣。《易》曰“主器莫若长子”，记曰“一人元良，万国以正”，其是之谓乎？臣濂遐方贱士，躬闻大庆，不敢暗无声歌，谨遵诗人美盛德之义而作颂曰：

皇明御宇，图治靡宁。邦本既建，万国以正。

仰瞻紫微，中居帝座。前星煌煌，厥象斯著。

圣人法天，夙夜弗违。爰升上嗣，以弼大基。

春日载阳，洊雷出震。龟协筮从，降兹大训。

乃敕近臣，持节而驰。锡以玉册，冕服九旒。

帝曰休哉，神器甚重。继体之思，朕敢不悚。

汝宜敬事，勿懈益恭。服兹宠嘉，祇谒太宫。

勿谓天高，征应甚速。勿谓宫深，千里在目。

若军若国，汝抚汝监。流祚无穷，朕心乃安。

皇储翼翼，拜手稽首。臣敢不勛，以主鬯卣。

百僚萃止，冠弁之峨。舞蹈不足，继以咏歌。

四海之命，悬于元冢。少阳位隆，不震不动。

何威弗宣，何气弗清。太白敛芒，天高日明。

微臣作颂，流播盛德。勒之贞珉，垂示千亿。

◇皇太子入学颂

至正九年某月日，皇帝开端本堂，命皇太子肄业其中，致圣功也。前期一日，司经设帝座于堂中，南面。朱几在其南，芻俎又在朱几南。俎前有筵，复设皇太子位于坐西，东面。太子、太傅位于坐东，西面。谕德、赞善二人，文学一人，位在太傅之东阶，西面北上。厥明，司经以裕皇所御圣典置朱几上。公卿子从学者，分东西序立堂南，北面，以中为上。正字一人，司经一人，对立两序端，以劾不如仪者。赞者导皇太子就位立，谕德以下亦如之。皇帝遣使者来致命，在位者皆北面立受，以次出堂门外，望北阙再拜者二，复初位。赞者又导皇太子至芻俎南，北面立。升筵再拜，就筵北跪，炳芻于炉者三，少退又再拜，复位立如初。凡拜若跪，公卿子咸从。司经以圣典还阁，几与俎皆彻。皇太子即位坐，谕德以下皆坐。公卿子别设几席于谕德位西，皆再拜。赞者引齿最长者一人，执贄自门左入，即席跪，奠贄于几。复位如初，又再拜。拜已，执罍以升，执尊及脯醢者从，诣谕德西，东面立，注酒于罍，即席跪行一献礼。从者荐脯醢，赞善、文学亦如之。少退，执事者勺酒授谕德，以酢献者。复位如初，皆再拜。赞者退，司经设授读位。正字一人，执策启皇太子受经。一人诣谕德，请授经。至位，东西相向坐。授受已，复位如初。惟皇帝丕式先王成宪，敷佑四方，帝求俊彦，用迪皇太子以学。惟敬惟慎，如此其至，实万世无疆之休。敢拜手稽首而献颂曰：

于赫皇帝，日照月临。飙驰霆轰，克威克明。

国本既定（叶，音庭），万方靡弗承。乃命官师，乃辟宫学。

侯咨侯度，侯究侯宅，于彼有庶。宫学峨峨，龙楼之阿。

奕奕其楹，伋伋其庭，既穆且贞。皇帝曰噫，莽莽九围，此实其基。

其基何居？有书有诗。羽翥干戈，亦以其时。

尔尚勛哉，毋越我彝。我心我縻，毋隳我维。

我善我师，上窥黄虞，百度惟熙。

皇储曰都，敢不敬恭，以养其蒙，以徼其功，以达于家邦（叶，而光切）。

旭日煌煌，出自东方。銮车彭彭，青旗阳阳。

佩玉锵锵，跻彼新堂。载诵载弦，或舞以扬，帝命罔敢荒。

维幅员既长，维天命靡常，匪德曷臧。

兢兢皇皇，寤寐弗忘。于赫皇帝，诒谋宁止。

皇储则之，学又烝止。百禄盈止，庶绩凝止。

庶绩凝止，万世期无已。

◇拟晋武帝平吴颂

惟咸宁五年冬十有一月，皇帝将举兵伐吴。乃集多士于庭而训之曰：惟皇天孚佑有晋，俾克君临万方。尔万方有众，罔敢有肆厥志。朕犹夙夜祇惧，若将坠于深渊，唯恐一夫不获，以越前王彝宪。《商书》曰：“民非后，罔克胥匡以生。后非民，罔以辟四方。”朕曷敢荒宁！今吴王皓，舍我民弗靖。唯酒暨色，淫酗无厌。大开苑囿，起土山楼观，殫极工艺。肆厥威如虎狼，群臣有正视者，辄杀无赦。神怨人怒，皓有耳若罔闻知，则亦弗畏天降威命。上帝震怒，集厥命于朕躬，不敢不正。敢用吉玉宣璧，昭告于上天神后，帅尔有众，底天之罚。尔由，尔为王子，国之休戚，与尔同之。尔督徐州诸军，以出涂中。尔浑，戮力王室，简在朕心。尔督扬州诸军，以出大江之西。尔预，夙以嘉谟告朕，朕极不忘。尔尚克践前言，以成厥勋。荆州诸军，尔其督之，以出江陵。尔浚，尔作大舰，欲有事于皓，多历年所，今维其时，非尔弗克终厥图。益梁诸军，尔其监之，以下巴蜀。尔彬，帅其部曲以从。尔奋、尔戎，世号忠贞，各将尔师，以出夏口，以出武昌。尔充，为使持节，假黄钺，大都督以冠军。尔济，副之。呜呼，尔有众尚修乃干戈，峙乃糗粮，齐乃士伍，勿丧厥纪律，惟尔贤。往敷朕威灵，越厥君臣，宜执俘之，献于大庙，勿大肆杀戮，惟尔贤。呜呼，朕岂有爱于吴土疆，闵我民罹辜，诞以尔多方，殄歼乃仇。尔尚兢兢怀保，若抚馘维。兵戎所指，弗使致厥伤，俾朕膏泽布于下民，时乃功。尔不听朕言，朕则孥戮女。尔其念哉！太康九年春，安东将军浑出横江，所向皆克。二月，龙骧将军浚克西陵。镇南大将军预，遣将渡江，自进克江陵。沅、湘以南诸郡，皆望风送印绶。预分兵益浚。建威将军戎遣将与浚合攻武昌，降之。三月，浚以舟师入石头，皓面缚舆櫓，诣军门降。克州四，郡四十三，户五十二万三千，兵二十三万。夏四月，赐皓爵归命侯。遣使行荆、扬，除吴苛政。诏增充浑邑八

千户，进浑爵为公。浚辅国大将军。预、戎皆封县侯。诸将赏赐有差。以伐吴之役，实始于巨平侯祐，祐既卒，策告其庙，封其夫人为万岁乡君，食邑五千户。复诏博士臣某，刻石纪功，昭示万世子孙，以绍有晋无穷之基，弗敢坏。颂曰：

煌煌有晋，宠绥下民。欲俾万方，均囿至仁。

吴人不恭，据彼海濒。残虐是逞，若火四焚。

帝怒斯赫，命将徂征。龙盾虎旗，照耀日星。

士气如虹，吞厥南土。长江天堑，一朝飞渡。

吴人震惊，流汗浹背。岂伊神武，自天而坠。

帝命将臣：汝戒汝师，汝敌则刘，降宜舍之。

皓既面缚，馀敢不释。万里虽远，天威咫尺。

青盖委蛇，入于洛中。夙发其祥，昭此武功。

皇华载遣，六轡耳耳。诞布阳和，以消阴噎。

旋乾转坤，六合一家。文恬武嬉，浑浑无涯。

有功者赏，载颂载锡。赤芾桓圭，帝不之惜。

惟帝神武，能屈群策。拓开蛮荒，揭此日月。

帝德流衍，颂声斯播。授之乐师，以荐郊庙。

◇天台教宗圆具图颂

三千性相，百界千如，此天台教观第一义也。有能于此悟入，融万法而归一心，即一心而达三谛，其近于佛之知见乎。比丘法咸，示濂圆具图像，于是合掌作礼而说颂曰：

我观妙境不思议，三千性相恒宛然。心佛众生本无二，不为迷悟有增减。

大充法界小尘沙，一一具此无量法。须知一念即三千，三千一念亦如是。

譬如悬空十宝镜，镜前爇一光明灯。一灯偏入一切处，一切摄归一灯内。
光光涉入了不碍，互偏互融无尽藏。此境即空即假中，而亦不落空假中。
非先非后非异时，举一即三三即一。事理俱摄无差殊，修性齐照亦不别。
五佛开显大车譬，只此一乘圆具旨。若祇观心不观具，乃以一观分二家。
或约三谛作二造，有昧圆融秘密义。妄嗔染净无异观，是非能析亦双泯。
偏虚空界尽法身，一法外求即邪道。唯此如来正法门，有非语言能拟议。
大海可饮风可捕，历劫赞叹莫能尽。

◇西域军中获角端颂

我太祖皇帝之龙兴也，灵承帝命，宠绥四方。克烈既臣，乃蛮攸服。远近诸国，往往向风内附。而东印度远在西域之陲，负固不庭。帝乃震怒，移六师以征之。师次铁门关之下，厥有神物，麋身而马尾，独角而绿文，胡人语曰：王师宜早还。帝因访问近臣耶律楚材。楚材对曰：是兽名角端，能日行万八千里，其见则恶杀之象，殆天使之告陛下耶。帝即日下诏班师。臣濂谨稽诸传记，角端有二焉：其一状类豹，角在鼻上，中作弓，今鲜卑及胡休多国尚或有之；其一能晓四夷语，圣人在上，明达方外幽远之事，始奉书而至。此则自周秦以来，历千馀年之久，绝未之闻，而独于神元见焉。岂非圣德有以动天，灵异之物莫不自至也欤！汉元狩初，武帝行幸雍祠五畤，获兽一角，而足有武蹄。协律都尉李延年及司马相如之流，尚竭其心思，播诸乐歌。千载之下，令人读之有若亲生其时而观其事者。矧今之所获，古所未有，使延年、相如辈得际今日休明之治，则其咏歌圣德于无疆者，又未知其何如也。臣濂虽不敏，其可已于辞乎？谨拜手稽首而献颂曰：

于赫太祖，肇基龙荒。手持黄钺，日靖四方。

飙飞云流，无敌弗剪。孰敢不恭，以贻诛殄。

维彼印度，疏勒之西。敢抗六师，大命卒迷。

帝乃震怒，爰饬其旅。尔褫尔牙，尔桴尔鼓。

龙旗载扬，列星光光。指于西疆，白日为黄。

乃有神兽，麋身骥尾。独角桓桓，人立而语。
帝询近臣，厥兽何灵？近臣有言，角端其名。
天子好仁，奉书而至。曷释戈矛，绥以文治。
帝曰俞哉，我师亟还。尔弓则橐，尔矢则鞬。
有声鉤鉤，震撼四国。垂衣龙庭，化行绝域。
九有之臣，载忭载呼。天地动色，神人俱愉。
惟我太祖，祇承上帝。帝度其心，纯一不二。
惟我太祖，乃武乃神。戢暴遏刘，绥我下民。
惟我太祖，恪慎天戒。曾不移时，戎车返旆。
神兽之来，自天降祥。匪天降祥，帝德之昌。
孰其媲之，古圣有作。龙马出河，神龟浮洛。
黄文之犀，九真之麟。何世不有，匪德之因。
皇灵赫奕，覆冒下土。鱼鳖咸若，鸟兽率舞。
曷其基之，自兹始之。茫茫八区，莫敢不来。
惟德动天，荐兹嘉瑞。小臣勒词，来貽世世。

◇豫章铁柱颂

豫章郡铁柱二，旌阳令南昌许逊敬之铸以镇蛟者也。郡地滨于江，水虫骋妖，故民多江祸。旌阳与西安吴猛世云，用正一斩邪、三五飞步之术，追歼其神于长沙。复惧遗孽洊兴，使物治铁厌其窟宅。一在西山双岭南，湮没已久。一在牙城南井，迄今犹存。柱出井外仅尺，下施八索，谓能钩锁地脉云。唐咸通六年，节度使严撰来为郡将，发视之。未及咫，烈风雷雨，江水暴溢。撰恐而止。其见于道家书者如此。濂窃闻之，周有壶涿氏，掌取水虫。若欲杀其神，则以牡絜牛贯象齿而沉之，则其神死，渊为陵。神，谓龙罔象之属也。古盖有其术矣。矧单阳则飞，制以重阴，

乃伏而不动。铁阴而蛟阳者也，斯柱之建，其亦沉絜象之遗意与？於戏，豫章之民与蛟不两立，微旌阳、西安，民其鱼矣。濂虽不敏，谨徇郡守某之请，勒文柱下，以颂神功于亿万载。颂曰：

吴楚合域，翼轸分经。南昌巨都，蛟孽所庭。

珠撻波谲，睢运涛萦。夫诸兽验，胜遇禽征。

沈灶蛙产，蚀阜泓成。灵伯应历，鬼宪宣刑。

岳纂三辰，斗剑七星。挥斥电战，刳割霆升。

河胄黑廓，川液红星。轨天设镇，冶金建楹。

祝融主焰，阍伯司型。八神锡羨，五官储精。

上旋圆枢，下铤方局。溟妃捧鉴，渊后持衡。

飙笙鹤濞，月吹鳧汀。仙旂周紫，童节流青。

元勋潜沕，素牒晶荧。龟山铁跂，龙鼎文铭。

翊扶鸿宰，斡运清宁。泰山可砺，灵柱弗倾。

◇大还龙虎丹赞（有序）

龙虎丹赞，为予友郑源氏作。源因读《金碧古文龙虎上经》有悟《大还》之旨，用之修炼，节节有奇验。复以其玄秘也，请予白之。作是赞，赞凡四章。

苞乾灵一

人身苞精气，妙与玄化并。一神管摄之，铅汞各流行。

神所栖止处，实为天地中。阖辟类两扉，循环不竭穷。

廓然含冲虚，独立不以形。是即真息根，强名帝乙庭。

静极必自显，内境垂白芒。或想为连环，无乃丧其常。

斡化纽二

凝神入紫虚，冲然抱一居。青龙郁上升，白虎为熬枢。
牝牡既相从，蒸润如流酥。鄞鄂一以固，温养成子珠。
销籙离中阴，坎阳复来随。纯刚号为乾，潜跃契道符。
郁罗萧台中，服霞漱云腴。阅历无穷年，永共溟滓俱。

考火记三

鼎炉乾坤枢，匡郭水火魂。戊己居土官，一气中夜存。
火候十二时，暮蒙复朝屯。专气而致柔，绵绵日相因。
刑德务并进，文武须错陈。薰蒸洽太和，天机盎神津。
三元与五气，一一返其根。后天不能雕，长为万象尊。

稽曲征四

三千六百门，尽随魑魅场。雌雄铸为剑，日月吸光晶。
尾闾闭元液，九鼎运女英。三逊及五假，八石巧煎烹。
如此之举措，难可一二名。阴魔夺人命，遗尸莽纵横。
寒飚动罗酆，时有鬼啸声。方知涉有为，不可学长生。

◇滕奉使赞

齐人王蠋有言曰：忠臣不事二君，烈女不更二夫。女之从人，一与之醮，当终身不改。譬之白璧，小有玷辱，人将斥去而不之顾。臣之事君也，其理亦同，故蠋特并言之。事两夫者，虽辨如虞姬，智处邓曼，吾知其决非良妇。事二君者，虽功如汾阳、才如屈平，吾知其决非良臣。呜呼，使此义昭如白日，人臣安肯怀二心，而国安有丧亡之祸哉？东阳滕茂实，当宋靖康初，以太学正与金书路允迪奉使于金，议割三镇太原。寻奉密诏，据城不下。金人怒，囚之云中。钦宗北迁，茂实谒见，涕泣请从行。主者不之许。其后允迪南归，茂实独留雁门，终身不再仕。临没，令以

黄幡裹尸而葬，仍刻石识云“宋使者东阳滕茂实墓”。此殆不事二君者欤。当是时，有宇文虚中者，亦以黄门侍郎使金见留，遂改节易行，反面事虏。其后虽欲夺兵仗南奔而自赎，卒亦不逃君子之讥，其视吾茂实，果何如也？茂实已矣，人至今想其遗节，如神龙不可得见。至视虚中辈，不啻若鬼蜮犬豕，有识妾妇亦羞闻之。此无他，人心天理终不可诬也。乃作滕奉使赞，用规事君而有二心者。赞曰：

汉有苏武，奉使不屈。滕公配之，有声烈烈。

黄幡裹尸，以全臣节。如璧之白，弗缁弗缺。

其人虽亡，精神不灭。上游帝所，凌厉日月。

降臣见之，肝碎胆裂。敢述赞辞，勒在贞碣。

◇溟滓生赞（有序）

溟滓生者，于江廖应淮海学也。抱负奇气，好研摩运世推移及方技诸家学。年三十，游杭，上疏言丁大全误国状。大全怒，中以法，配汉阳军。生荷校行歌出都门，道傍观者，啧啧壮之。抵汉江滨，遇蜀道士杜可大。揖曰：“子非廖应淮耶？”生愕然曰：“道士何自知之？”可大曰：“宇宙，太虚一尘尔。人生其间，为尘几何？是茫茫者尚了然心目间，矧吾子耶？然自邵尧夫以先天学授王豫天悦，天悦死，无所授，同葬玉枕中。未百年而吴曦叛，盗发其冢，得《皇极经世体要》一篇，内、外《观象》数十篇，余贿盗得之。今馀五十年，数当授子，吾俟子亦久矣。”乃言于上官，脱其籍，尽教以冢中书。其算繇、声音、起生、神鉴、颖利，可大指画未到者，生已先意逆悟，可大自以为不及。

学既成，去隐宣、歙间。遇余安裕弋阳，将教之。安裕劝生业《中庸》，生瞠目厉声曰：“俗儒！几辱吾康节于地下矣。”复去之杭，客贺外史家。昼市大衍数，夜沽酒痛饮。饮即吐，吐复饮，不醉如泥弗休。醉中尝大叫曰：“天非宋天，地非宋地，奈何奈何！”语闻贾似道，遣客叩之。生曰：“毋多言，浙水西北发白时，是其祥也。”似道未解，复召至，屏人与语。生曰：“明公宜自爱，不久宋鼎移矣。”似道恶其言，掩耳走。生亦径出。过曾渊子家，索酒轰饮。酒酣，作婴儿啼曰：“大厦将焚，燕犹呢喃未已耶！”复赋歌以见意。都人士闻之，竞指以为怪民，不与接。独太学生熊晞望犹时造其庐。生私执熊手谓曰：“吾端居曾楼，闻空中戎马百万来，人鬼作哭泣声。壬申襄樊陷，甲戌宫车宴驾，乙亥长江飞渡，似道亦殒死临漳，丙子三宫播迁，诸王大臣皆南北乱走。嘘吸事耳，子不去欲何为？”

居亡何，宋事日非，沿江州郡，望风奔溃。生大恟曰：“杀气又入闽、广中，吾不知死所矣！”遂遁去。其言无一不验。后四年，病死处州学中，年五十二。无子，

唯一义女从之。生宗尧夫先天之学，颇自谓知《易》。每见诸《易》师传疏，不问浅深，辄讪驳以为乐。及论后天，则尊羲画为经，象爻系辞为传，黜《文言》《象象》二传为九师之言。且谓《说卦》非圣笔不能作，上下《系》乃门人所述，《序卦》直汉儒记尔。盖生聪明绝人，未闻道而骤语数，故其论经多失中。然性使酒难近，又好讪人阴私，人面颈发赤不顾，罕有从其学者，唯国子簿吴浚、进士彭复乐师之。浚不卒业，复屡受唾斥不怨。生将遁时，召复至，口发例，手布筹，虽平昔所靳若终身不示人者，一举授复。复后又授鄱阳傅立云。

或曰：生濒死，语女曰：“吾死后一月，中朝命山姓鸟名使者，来征吾及傅立。立当过予门，汝可出藏书示之，立当以此致大官。”后皆如其言，所谓“山姓鸟名”，崔鹏飞也。生所著书，有《玄玄集》《历髓》《星野指南》《象喻统会》《声谱》《画前妙用》数十万言，今犹间传于世。赞曰：

龙图成章，有文从衡。以浚以明，以泄其藏，以奠乎玄黄。

昔我素王，韦编三绝。坠绪微茫，谁其我缀？

我参我腴，九师襄之。我苞我晶，百氏攘之。

如河之浑，如瞶而昏，如治丝以棼。

天未降割，一发攸存。维洛有士，居于百原。

超神冲漠，凝于画先。数往知来，小大斯甄。

莫峻匪厓，我陟其颠。莫深匪渊，我淪其泉。

简材以畀，非隐弗传。有冥者豕，卒昭以宣。

或得其角，载神于言。炎炎宋策，维其讫矣。

长星蚀柳，色之赤矣。眚祥见征，士发白矣。

朋昏以世，莫之戚矣。鱼在在鬻，尚其息矣。

维生之知，中如沸羹。彼惛弗知，覆谓我狂。

我狂如何，我忧孔多。我山我河，我用弗磨，俾沦胥以讹。

我酒既嘉，我瑟又和，我宁不啸歌？

北风其凉，旗央央，我车庞庞。荡荡江流，杭之如陆。

有腥其秽，流血沃沃。海氛方殷，其何能目？

人有恒言，风雨漂摇，夏宇障之。

涉于大川，烝徒楫之。楫副宇挠，子子焉依？

国武斯坠，不知攸戒。日陨弗升，虽昼作夜。

鸛舞于林，鬼瞰于舍。孰投是艰，曾莫之艾。

乃浚乃惊，乃瞻乃行，乃遁死于冥。卷生之为胡？

乃神以著。征之古圣，匪程伊度。何以言之，卒沦于数。

一曲之淹，不通其故。《易》道既泯，数亦不类。

激赞于生，发我长喟：月出皎兮，在天之心。

在天之心，何古何今！

余自幼即见长老谈溟滓生事，近见李淦性学及戚光子实所造文，又知生为详。以生之精艺如此，而修《宋史》者不列之方技传中，殊可憾也。故予潜之，特序之。又伤《易》道之微，激而赞之。惜乎予文芜陋，不能永生也，然予情亦至矣。濂志。

◇观音大士观瀑像赞

南瞻部洲东新罗国，有一鸟，号曰灵囿。以三昧力，于一毫端现大士相。其相云何？宝冠华辘，素衣缤纷，翘足而坐于崖石间。其崖东边有一石狭，中有水，下注无际。其水微妙，如娑罗林，自根而茎，自茎而条，前后相续，无间断者。大士旁睨，容颜端严，举手指水，不喜不愠。沙门似杞具大辨才，睹是相已，五体投地，而作是言：水之怒者，无如流瀑。飞空直下，其长或至一千馀仞，或至三万及无算数。斗岩射壑，昼夜六时，无有暂舍。虽神鬼众，闻其音声，亦生怖畏。譬诸众生，旷大劫来，以迄今兹，无明所覆，造诸恶业。火性所激，触山抵石，以至殒命，肝脑涂地。方其怒时，尽十方界日月星宿，霞电云露；尽十方界山林坟衍，草木鸟兽；尽十方界州邑楼阁，民人聚落，了无所见。以何因缘？怒所激故。怒火所熬，有

明皆丧。大士所指，因水以喻，明觉真性，慈悯方便，最为第一。尔时千越，有一长者鄢波索迦，闻沙门言，瞻仰赞叹：善哉善哉，沙门当知，不识水性因石而怒，为复石怒缘水乃见？或水石中，各有怒性。谓水之性其怒因石，怒在水外，水性无怒。长江鼓涛，怀山荡陆，其势可怖，非关于石。谓石之性其怒因水，怒在石外，石性无怒。悬崖下崩，飞电系丸，声闻百里，非关于水。谓水与石各有怒性，一鳞不生，倒涵太虚，内外若镜，不见有怒。屹立弗磨，苔蚀藓封，万古如一，怒从何起？沙门当知，法界无边，空为本性。性中本空，中实非空。万物荡摩，展转成妄，如水流跃，非水之性。舍彼二者，欲求水性，了不可得。如石裂罅，非石之性。舍彼二者，欲求石性，亦不可得。如是思惟，微尘国土，山河大地，或净或垢，皆吾法身。诸佛菩萨，天龙八部，夜叉罗刹，有情无情，皆吾法性。性中所具，不遗一物，一物不留。法界众生，无明烦恼，即是如来。正偏知觉，善思念之。此乃大士因水以喻，明觉真性。沙门闻我所说妙法，欢喜踊跃，异口同音，共说无上伽陀章句：

稽首毗卢华藏海，无量光明遍一切。

本来清净无染著，凡夫逐妄以迷真。

有如空里本无华，空里华生由眼翳。

华生华灭刹那间，空相如如元不动。

愿凭大士般若力，脱此八万尘劳门。

纵如瀑流千万变，转物不为物所转。

矧兹幻象出毫端，境相了知非实有。

因非实有悟真空，即证如来大圆智。

◇采苓子赞

荊阳郑仲德有隱操，尝采苓九蓝山间，因自号采苓子，斯赞之所由作也。赞曰：

彼采苓者，肥遁之士。

皦皦霞外，不容纖滓。

白月入怀，凉飈溯棹。

高视一世，何虑何营。

◇匡山居士真赞

眼有棱，足以洞视千古，长髯如戟，足以畏謗百壬，或建大将鼓旗，而殄歼于妖沴，或被处士冠服，而容与于云林，可显可晦，载浮载沉，壹委顺于外物，初无累于贞襟，县千寻之丹厓，莫逾其峻潞，万仞之重渊，冈测其深抱忠义之志，而耿耿自信，所谓不变不改，若百炼之精金者邪。

◇善继禅师血书华严经赞

上人善继。严持梵行。欲求无上真如之道。尝自念言。华严大经。实中天调御第一时所说一乘顿教。最为尊胜。欲熬松为煤。入以香药。捣和成剂。以书此经。而彼松煤者。假物所就。具黑暗相。有染白法。欲煅汞为丹。承以空露。研润如法。以书此经。而彼汞丹者。炫耀可观。能盲人目。非助道者。欲椎赤金素银。廉薄如纸。复粉为泥。以书此经。而彼金若银者。虽曰重宝。外尘为体。初不自内。以是思惟。身外诸物。若胜若劣。若非胜非劣。若一若多。若非一非多。皆不足以称此殊利。维我一身。内而心肾肺肝。外而毛发肤爪。资血以生。资血以长。资血以至壮老暨死。是则诸血。众生甚爱。如梵摩尼一滴之微。莫肯舍者。我今誓发弘愿。于世雄前。以所难舍而作佛事。从十指端。刺出鲜丹。盛于清净器中。养以温火。澄去白液。取其真纯。蘸以霜毫。志心善写。满八十卷。尊阁半塘寿圣教寺。昔者乐法比丘。当无佛时。欲闻佛语。了不能得。乃信婆罗门言。以皮为纸。以骨为笔。以血为墨。愿得一偈。况今百千妙颂十万正文。不止于一。纵捐躯命。以报佛恩。无足为异。于血何吝。惟愿法界有情。或见或闻。证入杂华藏海。证入杂华藏海已。即得六根清净。得六根清净已。即得自性清净。得自性清净已。即得四天下微尘刹土中。一切众生皆悉清净。无相居士未出母胎。梦异僧手写是经。来谓母曰。吾乃永明延寿。宜假一室。以终此卷。母梦觉已。居士即生。今逢胜因。顿忆前事。于是亲熬五分妙香。香云轮囷。结为宝网。遍覆经上。乃复合爪向佛散华作礼。而称赞曰。

杂华净智海。九会之所说。一音所演唱。十处放光明。信解行证门。总摄无复余。如是具五周。如是辩六相。如是分十玄。妙义皆充足。以至四法界。二十重华藏。无边香水海。浮幢刹重重。教条有差别。性相了无碍。圆融与行布。非异亦非同。一可为无量。无量亦为一。重重无有尽。是为功德聚。如来最上乘。龙宫所秘藏。上人出身血。严饰书此经。于一滴血中。普含十方界。于一一界中。普现光明台。于一一台中。普成狮子座。于一一座中。普见分身佛。如上无数佛。皆具大威德。眉间白毫光。遍满一切处。共宣大乘法。闻者应解脱。譬如日月王。照三千大千。悉见种种色。法能破暗故。譬如大海洋。一平乃如掌。无丘陵堆阜。法能平等故。譬如阳春至。大地尽发生。诸根各萌芽。法能沾溉故。譬如梵志梦。一梦千劫事。

不过刹那间。法能融摄故。譬如子忆母。未见心已至。形神皆两忘。法能无离故。譬如黄金色。金色不相分。金亡即色空。法能不二故。譬如石性坚。初不从外得。石性自圆满。法无修证故。能如斯见解。见经不见血。若加精进力。见佛不见经。及至成道已。见性不见佛。我性如虚空。了无能见者。不见中有见。全体即呈露。苟执于所见。亦非我本性。见见二俱泯。此为真见见。真见复何有。性本无物故。一心归命礼。只夜以为赞。诸妙楼阁门。弹指一时启。

无相居士金华宋濂拜赞

◇龙眠居士画十八应真相赞

第一尊者 张拱立海牛脊，绝流而过

指海为地，截断众流，

尚不见水，何所觅牛？

第二尊者 遡风立飞涛中，足踏钵多罗

手提天地，靡物弗举，

只一盂间，收尽海水。

第三尊者 乘芭蕉叶，傲睨太空，水珠乱溅叶上

何分水陆，即海是路，

未入水时，一叶已渡。

第四尊者 与前尊者共泛蕉叶，一沙弥荷橐随后，局步殊甚

天上地下，独立无偶，

沙弥何人，乃啜其后？

第五尊者 坐彩帔中，雪眉垂两肩，四海鬼狞甚舁之行

长眉垂肩，不来不去，

任尔东西，弗离故处。

第六尊者 横杖在腕，有大鼋负而西鼋半隐水中

杖挑须弥，目铄日月，

愍诸有情，证龟成鳖。

第七尊 瞪目东望，口嘘气成云，云中现七成塔景

无缝宝塔，不因外见，

优钵昙华，千年一现。

第八尊者 翫塔景微笑，一王孙持果献之

景固非真，塔亦是假，

一笑之余，语默双舍。

第九尊者 气貌甚伟，杖锡冲冲行，足下宝珠轮，有光炫耀如火

平视四极，一杖指定，

足下宝珠，圆光交映。

第十尊者 骑海鱼，鱼鼓鬣而逝，有洋洋自适意

乘鱼而来，我未尝乘，

青山过雨，白云如蒸。

第十一尊者 布杖于海，赤足蹶之，杖如龙悠西奔

汝杖犹龙，游戏海中，

一息万里，不假寸风。

第十二尊者 左手擎梵钵，噬唇仰视，小龙蜿蜒自南来，昂首作奋势

真龙出现，风云应符，

雨大法两，普活焦枯。

第十三尊者踞崖石坐，左揽衣，右舒指指，空若有所示

一指之下，领纳大千，

真如境界，不分中边。

第十四尊者手执修多罗，欲读未读，回顾邻坐者

佛尚不有，何况于言，

无水起波，中复驾船。

第十五尊者侧耳听经，神观清淨，如在禅定时

经从耳入，当以目听，

耳目两忘，非动非定。

第十六尊者骑鹿行山，桧栢萧森，阴飈飕飕吹衣

骑鹿而行，何曾移步，

欲问西来，笑指庭树。

第十七尊者跨斑文虎，手持降魔法杵，过前岩，岩下杂华如画

为无怖畏，全提宗印，

大吼一声，万山皆震。

第十八尊者藉草趺坐，作入定相，白毫光宛转起两眉间

瞑目而坐，心同太虚，

一尘不立，无欠无余。

卷二

◇太白丈人传

文中子学既成，慨然有济苍生之心。欲尊王道，推霸略，稽今验古，建太平十二策，与河东薛收西游长安，见隋君。道经太白山，息于灌木之阴。

有丈人自东来，缁袍无表，颜色肿𪔐，肩负束𪔐，去文中子靳十步，弛担箕踞而坐。两手搔爬，眼视云汉，若四傍无一人者。搔已，忽指文中子谓收曰：“彼凤颈龟背，须垂至腰者为谁？”收对曰：“河汾王夫子也。”曰：“其王通耶？”曰：“然。”曰：“将何之？”曰：“夫子忧世未治，以策西见隋君耳。”丈人大笑不止。文中子异之，乃捋衣趋前，揖而问曰：“丈人何哂通也，岂通未闻先王之道，不足以咸和万民乎？”丈人曰：“不然也。”“岂八埏之大，利害如牛毛，有非一士之舌可尽乎？”丈人曰：“不然也。”“岂上天未欲平治天下，而下民不当见大道之行乎？”丈人曰：“不然也。”曰：“三者既非，敢问丈人所哂者何事耶？”丈人曰：“嘻，何子愚之甚也！夫具人之体，服人之服，食人之粟，脱使稍有知，孰不欲尧舜君民哉？是有道焉，不可苟而就也。”文中子曰：“其道何如？”

丈人曰：“道有三：其上焉者，燮和乾坤，经纬星辰，枢机四时，官辖五行。执天之德，以牖帝明，以达帝聪。然其自任以斯道之重，非人君北面而事之，不复轻出。出则必为帝者师，若尧之君畴，舜之务成昭，禹之西王国是已。其次焉者，以六合为一家，以四海为翰蕃，以五岳为封镇，以元后为父母，以臣邻为伯仲，以蒸庶为赤子。煦以深仁，财以正义，防以峻礼，陶以至乐，威以严刑，式以庶政，治天下可运之掌上。然亦不轻于自试，必待王者致敬竭诚，而后起而佐之。否则乐耕渔以终其身，若汤之伊尹，周之太公望是已。其下焉者，仿佯局束，呶訾栗斯，不远千里，炫已求媚。君门如天，无路可陟，俯伏阙下，魄遁神疲，阍隶见诃，不敢出气。此不自重惜，而徇时射利者之所为，若齐王之门操瑟而售者是已。今子之西来也，欲为君畴、务成昭、西王国乎？欲学伊尹、太公望乎？抑欲同售瑟于齐王之门者乎？子须麋具在，宁不知所自处也？且子独不闻之：三家之市，有处子焉，必待行媒，始相知名。又必待纳采、问名、纳吉、纳征、请期、亲迎，而后始成昏。不然，是奔也，虽国人皆知贱之矣。子今负策而干进，恐与不待聘而奔者无大相远也。况隋君天性沈猜，不悦诗书，废弃学校，杀戮元勋，溺宠废嫡，惟妇言是用，惟刻薄毒痛之法是崇是嗜。萧墙之祸，起在旦夕，子尚欲行王道乎？言暴虐于汤武之世，必见诛；谈仁义于桀纣之朝，必见黜。何也？时不同也。子如解吾言，即请东辕，毋西向。不然，子其行哉。”

文中子曰：“丈人之论至矣，通何敢不敬承明训。然窃有疑焉，愿丈人卒教之也：昔孔子大圣也，车辙环于诸国，栖栖遑遑，如丧家之狗。至再逐于鲁，削迹于卫，穷于齐，围于陈蔡，而卒不悔者，诚畏天命而悲人穷也。今丈人教通以不仕，然则

孔子不足法欤？”

丈人曰：“是何言与！是何言与！在孔子，则无可无不可。下孔子一等，则可其所可，不可其所不可。子自视其孔子耶？抑下孔子一等者耶？昔鲁男子善学柳下惠者，盖以其不可而学其可也。予闻子尝受《书》于李育，学《诗》于夏典，问《礼》于关子明，正《乐》于A 1汲，考《易》于王仲华，而其知顾出鲁男子下，予窃为子不取也。夫不察时而冒进，谓之瞽。施之不当其可，谓之愚。不度德量力而强行，谓之固。枉己从人，谓之贼。沦溺僵回而弗止，谓之淹。瞽则不达，愚则不周，固则不变，贼则不正，淹则不振。是五垢者，子皆躬蹈之，宜乎有疑于予。予去子矣，予去子矣！”丈人言毕，负笈而行。

文中子面如死灰，远望丈人南行，不见其背，目犹不暂舍。薛收进曰：“夫子何慕之深耶？收闻不合先王，不顺礼义，谓之奸。言虽辩，君子不听。彼丈人不过奸言而辩者尔，初未闻先王之道。夫子冲冒风露，跋涉而至此，终不因其说而中返乎？”文中子遂行。至隋，隋君御太极殿，文中子以太平十二策上之。隋君下公卿议，公卿多不悦。文中子退而叹曰：“丈人其至人哉！”于是赋东征之歌而归，著《续经》数万言。

君子曰：甚哉，出处之难也！以河汾之贤，操经纶之具，施之天下，何不可者！而丈人方诋其自售，断断不恕，况其下者乎？甚哉，出处之难也。

◇白牛生传

白牛生者，金华潜溪人，宋姓，濂名。尝骑白牛往来溪上，故人以白牛生目之。生躯干短小，细目而疏髯，性多勤。他无所嗜，惟攻学不怠。存诸心、著诸书《六经》，与人言亦《六经》。或厌其繁。生曰：“吾舍此不学也。《六经》其曜灵乎，一日无之，则冥冥夜行矣。”生学在治心，道在五伦，自以为至易至简。或笑其迂。生曰：“我其迂哉？我若迂，孟子则迂之首矣。”生好著文，或以文人称之，则又赧然怒曰：“吾文人乎哉？天地之理，欲穷之而未尽也。圣贤之道，欲凝之而未成也。吾文人乎哉？”或求学文，生曰：“其孝弟乎？文则吾不知也。”生不肯干禄，或欲挽之使出。生曰：“禄可干耶？仕当为道谋，不为身谋。干之私也。”生安于义命，未尝妄有所为，或疑其拙。生曰：“我契以天，不合以人，是乃巧之大者，拙乎哉？”生慕孔、颜之乐，如聆钧天之乐，如获蹄之金，言及之，手足舞蹈不已。或以为狂。生曰：“吾能知之，恨未能允蹈之，奚其狂？”生幼多疾，常行服气法。或诮其欲久生。生曰：“盗跖甚夭，颜子甚寿，子知之乎？”或人不答。生曰：“窃阴阳之和，以私一己，服气矣。运量元化，节宣四时，服气乎？”生虽贫，喜色常溢眉宇间。或诘之。生曰：“吾内足乐也。内既足乐，无人非，无鬼责，得亦乐，失亦乐，我何忧哉？”生御恶衣粗馔安之。或虑其诈。生曰：“锦衣与卉服虽异，暖则一。糟核与淳熬固殊，饱则均。何诈为？”生不贵贵人，不贫贫人

。或尤其无别。生曰：“贵自贵尔，于我何加焉？贱自贱尔，于我何损焉？”生遇物以诚，三尺之童，莫之敢欺。或讥其同。生曰：“我道盖如是，同不同弗知也。”生不享外神，唯事其先甚谨。或谓其报本耶。生曰：“非惟报本也，以气感气，吾先以之，外人何预哉？”生多读台衡、贤首、慈恩诸家书。或谤其偏。生曰：“我虽口之，未尝心之也，何其偏？”生当情意调适，辄悬特磬于虞，亲击以铁钹，瞑目侧耳而听，自以为达制乐之原。或笑之，生曰：“此蕞桴土鼓之遗声也，五音繁会则未矣。”生好著屐登山，遇境胜处，注目视弗释。或恶其癖。生曰：“吾于峦容川色，见三代之精华，不忍舍也。”

生年四十有六，发无白者，日坐一室中，或澄思终日，或执笔立言，动以贤圣自期。其中之所存者，人固莫能识也。适有画史，貌生之骑白牛者。生大笑，以为得其真。故自疏其事如左，曰《白牛生传》云。赞曰：

生，妄人也哉。言其文，弗能成章。言其道，则又邈乎未之见也。犹自语诸心曰：我学古人，我学古人，不亦悖且戾乎！

◇朱环传（子元女寿）

朱环，字君玉，婺之义乌人。汉槐里令云四十代孙也。赤子时，无儿啼声，仲父桂奇之，养为子。桂后生璧及宗周，因外环。环益孝谨，凡劳事皆服行，不知有寒暑。时境内多盗，白昼出道上劫人财。桂有金数百两，与璧谋瘞窖中。璧夜发去，反诬环所为。桂怒，褫环襦袷，立之大雪中，一日夜不使去。环恂恂谢过，无一言辨其冤。桂犹日虐环，五六年间，濒死者数四。恒顺受之，不怨。桂死，遇璧益厚。璧子庆多暴，或遂嫁以杀人罪。环忧不能食，竭私财救之，庆获免。环善读书，宝祐间尝举进士，年八十六终于家，子元，女寿。

元，字子初，性警敏绝人。至元末，有盗数千起缙云，过永康，置寨峡源山。山抵元家甚迤，盗将劫元父环，及环兄遇魁为谋帅。元闻，遽归告二翁速避寇。不听。复涕泣谏。翁骂曰：“竖子不解事，江南内附久，谁敢叛耶？设有寇，不过鼠窃狗偷，何足病？”元自度贼若缚翁去，则是翁从贼反，官坐以法，虽有百喙莫能白。为今之计者，孰若杀贼自明。乃与役夫傅参谋，执刃伏垣下。或止之曰：“贼势张甚，汝不畏作菹醢耶？”元曰：“吾知有亲尔，若得白亲以无罪，虽万死不恨。”会贼使骑至，竟斫杀二人，梟首市中。以血手入示翁，负之北逃。贼平，翁竟无罪。

寿，生有淑姿。年既长，归金华戚象祖。台寇杨镇龙反，西攻婺州。宗王瓮吉及浙东宣慰使史弼捕获之，械至州城，将鞠其反状。寿父环，有亡奴在械中。奴尝怨环挝伤，欲连环出贖助镇龙。时史怒寇甚，凡狱辞所引，必尽杀乃止。环子元疾病不能起，乃视寿泣。寿曰：昔缙紫能救父命，我独非人耶？乃走告法曹掾冯耿贤曰：

“妾父无罪，亡奴欲诬以不道。倘事不得直，一家枉作泉下鬼。闻君素长者，独不能相活乎？”言讫，泪如雨。冯怒曰：“此事岂汝女子所知？”寿哀祈益切，冯为惻然良久，挥寿去曰：“尔但归，吾知所处矣。”明日，使吏椎碎奴口，不果诬。赞曰：

昔尹吉甫子伯奇无罪，为后母谮而见逐。履霜中野，作《履霜操》，其辞多怨伤。濂窃谓伯奇不必尔也。父母恶之，劳而不怨，何假于辞哉？今环之无罪与伯奇同，环裸身立大雪中，则又非若履霜比也。乃能顺受之而无怨，不贤而能之乎？古之所谓纯孝者，环盖近之矣。元为亲故，拔剑斫贼，而不知有身。寿虽女子，亦能脱父命于虎口，皆环身教之然也。人之行莫大于孝，孝有如环之父子，可使无闻哉？因具列之于篇。

◇张义妇传

义妇张氏，济南邹平人。年十八，归戍卒李午。午同从子零出戍七闽。未几，午死。张独事舅姑、父母，生养死葬无遗礼。复痛夫死数千里外，枯骨未知所归，乃往卧冰上，呼天祝曰：“天乎，妾夫何罪？妾夫何罪！生既不见父母，死又不能归葬父母之傍。使无妾即已，妾在，敢爱死乎？天若许妾取夫骨，虽寒甚，当得不死。”逾月竟不死。乡人异之，为闻于县，给过所遣之。至闽，零犹在。问夫葬地，则榛莽四塞，不可识。张哀恸几绝。夫忽降于童，与张语生前事甚悉，且示骨在处。张如其言，发得之，持骨祝曰：“尔信妾夫耶？入口当融如冰雪，粘如胶。”已而果然。官义之，为上于大府，请复其家，使零护丧归济南。

金华宋濂曰：濂闻长老言，庐陵有赵应祥者，父行贾死利津乱，葬丛冢间。应祥求之，恸哭七日夜不得。乃解发系马鞍上，祝曰：天若有知，行至父墓，鞍即堕。未几鞍堕，发而视之，果父也，葬时所题名氏犹存。此与义妇之事颇类。传曰“孝悌之至，通于神明”，此之谓夫。

◇谢烈妇传

谢烈妇芾，婺之金华人。年十三，适兰溪吴履。奉尊长，处先后以礼。性勤而刚，事非义，毅然执弗行。鞠抚众雏，纫箴补缀，常至夜分，虽血贯指不自宁。履贫而宦游，家政虽萧条，芾能弗坠。

戊戌春三月，西师破睦州，游骑日压境上。芾惧，急谓履曰：“妾闻西师铁骑逾十万数，出则尘埃蔽天，白日为黄。既得睦，必东窥婺，谓其不至者妄也。卿读书号男子，宜察知之。妾衰瘦如鬼，旦暮祸及，决不能挈弱幼远遁。曷若先买舟东下，为上计。否则，归妾母家。母家南有池，即有急，以身喂鱼鳖尔，誓不受污以病君也。”履重于行，给曰：“勿恐，有履在也。”冬十月二日丁卯，履出城南，芾复

申前言，且促履曰：“宜急旋，稍缓噬脐无及矣。”履复答如初。越四日辛未，芾见溃军被血衣东奔不绝，谓媵人曰：“事急矣！”候鸡再号，裹粮挟季女以东，媵人负小儿从。明日壬申，力惫甚，芾犹手牵女且行且泣曰：“汝父不得复见矣，吾与汝死即死耳，身不可失也。”遂避入金华山中。媵人后，视芾不相及，弃小儿道上，亦泣去。已而游兵四出，赤帜遍山泽，东西作呼啸声，掳女妇无算。芾度不可免，力疾扞萝而上，抱女投崖下死。履归，求之浹日，始得尸。母与女相向，其貌如生时。

呜呼，人极之所由建者，三纲也。使臣子之于君父，皆如芾之弗畔其夫，国家安有丧乱之祸哉！呜呼，世之号士君子者，平居暇日，高自称誉，无不曰我学周公、仲尼之道，苟指为妇人女子，则勃然怒去。一旦君父有难，辄或窜或伏，不翅狐兔，以妇人女子之弗如，抑又何说也？然自兵兴以来，女妇以节著者亦颇见之，未有若芾之烈者也。烈固烈矣。夫岂乐死恶生者哉？诚以义塞于内，与其生而抱愧，宁若死而就安。推其所志，神明可通，金石可贯，衡岳之层云可开，非细故也。彝伦风教，于是所系为甚重。濂故为文道其事。使濂言行，人心或不亡者，当自省矣。呜呼，彼有家而奉箕帚者，孰非人妇，孰非人妇哉？赞曰：

戊戌之变，濂女弟裸，亦以秉节沈渊死，后烈妇特三十有六日尔。濂悲之，泪落弗止。闻有如裸者，必谨叩之，或历其地以访焉。间尝过金华山中，问烈妇投崖处，悲风四集，林木怒立，犹凛凛有生气。岂其贞魂烈魄，犹足以感人耶？烈妇虽死，其弗死矣夫！

◇郑氏孝友传

郑绮，字宗文。白麟二十□世孙也。其先居荥阳，凝道迁歙，自牖迁睦，淮迁浦阳，今为浦阳感德乡人。淮，绮之祖也。绮通《春秋穀梁》学，撰《合经论》数万言，事父母孝。父照，以非罪系狱，当入死。绮上疏郡守钱端礼，请以身代。端礼察之，白其诬。母张，病风挛。绮保持若婴儿，袒适厕，必抱就之，三十年不懈。绮生闻，闻生运，运生政，政生德圭、德璋。至元中，仇家倾德璋以死罪，将械送扬州，德圭毅然代其行。德圭生文嗣。自绮至文嗣，凡同居六世，历二百年，咸如绮在时。至大二年秋九月，乡老黄汝霖等言于县。县上其事，廉访使加审按焉，文达中书礼部，四年春二月，准式旌表门闾。文嗣生鉴，鉴生渭，渭生挺，皆善守，合数千指无异心者。重纪至元元年冬十二月，太常博士柳贯与乡校群士，又上状请如故事复其家。从之。

初，文嗣既没，德璋子大和司家事，严而有恩，虽家庭中，凛如公府。子弟稍有过，颁白者犹鞭之。每遇岁时，大和坐堂上，群从子皆盛衣冠，雁行立左序下，以次进拜跪。奉觞上寿毕，皆肃容拱手，自右趋出，足武相衔，无敢参差者。见者喑喑嗟慕，谓有三代遗风，虽石奋之家亦所不及。名闻天下，自大丞相及台院诸公卿，

多赋诗美其行。部使者武威徐阙行县，以其孝友，七郡或莫之先，书“东浙第一家”以褒嘉之。皇太子在青坊，闻其事而叹曰：“此国家之祥瑞也。”复亲御翰墨，畀以“凤麟”二大字。翰林学士承旨欧阳元为之赞，勒石以传。

大和性正方，不奉浮屠、老子经像，冠昏丧祭，必稽朱熹《家礼》而行。子孙从化，孜孜孝谨，不识麀市嬉戏事。执亲丧，哀戚甚，三年不御酒肉。食货田赋之属，各有所司，无敢私。凡出纳，虽丝毛事，咸有文可覆。浹日则会，不公则监视发之。诸子昼趋功，入夜辄聚坐棣华轩中，温温语笑，至更馀始休。虽多列显仕，或入侍经筵，出持使节，不敢挟此有一毫自骄意。诸妇唯事女红，不使豫家政。宗族里间，以恩怀之，各有差。内外极严，舆台通传，不敢越堂限。家畜两马，一出则一为之不食，人以为行义所感。有《家范》三卷传于世。赞曰：

史氏之言，多有不足取信者。濂少时，尝读《唐书·宰相世系表》，谓白麟之后不传，私窃信之。及观司空图《荥阳记》，则曰白麟生师慎，师慎生怀芬，怀芬生膺，膺生斌卿，斌卿生唐青州刺史庶，庶生侍中徽，徽生大理卿鄱，鄱生嚳，嚳生给事中谔，谔生宣州观察使回。又观郑燮生《遂安谱》，则曰回生弘，弘生垣，垣生倬，倬生子袭，子袭生扈，扈生宋歙县令凝道，凝道生殿中侍御史自牖，自牖生秘阁校理安仁，安仁生淮，淮生照，照生冲素处士绮，绮即传之所书者也。其承传次第，灼灼可信如此，恶睹其所谓“不传”者哉！考征不广，而欲以一人之见闻，定百载之是非，难矣。

此传作于至正初，已刻《浦阳人物记·孝友篇》中。近板毁于火，因重钞于此，以励民俗云。濂志。

◇吾衍传

吾衍，字子行，杭人也。意气简傲，不为公侯屈色，常自比郭忠恕。居生花坊一小楼，客至，僮辄止之，通姓名使其登，乃登。廉访使徐琰一日来见，衍从楼上呼曰：“此楼何敢当贵人登耶？愿明日谒谢使节。”琰素重衍，笑而去。生徒从衍游者，常数十百人。衍坐童子地上，使冠者分番下授之。时出小青凉伞，教之低昂作舞势。或对宾游谈大噱，解发濡酒中为戏，群童皆肃容莫敢动。衍左目眇，又跛右足，一俯一仰，妩媚可观，宛有晋、宋间风致。畜两钱如意，日持弄之。或倚楼吹洞箫数曲，超然如忘世者。性好讥侮文学士，独推服仇远，及胡之纯、长孺兄弟，谓百年间所无有。

初，衍年四十未娶，买酒家女为妾。至大三年秋，或讼女尝为己妻。官为逮女母，母死，复逮母后夫。夫主衍家，会其伪券事觉，连及衍，衍固弗知也。逻卒辱衍，南出数百步，录事张景亮识之，叱曰：“是不知情，何摄也？”即遣归。或有诉衍丞相府，事下杭府治。腊月未尽二月甲子，衍持诗别仇远竟去，不知所之。明年三

月辛酉，卫天隐以六壬算之，得疾子丑顺流相，曰是骨朽淤泥久矣。多宝院僧故从衍学为诗，闻其死，哭甚哀，招衍魂葬之西湖上。

衍通声音律吕之学，善效李贺诗。工隶书，尤精于小篆，其志不止秦、唐二李间。宛邱赵期颐以书名世，得之衍者为多。其所著书，有《尚书要略》《听玄造化集》《九歌谱》《十二月乐辞谱》《重正卦气》《楚史棊机》《晋文春秋》《道书授神契》《说文续解》《石鼓咀楚文音释》、《闲中编》《竹素山房诗》，世多传。

为说者曰：衍之才高矣，使其能自贬以入绳墨，则其所进孰敢抗之哉？今所学仅若是，固可尚也，亦可悲也。虽然，衍亦奇士也夫！

◇余左丞传

余阙，字廷心，一字天心，唐兀氏，世居武威。父沙刺藏卜官合肥，遂为合肥人。母尹氏，梦异人生阙。阙生而发尽白。家贫，年十三始能就学。嗜欲甚浅，不知有肉味，惟甘六艺学若饴，嗜之不厌，岁环攻之。与河南张恒游，恒临川吴澄弟子，善谈名理，阙之学因绝出四方。

擢元统癸酉进士第，授同知泗州事。泗濒淮，民豪弗驯。令蚀人土田官籍之，多以诬去。阙绳尤暴者数十，不敢哗。廖甲与舒乙竞田，廖焚舒庐舍，舒妇偶母子同死，遂置灰烬中诬之。阙为白其事。泗无麦，民以乏，故事弗闻。阙上之中书，定为令，凡无麦者减赋代还。长老争进金为寿，阙谢去。后阙往桐城，道逢故民，皆罗拜马首，相随信宿而别。俄召入应奉翰林文字，转中书刑部主事。三月之间，疏涤冤滞狱五百。上官忌其才，议浸不合。阙上宰相书言状，又不报，投袂而归。居亡何，复召修辽、宋、金三史。拜监察御史。上疏言，守令最近民，欲万国治，责守令；反是政庞，宜用殿最法，力行之便。上从之。藩王府诸校白昼夺金道上，势如狼。阙鞭遣六十人。上思治切，议遣奉使巡察郡国。阙言奉使恒无状，所至处饮食供张，如事至尊，曾不能宣上忧恤元元之意，宜亟罢之。阙后补外，会奉使者亦至，执阙臂曰：“诚如君言。”知阙忠亮，不怨。

阙在位知无不言，言峭直无忌。人劝阙少辟祸，阙曰：“吾纵愆，岂不知批逆鳞为危？委身事君，身虽杀，弗悔也。”改中书礼部员外郎，阙议复古礼乐，其言精凿有征，闻者斥为迂阔，弗用。安西郭氏女，受聘未行，会夫卒，郭自缢死。有司请旌其门。阙以过于中庸，不可以训，格不下。出为湖广行省左右司郎中。广西多峻山，负粟输官者厄于道险，费常倍，阙命以为帛代输。右丞沙班怙权自用，多录其私人，阙每抗辞沮之。会莫徭蛮反，当帅师，又止不行，无敢让之者。阙扬言于庭曰：“右丞当往。受天子命为方岳重臣，不思执弓剑讨贼，乃欲自逸耶？右丞当往！”沙班曰：“郎中语固是，如刍饷不足何？”阙曰：“右丞第往，此不难致也。”阙下令趣之，三日皆集。右丞行。章宣慰伯颜以婆律香贽阙，阙觉重，辟之，香

中果胎黄金。章叹曰：“余赅达官多矣，洁如冰壶，唯余公一人。”

复以集贤经历召入，预修本朝后妃功臣传。迁翰林待制，出佥浙东道廉访使事。发奸擿伏，聪察若神。州县闻阙至，贪墨吏多解印绶去。婺定赋无艺，役小大各违度。阙遴官履亩实之，徭赋平。衢士无养，以没入田分隶学官。郡长燕只吉台肆毒残衢民，民重足立。阙鞫治之，狱上行御史台，台臣与其有连，反以事劾阙。阙归青阳山，已而丁尹氏忧。阙日夜悲号，有甘露降于墓，君子以为孝感。

至正壬辰，天下兵动，平章政事晃忽儿不花，方统戎淮南，承制起阙权淮西宣慰副使，分治安庆。安庆距城皆盗栅，人争谓不可往。阙毅然请行。从间道入，推赤心待人，罢其苛赋，转粟以哺饿夫，八社民翕然归。阙知民可用，乃帅之破双港寨。寨甚固，小路若发。阙被甲荷戟直前，贼空寨出斗，杀伤相当。至日昃，贼殊死战，阙不胜，退。复收散卒誓曰：“死则死此尔，何生为？”一鼓而进，大破之。诸寨畏威，次第降。阙益缮城浚濠，砺矛戈，分屯耕郊外田。民惧不能者，遣军士护之耕，贼来辄与战。一日，贼四合，旌旗蔽野，鼓噪之声震天地。阙纵泉骑数十，大喊而出，贼势披靡。遣兵击之，斩首数千级。当是时，淮东西皆陷，独安庆岿然存。贼来战，又数败。贼衔之，伪作尺牋，通城中诸大姓，约期日反，冀阙捕戮之。阙曰：“我民安有是？”命悉焚去。贼计穷，复令阙故人衡鼎许大明，以甘言说降。阙命牵出，以铁椎击碎齿颊，悬其皮东门。濠山有虎伤人，阙造文檄山神，使驱虎。虎出境不害。功上，朝廷俾为真，升同知淮西宣慰副都元帅，赐以上尊及黄金束带。江西诸官军，动号数万，掠玉帛，杀婴儿置戟上以戏，沿江州郡患苦之，独不敢近城下。即近，出师捣退之。或服其义，至有来归充将校者。溪河兵屯浔阳，命使者帅壮士百辈，腰刀直入，胁主供亿。阙叱左右收缚付狱，且上疏言：“猫獠素不被王化，其人与禽兽等，不宜使入中国，他日为祸将不细。”后竟如阙言。

转淮南行省参知政事，寻改右丞，赐二品服。阙益自奋，誓以死报国。立旌忠祠以厉将佐，时集祠下，大声谓曰：“男儿生则为韦孝宽，死则为张巡、许远，不可为不义屈。”意气慷慨甚。丁酉冬，贼大集诸部围城，战舰蔽江而下。樵饷路绝，兵出数失利。戊戌正月七日城陷，阙犹帅众血战，身中三矢。贼呼曰：“余将军何在？吾将官之，有生致者予百金。”阙戟手骂曰：“余恨不得嚼碎汝肉，吐喂乌鸢，宁复受汝官耶？”贼怒，举长枪欲刺阙。阙遂自刭沈水死，年五十六。其妻耶卜氏闻之，亦率其子得臣、女福章赴水死。诸将卒恸曰：“余将军不负国，我等可负余将军耶？”从而死者千余人。朝廷知其忠，赠阙荣禄大夫、江浙行省平章政事，谥曰忠潜，追封夏国公。阙为人刚简有智，无职不宜为，为即有赫赫名。所至荐贤旌孝义如恐后。每解政，开门授徒，萧然如寒士。《五经》悉为之传注，多新意。诗文篆隶，皆精致可传。赞曰：

於戏，阙其人豪也哉！独守孤城逾六年，小大二百馀战，战必胜。其所用者，不过民间兵数千，初非有熊虎十万之师，直激之以忠义，故甘心效死而不可夺也。虽不

幸粮绝城陷以死，而其忠精之气，炯炯上贯霄汉，必灿为列星，流为风霆，散为卿云，凝为瑞露。阙虽死，而其不死者固自若也。然而阙死于君，而能使妻死于夫，子死于父，忠孝贞节，萃于一门，较之晋卞壶家，又似过之矣。於戏，阙果人豪也哉！余来江左，见其门生故吏言阙事，多至泣下。因想见战守处，江流有声，而断云落日，凄迷于莽苍间，犹足以动人悲思。因掇其行事成传，以示为人臣者。

濂既作余廷心传，又见其门人汪河。言当廷心死时，其妾满堂，生一子甫晬，弃水滨。有伪万户杜某呼曰：“此必余参政子，是种也良，不可杀。”竟捐所钞诸物，怀子以去，今三岁矣。人或戏子曰：“汝父何在？”子横指拂喉曰：“如此矣。”此一事也。池州判官李宗可，蕲人也。李尝文身，又号为“花李”，善槊，视贼欲吞。廷心兄，尝以女归之。及来舒，命权义兵万户，统新军守水寨，前后多战功。贼来破城，李横槊入贼中，杀死甚众。闻廷心死，驰马还家，聚妻孥谓曰：“余相公死国，吾亦义不屈。汝等毋不死，为人所鱼肉。”拔剑无大小尽杀之。出，解甲据胡床中坐，取酒饮至醉，复衣甲自刎死。此一事也。呜呼，仁者宜有后，而义烈之士，声光可流于无穷。濂虽不文，唯恐其失坠也，故复附着于篇。

◇哀志士辞

奇俊之士，无世不生。特时人弗识之，或识之而弗能用，或用之而弗能尽其才。所以声光不流于当时，事业不白于后世，予窃悲之。庚寅之夏，因览元好问所录入之诸儒，自辛愿而下凡五人，见其气节刚方，言论磊落，实所谓奇俊之士者也。虽其行事或未能无过，终非齷齪陈腐、恹恹不振者所可冀其万一。然恨其有志而不能遂也，因掇其大略，隶于各人之下，又从而哀之以辞。

◇辛愿

辛愿敬之，福昌人。年二十五，始知读书。音义有不通者，搜访百至，必通而后已。由是博极群书，且善于文辞，尤以是非黑白自任。每读人诗，必为探源委，发凡例，解络脉，审音节，辨清浊，权轻重。片善不掩，微岩必指，如老吏断狱，文峻网密，丝毛不相贷。虽贻人怒骂，不恤也。性疏宕，不修威仪。贵人延客，愿麻衣草屨，足胫裸露，坦然于其间，剧谈豪饮，旁若无人。家甚贫，众雏嗷嗷，张口待哺。素负高气，又不能从俗俯仰，其枯槁憔悴，流离顿踣，一假诗以鸣。虽百沮之，其耿耿自信者不少变。元光初，李献能、元好问在孟津，愿往见之。献能为设美饌，愿放策叹曰：“平生饱食有数，每见吾二弟，必得嘉食，明日道路中，又当与老饥相抗去矣。会有一日，辛老子僵仆柳泉、韩城之间，以天地为棺槨，日月为含殓，狐狸亦可，蝼蚁亦可耳。”闻者悲之。辞曰：

天生尔才，胡不汝骋。麻衣如墨，下不掩胫。

下不掩脰，不过寒我。我食无所，我生其可。

水岂无藻，山岂无薇。苟非吾有，我敢采之。

市魁屠伯，彼岂无食。我腹虽虚，我腰肯折。

抱节而终，我则奚憾。乌鸢蝼蚁，上下何辨。

尔贫固甚，尔守则多。不义而富，其如尔何？

◇李汾

李汾，字长源，平晋人。旷达不羁，好以奇节自许。避乱入关，关中无一人敢与相轩轾者。元光末，用荐书得从事史馆。从事职名谓之书写，特抄书小史耳。汾素高亢，不肯屈世。乃今以斗食故，人以府史畜之，殊不自聊。馆中诸人，又多新进小生，史家凡例，或未能尽知，就其所长，有不满汾一笑。故刊修之际，汾在傍则蓄缩惨沮，握笔不能下。汾正襟危坐，诵左丘明、司马迁文或数百言，音吐甚洪畅。诵毕，顾四坐曰：“看秉笔！”诸人积不平，乃以嫚骂官长讼于有司，证左相半，逾年不能决。右丞师中遣东曹掾置酒，和解之。寻入关，驱马来京师，日以马价佐欢。道逢怨家，则画地大数而去。会恒山公武仙在邓，汾往说之，署行尚书省讲议官。既而参知政事思烈与仙相异同，惧汾言论，遂害之。汾孝友廉介，过人者甚多，宁寒饿而死，终不作寒乞声向人。又善为诗，清壮磊落，有幽、并豪侠慷慨之气，人是以是称焉。辞曰：

奎星光光，今何其昏。大河东流，遑恤无人。

金匱石室，藏我册书。岂伊群儿，所堪秽之。

我言弗信，弗信从汝。丘明虽鬼，其文不死。

既不我嘉，覆谓我僭。我视我觚，有泪如霰。

黄雾四塞，黑白谁分。彩凤无华，山狸有文。

悠悠苍天，曷其有常。自古莫不然，尔又何伤。

◇刘昂霄

刘昂霄，字景玄，一字季房，陵川人。聪敏绝人，或戏取市家日历鳞杂米盐者，令

读之，一过目无脱遗者。故其学无所不窥，《六经》百氏外，世谱、官制，与兵家成败为最详。为人细瘦，似不能胜衣。好横策兀坐，掉头吟讽。幅巾奋袖，谈辞如云，四筵耸听，噤不得语。遇其饮酒，眼花耳热后，其锋愈不可当。不知去古谈士为远近，馀子不论也。尝用门资，叙调庆阳军器库使，不就。诸公方荐试宏辞，未几卒。辞曰：

陋儒拘拘，以简为常。目视环堵，不知有四方。

狂澜既倒，谁复回之。气盖一世，独尔能之。

上自黄虞，下迨五季。一隙必烛，何有幽邃。

或触其机，谈辞如云。谁非男子，有舌无声。

我岂夸多，我岂斗靡。一物不知，吾儒所耻。

独立千古，上溯寥绝。尔身虽穷，尔名岂灭。

◇雷渊

雷渊，字希颜，别字季默，浑源人。崇庆二年进士，授涇州录事，不赴。改东平府录事，以劳绩遥领东阿县令。东平，河朔重兵处也，骄将悍卒不可制。渊出入军中，偃然不为屈。不数月，家有渊画像，虽大将亦不敢以书生遇之。调徐州观察判官，召为荆王府文学兼记室参军。转应奉翰林文字、同知制诰，兼史院编修官。拜监察御史，巡行河南，榜掠赃吏，风采凛凛。蔡下一兵与权贵人有连，时以药毒民家牛马，以小直胁取之。渊捕得，数以前后罪，杖杀之。老幼聚观，交口称快，然亦坐是失官。寻用宰相侯莘卿荐，除太学博士，再迁应奉，终于翰林修撰，累官大中大夫。先是正大间，北兵突入倒回谷，势甚张。平章芮公逆击之，突骑退走，填压谷溪中不可胜算。诸将议不定，释之勿追。渊请急歼之，主兵者不能用。后闻北兵狼狈而西，马多不暇入御，始悔不从渊言。渊学甚博，文甚奇。为人躯干雄伟，髯张口哆，颜渥丹，眼如望洋。遇不平，则疾恶之气见于颜间，或嚼齿大骂不休。虽痛自摧折，卒亦不能变也。食兼三四人，饮至数斗不乱。生平慕孔融、田畴、陈元龙之为人，虽其文章号一代不数人，在渊仍为馀事耳。渊之友高廷玉、李纯甫，亦以奇节自负，人号之为“三杰”云。辞曰：

尔心之劲，尔气之刚。嫉恶如仇，不问暴强。

将指出巡，面冷如铁。霜简所加，邪蒿即折。

才岂止斯，兵算又长。眼见千里，孰曰不明。

志不获伸，多士短气。其书徒存，九原能起。

埃风四来，式脂式韦。有髯如戟，妾妇之为。

我俗之昏，谁复继君。茫茫九州，敢谓无人。

◇雷琯

雷琯，字伯威，坊州人。志英迈，博学能文。以荐书从事史馆，调入作司使。初，并州李汾与琯同在馆中，以高蹇得罪。琯往送之信陵，携酒酌魏公子坟，握手痛饮。后去客阳夏，以鞭击酒壶，作楚声歌。自言去国十年，甲兵满天地，短衣匹马，来自西北，将起楚、汉间奇才剑客与游，而不可得。当是时，金已迁汴，大河以北，东尽山东，西抵关辅，大军长驱，徙少壮数百人，杀之居庸关外。自黄河、洛阳、三门、析津，至丕之源雀镇，凡二千馀里。潼关一带，西南边山，大小关隘亦一千馀里。各分地界，统以总帅，夜则传令坐守，冬则燃草敲冰。兼以关辅大饥，秦民死者相枕藉。琯皆悲之，作《商歌》十章写其情，曰：“秦，予父母国也，而一至此乎！”竟泪下不能食。乃出奇策白宰相，宰相不能听。琯去，不知所之。辞曰：

北风泱泱，海水为竭。俯窥神京，不隔一发。

举鞭击壶，歌声愈苦。来自西北，短衣匹马。

我泪既尽，以血继之。天门九重，曾莫闻知。

孰秉国钧，我将自荐。反谓我狂，斥去如箭。

商颜有芝，烨烨蕤蕤。可以葆神，可以乐饥。

长往不返，谁甘幽深。赤日在天，廉我明心。

◇孤愤辞

中州人士，有无罪而被废斥者。识与不识咸冤之。濂因本其志，为著《孤愤》之辞，使世之用法不慎者读焉，其或知所惧也。辞曰：

哀予生之匪淑兮，耿郁紆其谁语？恐此心之难白兮，假微词以自吐。曩有志乎学古

兮，指前修以作则。非秋兰奚敢纫兮，非申椒吾焉食。仗所履之正直兮，谓无施而不可。悲世涂之嶮巇兮，忽独中兹危祸。胡萋斐之小文兮，竟成之于贝锦。刚指方以为圆兮，揆人情为已甚。伊翩翩之公子兮，余素得而友之。握手以示肺肝兮，若断金而弗疑。何中心之多变兮，一旋踵而弗予识。既挤予于坑阱兮，复弯弓而下石。汝面目之无怍兮，曾何谋之弗深。纵祸予其曷伤兮，吾惧戕汝之良心。睹日月之光昭兮，闻雷霆之隐耽。予固不足畏兮，汝宁不畏于天？天道微而难索兮，斯焉足以责汝。彼黄鸟之嚶嚶兮，犹求友而弗止。将七尺之美躯兮，乃一禽之不如。予固约结而罔措兮，又为汝而歔歔。嗟受命之蹇阨兮，岂独汝之为尤。蛟龙斗于深渊兮，宁无损于鳬鰪。汝虽不我陷兮，予安往而逃囚？唯饮泣而无所诉兮，伤予罪之不当。苍天之至明兮，独不鉴我之幽枉（叶，于良切）！皎皎之白璧兮，金訾其为燕石也。纤纤之素缟兮，反谓其如玄漆也。欲力诋以深文兮，其奚患于无辞。咎繇之不吾出兮，眼有泪而谁知。誓剖心以自明兮，念父母之所遗。苟雉经于沟渎兮，虑君子之见嗤。夜漫漫而不旦兮，悲风飒其四来。秋虫响于空阶兮，似助予之悲哀。六合之至广兮，寘一身而无所。魂恍恍若有忘兮，虽生存而如死。昔公冶之所遭兮，夫何有于不仁。在縲继而非罪兮，亦鲁叟之所称。果自反而弗疚兮，纵遇辱其如荣。浮云过而日洁兮，春冰释而水清。外累不足以为惧兮，惧吾德之未明。意欣欣以超绝兮，振冠纓而起行。取瑶琴以弹之兮，有和衍之新声。乐天命以自度兮，究年岁而不再更。

◇陈子章哀辞

呜呼，吾子章竟止于斯耶！始予游学诸暨之白湖，而子章实来，予因获与子章交。当是时，四方来者类多纨绔之子，喜眩文绣以自媚，不争悦趋之。独予之贫，短衣才能至骭，冷处前庑下，四壁萧然，谁复见顾者。惟子章与予灯影相望，而读书之声相接也。予时学未闻道，心颇不能平。子章尝慷慨厉予曰：“子量隘矣，是焉足以污子哉？”子章好使气，人稍加昵，白眼视之，至其去乃已。予因用子章厉予者厉之，子章矍然谢曰：“是善教我。”子章自是与予居，至欢也。予既还金华，子章亦去。越二年，予再见子章于乌伤。更相劳苦，子章握手顾予曰：“子之贫尚尔耶？子但力学，天殆不能贫子也。”予观子章貌加壮，其厉予一如诸暨时。未几，予复西还金华。又二年，予束书寓浦阳。子章闻之喜，以书来曰：“予昔在诸暨，与子居仅四月而别。在乌伤，未十日而别。今子来浦阳，浦阳予父母邦也。予家距子之所寓不百里，庶几与子少相羊乎。”予亦喜，当与子章时相见也。又三年，子章未尝一来。予窃怪之，因询子章所尝往来者，具道子章病咯血，气厌厌不振。予谓是疾势虽迫人，得良医可已，未始为吾子章忧。又四年，子章竟死。呜呼，吾子章竟止于斯耶！

予之交友固多矣，如子章者宁几人哉！积十二年之久，仅能再见之。盖以子章春秋始壮，予虽少长，亦不过二三年，其与子章游未晚也，岂知子章遽先予而弃去乎！予蚤知子章若是，又敢忧百里之远，不与子章周旋乎！子章已矣，孰能相予之善，

孰能指予之疵哉？予虽欲不哀子章，不可得已。因从而著其辞。子章讳璋，姓陈氏，子章字也，浦阳人。辞曰：

已乎子章！天赋尔材而钟尔精，宜乎辉赫其声光，振拔其华英，不秩登于百石，亦名荐于九卿。奈之何单襦短褐，不知圭组之贵。藜羹糗饭，莫沾鼎珍之荣。虽足鋌乎敝屣，神惫乎篝灯，竟不少用，而遂潜辉韬迹于泉局。则吾子章，何如勿生！已乎子章，白杨萋萋，宿草莽莽。悲泉咽而不流，寒云郁而欲聚。以吾子章之才之淑，而遽下制于一抔之土，宁不使予抚遗文而增慨，想音容而惻楚也耶！呜呼唏矣！

◇王季楚哀辞

王仲淮季楚，越人也。其父艮，尝检校江浙行中书，政成，谒选京师。时季楚年方二十馀，请从行。既至，有多季楚才者，荐其名辽阳行中书，授季楚大宁路儒学正。未几以病卒。检校君哭之甚哀，既请国子监丞陈公旅撰铭揭墓上，复谓其甥方泗曰：“予深哀仲淮，既不能寿，而又客死。其二子，基始八岁，塾始一岁，傥然也。仲淮有知，其能瞑目乎？闻汝交友多能文，盍求辞以哀仲淮且慰我？”泗来为濂言，濂窃悲之。初，濂见季楚于泗家，眉目秀整，每言辄牵引史传，几若贯通者，濂方意其必进用于时。今若是，世之人欲以智力相雄长而不知止者，果何如耶？辞曰：

冥冥玄化，孰尸其权？胡予其才，而不予其年？呜呼！

◇思美人辞

吾乡吕成公，实接中原文献之传。公歿始馀百年，而其学殆绝，濂窃病之。然公之所学，弗畔于孔子之道者也，欲学孔子，当必自公始。此生乎公之乡者，所宜深省也。嗟夫，公骨虽朽，公所著之书犹存。古之君子有旷百世而相感者，况与公相去又如此之甚近乎？闻而知之，盖必有其人矣。托物引类，作《思美人辞》。辞曰：

惟美人之悒嫿兮，赋夸质于自然。修蛾规而凝黛兮，曼目转以成譔。妥鬓发而如云兮，靚辅巧以承权。纤腰秀颈若鲜卑兮，容都曼而体便娟。宝璐紫而右绕兮，桂徽婧以半偏。悬明月以缀佩兮，错木难而傅冠。向瑶台而微步兮，意憺静以贞闲。宓妃之伦折芳馨以相遗兮，复容与乎江干。势翩翩其鹈举兮，若游龙之在渊。胡人间不可以久留兮，遂凌厉乎高寒。冯道纪以为御兮，炼天和而为飧。径驱驭于阳阴兮，时上下乎星辰。欸予生之何晚兮，不一覩于芳仪。念夸嫿之鲜双兮，溯回飙而曾思。欲愁悴而委愴兮，气涓沸以如炊。道苟可以遇之兮，视万里犹门墀。登岖嶔而骋望兮，正晨旭之苍凉。气暄豁而闾朗兮，莽山川之纵横。树轮盘纠而柴鸛兮，飏草藿靡以相望。丰狐思群而永嗥兮，文沍慕类以徐翔。企精爽之不徕兮，空云龙之将将。蹇佗傺而望兮，耀灵留其西藏。降崇丘而临旷野兮，循故辙以东归。向阌楯

而徙倚兮，境外嬰而愁內滋。新蟾皎以出天兮，想纤美之曲眉。繁星烂而成文兮，怀绣帔之陆离。苍颡廓落而无滓兮，思玉体之弗缁。拂兰袖而起步兮，复经纬乎空庭。苦鸿雁之靡靡兮，厌羽虫之薨薨。撼户以悲恻兮，惕瞽容而弗自胜。转曲牖而入堂坛兮，胖独坐对乎华镫。镫影摇曳如鸟旃兮，象中心之靡宁。寒彪狺狺而竞吠兮，耳恍闻于跽音。疾倒屣以启关兮，飙斗叶于枯岑。缥绵绵而莫抒兮，托幽寄于瑶琴。琴声咽而思深兮，类孤鹤之鸣阴。更寂寞以将阑兮，斗杓旋而向东。舒枕衾而就榻兮，期梦寐以潜通。精气注以弗释兮，桥有物而衡中。息纚纚以方微兮，魂翕翕而上征。造旬始而谒太仪兮，群灵缤其若丛。氛旄溶以随猋兮，凤旂沛而嬰空。馭象车而秉虬节兮，鞭列缺以斥丰隆。豹纛熊幡聿皇以奋兮，穆流纁谖郁以相蒙。左撝右卫动以绷裊兮，倏肿倩湔云滃而雷春。回穴幡纚汨以卉歛兮，吸嚆灋率藹以蒙鸿。穆眇眇以前迈兮，翩纷纷而弗止。莽冥冥以无垠兮，势皇皇而迤靡。超氛埃而淑邮兮，竟按轡乎朱陵。长丽举喙以向日兮，有赫戏之华文。扬芒燁以上猋兮，粲重离之丹门。炫赤玉之宝章兮，列八龙之威神。东趋于苍极兮，青雕纷其并迎。群神丹尉以方飧兮，奏灵和之凤笙。四酎芬而冻饮兮，晕玉色而带纁。揖素威以升皓宫兮，盼四极之浮浮。蓐收顾馀而破颜兮，锡鏤琼之华钩。谓贞白以眉守兮，合左契于伊、周。折寒门而烛玄冥兮，朔纁飒以吹裘。有夫元巾而擐甲兮，握灵蛇以为驱。重阴沍而未启兮，肃元氛之幽幽。四方非不可居兮，怅所思之莫馀睹。驰两轂如飞丸兮，又滔滔而遐逝。灵氛告馀以吉故兮，子何为兮独愁。若彼中天之有居兮，隔人世之风雨。吾将导子之一至兮，庶弗愆于恒素。怛忽荒以从之兮，驾刚飙以径度。晷光炎之忻忻兮，纚郁决而不可正视。雕甍彤楹屹以上起兮，浏濫宏恂云谖而波诡。连卷欒佹杳以轧芴兮，崑崙幼眇矗以高峙。中洞房之沕穆兮，乃美人之攸居。使曼姬为予通讯兮，俨再拜乎堂垂。晷朱扉之洞开兮，移玉趾之委蛇。珠明玉洁不足以为喻兮，光照耀乎东西。吐芳辞以若兰兮，意勤勤而告余。曰皇降灵兮昭质弗沫，毋染尔秽兮昧厥施。纫药襦兮曳菰旃，结蕙笱兮张椒帟。勺桂浆兮咽荈麋，索胡绳兮畦揭车。集众芳以远蒸兮，羌郁郁而斐斐。余俯首而敬听兮，书鞶绅以自规。海色动而报曙兮，陶去幽而开寤。虽嘉辞之盈耳兮，邈若人其何处。遂扞膺以沈思兮，独处而繚戾也。诚因言以会心兮，将神交于千载也。亘天地而无初终兮，惟我民之秉彝。道宏敷于上下兮，必有人而系之。往者固不可作兮，幸方册之昭如。日参验于厥躬兮，若面命而耳提。跛鳖之蹒跚兮，固难齐于六骥。能孳孳而弗怠兮，亦千里之可至。余虽质濶而力单兮，敢不沾沾而奋厉。带钩矩而佩衡兮，撤郤蒙而祛爵。期有形以必践兮，始俯仰而无愧。纵不得美人以与之游兮，又何异同功而并世。

予既为此辞，尝录一通寄王贤良，贤良盖有志同予学吕者。书以识之，庸俟异日各考其学之成也。

◇东湖先生方君招魂辞

至正元年春，东湖先生年过九十，貌加臞而神益腴。一旦，合贤士大夫于庭，先生

被古冠衣出，肃宾升堂已，复揖宾咸东向坐，顾外孙杨恒执豆筯，乃从容举觶而扬言曰：“老夫耄矣，其去人间世不远矣。私自念，阴阳之运，相摩相荡，而人实藉是以成形。有生者必有死，暂聚者必终散。尝昧昧思之，上自头颅齿发，下自肩髀腰臂，不知何者为可藉，何者为可恒，乃欲长生阅世而不死乎？予每读古书，见所谓豪杰之士不可胜数，或提三尺剑，拥百万兵，啗嚙叱吒，而江水为之起涌。或掉三寸舌，高轩结驷，游骋于诸侯之间，亦足以慑强而下敌。若而人，其材略雄矣，其精魄劲矣，吾将求而与之游，则已荡为飘氛而无所诘矣。呜呼，世之人凡以有涯之身与无涯敌者，皆可悲也。是以荣启期、林颢之徒有见乎此，或被索鼓琴，或行畦拾穗，虽至老死，不以戚戚少婴其心。予窃慕之。尝闻古有《虞宾》之章，盖群歌以挽桡于涂。与其施诸死后之鬼，孰若予亲见之？贤士大夫若不予弃，宜赋诗以挽予。予当乘安车而出，使善音者道予而歌，予且击轮为节以应之，是未必遽减于秦淮海也。贤士大夫若从予言，愿举此觶，为贤士大夫寿。”众皆曰：“然。”

先生既行觶已，又举觶言曰：“贤士大夫固挽我矣，予又闻古之人有遭谗放逐者，或闵其魂魄离散而不复还，作辞以招之，其人初未尝死也。予虽无放逐之忧，而其精神皆已斲竭，筋骸皆已罢惫，顾未死耳。幸未死，有能辞以招我，庶几翩然自适，与夫既死而有灵，亦御云龙而一下听之，又未必不然而笑也。此非属吾景濂而谁为？愿举此觶，为吾景濂寿。”濂又曰：“然。”

于是贤士大夫执觶以酢先生，且各撰歌诗一章以进。濂因制为招魂辞云。先生名采，字德载，姓方氏，越之暨阳人。其行事大略，见于延陵吴公所著碑铭。辞曰：

魂兮归徕，毋远征些。上下八极，皆蒙冥些。华山如云，倚空青些。下有芝房，炳明灵些。白间绮疏，紫檀局些。铜龙承枢，吐赤瑛些。绣帷高褰，耀辎辘些。绿蛇卫毂，若流星些。淳熬熊膋，溢鼎郤些。狼臄凝膏，如玉晶些。九霞玄冠，五彩綖些。麟衫麕裘，光荧荧些。珎璜合节，锵珑玲些。离洒巢和，一齐鸣些。折眊飘，发繁声些。赵舞激风，肖霓旌些。秦歌嫚回，折悬瓔些。室中百具，无一不精些。中天化居，能及此清宁些。魂兮归徕，不越故庭些。

◇郑仲昭字辞

《诗》云：“倬彼云汉，昭回于天。”说者谓云汉天河也，夜晴则天河明，其光随天而转也。云汉然矣，揆于心之灵明，其有弗同者乎？予友浦汭郑君，以汉为名，内翰柳先生字之曰仲昭。间来征予言。予闻制字必有祝，于是稽诸《诗》义，而补之以辞。辞曰：

五礼攸建，冠为之先。备物祇事，无一或愆。

筮期宿宾，列器布筵。弁间皮爵，裳错黄元。

组纓属缺，韎韐用延。尊甌有禁，栖觶斯甄。
离肺充鼎，干肺实筵。嘉爵既祭，工祝乃前。
造字命辞，厥义则宣。维天有汉，灏气成川。
冲角奠軫，贯乎宿缠。夜翳既敛，若练在县。
随时运行，素色连娟。征诸人心，同此皦鲜。
森列万象，遍烛八埏。出王游衍，与天周还。
有美郑君，世胄蝉联。十世同爚，义闻四传。
君实纘之，金曰象贤。图之回之，家政尔肩。
泰之昭之，先绪愈绵。惟廉则砺，惟温则瑄。
处乎正中，有赫其平。汉名昭字，佩服允坚。
一理是循，顾諟匪偏。相彼先民，日夕乾乾。
一事或悖，六凿相撻。君宜自勖，弗懈益虔。
器服有铭，在古则然。敢补祝辞，以代韦弦。

◇赵广字辞

浦汭赵志道氏，衣冠之望族也。有子曰广，来求予为之字。予谓“广”之文，从广从黄，广则因厂为屋，象对刺高屋之形，而黄则谐声也。许慎以“屋之大者”为广，实有“容受”之义焉。请以子容字之，何如？志道曰：“善矣。”乃为之辞曰：

人之隘也，尔则广之。

人之拒也，尔则容之。

惟广惟容，吾将见尔德之丰。

◇诸暨孝妇杨方石表辞

呜呼，是惟孝妇方氏之墓。夫孝未易称，余独归之孝妇而不靳者，将以愧为人妇之不孝者也。孝妇姓方氏，讳迎，越之暨阳人。生二十七岁，归同里杨君敬。敬有母何氏，孝妇左右就养，唯恐违其志。何病腑道涩，不能亲御偃溷。孝妇浸之汤盆中，以指探出之。积岁之久，手文皆龟裂，而孝妇未尝有倦色。昔人有为亲浣厕窾者，史臣尚以为难，载之于策。矧孝妇之事，尤人所难者耶。人之所难者且若是，则孝妇其他之行，弗问而可知也。呜呼，是尚不得为孝妇矣乎？使如此而不得为孝，则夫勃谿而不恭者乃足为孝乎？

予自成童时，读刘向所传古孝妇事，以为斯世何为无此人。心虽未敢必其无，然历三十余年，卒不能一逢。呜呼，余岂意今于暨阳乃见之也。暨阳距予金华仅二百里，予昔尝两至其处，而不知有孝妇，至今始得知之。呜呼，予又意世之如孝妇者，夫岂少哉？特以不遇于君子，故湮灭草莱而人弗闻之耳。其弗闻者，予固无如之何，其幸而得闻者，可不大书，揭之崇阡，以愧人妇之不孝者耶！非为愧人妇也，抑将愧人子也。

孝妇性俭慈，颇知读书，尝鬻田教子。父德载，母张，皆宦族。年六十一，生二子：恒、慧。其卒以至正二年九月五日，其葬于马鞍山，以三年十二月二十二日云。

◇蒋季高哀辞

至正丁酉秋七月壬午，濂畏暑，被发行青松间。忽有客自东阳来，曰：“蒋季高氏歿矣！”濂闻已，哭之哀。哭已，进客问状，客曰：“前月戊辰，季高以事如县中，已巳即有滞下之疾，昼夜之行馀百。久之，热发体中如火。其兄伯康惧，亟呼医视之。医至，脉已绝矣。自己巳至今月甲戌，仅六日而遽至于亡。”濂闻已，复哭之哀。乃尤天曰：呜呼悲乎，不知何繇而夭吾季高乎？使季高其行负天地、愧神明，夭之可也。季高恂恂儒者，非其道弗言也，非其道弗为也。言其事亲则孝而恭，处伯仲则穆而和，交朋友则信而贞，遇族姻则悃而庄，接闾党则惠而慈，求其致夭之繇，无有也。今季高何为乃遭尔乎？岂高高在上，果不可必乎？抑其视梦梦，不能别善恶乎？所谓天道常与善人，其尚足征乎？呜呼悲乎？

初，濂年二十馀，颇嗜学，闻文懿许公弟子三衢方先生，以性理学讲授东阳之南溪，徒步往，从之游。先生所主，盖蒋君子晦家。子晦，季高父也，濂因获交季高父子间。时季高尚未冠，即能执经问难，进退雍容，肌肉若玉雪可爱。岁几何，既哭其父，今又哭季高焉，则夫人世如传舍者，可不信乎！呜呼悲乎！

季高笃意于学，方先生既歿，复负笈师事侍讲黄公。会濂亦执洒扫之役于公门，与季高交益密。季高日出所为文，皆雅驯可传诵，濂甚敬之。每一会绣湖上，辄握手吐肺肝。间酒酣气豪，竞出慷慨背俗语。季高喜，益与濂亲。季高善辨说，衮衮数千言不休，濂不能屈，每务力胜之，于是各大笑而止。且曰：“良会不可数，一嘻

笑，一怒骂，皆别后之相思。”当时出此言，亦以为常，岂知别后之相思者，乃为死后之相哀乎？心虽如铁石，其不为季高一酸辛乎！呜呼悲乎！

去年之春，季高有书来曰：“东西二岷山，无君足迹十年矣，纵不为吾行，其可贻山灵之所笑乎？”濂方闭户著书，跼步弗妄出，不及如季高言。濂所居实浦汭青萝山，山中林樾苍润，孤猿野鹤，见人了无惊猜意，而梅花泉又极可饮。濂自念，虽不能为季高往，季高清俊士，折简招之，或可一来，当共饮水哦诗，或投壶白云间，亦一乐也。岂知季高遽弃濂而长逝乎？岷山之苍翠固在眼，宁不对之堕泪如襄阳乎！虽欲重登，顾后瞻前而季高不见，又宁不为之感慨乎？呜呼悲乎！

季高之太夫人年逾八十，母夫人发亦种种，而三子方累累在疚，长者仅七龄，幼者尚居乳哺中，惻然可念。季高之死，两目能遽瞑乎？呜呼悲乎！季高已矣，濂将抚季高群行，为书以信后世。适有故未及为，姑撰哀辞一通，焚之于墓，以写中心之悲。季高其能有知乎？抑无知乎？岱岳可移，瀛海可填，濂之哀吾季高者，尚何时而已乎？呜呼悲乎！呜呼悲乎！

季高讳允叔，季高其字也，卒时年二十九云。辞曰：

有木蕤蕤兮，呜呼！

将鬯其施兮，呜呼！

霜雪何为兮，呜呼！

竟从而折之兮，呜呼！

天者不可知兮，呜呼！

千载之悲兮，呜呼！

◇赠医师贾生序

医之为道，难言久矣。然必审诊以起度量，立规矩，称权衡，合色脉，表里有余不足顺逆之法，复参其人之动静，与其息之相应，然后从而治之，则其事为甚不轻矣。非洞明应世群书之得失，尚可与于斯乎？《黄帝内经》，虽疑先秦之士依仿而托之，其言深，其旨邃以宏，其考辨信而有征，是当为医家之宗。下此则秦越人和缓，无书可传。越人所著《八十一难经》，则皆举《内经》之要而推言者也。又下此则淳于意、华佗之熊经鸱顾，固亦导引家之一术，至于刳腹背湔肠胃而去疾，则涉于神怪矣。意之医状，司马迁备志之。其所谓迴风杳风者，今人绝不知为何证，况

复求于治疗之深旨乎？又下则张机。机之《金匱玉函经》及伤寒诸论，诚千古不刊之典。第详于六气所伤，而情欲食饮罢劳之所致者，略而弗议，兼之文字错简，亦未易以序次求之也。又下此则王叔和。叔和纂岐伯、华佗等书为《脉经》，叙阴阳内外，辨三部九候，分人迎气口，条陈十二经络，洎夫三焦五脏六腑之病，最为着明。惜乎为妄男子括以肤陋之脉歌，遂使其本书不盛布于世也。又下此则巢元方。其《病源候论》似不为无所见者，但言风寒二湿，而不着湿热之文，乃其失也。又下此则王冰。冰推五运六气之变，撰为《天元玉策》，周详切密，亦人之所难，苟泥之则局滞而不通矣。又下此则王焘、孙思邈。思邈以绝人之识，操慈仁惻厚之心，其列《千金方》、《翼》及工害人之祸，至为愤切，后人稍闻其藩垣，亦足以其术鸣，但不知伤寒之数，或弗能无遗憾也。焘虽暗劣，《外台秘要》所言方证符禁灼灸之详，颇有所祖述，然谓针能杀生人而不能起死人者，则一偏之见也。又下此则钱乙、庞安时、许叔微。叔微在准绳尺寸之中而无所发明，安时虽能出奇应变而终未离于范围，二人皆得机之粗者也。惟乙深造机之阃奥，而撷其精华，建为五脏之方，各随所宜。肝有相火则有泻而无补，肾为真水则有补而无泻，皆启《内经》之秘，尤知者之所取法。世概以婴孺医目之，何其知乙之浅哉？其遗书散亡，出于阎孝忠所集者，多孝忠之意，初非乙之本真也。又下此则上谷张元素、河间刘完素、睢水张从正。元素之与完素，虽设为奇梦异人以神其授受，实闻乙之风而兴起然者。若从正则又宗夫完素者也。元素以古方新病，决不能相值，治疾一切不以方，故其书亦不传。其存于今者，皆后来之所傅会。其学则东垣、李杲深得之。杲推明内外二伤，而多注意于补脾土之说。盖以土为一身之主，土平则诸脏平矣。从正以吐汗下三法，风寒暑湿火燥六门，为医之关键，其治多攻，其剂多峻厉，不善学者杀人。完素论风火之病，以《内经》病机气宜十九条，若为《原病式》，简奥粹微，有非大观局诸医所可仿佛。究其设施，则亦不越补攻二者之间也。嗟乎！自有《内经》以来，医书之藏有司者，凡一百七十九家，二百九部，二千二百五十九卷，亦不为不多也。他未遑深论，即今所论者言之，世之医师，果能尽心于斯否乎？脱或未尽心于斯，则夫起度量、立规矩、称权衡、合色脉之属，焉能察而行之？不至以人命为戏也几希矣。虽然，亦有要焉，逆与顺之谓也。曰升降、曰浮沉，吾则顺之；曰温凉、曰寒热，吾则逆之。果能此道矣，则去夫先医之所治，虽不中，不远矣。然又未易以一蹴至也。非求之极博而观其会通，安可遽反于至约之域乎？医之道所以难言者，盖若此而已。乌伤？

贾思诚，濂外弟也，性醇介，有君子之行，尝同濂师事城南闻先生，学治经。久之，思诚复去受医说于彦修朱先生之门。诸儒家所著，无所不窥，出而治疾，往往有奇验。荐绅间多为赋诗，而属濂以序。濂非知医者，将何以为思诚告哉？而思诚请之不倦，因为直疏历世群书之得失，而勸思诚以学者如此。初不暇如他作者簸弄笔舌，交错以成文也。

卷三

◇燕书四十首

玄黄之间，事变无垠，辩士设喻，以风以陈。质往旧，开今新，作《燕书》四十首。

晋侯将伐楚，楚子甚惧。召六卿讯之曰：“楚国虽小，自若敖、鬬冒至于武、文，威棱气焰，慑彼诸姬。今晋君不道，乃谋兵入我，是蔑寡人而死二三子也。寡人耄矣，不复亲帅三军以逆。坚乃城郭，以迟晋人，不亦可乎？”王孙由于对曰：“然。《易》有之：‘王公设险，以守其国。’非险，国孰与守？盍图诸？虽然，城郭有时而堕也。楚国之南有方城焉，其东有汉水焉，晋人虽众，将焉用之？虽然，山川之阻亦可逾也。若使舅犯守郢，先軫保郢，叔盼御云中，荀偃扼直辕，谁敢侮予？虽然，此犹以力言也。齐民毒吾赋久，若绥之以仁，馭之以宽，绳之以礼，则封内之民德君，以死守矣。虽然，是保民也，非保国也。”楚子曰：“何谓保国？”王孙由于曰：“君务上尊天王，下睦四邻。分昭于上，势定于下。上下有序，畴敢构兵？是保国也。”楚子曰：“善。”于是遣公子结如京师，左司马戍聘于齐、鲁诸大国。晋侯闻之，谓诸大夫曰：“楚国方尊王睦邻，而以兵入其境，不祥。”遂退师。君子曰：甚哉，分之大也。分为天则，定乃靡乱，何有兵祸哉？《易》不云乎：“六二之吉，顺以则也。”失则凶矣。

燕与齐方睦，齐人以燕不虞其入也，将侵之。武安君闻之，走告燕文公曰：“齐将不利于我，公宜谋之。”文公曰：“寡人所谓，晋、楚大国尔，齐何能为哉？”武安君曰：“不然也。臣尝至豚泽，豚泽之人养蜀鸡，有文而赤。翁有群，周周鸣。忽晨风过其上，鸡遽翼诸，晨风不得捕去。已而，有乌来与同啄。鸡视之，兄弟也，与之下上甚驯。乌忽衔其飞去，鸡仰视怅然，似悔为其所卖也。夫巫峡之险，不能覆舟，而覆于平流；羊肠之曲，不能仆车，而仆于剧骖。此无他，福生于所畏，祸起于所忽也。”文公曰：“子诚过虑哉。”不听。未几齐果攻燕，取十城。君子曰：蜂虿且有毒，况上国乎？燕人为不知矣！

齐路寝坏，桓公欲新之，召工师翰具材。工师翰伐巨木于营丘山中，若蘼，若闪，若魄旄，若豫章，无疵，取而泛之河，蔽流而下。工师翰麾众徒，操剡剡斫之，运绳尺剡之，阁阁然，橐橐然，声达乎临淄之郊。越五月，路寝成。桓公环视之，东阿之楹有用樗者。桓公让工师翰曰：“樗，散木也。肤理不密，沈液弗固，嗅之腥，爪之不知所穷。为秩为枅且不可，况为负任器耶！”工师翰对曰：“臣之作斯寝也，嘉木以为脩，文以荐址，画藻以奠井，坚垤以厚墉，陶甃以饰黝。臣窃以为尽善矣，惟东阿之楹缺，以一樗足之，不虞君之见让也。”桓公曰：“寝之巩者在采廂，承采廂者在桴，藉桴惟楹耳。一楹蠹，则倾隳，奈何不让？”工师翰曰：“臣闻国犹寝也，一楹蠹，则无寝。若众壬进，尚可有国乎？”桓公曰：“不可也。”

工师翰曰：“君既知不可，何为察其小而遗其大也？”桓公曰：“不知也。”工师翰曰：“臣请为君言之：擅执国柄者，有雍巫焉；成内食之奸者，有彘鼓初焉；长君之欲者，有寺人貂焉；外恶诸侯而凶德弗革者，有开方焉。是众楹皆蠹矣，路寝能独存耶？”桓公悟曰：“敬诺。”于是解四子政，而召管敬仲任之。齐国大治。君子曰：工执艺事以谏，忠矣。断而行之者，非勇欤？宜其上下相亲，霸业底定。《书》曰“从谏勿咈”，桓公有焉。《易》曰“纳约自牖”，工师翰近之矣。

楚庄蹻过商丘之墟，闻司鸿氏之妻婴美而艳，杀司鸿氏攘之。未几，又将室卫人之白间。白间宜卫人，不从，引锥自刺，左右夺锥免。蹻怒，欲梟卫人。白间曰：“卫人厚我若此，勿以妾故伤卫人也。泣而往。”白间得幸久，竟忘卫人恩己，请曰：“卫人女弟，容颜夸嫔，肌肤若琢玉，善为《阳阿》《七盘》之舞，翩翩如龙旋，见者欲死。君强委禽焉，可妻也。”蹻从之。至，蹻绝怜爱，终不自怪。婴则日媚蹻，作狐狗态，蹻或一破颜，辄出骄人曰：“主君赠我以笑矣！”“主君面目有光，唇如缴丹，齿如齐贝，音中黄钟，其美丈夫哉！悔相从不夙也，虽然，今幸得侍巾栉者，殆天畀我宠乎！”言已，手足皆乱无主。白间尤善媚，其骄人比婴有过无不及焉。已而蹻专，白间甚患，往诟曰：“而溷彘耳，遽忘德吾乎？不然，吾专我主君也。”婴继詈尤力。起避之，白间与婴逐噪不已。问婴曰：“而昔有良人乎无也？”曰：“有。”曰：“今何在？”曰：“人杀之矣。”曰：“孰杀之？”曰：“主君也。”曰：“然则主君而仇也，而弗能报，反争一旦之宠，不亦慎乎？”婴不能答，白间遽曰：“妾夫子固在也。”曰：“而夫子固在，而心悦未死，曾记泣别时言乎？”白间抱大恸，与婴亦泣下，不能仰视。君子曰：大侠出南海中，杀人肝为脯，妻其女妇，事与庄蹻正同。南海之人无缚之者，反北面事之，争权而矜宠。已焉哉，天实为之，谓之何哉？

顿国之大夫权，闻黄帝与蚩尤战，制角以象龙鸣乐之，剡桐而髹镗焉，画为龙文曰习焉。其音郁纡而回旋，优优焉，靡靡焉，可听，若能通乎元潜者。大夫吹向南山之湫，以感龙，湫中三足能闻角鸣，意人将醢己，呀然号，林木皆动。大夫大惊，谓真龙吟也，走谓公之奇曰：“真龙之鸣，业业如灵鼓，前后相续，宛澹不能休，吾向学者殆非也，请改而习诸，何如？”公之奇曰：“子所闻者能也，非龙也。龙之鸣，人鲜能闻。子之角固伪也，今子又以能为龙，益伪矣。舍伪而学伪，奚择焉？”君子曰：世之法孔子，断断兮自谓得其宗者，若真龙出鸣，则骇矣。

郑伯卒，庶孽夺正公子五争。及厉公自栎入国，将尽刘诸公族，悬剑于国门，且下令曰：“敢争者斩！”子俞弥方病，闻之叹曰：“是何亡国之政也！”乃令左右扶见公。未至，公遥呼曰：“大夫力疾而见寡君，非欲尝国门剑乎？”声色俱厉。子俞弥阳惊曰：“何谓也？”公语之故。子俞弥曰：“君能如此，过文王远矣。臣顿首贺且不暇，况敢争乎？”公解颜曰：“寡君焉能过文王也？”曰：“臣言不悖，君实过之。”公曰：“大夫言何易也？虽然，幸卒言之。”子俞弥曰：“君之过文王者无他，威胜也。”公悦，前子俞弥问曰：“文王初伐犬戎，次伐密须，次伐耆

邗，次伐崇侯虎，而作丰邑，自岐徙都之，其威盛矣。大夫乃谓寡君胜之，其故何耶？”子俞弥曰：“文王之威，能行天下，而独不行于周宗，故其孙子之蕃，兄弟之国者十有五人，姬姓之国者四十人。此无他，亲亲也。今君欲兵之，非威胜文王乎？”公艴然见乎色，曰：“大夫言固善，如仪之党何？”子俞弥曰：“郑之公族尽二入党耶？君奈何歼之？臣所居之南有山曰阳都，之山甚深，群熊萃焉。熊性恶血，偶度绝壑，棘刺胁血，见若濡缕。熊亟爪之，血愈滋。爪之不已，肤成坎，原原如泉涌。熊不能禁，剜去其肤，而血弗息，竟擢肾肠以死。郑之公族，犹一体也，今因公子五争，不问小大尽刘，无乃与前事类耶？”公矍然失声曰：“吾过矣，吾过矣！”遂下城门之剑，置诸公族不论。君子曰：郑厉公之悞谏，谁能犯焉？子俞弥反复言之，而公弗格者，以顺入以正出也。《内经》曰：“寒因寒用，热因热用，其始则同，其终则异。”於戏，岂特医师之为然哉！

蔡人有列宗子泓，性好洁。恶人口过，人与语，遥答之，且答且唾，人进寸则退尺以避。沐浴必十更汤，收湿不以巾，溯风干之。掘坎为匱，而轩其上，下疏河水，随随流。欲行人道，汲井泉前后濯，大雪不废，妻因病寒死。然好嗅女妇足馊，足馊若行膻，缠三周而覆涌泉，善垢。或解之，其臭逆鼻，人不啻即吐，子泓独乐之，骄人曰：“是何郁金之腴也，婆律之润也，椒兰之郁也。”置诸袖中，饭不甘，嗅之；神度弗爽，嗅之；怒不舒、懣不释也，又从而嗅之。濒死召其子曰：“吾死矣，粢盛芻合不尔求也，嘉荐普淖弗汝觐也，能时致足馊于柩前，孝莫大焉。”蔡大夫闻而笑之。君子曰：古语有之，大洁者必有大污。其子泓之谓乎？

鲁之老父，相与谋造狐白之裘。纫之以密箴，缘之以画纯，佩之以长褊，熨之以榆火。择彤笥承之，趋鲁君之庭而致辞曰：“吾侪小人，得有阖庐以蔽风雨者，非君赐与？出作入息，而鼓腹酣歌者，非君赐与？男播于畴，妇馐于郊，以遂其生者，非君赐与？吾闻上德不报，于人为无礼，于德为愆义，不祥莫大焉。请以是为玉体之共。”谨再拜以献。鲁君曰：“寡人闻之，君犹本也，民犹支也。君所以庇民，如本之养支也。尔二三老父之无衣，宜于寡人乎是给。今倒行而逆施之，无乃不可乎？敢辞。”二三老父又相与谋曰：“是服之不华，无以彰君之德也，盍更诸？”于是以锦为衣，绣以五色龙章，鞶以朱丝，褊以华黼，有文烂如也。又复趋鲁君之庭而致辞曰：“臣等不佞，长于蒿莱之野，未尝受教于君子，不知以礼事君。夫因物以合矩，矩谓之章；缘文以显义，义谓之范。君有至德，而惟皮革之物是供，非合显之意，谨更之，惟君图焉。”公曰：“鲁国虽小，尚敢私一裘乎？礼若可受，絀布惟盈。如其不然，五采奚益？敢固辞。”二三老父又相与谋曰：“吾君诚贤君，其不受者，非有他也，不欲重烦吾民，我等当爱之以德可也。”又进而致辞曰：“君之中心，臣等幸已知之。有君无臣，世谓乱国。臣不敢以褻服污于执事，愿以仁义为衣，道德为领，忠信为绅，廉知为缘。使君服之，长有兹鲁国，先公社稷，永有攸赖，不亦可乎？”公曰：“寡人敢不承教！”君子曰：“鲁之老父，何其善爱君哉！其气和，其辞婉以周，其情恳愿而有依。鲁君应之，若黄钟大吕，弦歌干扬，洋洋乎相宣，泠泠乎相应也。君臣如此，鲁欲不治得乎？《礼》曰“无体之礼

”，“上下和同”，此之谓也。

腹击至赵，赵苦成常与之出游，指河山曰：畛畛乎有截也。指民物曰：芴芴乎众多也。指兵府曰：矛戟犀利也。指内藏曰：玉帛充刃也。“大夫上国也，宁有匹于是乎？”腹击曰：“敝邑索甚，安能及此？然有一说焉，为君陈之可乎？”曰：“可。”曰：“南海之滨有昭支曄者，居蛟汭之丘。汭不产牛，有绳童来者，大如獒，其角蜺尔栗尔。昭支曄怖曰：‘是何物也？’其友伯昏氏告曰：‘此谓童牛，《易》称“童牛之牯”是也。’昭支曄曰：‘吾见貌牛者，形咫尺耳，其大有若斯乎？’悬其人购以归，骄其比邻，矜其舆皂，自以为无敌也。他日，宁宣子过焉，谓之曰：‘是未足为大也，高凉之山，有牛曰夔，其有黄，其尾玄，其色类乎卷，其肉重三百馀斤，子盍致之？’昭支曄复往购以归，又自以为无敌也。他日，爰子旃过焉，谓之曰：‘是未足为大也，空宾之林，有牛曰旄，赤鬣垂髀，绀牦蔽膝，体长而多力，其肉重六百斤，子盍致之？’昭支曄复往购以归，又自以为无敌也。他日，倨无膝过焉，谓之曰：‘是未足为大也，巴峡之中，有牛曰摩，其毛拳然，其睛煜然，其角鬻然，其肉重一千斤，子盍致之？’昭支曄复往购以归，又自以为无敌也。他日，梁都之舟过焉，谓之曰：‘是未足为大也，合浦之间，有牛曰犂，项肉上葵，龙胡下绥，迅行如飞，其肉重三千斤，子盍致之？’昭支曄复往购以归，且诧人曰：‘如此尚有可敌者耶？’岸舞焉悦，器器然自溢也。他日，公孙伯光过之，昭支曄出牛仇之。公孙伯光曰：‘是犹未足为大也，岷峨之谷，有牛曰犛，鬣鬣荡以为顶，鹄象以为跟，雕壁以为背，填脂以为尻，其肉重七千斤，子盍致之？’昭支曄惑曰：‘有是哉？’虽然，且将验之。迨至，果如伯光言。因叹曰：‘使人不我告，我终矜童牛大于天下牛也。’赵之河山、民物、府藏，较之胡、海，固为大国也；比之齐、晋，则不及矣。齐、晋比赵，固为大国也；较之秦、楚，则雄强不如之矣。君勿自足，自足则骄，骄则轻，轻则残民以逞，国欲治，得乎？”苦成常舌本强不能对。君子曰：人自狭者，其不可哉！

齐景公惩奢而好俭，诸大夫复日浸乎淫靡，然惧景公之知，矫情事焉。每入朝，驾羸马朴车以从，衣恶甚，冠纓殆欲绝也。齐景公谓其诚也，怜焉，召群臣曰：“寡人使子囊带，赐尔等锦衣一袭，及鞞奉、容刀各一，以为身章，而等毋过俭也。”皆对曰：“臣等藉君威灵，得从大夫之后。食虽弗啗，不我馁也；衣虽弗华，未尝冽也。愿君久有此土，俾万子孙食君之俭。《传》曰：‘俭，德之共也。’共则一和，俭则从康，从康则豫，一和则辑，唯君图之。”景公悦。一日出游，会诸大夫飨于鹿门。入而观焉，其车则泽而焕也，其马则矫而腾也，其服食器用则丰明精腴也。景公以其给己，大怒曰：“叱嗟！而吾臣也，敢尔乎！”尽收而戮之。君子曰：《书》云“作伪，心劳日拙”，其齐大夫之谓乎？

秦昭王即位之三年，中外士多去。昭王患之，谓阳山君曰：“寡人遇士不为不至矣，先饥而之，未冻而裘之，寡人何负于士，士之相视如弁髦？将絜维之耶，益离其心。欲任其所之耶，则去者日多矣。弗禁国将空，奈何？”阳山君曰：“君何患焉

。夫王孙非重飴不栖，非山实不食，非族林不悬，闻人声则逸。弋人饵而粟之，诏而驯之。命之春，人立而下上其手；命之水，负壶出汲；命作《兜离》、《桑林》之舞，则冠带踉跄而起。夫王孙，类夫人者，犹可也。至于魑魍，则噬人之物，仰首则百兽慑，掉尾则林木震，啸咆则阴森四发。非惟不可近，矧敢狎？猎人羈而缚之，习而安之，相与作角抵之戏，跨项编项，或翻出蹯下，无所不至。魑魍亦灵兽，犹可也。至于伯赵，禽中微者尔，技人引而罗之，扰而柔之，抁土为人、兽、神、鬼面，而空其中，衣与皮如之。令其为鬼，则冒鬼面、服鬼衣以出，跳踉偃仆如画。至于人、兽、神皆然。伯赵虽微，犹禽属也。至于蚺蜥，则虫之至微者也。形大于粟，其目、鼻入微不可见。眩人以彘肢诱而致之，集于干壶，玄与黄异贮，序而教之。布髹几于庭，置二壶其上，振鼓三。初则玄、黄皆出，再则各成列，奋首摇鬣相向，三则纷纭交不可辨。闻钲声，各退入壶不乱。夫王孙、魑魍兽也，伯赵禽也，蚺蜥虫也，皆口不能言，冥顽不灵，其可服而制之者，奠心志、宁嗜欲故也，况士灵于万物者乎？且士者，国必资以成治者也。昔我先君繆公，西取由余于戎，东得百里奚于宛，迎蹇叔于宋，求丕豹公孙支于晋，遂成霸业。臣窃闻之，先君尝语群臣曰：‘林繁则众禽来栖，海宽则大鱼来游。寡人之待士亦以宽，故剑舄乃麋至耳。’今王之驭下如束涩，昼不得宁，夜不得息，来者如入囊，有入无得出者。臣亦将去之，况他人乎？王若以诚待士，纵其去来不问，士若不至，当磔臣以示，不悔也。”昭王曰：“善。”邻国闻之，士之来归者千余人。君子曰：君子怀材抱艺，孰不欲自见哉？特患遇之非其道，故避去尔。《礼》云，举贤而容众，毁方而瓦合。言宽裕也，君子亦何心哉。

齐顷公欲赋民，一丘出车一乘，不从者死。袁娄宰泣曰：“敝邑之赋急矣，四丘一乘尚弗支也，况倍三乎！吾宁死尔，不忍死民也。”弗奉令。公使使者让宰，且召与使者俱。宰至，见公顿首请曰：“臣无罪。”卢蒲就魁在侧，斥曰：“汝恶得无罪？立国养民古也，瘠民肥国今也。胡不腴民膏血以媚公？尔罪一也。公既弃民，汝反欲爱民，使诸侯不敢侵伐，尔罪二也。通国之宰，皆徇公欲，尔独以正自匡，而欲死之，尔罪三也。汝恶得无罪？”公笑而释之。君子曰：古者谏有五，有正谏，有降谏，有忠谏，有戇谏，有讽谏。若卢蒲就魁之言，其殆讽谏也欤！

韩帅师伐魏，入舞阳，魏人避之。韩将公仲曰：“夫魏，易摇之国也，今弗斗，盖弱我矣。再帅师进，必下一二城。”公叔曰：“不然，魏国虽小，许鄢在其南，西河络其北，长城界其西，淮颖出其东，是所谓险阻国也。今无故我弱，盖有伏甲焉。譬犹越人阱鼠，鼠好夜窃粟。越人置粟于盎，恣鼠啮不顾，鼠呼群类入焉，必饫而后反。越人乃易粟以水，浮糠覆水上，而鼠不知也。逮夜，复呼群次第入，咸溺死。魏以舞阳饵我，是置粟于盎也，无乃不可乎？”弗听。未几，伏甲四起，韩师歼焉，公仲仅以身免。君子曰：公叔可谓智士哉。所谓智者，察见隐微，无所遁其情尔。魏人无故而弃舞阳，岂力弱哉。盖诱我也。公仲遽信之，何耶？老子曰：“将欲夺之，必固与之。”其魏人之谓矣。

晋栾氏世为晋卿，以财名。至栾雱，益务侈靡，狗马声色无不好。藉之举火者百家，无规之者，媚惑惟恐不亟。求蔡西旅，访神马渥洼，征乐姬燕赵。出则行马拥犬，还则吹竹弹丝。为长夜饮，酒酣，连臂踏歌曰：“北邙之阴，白杨悲止。今我不乐，日月驰止。卷发衰止，饮酒沲止，我心和止。”无日不然，盖藏皆空，而为乐不厌。雱觉，召所嬖谓曰：“吾乐已，太康家力，不向单乎？”辄给之曰：“鱼雁满藪泽，羊牛溢郊，金帛珠玉，充积库藏，何谓单乎？”雱复悦。雱妻蓼媛骂曰：“蛲蛔所藉以生者，在人肠胃中也。嗜其血，日夜不止，人因病历死。人死，即蛲蛔亦槁矣。尔曹藉吾家举火，旦旦蛊而伐之。我家亡，汝家得独存乎？”众畏蓼言，以计去之，嬖乱益甚。雱以贫死，百馀家皆散为丐。君子曰：山之阳有桑，群虫穴之，昼夜啮弗止。桑沈液干而悴，虫亦无生者。虫其栾氏之客欤？使戒蓼言，亦何至于丐？哀哉！

楚有斫子般者，貌肃而言庄，言则必称先王，国人皆以为修洁人也。一日，饮蘧启强家，而沈尹寿、师祁犁与焉。师祁犁与沈尹寿语，语近褻。斫子般怒曰：“若等陷女蛊，若渠略出入秽坏，虽鬼见亦唾也，尚敢扬言俎豆间乎？”众皆色沮。言未既，有艳姬过门，斫子般起更衣。忽见夫握刀趋甚疾，众随之观，则所追者正斫子般也。初，斫子般通于姬，姬知饮蘧启强家，过而目招之。斫子般将尾而私焉，不虞良人见也。沈尹寿拊膺叹曰：“天下宁复有是耶！天下宁复有是耶！”蘧启强尤之曰：“子何见之晚也！昔纪侯好狙，使狙师教焉。狙师脱土肖人貌饰之，冠九山之冠，衣结霞之衣，蹑文鸾之履。升降周旋，人也；拜立坐跪，人也。狙师度可用，进纪侯。纪侯观之乐，举觴觴焉。狙饮已，竟跳掷裂冠裳遁去。盖狙假人貌饰形也，其心狙也，因物则迁尔，子何怪斫子般哉？今之世，假称先王以文奸言者，衣袂相属也，子何怪斫子般哉！”君子曰：天之高也，日月之昭也，星辰之远也，涉天之家咸得测焉。独人心之变，尧舜有难知者。观斫子般之事，可为寒心矣。

齐西王须，善贾海，出入扶南、林邑、顿逊群蛮中，贸迁诸宝，若毒冒、颇黎、火齐、马脑之类，白光烨烨然。遇东风覆舟，附断桅浮沈久之，幸薄岸。被湿行彝阴山中，山幽不见日，常若雨将压地。西王须自分必死，寻嵌窦绝气，庶遗骸不为鸟鸢饭。未入，猩猩自窦中出，反复视，意若怜之者。取戎叔、霍葵、委萎诸物，指之食。西王须方馁，甘之。窦右有小洞栖，新毳厚尺馀，甚温，让西王须。猩猩独卧于外，大寒不自恤。语言虽殊，朝夕呶作声，似慰解状。如是者一年不懈。忽有馀艘度山下，猩猩犹急挟西王须出，送之登。及登，则其友也。猩猩犹遥望不忍去。西王须因谓其友曰：“吾闻猩血可染罽，经百年不蔫。是兽也腠，刺之可得斗许，盍升岸捕之？”其友大骂曰：“彼兽而人，汝则人而兽也，不杀何为？”囊石加颈，沉之江。君子曰：负恩背义，人弗戮，鬼斯戮之矣。西王须之见杀也，宜哉！虽然，西王须固可杀，犹施于异类也。类同者亦有之，岂惟类同，而同气者亦或有之，奈之何哉？天王之法尚在，吾当执刑书以往。

玉戴生与三乌丛臣朋，玉戴生曰：“吾侪宜自厉，异时立朝，势人之门，足毋陟也

。”三乌丛臣曰：“此余切齿腐心者，盍誓诸？”玉戴生喜，乃歃血誓曰：“二人同心，母循利，母誑有位，母附厥憊壬而移其行。有违此盟，明神殛之。”居亡何，共仕于晋。玉戴生复申前誓，三乌丛臣曰：“言犹在耳，何敢忘也！”时赵宣子得君，诸大夫日奔走其庭。三乌丛臣既悔，复恐玉戴生知之，又不得不往也，鸡初鸣，即去候宣子。入门，有危坐东荣者，举火照之，则玉戴生也。各惭而退。君子曰：二子贫贱时其盟诚良，及登禄仕，遽变其初志，何耶？利害战于中，位势怵于外故也。士君子养于山林，而坏于朝廷，昔人之叹，其有感哉！

武安君说六国从亲以孤秦。秦惠王患之，使犀首期齐、魏，与共伐赵，以败从约。赵肃侯使使臣说齐、魏之君曰：“臣之东邻有长瀦君，其妻终葵夫人，妒虐其侍姬，长瀦君苦之。长瀦君之友六人，家有如夫人者三，和而不争，长瀦君泣而诉焉。六人者各遣其妻，载饗飨以食夫人，且解之曰：‘人所贵于妇者，能乐其夫子尔。长瀦君年将耄矣，宜安之。今因帷薄之故以伤其心，不可乎？’夫人答曰：‘妾不佞，不知明训，不能奉夫子，致辱玉趾贲于兹敝庐，有命敢不敬从？然窃有辞焉：长瀦君实耄，子且幼，未能胜洒扫。所恃以无恐者，长瀦君存耳。苟一旦溘先朝露，吾属将操觚丐于道路。长瀦君精神几何？宝之爱之，惟妾尔。侍姬惟欲是从，长瀦君若死，其目岂有泪耶？肉未及寒，已思移他家矣。妾虽愚，宁复计帷薄事乎？’六人之妻各归，逐其如夫人者。今六国合从，将以摈秦。秦遣衡人一誑，从约顿解，而惟秦之令是从，不亦难哉？且说士之口，是非纷乱，唯其所命皆傅理善惑，大王不可不察也。”齐、魏之君皆曰善，于是遣使至诸国，从约复成。君子曰：七国之君，甚矣无识也，随辨士之舌以为东西。辨士升，国势降矣，故当时谓无士为无国。传曰：“眩白为黑，倒上为下。”其士之谓欤？

鬻夷子谓魏力叔牟曰：“越山之中，多蒙頔、獬豸，而牛尾狸亦产焉。狸与肉间错，味旨甚。当林实秋肥，狸日饫之，其毛泽泽。狸自料为人所忌，穴山为宫，树石为柵，聚箴为墉，昼伏夜动，无隙可寻。老猎师噉犬踪迹之，毁柵坏墉，而烟其宫。狸不能烟也，闭目冒火出，犬随毙之。”力叔牟曰：“狸何罪哉？”鬻夷子曰：“狸何罪哉，利其肉之脆也。高国氏以富见祸，人以为无辜，殊不知从己召也。高国氏亦牛尾狸哉？”君子曰：匹夫无罪，怀璧其罪。信矣！

楚放宜咎者，善为鹵，学未三月皆驯，纵之扬则扬，呼之降则降，指鸢鹄鳧鴈，使之击则击，无不如志。西邻有终利之伊，争能宜咎，欲学之。求鹵于太阴山，使调鹰奴囚之七月。有鸢过焉，命鹵搏之。鸢惊坠，鹵亦坠，对立闪枝上。招之，矫矫然逝矣。馀者瘦死过半。终利之伊甚惭，往宜咎曰：“子何术而使鹵驯也？”宜咎曰：“吾亦何术哉。予初得之也，冠之以笼胃，束之以绦旋，严之以鼓鼙，承之以鞴鞞，振之以釜和。使其目无邪视，神无外驰。时其饥也，和水肉以炙之；廉其餒也，咽羽毛以泄之。于是其天者全，不知有人，人亦鹵比。故命击则击，命止则止。今子畜之以人，不以禽，乖戾其性情，动摇其筋骸，逆乱其血，紊伤其羽翮，不适其饥饱。神既不完，天者皆丧矣，又乌能如人志哉！唯恐其不纵也，纵则扬去尔

。吾亦何术哉，所用与子异尔。”终利之伊再拜曰：“吾因问调鹳，而得驭将之术也。”君子曰：岂惟驭将哉，治民亦犹是尔。

楚将伐鲁取其地，召诸大夫问焉。辟闾巫臣曰可，神子鱼曰不可。楚子病之，请言其故。辟闾巫臣曰：“鲁公失政，季氏得民。公伐之，弗胜，次于阳州。齐侯唁公于野井，而不能讨。鲁之臣子，枕戈待旦莫敢发者，畏季氏威也。君将求逞诸侯，而徼福周公之庙，奈何不伐？臣故曰可。”神子鱼曰：“周室东迁，列国失序。若声罪加之以兵，何君不可攻？何国不可伐？楚之视鲁，犹齐、晋之视楚也。鲁可伐也，楚能免焉？臣故曰不可。”辟闾巫臣曰：“鲁弃周礼，惟强弱是视。当齐肇伯，衣裳之会九，兵车之会四，鲁鲜不与闻。晋文率诸侯会于温，以臣召君，不可以训，亦仆仆而往，不遑宁处。其蔑我楚国则曰：‘是芟路篮缕之邦，可与行典礼乎？’楚国之民，含怒日久，非特君也。康王即世，鲁公虽与二三丈夫辱临楚郊，实怵于势，非中诚也，不伐何以示远？臣故曰可。”神子鱼曰：“周公相王室，尹天下，于周为睦。分鲁公以大辂、大旗，夏后之璜，封父之繁弱。殷民六族，使帅其宗。辑其分族，将其丑类，以法则周公。用即命于周，其德至今未泯也。夫修惠以怀人，人谁弗亲？逞威以上人，人孰能辑？今以鲁不我与，而兵之以示远，其无乃非德惠也乎？臣故曰不可。”辟闾巫臣曰：“受姓定封，孰非懿亲？诸姬存者，其可数也。或明德之弗崇，则弗足以存。且臣闻之，立德敷政，立义和民。德，天之明也。义，地之制也。君人者，则天之明，法地之制，以洽和民人，古之道也。今鲁之公室弱，民罹荼毒，若入火无所避之。弃而不伐，不亦左乎？臣故曰可。”神子鱼曰：“王灵虽微，天下共主。楚国固强，终人臣也。以君伐臣，是谓布义。以臣伐君，是谓悖政。四海弗靖，职此之由。若以师宿于鲁境，东诸侯告于天王，使一介之使以让君曰：‘鲁也弱，诸臣畔之，致使其君越在草莽，不能事宗庙，诸姬窃忧之。君为大国，不唯其难之靖，而土地是图，或为执事羞。天王命我诸姬，亦既有辞，当以公徒三万，与君周旋于龟蒙之墟。君其图焉。’不知君将何辞以对也？臣故曰不可。”辟闾巫臣曰：“天王崩，王室乱，刘子、单子以王猛居于皇，自救且不及，况能馁我鲁乎？五侯九伯，桓公实征之，以臣伐君，非一朝夕。今楚之霸与齐代兴，我若讨鲁之罪，东诸侯震叠不暇，其能有辞乎？臣故曰可。”神子鱼曰：“鲁之为国，密迩于齐，又甥舅也。王室固多难，鲁之君子，或藉齐馀威以安靖之。楚师进焉，诸姬必忿，将为楚患，是无故勤诸侯也。如或还也，劳师千里，靡厥糗粮，触冒风露，何益于国？臣故曰不可。”楚子曰：“巫臣之言良。”欲帅师东，闻齐侯取郚，居昭公，乃止。君子曰：春秋大夫类多能言，而丽乎理者，何其寡也？季氏逐君，诸侯莫不闻。楚能告天王致讨，桓、文之功可继也，神子鱼乃力遏之。巫臣不务出此，乃凌蔑我王室，惓惓以威远为言，二者胥失也。楚之为楚，其不竞也宜哉！

宋襄公继霸，将与楚子会于盂，以乘车往而不设兵备。通国人皆忧之，莫敢言。昆吾之叟曰：“君安则臣宁。君设有难，宋社且不血食，吾属将焉置诸？请昧死言焉。”俟宋襄公出，歌而遏之曰：“有虢者貔，其毛栩栩。冠弁而揖，吾不知死所。

密密者陆，鳞鳞者矛。伋伋者夫，始可貔与居。貔乎貔乎，良足畏乎！君何之乎？”襄公怪之，召而问焉。昆吾之叟对曰：“闻君将与楚子会，有诸？”曰：“然。”曰：“闻君武备弗之戒，有诸？”曰：“然。”曰：“礼务从时，政在体要。佩玉锵锵，不可薪于山。荷戈与祲，不可酬于庙。其理然也。今楚人貔而冠者也，君欲以文德合之，其术迂矣。君之莅政，动法文王。使文王遇貔，亦使勇士操戟逐之，未必朝服与之揖也。”襄公曰：“人皆相率约君以礼，子奈何欲兴戎乎？坛坫之间，玉帛交错，而使甲士厕之，人其谓我何？”不听，往与楚子会。楚子以兵车至，执襄公。君子曰：宋襄公为万世笑者，以胶柱而鼓瑟也。胶柱而鼓瑟且不可，况往会强国而不知变乎？

郑人有爱惜鱼者。计无从得鱼，或汕，或涔，或设饵笱之。列三盆庭中，且实水焉，得鱼即生之。鱼新脱罔罟之苦，惫甚，浮白而喁。逾旦，鬣尾始摇。郑人掬而观之，曰：鳞得无伤乎？未几，糝而食，复掬而观之，曰：腹将不厌乎？人曰：“鱼以江为命，今处以一勺之水，日玩弄之，而曰‘我爱鱼，我爱鱼’，鱼不腐者寡矣。”不听。未三日，鱼皆鳞败以死，郑人始悔不用或人之言。君子曰：民犹鱼也，今之治民者，皆郑人也哉。

楚万咸语不更先生曰：“鼯之在田也，弹丸欲击，卢犬欲磔，山狸欲咬。鼯苦之，其黠者乃往依稷焉。稷，社之配也，世谓之稷鼠，人不敢图。意而之野巢也，乌鸢啄其揅，鸠残其躯，伯赵夺其室，亦不能一朝居。意而近人而家于宫，则舒然安矣。夫物尚有知，人或失所依，何耶？”不更先生曰：“若是余将焉依？”万咸曰：“仁义汝稷也，礼乐汝宫也，人依乎仁义礼乐，其孰曰不然？”不更先生泠然而悟。君子曰：人之智，岂不物若哉？物之专，人则扰而离也。《诗》云：“依彼平林，有集维沄。”沄非平林固不集也，人孰不智哉？

楚共王有照乘之珠，爱之甚，函以金检，命左右负以随，时出玩之。游于云梦之泽，失焉。共王不悦，下令国中曰：“有获吾珠者，予以万家之邑。”楚国臣无小大咸索珠，简茅淘土，哄哄者三月，竟不得。更数年，繁阳之子牧犊于泽，有气青荧起菅中，视之珠也，楛以献。共王不食言，乃赐之邑。君子曰：仲尼既没，珠之失二千年矣，求者非一世一人，而弗获之。一旦乃入牧犊者之手，可以人贱忽其珠哉！

卫灵公问治国之要于蘧伯玉曰：“寡人之国不为小矣，久而不治，欲帅虎士以御四封，何如？”蘧伯玉曰：“可也，非其要也。”曰：“遣使致聘，以修邻好，何如？”曰：“可也，非其要也。”曰：“慎简百僚，毋旷厥官，何如？”曰：“可也，非其要也。”曰：“社闾文谒，勿使行政，何如？”曰：“可也，非其要也。”曰：“斥槟奸回，崇厥正士，何如？”曰：“可也，非其要也。”曰：“俭德是共，屏弃淫侈，何如？”曰：“可也，非其要也。”曰：“怀保小民，夙夜匪懈，畏之如天，敬之如神，绥之如子，何如？”曰：“斯其至矣！有民斯有国，有国斯有

君。民者君之天也，君之则君，舍之则独夫耳，可不畏哉！”公曰：“善哉言乎！”君子曰：蘧伯玉之言，其有激哉！君者主民，民之从君，犹水朝宗，振古然也。而曰民为君之天，何耶？虽然，天之生民，使君主之，不使虐之，虐之非君也。是则君为民立，民亦重矣哉。

赵成阳堪，其宫火，欲灭之，无阶可升，使其子朏假于奔水氏。朏盛冠服，委蛇而往。既见奔水氏，三揖而后升堂，默坐西楹间。奔水氏命侯者设筵，荐脯醢觞朏。朏起，执爵啐酒，且酢主人。觞已，奔水氏曰：“夫子辱临敝庐，必有命我者，敢问？”朏方白曰：“天降祸于我家，郁攸是崇，虐焰方炽。欲缘高沃之，肘弗加翼，徒望宫而号。闻子有阶可登，盍乞我？”奔水氏顿足曰：“子何其迂也！子何其迂也！饭山逢彪，必吐哺而逃；濯溪见鳄，必弃履而走。宫火已焰，乃子揖让时耶？”急昇阶从之。至，则宫已烬矣。君子曰：迂儒僨事，往往类此，是何可胜道！人以经济自负，临事之际，或不知急缓，以至覆亡，亦何其谬哉！

中山君嬖梁其生。生蹇僂而椎鄙，尽国中无过者，唯中山君宜之，一朝不见，辄若有所失。语大夫旃曰：“梁其生其智人哉？何为能安我也？”大夫旃曰：“心成怜，白发玄。情弗怡，艳色嫋。从古然也。”中山君曰：“何哉？”大夫旃曰：“君闻癸北子之为人乎？子慎妃耦，十年不遂，恒郁郁离居。曲逆有丑女，眇左目，疹瘢如丛珠，且黑而羸。曲逆人过而不睨。丑女怒，去从师学击筑，弹坎篪，三年精其技。又善为《北里》之舞以惑人。子一见大悦，致厚币聘以归，字曰玄姬。朝筑焉，莫坎篪焉，嬖之甚。子稍出游，归必熟视其面，无不妍者，反笑世人多一目云。其友宛爰都怜之，为致赵女，光艳皦照人，世谓閭须、白台不能似之。子逐出曰：‘何物丑类，敢侪吾玄姬？’所谓玄姬，其君之智人欤？”中山君笑曰：“大夫言过矣！”君子曰：中山君之蔽，一至是乎！妍媸最易辨，且不可，况其他乎？世道既污，以佞为贤，以正直为儼邪者，皆是也。尚何暇中山君之笑哉！尚何暇中山君之笑哉！

宋大心钩与公玉乘、无庸伯仇，同居于乘丘。大心钩学内圣外王之道，淫淫而洽于心。公玉乘迂之曰：“子之道古也，不宜于今。是翠黄擒鼠也，千不得一焉。”乃舍去，学假仁定霸之术，三年而足之。无庸伯仇又尤之曰：“子病大心钩，善矣。子道亦未为得，是使韩卢捕鼠，百而一中焉。予所业则异于是。”公玉乘曰：“何术也？”曰：“捭阖之术也，仪、秦之舌，申、韩之法，轸、到之略也。放之一邑则一邑服，放之一国则一国准，放之天下则天下从。是使蒙贵袭鼠也，十不失一焉。”大心钩、公玉乘疑之，相与说于秦王。大心钩进曰：“王道如春，煦妪兆民，无迹可窥，均囿至仁。王假臣以三十年，鸿化覃于迹遐矣。”王曰：“子之言美矣，惟黄虞能致之尔，寡人不能伺也。”目公玉乘言，公玉乘进曰：“揣摩地势，明王之制，义融于人，已蚀其利。王假臣以十年，霸业可定矣。”王曰：“子之言良矣，惟桓、文能行之尔，寡人不能学也。”无庸伯仇见二人所对不合，于是不待王见问，目如明星，风雷隐隐起舌间，利害粲如也。言已，且继曰：“愿王假臣五月

之久，四海诸侯皆惧，膝行而来朝矣。”王大悦，曰：“此寡人夙夜不敢忘者也！”即命为上大夫，与闻国政。公玉乘去之齐，不遇，又之宋、之卫，无客之者。晋人闻而召之，亦为大夫。大心钩轍环诸侯，皆不售，老死垂丘，一如无庸伯仇之言。君子曰：羽龠、于戚之舞，不可施郑、卫之邦，亦犹子女优杂之戏，不可陈齐、鲁之俗。大心钩欲行先王之道于春秋之世，难矣哉！

晋定公好以位骄人。扬食我谏曰：东海有巨鱼，名王鲙焉，不知其大多少。赤帙曳见鳬赭间，则其鬣也。王鲙出入海中，鼓浪喷沫，腥风盖翛翛然云。逢鯨必吞，日以十千计不能饜。出游黑水洋，海舶聚洋中者万，王鲙一喷，皆没不见。其从雄行海间，孰敢向问之者？溯潮上罗刹江，潮退胶焉，矗若长陵。江滨之人以为真陵也，涉之，当足处或战，大骇。斫甲而视，王鲙之肌。乃架栈而脔割之，载数百艘。乌鸢蔽体，群啄之，各饫。夫王鲙之在海也，其势为何如？一失其势，欲为小且不可得，位其可恃乎哉？”定公曰：“寡人已知之矣，子姑就舍。”君子曰：德称其位者恒下人，反是则骄。是何也？德则虚，不德则盈。虚则能容，盈则覆，理也。传曰“君子以虚受人”，又曰“日中则昃”，可不信夫！

齐侯再伐山戎。宾胥无问曰：“闻君将有事山戎，然乎？非与？”公曰：“然。何如？”曰：“以臣观之，可伐者五，不可伐者一。”公惊曰：“何谓也？”曰：“谋夫孔多，可伐者一也。矛戟铍利，幡帜精明，可伐者二也。既廩充刃，饷弗绝，无仰于邻，可伐者三也。卒乘辑睦，队伍成列，不战则已，战无不克，可伐者四也。大而陈、蔡、宋、卫，小而邾、邓、杞、薛，皆与国也，奔号承令，匍匐恐后，可伐者五也。以此言之，止君勿行者惑也。臣窃有私焉，夫山戎，蕞尔之邦也，使诚有罪，君亦既伐之矣，奈何再乎？为土地耶，海滨千里，君悉有之，何爱僻远之野，以广君土疆？为民人耶，衣冠剑舄，充斥君之境上，何爱魑结卉裳之俗，以乱我边陲？为一战可以定伯耶，君已帖陈服郑，亲鲁而攘楚矣，何假乎山戎？今再帅师，徒使斯民肝脑润草莽，枯骸暴原野耳。夫争地以战，残民以逞，非仁君也。非仁君不足以霸诸侯，此不可伐一也。”齐侯曰：“大夫言固善，山戎屡悖寡人，奈何？”宾胥无曰：“熊黑豺虎并家于山，蛟鼉鱼鳖俱穴于渊，九彝百蛮均宅于仁。君务仁德之修，独不能容一山戎乎？容之则来庭，伐之则叛去，力不胜德故也。君请改图焉。”齐侯曰：“大夫之言善。”止。君子曰：桓公贤君哉，不然，何闻义则服如此也。

南文子任卫国之政，察见渊鱼，人莫不畏之。一旦忽若狂易者，以足衣为巾，以冠纓苴履，以食豆而羹簞，百物靡不反者。卫君深忧之，亲枉驾文子之间，问曰：“先生病耶？”曰：“臣非敢病也。”曰：“先生非病，何反悖若是耶？”曰：“臣非敢反悖也，效尤也。”曰：“何谓效尤？”曰：“今国中法制不定，上下无章，骹暴者字民，孱夫操弓矢出斗，是簞受羹而豆盛食也。贵戚之卿混乎舆台，是履苴冠纓也。髡钳之伦升于上士，是巾足衣也。举国反易，而无一入悟者，君顾独忧臣乎？臣实病，亦一身尔，如国何？”卫君曰：“目能察白黑，而不见其睫。心能识

壮耄，而不觉其形。自蔽之患也，请为先生更诸。”君子曰：南文子托疾以悟卫君，美矣。卫君闻之，即有心目之喻，亦易悟也哉。《诗》曰：“鹤鸣于九皋，声闻于天。”此之谓也。

渔者庶其廉与妇竞绝，数月不通。于越入楚，兵大掠。各东西匿，死生不相恤。人诤庶其廉盍聚诸，辄谢去。一日，渔于海，获甲虫曰蜃，雌雄相负，虽风涛不解。庶其廉悔曰：“是物也，人或不如可乎？”归召妇与居，礼之终身。君子曰：阴阳合而大化彰，寒暑正而岁功成，夫妇和而家政理。天道也，亦人道也。俗降世污，有反目至死弗覿者，不亦悲夫！视庶其廉之能悔，抑又贤矣。

秦有尊卢沙者，善夸谈，居之不疑。秦人笑之，尊卢沙曰：“勿予笑也，吾将说楚以王国之术。”翩翩然南。迨至楚境上，关吏絏之，尊卢沙曰：“慎毋絏我，我来为楚王师。”关吏送诸朝，大夫置馆之。问曰：“先生不鄙夷敝邑，不远千里，将康我楚邦。承颜色日浅，未敢敷布腹心，他不敢有请，姑闻师楚之意，何如？”尊卢沙怒曰：“是非子所知！”大夫不得其情，进于上卿瑕。瑕客之，问之如大夫。尊卢沙愈怒，欲辞去。瑕恐获罪于王，亟言之王。趣见。未至，使者四三往。及见，长揖不拜，呼楚王谓曰：“楚国东有吴越，西有秦，北有齐与晋，皆虎视不瞑。臣近道出晋郊，闻晋约诸侯图楚，刑白牲，列珠盘玉敦，歃血以盟曰：‘不祸楚国，无相见也。’且投璧祭河，欲渡。王尚得奠枕而寝耶？”楚王起问计，尊卢沙指天曰：“使尊卢沙为卿，楚不强有如是。”王曰：“然。敢问何先？”尊卢沙曰：“是不可以空言白也。”王曰：“然。”即命为卿。居三月，无异者。已而晋侯帅诸侯之师至，王恐甚，召尊卢沙却之。尊卢沙瞠目视，不对。迫之言，乃曰：“晋师锐甚，为王上计，莫若割地与之平耳。”王怒，囚之三年，劓而纵之。尊卢沙谓人曰：“吾今而后，知夸谈足以贾祸。”终身不言，欲言扞鼻即止。君子曰：战国之时，士多大言无当，然往往藉是以媒利禄，尊卢沙亦其一人也。使晋兵不即至，或可少售其妄。未久辄败，亦不幸矣哉！历考往事，矫虚以诳人，未有令后者也。然则尊卢沙之劓，非不幸也，宜也。

宋有白冥子旗，耕于渠蔭之野，得石焉。圆而皙，肉且倍好，上有蒲谷文。子旗熟视之曰：“质如截肪，泽而有章，其璧也哉？孚尹旁达，廉而不刿，其璧也哉？无功而家大宝者祸，当献诸朝。”于是沐浴冠带，言于周王曰：“臣渠蔭之贱夫也，偶挈耒耜以耕，窃不自意，地不爱宝，获嘉璧焉。臣不敢私，闻王将有事上帝、方明，六玉阙其一焉，敢献诸下执事。”王使大夫黻受璧，荐诸玉尹。玉尹曰：“嘻，是璿也。”却还之。子旗抱石叹曰：“吾闻有道之朝，是与非别白。绣衣虽华，不髡以补冠，太阿虽钝，不季以割牲。今强谓璧为璿，可不可乎？”楚丘丈人过而视之，曰：“子旗其幸矣哉！”子旗怒曰：“何幸也？”曰：“卞和以玉献尚遭刖，况尔荐璿者乎？”子旗终不悟。君子曰：士以真材炫，且犹不可，假才能自致与？呜呼，世不特一子旗也。

越人甲父史与公石师交。甲父史能计而弗决，公石师善决而计疏，各合其长，事无留行，人两而一心也。因语相侵，离去，政辄败。密须奋泣谏二人曰：“君不闻海虫有水母乎？水母无目，资虾以行，虾亦资水母食，两不能无也。水母姑置之，又不闻有琐吉乎？腹藏蟹，饥则蟹出求食，归则琐吉饱。否乃死，蟹失所巢，亦两不能无也。琐吉姑置之，又不闻夏屋有蜾鼠乎？与邛邛、巨虚比，为邛邛、巨虚啮甘草。即有难，邛邛、巨虚负而走，亦两不能无也。蜾鼠姑置之，又不闻西域有共命之鸟乎？枳首一体，性多妒，饥则争啄，一俟其瞑，餐毒草害之，及下嗑皆毙，亦两不能无也。是皆山海虫尔，不足怪。虽人亦有之，北方有比肩之民，迭食而迭望，失一则死，亦两不能无也。今二人甚类之，其所异者，彼以形，此以事尔。奈何离去？奈何离去！”二人相顾曰：“微奋言，吾等将愈败。”欢焉如初。君子曰：十二官各有所司，必相资以成体。况尺有所短，寸有所长，何可自用乎？密须奋可谓善讽矣！

猗于皋闻尾勺氏畜豹善捕兽，以双白璧易之。且肆筵，召所与游者饮，出豹于庭而譟其能。于是冶金为绳，系之文罗，日割牲啖之。居亡何，有硕鼠过宇下，急解豹毙之。豹视鼠若不见，猗于皋怒詈之。他日又有鼠过焉，猗于皋复纵之，豹遇鼠如初。猗于皋怒鞭之，豹辄嗥，猗于皋愈鞭之。易以縲继，置之牛羊栈中，日以糟。豹丧欲泣，猗于皋之友安期子佗闻之，诮曰：“吾闻巨阙虽利，补履不如利锥；锦衣虽丽，供不如尺布；文豹虽鸷，擒鼠不如狸狌。子何愚也？曷不用狸狌鼠，而纵豹捕兽哉？”猗于皋说，如其言。未几，狸捕鼠且尽，豹获獐鹿麋以归，无算者。君子曰：兽固善捕，亦各有所能，至于用人，乃违其才，何耶？

楚多鹑，善格，如胶弗之解。大夫黎嗜之，偶使韩，遂挟以行。左右言于韩君，君说之，令国中罗鹑与格，皆不胜。君以韩无鹑，愧之。无钩大夫曰：“夫鹑，海内所有也，而韩独无乎？然而能格与否，在所择焉尔。今衣褐而班文鹑也，翁鳞而尾佳鹑也，刀啄而剑距鹑也。鹑则鹑矣，求能格者几何？虽然，此不足道也。国中圆冠方屨，尧行舜趋者，皆士也，能与君排难解纷者复几何？能否在君，不在物也。”君说。择善鹑与黎格，卒大胜。韩因此而得择士之法。君子曰：古语有云，羊质而虎皮，见草悦，见豺战，士鲜不类之。然岂无真虎哉？亦患人君不能用耳。

楚帅师伐晋，晋人恐，严甲兵以待。楚入河阳，退师，未几又入，如是者三。晋侯疑，朝群臣问焉。伯瑕对曰：“楚诱我也，急宜驱，弗驱必深入，存亡不可期。”晋侯曰：“子计疏矣。”伯瑕悲曰：“君如弗纳臣言，臣终不能俘随君，请先去之。”晋侯斥之，问步毅。步毅对曰：“楚非昔楚矣，执政众乖，内嬖日盛，曳绮縠而副玉珈者，后宫千人，旦讴莫酣，惟日不足，焉能及我？”问士渥浊。士渥浊对曰：“毅言固当，亦知其一，未知其二者也。楚西有秦难，东诸侯则齐、郑、鲁、卫，枕戈待隙，独吾国有新丧，未暇攻。彼虞我兵起，五国必应之，故先动相制耳，不足虑也。”问范。对曰：“如二大夫言。”问韩起。韩起大笑绝纓。晋侯变色曰：“大夫笑寡人乎？”起对曰：“老臣何敢笑君？实笑雁奴不知也。”晋侯曰：

“何谓也？”曰：“具区之泽，白雁聚焉，夜必择栖。恐人弋己也，设雁奴环巡之，人至则鸣，群雁藉是以瞑。泽人熟其故，爇火照之，雁奴戛然鸣，泽人遽沉其火。群雁皆惊起，视之无物也。如是者四三，群雁以奴给己，共啄之。未几，泽人执火前，雁奴不敢鸣，群雁方寐，一网无遗者。今楚师进退三，执火之谓也，君何不少察之乎？”晋侯曰：“人不当如是哉！”于是大严守备。楚子闻之，曰：“勿谓晋无人。”不敢侵。君子曰：晋侯其善谋哉！集众人之虑，必有一长者。及韩起献计，楚人知悉其情，遂退师。《诗》云：“先民有言，询于刍蕘。”况士乎？

宋剔成君自高，视群臣皆下。有谏者，辄拒曰：“尔欲上我耶？母不已也。”指所佩剑曰：“惧此乎？”皆怖汗而退。欲造九成台于雍丘之郊，恐群臣言，戒门者毋纳士，纳则死。北殷子且谓门者曰：“吾将见吾君。”门者沮之。子且坚欲入，且曰：“吾事君十年，岂不知君？君所甚恶者谏耳，吾不谏则已，何沮也？”曰：“子既不谏，欲入何为？”曰：“吾善为鸡戏，将以悦君也。”门者入白剔成君，君召至。子且鼓肱为翼，胶胶而长鸣。鸣已，急趋出，气甚畅。君怪之，趣使还，问曰：“子人耳，乃效鸡鸣，何也？”曰：“臣尊鸡甚，故效之。”曰：“何故尊之？”曰：“臣以尧舜之知，或不如也。”曰：“是何言与？是何言与！寡人闻，非圣人者无法，况方之异类乎！”曰：“臣焉敢非圣人，窃有疑也。道蔽天地者尧，德极万世者舜，皆古圣人也。今谓其知不鸡若者，诚过乎激。然风雨晦冥，能司晨不愆度者，尧舜能之乎？”曰：“不能也。”曰：“尧舜虽大圣，司晨必以鸡乎？”曰：“固也。”曰：“君知如此，奈何尽下群臣无若鸡者乎？”君喜曰：“群臣无言及兹者，今乃始闻之。寡人有过，子宜力谏也。”曰：“君令臣谏，臣不敢隐。今赋急民单，环四封皆强敌，夙夜忧勤，且惧不免，况事游观乎？”曰：“寡人不敢也。”曰：“君曰不敢，而造九成之台，何也？”剔成君即日罢其役。君子曰：日之行昼，天下无不照。月之行夜，万国无不明。然日月之光有所不及者，一灯之微，足补其功。此盖子且鸡喻之说也。

余为《燕书》四十篇，盖取郑人误书“举烛”之义。读者好之，谓有秦汉风。余独愧汗弗止者，何也？自婴忧患以来，神情销沮，见于觚翰之中，气荼而辞荒，恶在其能秦汉也？不犹优孟之似孙叔敖哉！至正丁酉夏五月记。

◇拟答吕相绝秦书

昔我嬴秦，实长西戎。献公不我鄙夷，以伯姬归我穆公，穆公不敢忘。献公薨，国内不靖，群公子出奔。穆公惧大国社稷之陨，会齐人纳惠公于晋。惠公许以河外列城五，东尽虢略，南及华山，内及解梁城。言犹在耳，乃即背之。会晋荐饥，来乞糴于我。诸大夫恶惠公二三其德也，欲乘机伐之。穆公则曰：“其君是恶，其民何罪？”于是乎输粟于晋，自雍及绛，相继不绝。未几，秦亦饥，穆公又曰：“晋君其能恤我民矣乎？”遣使之晋。惠公弗念穆公之施，绝而弗与。穆公不得已，有韩原之师，相从惠公而西。虽然，岂敢以至？即改馆，馈七牢焉，使归于国。及晋再

饥，穆公又饩之粟。惠公薨，怀公遣师军于庐柳，威灵所加，孰不畏之？我穆公忘己之弱，使公子繁如晋师，天诱其衷，退军于郇。文公遂入曲沃，朝于武宫。吕卻畏逼，将焚公宫，以图不轨。穆公知之，乃潜会文公于王城，诱而杀之。文公即位，来逆夫人嬴氏。穆公以晋国大臣未附，俾三千人卫之以归。微我穆公，惠、文之能有国，未可知也，则是我有大勋于晋，岂惟诸侯知之？皇天后土，实与闻焉。文公当不忘我旧德，戮力同心，以辅王室。

子带之乱，天王出居于郑，使左鄢父来告难，亦使简师父以告于晋。我穆公左执鞭弭，右属橐鞬，亲帅师屯于河上，以迟文公。文公恐我分其绩也，乃辞我师而下，纳王于成周，杀太叔于隰城，而独受阳樊、温原、攢茅之田。我穆公不敢言。文公自是信宣于诸侯，虞夏商周之胤，莫不震叠，相率而朝于晋。非为秦也。文公又以诸侯方睦，欲修旧怨于郑。穆公畏文公之威，不我自宁，急出师军汜南。郑伯恐，使烛之武来言曰：“君尝为晋君赐矣，许君焦瑕，朝济而夕设版焉，君之所知也。夫晋何厌之有？既东封郑，又欲肆其西封，若不阙秦，将焉取之？”穆公闻其言而惧，结盟而还。

文公薨，襄公即位。穆公有事于郑，未尝以一矢犯晋疆场。襄公蔑弃我穆公，以墨衰即戎，败我于殽，殄歼我卒徒，系累我三帅。我穆公亦不唯晋之怨，乃自悔过，誓告于群臣。然犹愿徼灵于惠、文，以事我襄公。襄公不察我之诚，又帅宋、陈、郑三国之师，取汪及彭衙。国中之人怒曰：“晋不报德则已，乃日事干戈，是欲滕、薛我也。”将悉敝赋，以待于郊，亦冀晋人遣一介行李之来，修复旧好。襄公唯力是恃，又伐我，围祁新城。

襄公薨，穆公亦即世。晋人以国家多难，欲立长君，使先蔑、士会如秦，逆公子雍。我康公唯穆公之事是效，多帅徒卫以纳之。晋人遽食前言，而立灵公，又败我于令狐。自时厥后，又取我少梁，又战我于河曲。康公薨，共公即位。灵公亦悔于厥心，欲求成于我。又不明言，以侵崇急我。我共公恶其诡道，弗敢与成。灵公薨，景公即位。景公不务抚绥秦民，又迫我于辅氏。

景公薨，君嗣厥位。寡人谓二三大夫曰：“我两国匪以玉帛相见，而以兴戎，寡人之耻也。盍行成乎？”君亦降心相从，会于令狐，而盟于河之东西。口血未干，又使卻魋乞师于鲁，欲以伐我，且以蔓辞，以文致我罪。寡人闻之，困兽犹斗，况国乎？君既有意督过矣，寡人亦何爱一国士卒，不与君周旋左右乎！君若惠顾前好，唯令狐之盟是申是寻，亦唯命；锻乃戈矛，备乃弓矢，俾两君相见于野，亦唯命。寡人敢帅西方之诸侯，俯伏以听，唯执事其进退之。

◇补范少伯辞越王书

臣闻知足不辱，知止不殆，古之明戒也。臣虽不佞，窃尝从事斯语，敢白其私于下

执事，唯君王加察焉。

臣本南阳一布衣，自谓衰贱，未尝世禄，故饮食则甘天下之无味，居则安天下之贱位，被发佯狂，不与于世。而君王待之过礼，置诸群臣之列。臣日夜心计之，一介狂士，而上辱君王之知如此，当尽瘁以事国。即于国事无所建白，设有不幸，誓伏剑结缨，以报称万一。言虽不出诸口，上帝鬼神实鉴临之。夫椒之役，夫差介其人民之众，以残伐吾邦，夷吾宗庙，邦为空棘。君王以馀兵五千，保栖会稽，下守溟海，唯鱼鳖是见，困亦甚矣。夫差不道，复追而围之。大夫种膝行顿首请成，夫差听申胥谗，毅然不许。君王悲甚，至欲杀妻子，燔宝器，触战以死。臣时在左右，忧惧不知所为，亦屡思克践前志。所以未忍即死者，将有所图也。幸赖先王之灵，夫差悔过，卷旆而旋。君王既反国，臣亦得效犬马奔走，与大夫柘稽为质于吴。

夫差畏君王之威，不敢久留臣，遣之东归。君王因与臣及大夫种谋，以复仇为事。食不杀而饜，衣服纯素，不衾不玄。内饬其政，外事诸侯。如是者二十馀年，始发习流二千，教士四万人，君子六千人，诸御千人，有事于吴，及其平而还。后四年，复往伐焉。败之于囿，又败之于郊，又败之于津。如是三战三北，遂围之，栖夫差姑胥之山。夫差使王孙骆，肉袒膝行请成。君王弗之许，乃被五胜之衣，带步光之剑，仗屈卢之矛，瞋目大言以执之。夫差惧，太息四顾，引剑而死。君王乃北渡淮，与齐、晋诸侯会于徐州，致贡于周。周元王使人致胙，命为伯。当是时，越兵横行江淮东，诸侯毕贺。

初，君王之在会稽，其辱为已甚。臣岂不知主忧则臣劳，主辱则臣死？其不能即死者，为此事也。藉君王之威武，二三大夫之用命，一雪其仇，始愿从会稽之诛。君王怜臣之愚，不赐臣以死，乃欲与臣分国而治。且臣闻之，四时之序，成功者去，天之道也。功成名遂身退，明哲之事也。持禄固位，知进而不知退，危亡之道也。昔晋大夫析奚为中军尉，请老而归，身名俱全，人以为知分。申侯有宠于楚、郑之君，楚、郑之君唯其言之是听，无不可者，卒致首领不保，为天下万世笑。何也？不能退也。况臣起自布衣，幸得侍卫左右，何功于越？而称上将军。大名之下，难以久居。若恋执宠荣而沈溺不返，不有人祸，必有天殃。君王幸察臣知止知足之意，赐臣骸骨，得乘扁舟，出三江入五湖，去耕东海之滨，则志愿毕矣。唯君王留意焉。

◇五炁大有宝书

《陵梵寥辰五炁大有宝书》，为句曲外史陈太虚作。太虚性好道，合丹鹤台涧中，闻余尝究《大洞真》诸部书，求发其秘。予因揽精拏华，为辞五章，托于中黄灵君，序以告焉。然而语各有征，意皆有寓，太虚慎览之，则玄玄之道毕矣。序曰：

玄玄浩劫，龙汉开天。中黄灵君，三景之尊。运动玉枢，道合大始。神化元幽，莫

知其几。据白坐，敷演妙音。陵梵蹇辰，分合五炁。五炁郁勃，凝为天章。九始东炁，龙文流元。瑶华洞阳，王都回先。太黄开清，二象渊通。空清净霭，上炁五冲。三微南炁，神文委精。堂曜焕户，观明启庭。八都录图，十泽应征。上下翥冀，神驾肃征。七华西炁，策文命基。象极载御，璇房荐釐。天元危宫，六天上书。寒灵之府，日闾以舒。五威北炁，皇文馭刚。孝芒宸居，梵度翕章。郁阴绝密，明都皓良。泉曲宵台，煜煜吐阳。一元中炁，玉文养和。上无宛黎，下爽龙阿。虚皇元老，于此啸歌。神母亭毒，万有乃多。青赤白黑，从横交错。黄炁间中，八角布耀。景灵散焕，潜运勃英。堪舆停轮，日月避舍。郁纷纷罗，光偏璇极。元阳玉匱，九灵元篇。《大有宝书》，实垂玉简。飞元上仙，惟耀魄宝。或灵威抑，或赤炁怒。或白招矩，或协光纪，或含枢纽。昼夜动行，游神黄宁。朱炁下藏，冥元上升。凝合妙真，洽于太神。与道为祖，周流八津。罗明皇真，蒙翳大神。龙变巴元，劫仞之神。元康和畅，出入七门。神风流烟，归于无明。无方无象，无景无声。无兆无朕，无幽无明。廓落单郁，皇明流泠。大微扈卫，紫垣鬯英。可以度世，可以延龄。可以阏邪，可以辟兵。藏之金室，龙鬼守扃。勿授下士，以褻我天经焉。

◇东方延蓝渺郁康弥浮皇洞真青炁九始龙文

太清混微天一芽，至神旁魄飞九遐。

灵腴上浮三素遮，神霄赤明生玉葩。

阳林褰开洞真过，紫充藏胞晕幽霞。

帝真导肥上范和，翠元交生象胚华。

轮化无方正不邪，生生不恤年劫多。

◇南方帝溲禅育郁罗干那洞神赤炁三微神文

太明开景标朱陵，大化块圯物以神。

星马在皂鹑吻伸，绛泉上卷华池津。

梵英公子司炎垠，华阙阳堂风火轮。

自然元照符明真，繁想刊落曜中根。

遥翰轻迅上天阊，赤混宝濯资精元。

◇西方颢凝飞元雍观龙炎洞精白炁七华策文

太素皇梵扬金晶，白藏御序肃五兵。

空洞浮寥元极并，散华潜收哺飞明。

紫阳琼蕤割辰衡，璇关起爽归元璿。

嘉穉还结真一庭，泰元左右栖八灵。

昏昏默默中有精，须延勿使霆鬼侦。

◇北方爽朗兜术大演潇图洞明黑炁五威皇文

太冥浩阿君四蒙，清泠使者都大宫。

玉灵玄胄四日彤，缠以长蛇涩欲封。

寒庭幽闺压罗酆，双馆阴闭关元通。

蹇爽回翳神自雄，浮游反命蕴冲容。

离罗来居百灵从，出入三际应无穷。

◇中央阿奕流华曜驾回飙洞灵黄炁一元王文

黄房渊元围中规，悬空特立无东西。

虚元焕落含浮黎，中局束纽北极齐。

神辉旁射婴素蜺，太乙流珠混若鬻。

黄宁练胎元命稽，阴阳大分和天倪。

鬼户闯入日啸啼，至土闻道当勿迷。

◇答章秀才论诗书

濂白秀才足下：承书，知学诗弗倦，且疑历代诗人皆不相师，旁引曲证，亶数百言

，自以为确乎弗拔之论。

濂窃以谓，世之善论诗者，其有出于足下乎？敢然不敢从也。濂非能诗者，自汉魏以至于今，诸家之什，不可谓不攻习也。荐绅先生之前，亦不可谓不磨切也。揆于足下之论，容或有未尽者，请以所闻质之，可乎？

《三百篇》勿论已，姑以汉言之。苏子卿、李少卿，非作者之首乎？观二子之所著，纡曲凄惋，实宗《国风》与楚人之辞。二子既没，继者绝少。下逮建安、黄初，曹子建父子起而振之，刘公干、王仲宣力从而辅翼之。正始之间，嵇、阮又叠作，诗道于是乎大盛。然皆师少卿而驰骋于《风》《雅》者也。自时厥后，正音衰微。至太康复兴，陆士衡兄弟则效子建，潘安仁、张茂先、张景阳则学仲宣，左太冲、张季鹰则法公干。独陶元亮天分之高，其先虽出于太冲、景阳，究其所自，得直超建安而上之，高情远韵，殆犹大羹充郤，不假盐醯而至味自存者也。元嘉以还，三谢、颜、鲍为之首。三谢亦本子建，而杂参于郭景纯。延之则祖士衡。明远则效景阳，而气骨渊然，骀骀有西汉风。馀或伤于刻镂，而乏雄浑之气，较之太康，则有间矣。永明而下，抑又甚焉。沈休文拘于声韵，王元长局于褊迫，江文通过于摹拟，阴子坚涉于浅易，何仲言流于琐碎。至于徐孝穆、庾子山，一以婉丽为宗，诗之变极矣。然而诸人虽或远式子建、越石，近宗灵运、玄晖，方之元嘉，则又有不逮者焉。

唐初承陈、隋之弊，多尊徐、庾，遂致颓靡不振。张子寿、苏廷硕、张道济相继而兴，各以《风》《雅》为师。而卢升之、王子安务欲凌跨三谢，刘希夷、王昌龄、沈云卿、宋少连亦欲蹴驾江、薛，固无不可者。奈何溺于久习，终不能改其旧，甚至以律法相高，益有四声八病之嫌矣。惟陈伯玉痛惩其弊，专师汉魏而友景纯、渊明，可谓挺然不群之士，复古之功，于是为大。开元、天宝中，杜子美复继出，上薄《风》《雅》，下该沈、宋，才夺苏、李，气吞曹、刘，掩颜、谢之孤高，杂徐、庾之流丽，真所谓集大成者，而诸作皆废矣。并时而作有李太白，宗《风》《骚》及建安七子，其格极高，其变化若神龙之不可羁。有王摩诘，依仿渊明，虽运词清雅，而萎弱少风骨。有韦应物，祖袭灵运，能一寄穠鲜于简淡之中，渊明以来，盖一人而已。他如岑参、高达夫、刘长卿、孟浩然、元次山之属，咸以兴寄相高，取法建安。至于大历之际，钱郎远师沈、宋，而苗、崔、卢、耿、吉、李诸家，亦皆本伯玉而宗黄初，诗道于是为最盛。韩、柳起于元和之间。韩初效建安，晚自成家，势若掀雷抉电，撑决于天地之垠。柳斟酌陶、谢之中，而措辞窈眇清妍，应物而下，亦一人而已。元、白近于轻俗，王、张过于浮丽，要皆同师于古乐府。贾浪仙独变入僻，以矫艳于元、白。刘梦得步骤少陵，而气韵不足。杜牧之沈涵灵运，而句意尚奇。孟东野阴祖沈、谢，而流于蹇涩。卢仝则又自出新意，而涉于怪诡。至于李长吉、温飞卿、李商隐、段成式，专夸靡曼，虽人人各有所师，而诗之变又极矣。比之大历，尚有所不逮，况厕之开元哉！过此以往，若朱庆馀、项子迁、李文山、郑守愚、杜彦之、吴子华辈，则又驳乎不足议也。

宋初袭晚唐、五季之弊。天圣以来，晏同叔、钱希圣、刘子仪、杨大年数人，亦思有以革之，第皆师于义山，全乖古雅之风。迨王元之以迈世之豪，俯就绳尺，以乐天为法。欧阳永叔痛矫西昆，以退之为宗。苏子美、梅圣俞介乎其间，梅之覃思精微学孟东野，苏之笔力横绝宗杜子美，亦颇号为诗道中兴。至若王禹玉之踵徽之，盛公量之祖应物，石延年之效牧之，王介甫之原三谢，虽不绝似，皆尝得其仿佛者。元祐之间，苏、黄挺出，虽曰共师李、杜，而竞以己意相高，而诸作又废矣。自此以后，诗人迭起，或波澜富而句律疏，或锻炼精而情性远，大抵不出于二家。观于苏门四学士及江西宗派诸诗，盖可见矣。陈去非虽晚出，乃能因崔德符而归宿于少陵，有不为流俗之所移易。驯至隆兴、乾道之时，尤延之之清婉，杨廷秀之深刻，范至能之宏丽，陆务观之敷腴，亦皆有可观者。然终不离天圣、元祐之故步，去盛唐为益远。下至萧、赵二氏，气局荒颓而音节促迫，则其变又极矣。

由此观之，诗之格力崇卑，固若随世而变迁，然谓其皆不相师，可乎？第所谓相师者，或有异焉。其上焉者师其意，辞固不似，而气象无不同。其下焉者师其辞，辞则似矣，求其精神之所寓，固未尝近也。然唯深于比兴者，乃能察知之尔。虽然，为诗当自名家，然后可传于不朽。若体规画圆，准方作矩，终为人之臣仆，尚乌得谓之诗哉！是何者？诗乃吟咏性情之具，而所谓《风》《雅》《颂》者，皆出于吾之一心，特因事感触而成，非智力之所能增损也。古之人其初虽有所沿袭，未复自成一家言，又岂规规然必于相师者哉！呜呼，此未易为初学道也。近来学者，类多自高，操觚未能成章，辄阔视前古为无物，且扬言曰：“曹、刘、李杜、苏、黄诸作，虽佳不必师。吾即师，师吾心耳。”故其所作，往往猖狂无伦，以扬沙走石为豪，而不复知有纯和冲粹之意。可胜叹哉！可胜叹哉！濂非能诗者，因足下之言，姑略诵所闻如此，唯足下裁择焉。不宣。濂白。

◇答郡守聘五经师书

十一月二十七日，承遣使者来山中，赐以书币，强濂为五经之师。闻命惊愕，不知所云。

虽然，执事之意则甚善也。昔舒人文翁为蜀郡守，招下县年少者为学官弟子。每行县，益从学官诸生明经饬行者与俱，蜀地大化，比齐、鲁焉。执事亦舒产，是宜汲汲孜孜，欲追躅于文翁也。然而兴学在乎明经，明经在乎选傅，得良傅则正鹄设而射志定，土范齐而铸器良，声流教溢，俗转风移。反是则政堕矣，此则执事不可不慎者也。

濂也不敏，幼即多病，若艺黍稷，与肇牵车牛、远服商贾之事，皆力所不任。靖自念之，吾将何执以阅世乎？适家藏古书数千卷，因取翻阅，习久成性，遂不欲弃去，然亦藉是以自遣耳，非有所能也。是故家庭之间，未尝以知经称之。岂直家庭哉，至于乡党州闾，亦未尝谓其通经也。执事者不之察，一旦强儒之，使服深衣大带

，张拱徐趋于讲堂之上，吾恐人无不笑之。而所笑者，又恐不止于区区也，执事何为欲强之乎？

况《五经》自孟氏后无兼通之者，如施雠之《易》，大、小夏侯之《书》，辕固、韩婴之《诗》，尹更始之《春秋》，庆普、郑兴之《礼》，各仅仅成家而已。濂视数子之间，曾不足负羈继以从。执事采浮华而忘本实，但见耳目具者辄聘以为师。执事倡之曰“某可师也”，左右畏威，莫敢谏白，又从而和之曰“某实可师也”，所以滥及于濂。濂纵不顾清议，曲徇执事意而匍匐从之，衿佩森如立竹，执经问难，欲屏之耶，则所职何事？欲应之耶，则环视其中，枵然无所有，其于窘迫，实有不堪。执事何为欲强之乎？

古之通经者，非思腾簸口舌，以聋瞽时俗，实欲学为忠孝。而孝者又百行之冠冕，苟于孝道有阙，则虽分析经义如蚕丝牛毛，徒召辱耳。阳城为学官时，谓诸生曰：“凡学者，学为忠与孝也。”诸生有不省亲者乎？其有不省亲者，即斥去之。此古人龟鉴也。濂严父年垂八十，旦莫弄雏亲侧，以尽爱日之诚，犹惧不足。乃使弃之，以临诸生，诸生将何以取法乎？诸生尚不欲久去膝下，况为师者乃可尔乎？世岂无阳城，将何面目以见之也？执事何为欲强之乎？

师严然后道尊，理势然也。濂以轻浮浅躁之资，习懒成癖，近益之以疏顽，不耐修饬。乱发被肩，累日不冠，时同二三友徒跣梅花之下，轰笑竟日。不然，则解衣偃卧，看云出岩扉中，有类麋鹿然，见人至辄惊遁，欲危坐一刻，亦不可得。自知获罪名教，痛思惩艾，卒不可变。此执事素所知，非今日造此饰词。如此之人，不弃绝则已，安可使仪刑后进？执事何为欲强之乎？濂虽不能造文，性乐之甚。当操觚沈思时，阖扉凝坐，不欲闻步履声，虽犬猫不使之近。即近，辄拊几大呼，人咸指为狂易，传以为笑。傥章不能就，击磬绕室中行。或使小苍头筒发，如捕虱状。或摩搔膺腹，使气隆隆然升降乃已。若一入城市，众人丛居，又无邃房曲阁可下笔。笔未书半行，狙伺猿视，大鸣小噪，败人兴趣。宁失万金之产乃不怨，苟废此乐，不如无生。执事何为欲强之乎？

平生朴戆，视人世百为，颠倒变幻，动如神鬼。或握手视肺肝，乃宿刀剑之惨。或斗争纷不可解，则暗敦玉帛之好。如此之类，不一而足。明以告我，尚不能通晓，况启之以端，欲使其揣摩测度耶？自料决不能与此辈周旋，苟与之相周旋，宁免其见卖乎？况兼目有短视疾，虽月下可读蝇头之字，距寻尺间，白昼则不见人。不相知者，必以我为简，非挟人以济，如水母之目虾，必有祸我者。素无所仰于人，不知奚故而自求苦乃如此。执事何为欲强之乎？

又自婴祸患以来，得怔忡疾，见一夫负戟而趋，心辄惊怖，若杵击下上，面无色泽，口噤不能对人。近年衰孱日甚，酬答稍烦，则肩髀颓堕，重如压石，急呼枕熟寐一二时，然后渐复其旧，自度亦不久在人世者。所居之北，有一峰峻甚，俗以其如

冯翊夏阳之山，因号曰小龙门。其间多闲旷之地，思诛茆架草室三间，以奉老亲，则志愿毕矣。此足一出，众事皆弃。尝日夜计之，与执事相契亦欢甚，初无不共戴天之仇，执事何为欲强之乎？

昔者卫人有西乞牟，问褚师仑曰：“世传五凤，信祥征乎？”曰：“有。东方则发明，南方则焦明，西方则肃爽，北方则幽昌，其见或有孽焉。唯中央号凤凰，乃至瑞耳。”曰：“可获之乎？”曰：“否。有德则见岐山之阳尔，非可以力致也。”褚师弗之信，出千金号诸岐山之阳。岐山民疑之，罗彩沔售焉。褚师持归，夸诸人。人皆笑之。执事之所为，无乃有类于是乎？吾婺为东莱倡道之邦，而龟山、考亭之正宗，又往往传诸学者，故闾閻之家，多尊道德而浅功利，据案谈经，比比皆是。执事不彼之即，而独此是强，岂弃瑞凤而爱彩沔乎？古人有云：经师易得，人师难遇。执事于易得者尚不鉴其伪真，况所谓难遇者耶？窃为执事不取也。

虽然，执事孜孜汲汲，以兴学为意，何让乎蜀之文翁？但未能选良师傅，其术为少疏耳。今之为守牧者，不为不多也，而溺冠跨项，亦有之矣。如执事者，又何可少哉？又何可少哉！濂非明经者，愧不能成执事之意，化吾邦如齐、鲁，故历疏鄙衰之不可强者如此，惟执事采择焉。傥黜之不制，则黄冠野服，负亲而逃东海之上，岂能悖性徇物，亶随人作上下耶？礼币随使者还。千万情辞，笔不可尽。

卷四

◇太乙玄征记

金华宋濂，赋质甚弱，十日九疾。生产作业之事，皆力有所不任，唯日学操觚，造为文章。精思弗得，罢极就寝。

梦一老父，白发鬅髻，与雪斗洁，身被黄服，手支青藜杖，徐徐而前，招濂谓曰：“若何疲思之甚耶？吾乃太乙之精，在皇汉时，曾降天禄阁，以《洪范》五行授刘向。若今意有何图，第言之，吾当有以处若也。”濂再拜曰：“下土蚺虱臣，不自料得接休光，以沐浴神化，亦既幸矣。复不以臣之微贱，使吐其情辞。臣虽无知，敢不精白一心，以承灵贶？臣受气于天，孱弱而蒙。庚戌之岁，律中应钟，日在于氐，地寒以风。母妊七月，臣体即降。生未五龄，百疾交攻，热火郁木，邪沴制阳，肝气动摇，手牵目瞠。谒医视之，谓为癰，毒艾焮肤，其苦莫膺。虽脱于虎口，筋骸弗强。有牛负轭，有在场，力既弗任，田卒秽荒。幸有书一束，尘啮蠹戕，振拂驱剔，以佩以藏，以啜以尝，以求其方。疲精竭思，攻为文章，穷年矻矻，恒不知变更。”

太乙曰：“吾闻心有所溺者，必有所甚乐也。若之所嗜如是，将乐之耶？抑弗获已也？”濂曰：“臣为文之时，独潜阖庐，五官内守，形若槲株。凡虑既澄，运思希夷，上升层霄，下入重垆，缦庶汇，弥布大区。自形自色，匪可数知，一一摄之，若禽在笵，若兽在周陆，纵健距捷羽，曾不得离其范围。及夫意畅气熙，与神合机，岳荡河翻，雷椎霆驱。倏尔阴合，然阳施，鬼出电入，载正载奇，万紵千变，莫穷端倪。虽身执台枢，腰悬金鱼，膳羞熊蹯，居饰璇题，入则丽姝吹竹弹丝，出则戎士负弩曳旗，亦不足以逾其适。臣实乐之，初非有弗获已也。”

太乙曰：“若乐则乐矣，古之人亦有业是者乎？”濂曰：“有之，虽更仆不可尽也，请陈其略：昔有巨儒，曰太史迁，豪气孤，阔视无前，执笔著书，动数万言，秘之金匱，及藏名山，至今文光，上烛九天。董生三策，扬雄《太玄》。相如《大人》，退之五原。若修、若轼，若巩之贤，各有论著，焜耀后先。虎凤腾跃，韶钧相宣，汗澜卓蹕，盘纡蝉连。业之既专，厥功乃全。其功何居？时磨琢之。耄之获之，湘之澹之，炊之酌之，使心乐之。一日不治，若芒刺肌，六气昏昏，精神不来。由是观之，古之人所业，其亦有以哉？”太乙曰：“嘻，若言陋矣。知冠角髯胡之为象，而不知弁冕纓之制。知糗饭藜羹之为美，而不知淳熬肝之味。知吴楚艳之为曲，而不知夏武勺之音。若言陋矣！”

濂于是恍然自失，膝行而进，俯首至地，且拜且祈曰：“臣不佞，窃受教于先生长者，学文二十余年，自意已造其极，不知犹未也。夫井鱼固不足以语大，夏虫固不足以语寒。幸察臣之诚，怜臣之愚，授臣以要道，使臣闻之，虽即死无憾。”太乙

愀然不答。濂复殷勤致辞，俯伏俟命，历一时之久。太乙三叹而后言曰：“上堪下舆，惟人中居，厥初芒芡，蓍未有知。野鹿标枝，蚩蚩狃狃。圣人者出，扶弼教基。揭我日月，烛我冥馗。所谓建生民极、立天地心者，是不有其道欤？道虽无形，揆文可知。《典》《谟》浑淳，卦画闳奇，《雅》《颂》恢张，《礼》《乐》威仪，《春秋》谨严，袞袞钺铖。不由于此，去道远而。舍其根荄，玩其葩叶，而何以史迁诸子为？且非文不行，非文不章。天子非文，曷风四方？诸侯非文，莫守其邦。卿大夫非文，身郁不扬。士庶人非文，卒遏于乡。故云文者，乾坤之粹精也，阴阳之灵和也，四时之衡石也，百物之錡鍳也，中国之采章也，四裔之仪法也，可不务乎？彼辨博驰骋，以邪夺正，是诬世也。卑辞甘言，藉威取宠，是媚权也。佞墓受金，是非舛缪，是罔利也。气亡魄丧，恹恹不振，是萎茶也。抽青媲白，眩人耳目，是聒瞽也。若此者弗可枚举，其文乎哉？其文乎哉？吾前之所谓文，则异于是矣。充于一身，和顺内积，英华外发。达于四国，民物阜康，政教鬯洽。笔之于书，则可为天下后世法。传曰‘有德者必有言’，若之志勤矣，其亦慎所学哉！”言讫，四方晦冥，飙风上行，仰视天门，如有火光。反而顾之，太乙已亡。

濂惊而寤，不知其为何祥也，乃召日者占之。日者端栲出蓍，左右揲之，挂而扚之，遇《复》之《离》，曰：是谓后得而先迷。百折旁歧，伫伫安归。虽车坚马肥，终九颠而一瀆。或道之于崇期，载旌以驱，历国过都，膳宰致饩，司里授庐。不亟不徐，直抵夫玄圣之所居。盖“复”者不远复也，而重“离”又文明之象也。此殆示子学文玄征乎？濂于是惕然悟，悉燔毁笔砚，取《六艺》愒温之。未几，学果进。

◇华川书舍记

华川书舍者，乌伤王君子充学文之所也。乌伤有大泽曰华川，唐武德间尝置华川县，不久而县废，今之所谓绣湖者，即其地也。子充之居，直湖之阴，犹系之以旧名，志乎古也。子充之志乎古，岂止此而已哉，上自群圣人之文，下逮诸子百家之文，咸萃舍中。日冥搜而精玩之，大肆其力于文，愈出而愈无穷。以濂同受经于侍讲黄先生之门也，请为记书于舍壁。

濂虽稍长于子充，视子充之辞锋横厉，百未能及一，纵强颜欲记之，将何所云耶？虽然，子充弱冠时，濂见其文，辄曰：“子充他日当以文知名。”今始十年，而子充名动荐绅间，识者遂以濂为知言。濂虽不文，宁不为子充一言乎？

呜呼，文岂易言哉！日月照耀，风霆流行，云霞卷舒，变化不常者，天之文也。山岳列峙，江河流布，草木发越，神妙莫测者，地之文也。群圣人与天地参，以天地之文发为人文，施之卦爻，而阴阳之理显。形之《典》《谟》而政事之道行，味之《雅》《颂》而性情之用着，笔之《春秋》而赏罚之义彰，序之以《礼》，和之以《乐》，而扶导防范之法具。虽其为教有不同，凡所以正民极、经国制、树彝伦、

建大义，财成天地之化者，何莫非一文之所为也。自先王之道衰，诸子之文，人人自殊。管夷吾氏则以霸略为文；邓析氏则以两可辨说为文；列御寇氏则以黄、老清净无为为文；墨翟氏则以贵俭兼爱、尚贤明鬼、非命尚同为文；公孙龙氏欲屈众说，则又以坚白、名实为文；庄周氏则又以通天地之统，序万物之性，达死生之变为文；慎到氏则又以刑名之学为文；申不害氏、韩非氏宗之，又流为深刻之文；鬼谷氏则又以捭辟为文；苏秦氏、张仪氏学之，又肆为纵横之文；孙武氏、吴起氏则又以军刑兵势、图国料敌为文；独荀况氏粗知先王之学，有若非诸子之可及。惜乎学未闻道，又不足深知群圣人之文。凡若是者，殆不能悉数也。

文日以多，道日以败，世变日以下，其故何哉？盖各以私说臆见，哗世惑众，而不知会通之归，所以不能参天地而为文。自是以来，若汉之贾谊、董仲舒、司马迁、扬雄、刘向、班固，隋之王通，唐之韩愈、柳宗元，宋之欧阳修、曾巩、苏轼之流，虽以不世出之才，善驰骋于诸子之间，然亦恨其不能皆纯。揆之群圣人之文，不无所愧也。上下一千余年，惟孟子能辟邪说，正人心，而文始明。孟子之后，又惟舂陵之周子，河南之程子，新安之朱子，完经翼传，而文益明尔。

呜呼，文岂易言哉！自有生民以来，涉世非不远也，历年非不久也，能言之士非不伙且众也。以今观之，照耀如日月，流行如风霆，卷舒如云霞，唯群圣人之文则然。列峙如山岳，流布如江河，发越如草木，亦惟群圣人之文则然。而诸子百家之文，固无与焉。故濂谓，立言不能正民极、经国制、树彝伦、建大义者，皆不足谓之文也。士无志于古则已，有志于古，舍群圣人之文何以法焉？斯言也，侍讲先生尝言之，子充亦尝闻之，濂复取以为子充告者，诚以子充将以文知名于世，不可不以群圣人之文为勉也。濂家芙蓉山之阳，距子充之居不二舍而近，他日谒子充于湖之阴，仰观俯察天地之文，退坐书舍中，又参之以群圣人之文，则濂与子充各当有所进也。子充以濂言为然乎？虽然，濂言夸矣，子充幸为我删之。

◇释氏护教编后记

西方圣人，以一大事因缘出现于世。自从鹿野苑中，直至于跋提河，演说苦空无量妙义。障机钝利，分为顿、渐，无小无大，尽皆摄入萨婆若海。既灭度后，其弟子阿难陀多闻总持，有大智慧，结集为修多罗藏。而诸尊者或后或先，各阐化源，优波离集四部律，谓之毗尼。金刚萨埵于毗卢遮那前亲受《瑜珈》五部，谓之秘密章句。无著、天亲频升知足天宫，咨参慈氏，相与造论，发明大乘，谓之唯识宗旨。西竺龙胜，以所得毗罗之法，宏其纲要，谓之中观论。炖煌杜法顺，深入《华严》不思議境，大宣玄旨，谓之华严法界观毗尼之法。

魏嘉平初，昙柯罗合持僧祇戒本至洛阳，而昙无德、昙谛等继之，立羯磨法。唐南山澄照律师道宣，作疏明之，《四分律》遂大行，是为行事、防非、止恶之宗。萨埵以《瑜珈》授龙猛，猛授龙智，智授金刚智。唐开元中，智始来中国，大建曼荼

罗法事。大智道璠、大慧一行，及不空三藏，咸师尊之，是为瑜珈微妙秘密之宗。

唐贞观三年，三藏玄奘往西域诸国，会戒贤于那兰陀寺，因受唯识宗旨以归，授慈恩窥基，基乃网罗旧说，作《广制疏论》，是为三乘法相显理之宗。梁、陈之间，北齐惠闻因读《中观论》悟旨，遂遥礼龙胜为师，开空、假、中三观心观法门。以法华宗旨授慧思，思授天台国师智，授灌顶，顶授智威，智威授惠威，惠威授玄朗，朗授湛然，是为四教法性观行之宗。

隋末，顺以法界观授智俨，俨授贤首法藏。至清凉大统国师澄观，追宗其学，著《华严疏论》数百万言。圭峰宗密继之，而其化广被四方，是为一念圆融其德之宗。瑜珈久亡，南山亦仅存，其盛行于今者，唯天台、慈恩、贤首而已。此则世之所谓教者也。

世尊大法，自迦叶二十八传至菩提达摩，达摩悲学佛者缠蔽于竹帛间，乃宏教外别传之旨，不立文字而见性成佛。达摩传慧可，可传僧璨，璨传道信，信传弘忍，忍传曹溪大鉴禅师慧能，而其法特盛。能之二弟子怀让、行思，皆深入其阃奥。让道一一之学，江南宗之。其传为怀海，海传希运，运传临济慧照大师义玄，玄立三玄门，策厉学徒，是为临济之宗。海之旁出，为汾山大圆禅师灵佑，佑传仰山智通大师慧寂，父唱子和，微妙玄机，不可湊泊，是为汾仰之宗。思传希迁，迁之学湖南主之。其传为道悟，悟传崇信，信传宣鉴，鉴传义存，存传云门匡真大师文偃。偃之气宇如王，三句之设，如青天震雷，闻者掩耳，是为云门之宗。元妙师备，偃之同门友也，其传为桂琛，琛传法眼大师文益，虽依《华严》六相唱明宗旨，迥然独立，不涉凡情，是为法眼之宗。迁之旁出，为药山惟俨。俨以宝镜三昧、五位显诀、三种渗漏传昙晟，晟传洞山悟本大师良价，价传曹元证大师本寂，而复大振，是为曹洞之宗。法眼再传至延寿，流入高句骊。仰山三传之芭蕉彻，当石晋开运中，遂亡弗继。云门、曹洞，仅不绝如线。唯临济一宗，大用大机，震荡无际，若圣若凡，无不宗仰。此则世之所谓禅者也。

呜呼，教之与禅，本无二门，依教修行，盖不出于六度梵行，而禅定特居其一。由众生根有不齐，故先佛示化，亦不免有异耳。奈何后世各建门庭，互相盾矛，教则讥禅滞乎空寂，禅则讥教泥乎名相，藉藉纷纷，莫克有定。是果何为者耶？此则教、禅异涂，犹可说也。自禅一宗言之，佛大胜多与达摩同学禅观，达摩则远契真宗，胜多所见一差，遂分为有相、无相、定慧、戒行、无得、寂静六门，非达摩辟之，安能至今廓如也。慧能与神秀，同受法于弘忍，能则为顿宗，秀则别为渐宗，荆吴秦洛，各行其教。道一、神会，又同出于能者也。道一则密受心印，神会则复流于知解，一去弗返，而其末流，若大珠、明教、慈受辈，尚何以议为哉！自教一宗言之，慈恩立三教，天台则分四教，贤首则又分五教，粗妙各见，渐圆互指，终不能归之一致，可胜叹哉！此虽通名为教，各自立宗，犹可说也。自夫本教之内言之，律学均以南山为宗，真悟智圆律师允堪，著《会正记》等文，识者谓其超出六十

家释义之外，何不可者。至大智律师元照，复别以法华开显圆意，作《资持记》，又与《会正》之师殊指矣。不特此也，四明法智尊者知礼、孤山法慧大师智圆，同祖天台，同学止观，真妄之异观，三谛之异说，既已抵牾之甚。雪川仁岳以礼之弟子，又操戈入室，略不相容。谏书辩谤之作，逮今犹使人凜然也。其他尚可以一二数之哉？

呜呼，毗卢华藏，圆满广大，遍河沙界，无馀而馀，非相而相，非缘而缘，非同而同，非别而别，苟涉思惟，即非圣谛，又何在分教与禅之异哉？又何在互相盾矛、业擅专门哉？又何在操戈相攻，遽背其师说哉？虽然，适长安者南北异涂，东西殊辙，及其所至，未尝不同，要在善学者慎夫所趋而已。

比丘永寿，尝以闽僧一源所著《护教编》示予，自大迦叶至于近代诸师，皆有传赞。文辞简古，诚奇作也。寿独惜其不著教、禅承传同异之详，请予为记，以补其阙略。予因以所闻疏之如右，文繁而不杀者，欲其事之著明，盖不得不然也。

◇浦江县新建尉司记

浦江尉司在县西一百步，岁久就圯。至正庚寅，大梁刘师稷以主簿摄尉事，始作正厅，未成而刘去。明年辛卯，新安洪在来为尉，完之，且新其门楼。又明年壬辰，建厅之前轩暨吏士之舍。又明年癸巳，造濯心亭。屋以间计者若干，役功若干，糜钱若干。濂惧后来者不知其劳也，乃文其事于石，俾相继葺之。

◇贞一道院记

贞一道院者，浦江戴君性中所建，以奉玄武神者也。初，性中尝习法令于江浙行中书，有事如金陵。舟渡大江，至中流，忽黑风吹舟，荡摇欲覆，幸不覆，而水入者二尺。会天大寒，冰生衣上，淅淅有声。如此者三日夜，风既不止，又不能火食，唯取醇酎饮之，俟死而已。怖中计无所出，乃北向稽首，号诸神曰：“神当有以哀我，即使我无死，誓作宫以报神休。”时夜正黑，有天光自樯端下烛，烨然如灯。仿佛见黑衣神，披发按剑，以足蹴舟，迅行如飞。迨明，已薄江岸。噫，亦异矣。

儒者之正论，恒以为玄武乃北方七宿之象，而传记之所谓龟也。或曰，龟与蛇也。古之人出师，必象天文而作陈法。故画龟蛇于，而与交龙之旗，熊虎之旗，鸟隼之，并掌于司常。仪礼之家独谓龟蛇为玄武者，玄则以其色之黑，武则以其有甲能御侮也。玄武之见于用者，盖如此。宋有天下，尊崇圣祖，以其嫌名玄朗，故改玄为真，初非有所谓神也。道家者流欲奇其事，谓神有名字里居，一何悖耶！性中之所见，其有无未可必也。濂则以为不然，冲漠无朕，而万象森然已具者，非心之谓也？心则神之所舍，无大不包，无小不涵，虽以天地之高厚，日月之照临，鬼神之幽远，举有不能外者。故其精诚所召，挥戈指天，白日退舍；拔刀斫山，飞泉涌地。

亦感应之常理耳，何足异乎？此既不足异，何独于性中之所见而疑之乎？世之好奇者，既听于茫昧不可致诘之神，而激者反之于正，又一切绝之于无有。呜呼，不亦两失也哉！

道院之额，教主嗣天师之所署。始事于某年某月日，讫功于某年某月日。费钱若干缗，为屋凡几楹间。抔土象玄武神于中，黑衣翩翩，披发按剑而坐，盖志所见也。

◇先夫人木像记

先夫人既歿之九年，予妻贾专朝夕思之不少置。间告予曰：“妾生二十二年而归君，妾之姑已四十有九岁，妾母方氏，亦五十有四岁。后君念妾之母老而兄弟多，故乃迎养于家。当是时，二老人苍颜白发，共坐堂上。妾与君，沽酒买鱼以奉其欢。更阑烛尽，犹连觞引满，而语笑声不休。君时尝语妾曰：‘吾虽贫，而老亲之欢如此，吾退而安寝矣。’后十三年，而妾之姑竟亡。初姑未亡时，妾子瓚始十三岁，姑尝抚瓚顶谓曰：‘吾年耄矣，或幸见汝之有子，吾死亦瞑目也。’又三年，君自金华迁浦阳，妾与母从之来。今妾母七十有五岁，瓚亦娶妇生子，而妾姑之墓木拱矣。思欲如昔时共君奉觞上寿，其又可得耶？每念及此，辄涕泗交颐。然恨无以自慰也，欲刻木为像以事之。凡遇蔬食菜羹必祭，使死者而有知，亦当翩然而来享也。虽然，此岂妾之敢知哉？不过尽其心焉尔矣。”

予谓之曰：“昔之孝子有丁兰者，事母至孝，及母亡而思之不置，乃刻木事之。此盖丈夫子之事，子以一女妇能行之，亦可谓贤矣。虽然，不必尔也。古者既葬而反虞，虞主用桑。期年而练祭，练主用栗。所谓主者，主乎神者也。设主之外，无有刻像事之者也。予之思亲，岂不尤切于子哉？礼若可为，则予为之也久矣。”专曰：“是固然矣，世俗媚浮屠神者，尚饰像奉之，而况妾之姑乎？妾不若是，其心终皇皇焉，君幸有以如妾之意也。”

予不能拒，于是命工人刻像以遗之，并录其问答之辞，书于像龕之北，以示子孙。先夫人姓陈氏，讳贤时，金华潜谿人。

◇浦阳善应精舍记

我大雄氏说法度生，凡其住处，众所依止，以是因缘，成大兰若。象教东渐，遂建道场，涌殿飞楼，在在而是。其中亦有折一茎草，插标立坛，作佛事者。小大虽殊，及其藉是明自心性，如指指月。指有短长，因指见月，了无有异。

浦阳山中，有一沙门，号曰景岑，发大弘愿，自无始劫以迄于今，或神或天，或阿须伦、泥梨、旁生，并诸鬼趣，随业之所感，轮转不息。所以者何？为贪欲故。贪故不舍，不舍故有我。今思维咸悉弃去，构为梵居。见者闻者，皆大欢喜，输田荐

货，奔走承事。大德乙巳，迨于丁未，凡三寒暑，以溃于成。殿庭靦飭，门庑峻黑，风飘船舫，流入罗刹国，躯命不能保。此以何因缘？盖为贪欲故。由贪渐滋蔓，业障永不净。我今建梵居，皈依大悲人。幡盖及床坐，一一尽庄严。藉是象教力，欲舍诸所有。所有既空故，空空亦无有。譬如大圆镜，中放无量光。不去亦不来，不内亦不外。如如屹不动，随物悉现形。苟涉世间相，执此有漏因，何以能出离？汝等比丘众，当听我所说。于一刹那间，成此无上道。

◇集贤大学士吴公记（代吴志道）

先公讳直方，字行可，姓吴氏。其先毗陵人，一迁于鄱，再迁于睦，三迁浦阳之新田。唐乾宁初，有讳公养者，又迁县西尊仁里，至先公十五世。曾祖讳闻，赠中奉大夫、福建道宣慰使、护军，追封渤海郡公。妣盛氏，追封渤海郡夫人。祖讳蕃，累赠资善大夫、太常礼仪院使、上护军，追封渤海郡公。妣沈氏，追封渤海郡夫人。父讳伯绍，累赠翰林学士承旨、荣禄大夫、柱国，追封渤海国公。妣金氏，追封渤海国夫人。

先公自幼有大志，笃意儒学。及壮，游京师，主留守马扎儿台家，教其子脱脱及也先帖木儿。元统间，脱脱为御史中丞，以先公尝用说书事明宗于潜邸，奏除江浙等处儒学提举。中书易为副提举，阶将仕佐郎。先公年已六十一矣，未上。御史台改授将仕郎、海北广东道肃政廉访司管勾，承发架阁库兼照磨。迁中政院管勾，承发架阁库。复升长史，阶咸如故。重纪至元末，庙堂用事者颇擅威福，上与大臣谋罢其政柄，先公实协赞之。上念其功，召至便殿，锡以黄金系带，超拜集贤直学士，就转侍讲学士。未几，升学士，历亚中、中奉、资善三阶大夫。会脱脱入相中书，国有大政令，多咨先公而后行。先公每引古义告之，言无不听，民被其泽为多。先公以年及致仕，上章乞骸骨，遂以集贤大学士、荣禄大夫食俸赐终身。俄又赐田一千九百余亩，寻谢不受。

先公前娶盛氏，先十七年卒。后娶金、李二氏。金氏封渤海夫人，子男二。长莱，字立夫，延祐庚申以《春秋》经预乡荐，后用御史察举为饶州路长芎书院山长，博学能文，为世闻人，亦先十七年卒。次即志道，崇文监丞、奉训大夫。孙男三：长士谔，婺州路金华县儒学教谕；次士谧；次存仁。曾孙男三：长中，次平，次弇。曾孙女一，申。先公生于宋德祐乙亥十一月二十四日庚寅，薨于今至正丙申七月十二日庚寅，享年八十有二。卜以是年八月十二日庚申，葬德政乡后吴山徐坞之原，距承旨公墓左五十步而近。呜呼，褒叙令德，是在世之立言君子，非不肖孤所敢僭。姑序世系及历官次第，纳诸玄堂，别录其副，以藏于家，庶几后人知所考焉。呜呼痛哉！孤子志道泣血谨记。

◇蜀墅塘记

义乌县南四十里，有塘曰蜀墅焉。周围凡三千六百步，东、西、北皆岸山。山之水合七十二流，入于塘而南出。南有蜀山，突然中起，昔人因据山作堤，障水以溉田。山之东，其修七百尺有奇，广如修之数而杀其五之四，深如广之数而又杀其三之二。山之西，其修如广之数而稍加强焉。堤之中，剡木为三窦以泄水。水之所溉田，至六千亩而赢。至正四年夏，水暴而堤坏，田遂不稔。

丹溪朱君震亨，悯农之告病也，白于县。县尹周侯自强为下其事，命双林巡检张某来视役。震亨遂尽召有田之民，履其亩而使之输其力，荐货有差。复出役夫之功一千，以为众倡。众说趋之，一听震亨之经画。补其阙遗，增以崇高，筑其址，加辟而渐杀其上。堤之西垂，凿石为斗门，视水溢干而时畜泄之。门之上架徒杠，以便行者。木窦易坏，则易以坚石，且定为高下之穴，使欲水者先后有程而不紊。复惧历岁之久而堤弗固也，请于掌塘事者，中析粥鱼之利而嗣葺之。凡用钱四千缗，夫一万功，经始于五年秋八月庚申，逾三月乃告成。里耆朱仁杰等来谓濂曰：“震亨之兴是役也，初无一弓之田以徼塘利，其夙夜尽瘁而不舍者，果何为哉？凡欲利吾农也。我不敢忘，愿吾子记之。”

濂闻海陵胡公瑗之在湖学也，置经义治事之斋教授诸生，至于水利之属，亦无不习而通之，故其门人皆有适于世用。今震亨之学，出于金华许先生谦。先生之六世祖，实尝从海陵游。其家学相传，至先生为尤盛，宜吾震亨见诸行事者有足观哉。世之人方高谈性命以聒世瞽俗，听之虽若可与有为，一遇小利害，辄颠倒裳衣，不知所措。视震亨无所为而利民者，何如也？盍亦知所警哉？震亨字彦修，有长材，县尝下括田之令，唯震亨行之无扰云。

◇游钟山记

钟山，一名金陵山。汉末，秣陵尉蒋子文逐贼死山下，吴大帝封曰蒋侯。大帝祖讳钟，又更名蒋山，实作杨都之镇。诸葛亮所谓“钟山龙蟠”，即其地也。岁辛丑二月癸卯，予始与刘伯温、夏允中二君游。

日在辰，出东门，过半山报宁寺。寺舒王故宅，谢公墩隐起其后，西对部娄小丘。部娄，盖舒王病湿，凿渠通城河处。南则陆修静茱萸园，齐文惠太子博望苑，白烟凉草，离离蕤蕤，使人踟躇不忍去。沿道多苍松，或如翠盖斜偃；或蟠身矫首，如玉虬搏人；或捷如山猿，仰臂掬涧泉饮。相传其地少林木，晋、宋诏刺史、郡守罢官者栽之，遗种至今。抵圆悟关，关宋勤法师筑，太子曲国寺在焉。梁以前，山有佛庐七十，今皆废，唯寺为盛。近毁于兵，外三门仅存。自门左北折，入广慈丈室，谒钦上人。上人出，三人自为宾主。适松华正开，黄粉粼粼触人，捉笔联《松华诗》。

诗未就，予独出行幽道间。会章君三益至，遂执手止翠微亭，登玩珠峰。峰，独龙

阜也，梁开善道场宝志大士葬其下，永定公主造浮图五成覆之。后人作殿四阿，铸铜貌大士实浮图。浮图或现五色宝光，旧藏大士履，神龙初，郑克俊取入长安。殿东木末轩，舒王所名。俯瞰山足如井底。出，度第一山亭，亭颜米芾书。亭左有名僧娄慧约塔，塔上石，其制若圆楹，中斫为方，下刻二鬼擎之，方上书曰：“梁古草堂法师之墓。”有融匾法，定为梁人书。复折而西入碑亭。碑凡数辈，中有张僧繇画大士相、李白赞、颜真卿书，世号三绝。又东折，度小涧，涧前下定林院基，舒王尝读书于此。院废，更创雪竹亭，与李公麟写舒王像、洗砚池，亦皆废。又北折，至八功德水。天监中，胡僧昙隐来栖，山龙为致此泉。今甃作方池，池上有圆通阁。阁后即屏风岭，碧石青林，幽邃如画。前乃明庆寺故址，陈姚察受菩萨戒之所。又东行，至道卿岩。道卿，叶清臣字也，尝来游，故名。有僧宴坐岩下，问之，张目视，弗应。时雉方桴粥，闻人声，戛戛起岩草中。从此至静坛，多臧矜先生遗迹。复西折，过桃花坞，询道光泉，舒王所植松已游，唯泉紺净沈沈如故。

日将夕，章君上马去，予还广慈。二君熟寐方觉，呼灯起坐，共谈古豪杰事，厕以险语，听者为改视。

明日甲辰，予同二君游崇禧院。院文皇潜邸时建。从西庑下，入永春园。园虽小，众卉略具。揉柏为麋鹿形，柏毛方怒长，翠濯濯可玩。二君行倦，解衣覆鹿上，挂冠鼠梓间，据石坐。主僧全师具壶觞，予不能酒，谢二君出游。夏君愕曰：“山有虎，近有僧采葑，虎逐入舍，僧门焉，虎爪其颧，颧有瘢可验。子勿畏，往矣。”予意夏君给我，挟两驹奴，登惟秀亭。亭宜望远，惟秀、永春皆文皇题榜，涂以金。又折而东，路益险。予更芒屨，倚驹奴肩，蹉跎行。息促甚，张吻作锯木声。倦极思休，不问险湿，牒牒据顿地，视燥平处不数尺，两足不堕。久之，又起行。有二台，阔数十丈，上可坐百人。即宋北郊坛，祀四十四神处。问蒋陵及步夫人冢，无知者，或云在孙陵冈。至此屡欲返，度其出已远，又力行。

登慢坡，草丛布如毡，不生杂树，可憩，思欲借裯褥卧不去。坡古定林院基，望山椒无五十弓，不翅千里远。竭力跃，数十步辄止，气定又复跃。如是者六七，径至焉。大江如玉带横围，三山矶、白鹭洲皆可辨，天阙、芙蓉诸峰，出没云际。鸡笼山下接落星涧，涧水淅淅流。玄武湖已堙久，三神山皆随风雨幻去。西望久之，击石为浩歌，歌已继以感慨。又久之，傍崖寻一人泉，泉出小窾中，可饮一人，继以千百弗竭。循泉西过黑龙潭，潭大如盎，有龙当可屠。侧有龙鬼庙，颇陋。由潭上行，丛竹翳路，左右手开竹，身中行，随过随合。忽腥风逆鼻，群鸟哇哇乱啼。忆夏君有虎语，心动，急趋过，似有逐后者。又棘针钩衣，足数蹶，咽唇焦甚，幸至七佛庵。庵萧统讲经之地，有泉白乳色。即踞泉璟饮，衫袂落水中不暇救，三咽神明渐复。庵后有太子岩，一号昭明书台。方将入岩游，庵中僧出肃，回有新瘢，询之即向采葑者。心益动，遂舍岩，问别径以归。所谓白莲池、定心石、宋熙泉、应潮井、弹琴石、落人池、朱湖洞天，皆不复搜览。还抵永春园，见肴核满地，一髻童立花下。问二客何在？童云：“迟公不来，出壶中酒饮，且赋诗大号，酒尽径去

矣。”

予遂回广慈，二君出迎。夏君曰：“子颜色有异，得无有虎恐乎？”予笑而不答。刘君曰：“是矣，子幸不葬虎腹，当呼斗酒涤去子惊可也。”遂同饮。饮半酣，刘君澄坐。至二更，或撼之，作舞笑钩之，出异响畏胁之，皆不动。予与夏君方困，睫交不可擘，乃就寝。

又明日乙巳，上人出犹未归，欲游草堂寺，雨丝丝下，意不住，乃还。按地里志，江南名山，唯衡、庐、茅、蒋。蒋山固无耸拔万丈之势，其与三山并称者，盖为望秩之所宗也。晋谢尚，宋雷次宗、刘勰，齐周顒、朱应、吴包、孔嗣之，梁阮孝绪、刘孝标，唐韦渠牟，并隐于此。今求其遗迹，鸟没云散，多不知其处，唯见尧儿牧豎，跳啸于凄风残照间，徒足增人悲思。况乎人事往来，一日万变，达人大观，又何足深较？予幸与三君得放怀山水窟，一刻之乐，千金不以易也。山灵或有知，当使予游尽江南诸名山，虽老死烟霞中，有所不恨，他尚何望哉！他尚何望哉！章君约重游未遂，因历记其事，一寄二君，一遗上人云。

◇玉壶轩记

玄默摄提格，律中夷则，白月流天，牵牛正中，商飙袭人。仙华羽客凝神黄宫，忽翛然遐征，西至离紫之山。其山高三百五十有八丈，而翠河之水出焉。其阳多于琪树，多瑶草，多婴垣之英。赤蕤而素茎，皆生玉荣，其光熊熊，其气魂魂。其阴有五华之木，产实如樱，丹腴而长毫，其垂屯屯胶胶。神麟炎尸之，厥容类虬，枳首而六眸，其音如榴。山河之间，有洞房焉，中外纯素，圆若嘉瓠，太灏流晶，以雪为城，见费仙人从一老父酣觞其中。

寤而思之，不知何祥也。于是以《归藏》筮之，遇《乾》之《离》，其繇曰：“至象有容，豁落无隅，浑沦中苞，西华流储，超乎元素。”造物之初，有玉壶之象焉。已而游句曲洞天，望积金峰北，云勃勃如练起谷中，散为五色霞东去。乃指曰，是必有异。因蹑屐寻之，一室然，宛如神游所睹者。有仙翁年七十馀，冠绿敖之冠，被三真朝斗之衣，欣然出速。予往与之揖，且告之故。仙翁笑曰：“若子所言，乃蒙庄所谓外而不内者也。子曾谓吾之玉壶果在此耶？溟滓之先，忽荒眇绵，洞明两极，混合上玄，大如黍珠，含乎方圆。然犹以迹言也，况乎大道无名，主宰万汇，郁纷罗森，有不出是壶之外者。是何也？至人以白为室，以圆为家，以虚为质，以润为华。子曾谓吾之玉壶果在此耶？”仙华羽客瞪然视，愕然惊曰：“费仙人之从饮者，无乃翁也耶？吾向所见离紫之山，翠水之河，不其涉幻化耶？幻隐而真始显耶？”仙翁不答，笑而去。

问诸左右，仙翁姓蒋，名应琪，金坛人，海云先生弟子。通玄学，兼究孔、墨诸家言，金陵学道之士，恒推为巨擘云。

◇龙渊义塾记

至正十三年九月某甲子，栝苍章君溢新建龙渊义塾成。龙渊，即龙泉，避唐讳更以今名。相传其地即欧冶子铸剑处，至今有水号“剑溪”焉。山深而川阻，与通都大邑相去，远或二三百里，虽至近亦且半之。乡间之子弟无所于学，章君之先世尝以为病，谋创桂山、仙岩两书院。以无恒产，未几而皆废。章君深忧之，与诸子计曰：“无田是无塾也，其奚可哉！”遂撙节凡费而用其馀，斥田至一百五十亩。其妻党陈京兄弟闻之，以曾大父适斋先生所遗二百三十亩有畸，来为之助。章君曰：“吾事济矣！”

乃卜地官山之阴，创燕居以奉先圣，而先师为之配。春与秋，行释菜之礼。旁列四斋，曰逊敏，曰知通，曰敬乐，曰博约，以居弟子员。后敞正义堂，月旦、十五日，鸣鼓集多士，以申饬五伦之教。前建大门，榜之曰“龙渊义塾”。甃其修涂，以达于东西。灌木嘉篁，前后蔽荫，盖郁然云。岁聘经行修明之士以为讲师，诸生业进者，月有赏。才颖家单不能裹粮者，资之使成。其不帅教者，罚及之。田赋之出入，主塾事者司焉。日用有籍，月考朘赢，岁一会。其数有馀，则他贮，益斥田以广其业。石华、象溪二所，复设别塾以教。陈氏族子之幼者，俟其长乃赴龙渊受业。此其大凡也。江浙行省参知政事石抹公闻而嘉之，檄本郡免其科繇，俾无有所与。章君既列条教，序而刻诸石，复惧来者不能保其终也，俾来请濂记之。

惟古者之建学也，虽其为制有小大之殊，而所以导民衷、扶世防者，则一而已。龙泉旧为浙水东文献之邦，水心叶氏正则、西山真氏希元，实后先以学鸣。声感气求，籁鸣机动，掇巍科而典雄藩者，声华相望。一时文物，固尝盛矣。距今未及百年，而继之者何其鲜也？岂俗尚不同，遽有古今之异哉？亦系乎学之兴衰为何如尔。章君有见于斯，不效时俗封殖吝固，以为肥家之计，乃辟塾聘师，以克绍先世之徽猷。其立志甚宏，而为功甚溥。陈京兄弟乐善好义，以助其成，自非适斋涵濡之泽，亦岂能至于是哉！章君之子若孙，当夙夜以继志为事，毋丰己以自私，毋蠹龋其间以启争端，毋狎非类而黷厥彝训，毋植朋党而互相低昂，庶几不负章君之意。脱有违于是，陈氏之中有端亮者，宜匡正之；陈氏或不我屑也，则乡尹里师，岂无勇于为义者，咸得纠之；乡尹里师又不我屑也，则县大夫之贤者，宜扶树而振发之。是则章君之塾可相传于无穷，虽然，无以远虑为也。夫具人之形体也，孰无人心哉？苟读濂文，宜战兢保守之弗暇，矧敢坏？因书之以为记。

是岁十月，具官宋濂记。

◇看松庵记

龙泉多大山，其西南一百馀里诸山为尤深。有四旁奋起而中窞下者，状类箕筐，人因号之为匡山。山多髯松，弥望入青云，新翠照人如濯。松上薜萝，纷纷披披，横

敷数十寻，嫩绿可咽。松根茯苓，其大如斗，杂以黄精、前胡，及牡鞠之苗，采之可茹。

吾友章君三益乐之，新结庵庐其间。庵之西南若干步，有深渊二，蛟龙潜于其中，云英英腾上，顷刻覆山谷，其色正白，若大海茫无津涯，大风东来，辄飘去。君复为构“烟云万顷”亭。庵之东北又若干步，山益高，峰峦益峭刻，气势欲连霄汉，南望闽中数百里，嘉树帖帖地上如荠。君复为构“唯天在上”亭。庵之东南又若干步，林樾苍润，空翠沈沈扑人，阴飈一动，虽当烈火流金之候，使人翛翛有挟纩意。君复为构“清高”亭。庵之正南又若干步，地明迥爽洁，东、西、北诸峰，皆竞秀献状，令人爱玩忘倦，兼之可琴、可奕，可挈尊罍而饮，无不宜者。君复为构“环中”亭。

君诗书之暇，被鹤氅衣，支九节筇，历游四亭中。退坐庵庐，回睇髥松，如元夫巨人，拱揖左右。君注视之久，精神凝合，物我两忘，恍若与古豪杰共语千载之上。君乐甚，起穿谢公履，日歌吟万松间，履声锵然合节，与歌声相答和。髥松似解君意，亦微微作笙箫音以相娱。君喟曰：“此予得看松之趣者也！”遂以名其庵庐云。

龙泉之人士，闻而疑之曰：“章君负济世长才，当闽寇压境，尝树旗鼓、砺戈矛，帅众而捣退之，盖有意植勋业以自见者。今乃以‘看松’名庵，若隐居者之为，将鄙世之胶扰而不之狎邪？抑以斯人为不足与，而有取于松也？”金华宋濂窃不谓然。

夫植物之中，禀贞刚之气者，唯松为独多。尝昧昧思之，一气方伸，根而蕴者，蒔而敛者，莫不振翹舒荣，以逞于一时。及夫秋高气清，霜露既降，则皆黄蘗而无馀矣，其能凌岁寒而不易行改度者，非松也耶？是故，昔之君子每托之以自厉。求君之志，盖亦若斯而已。君之处也，与松为伍，则巍然有以自立。及其为时而出，刚贞自持，不为物议之所移夺，卒能立事功而泽生民，初亦未尝与松相悖也。或者不知，强谓君忘世，而致疑于出处间，可不可乎？濂家青萝山之阳，山西老松如戟，度与君所居无大相远。第兵燹之余，峦光水色，颇失故态，栖栖于道路中，未尝不慨然与怀。君何时赋归，濂当持石鼎相随，采黄精、茯苓，烹之于洞云间，亦一乐也。不知君能余从否乎？虽然，匡山之灵，其亦迟君久矣。

◇孔子庙堂议

世之言礼者，咸取法于孔子。然则为庙以祀之，其可不稽于古之礼乎？不以古之礼祀孔子，是褻祀也。褻祀不敬，不敬则无福，奈何今之人与古异也！

古者将祭，主人朝服即位于阼阶东，西面。祝告利成，主人立于阼阶，西面。尸出

入，主人降立于阼阶东，西面。此皆主人之正位也。卒胥，祝盥于洗，升自西阶。主人盥，升自阼阶。祝先入，南面。主人从户内，西面。祝酌奠，主人西面，再拜稽首，皆为几筵之在西也。尸升筵，主人西面立于户内，拜妥尸。尸醑主人，主人西面奠爵拜，皆为尸之在西也。《汉晋春秋》所载，章帝元和二年幸鲁祠孔子，帝升庙，西面再拜。《开元礼》亦谓先圣东向，先师南向，三献官皆西向，是犹未失古之意也。今袭开元二十七年之制，迁神于南面，而行礼者北面，则非神道尚右之义矣。

古者造木主以栖神，天子、诸侯之庙皆有主。卿、大夫、士虽无之，大夫束帛以依神，士结茅为菆，无有像设之事。《开元礼》亦谓设先圣神座于堂上西楹间，设先师神座于先圣神座东北，席皆以莞，则尚扫地而祭也。今因开元八年之制，抔土而肖像焉，则失神而明之之义矣。

古者灌用鬯臭，郁合鬯臭，阴达于渊泉。既灌，然后迎牲，致阴气也。萧合黍稷臭，阳达于墙屋，故既奠然后蕕萧合膋芻，盖求神于阴阳也。今用熏芻代之，庸非简乎？

古者朝覲会同，与凡郊庙祭飨之事，皆设庭燎，司烜共之，火师监之。其数则天子百，公五十，余三十，以为不若是则不严且敬也。今以秉炬当之，庸非渎乎？

古之有道有德者使教焉，死则以为乐祖，祭于瞽宗，此之谓先师，若汉《礼》有高堂生，《乐》有制氏，《诗》有毛公，《书》有伏生之类也。又凡始立学者，必释奠于先圣先师。释奠必有合，有国故则否，谓国无先圣先师，则所释奠者当与邻国合。若唐虞有夔、伯夷，周有周公，鲁有孔子，则又淘奠之，不合也。当是时，学者各自祭其先师，非其师弗学也，非其学弗祭也。学校既废，天下莫知所师。孔子集群圣之大成，颜回、曾参、孔伋、孟轲实传孔子之道，尊之以为先圣先师，而通祀于天下固宜。其馀当各及其邦之先贤，虽七十二子之祀，亦当罢去，而于国学设之，庶几弗悖礼意。《开元礼》，国学祀先圣孔子，以颜子等七十二贤配，诸州但以先师颜子配。今也杂置而妄列，甚至荀况之言性恶，扬雄之事王莽，王弼之宗庄老，贾逵之忽细行，杜预之建短丧，马融之党附势家，亦厕其中，吾不知其为何说也。

古者立学，专以明人伦，子虽齐圣，不先父食久矣。故禹不先鯀，汤不先契，文、武不先不窋，宋祖帝乙，郑祖厉王，犹上祖也。今一切置而不讲，颜回、曾参、孔伋，子也，配享堂上；颜路、曾点、孔鲤，父也，列祀庑间；张载则二程之表叔也，乃坐其下。淳祐初，张居程上，后因国子监集议，再定张遂居程下。颠倒彝伦，莫此为甚，吾又不知其为何说也。

古者士之见师，以菜为挚，故始入学者，必释菜以礼其先师。其学官四时之祭，乃

皆释奠。今专用《春秋》，亦非。释奠有乐无尸，而释菜无乐，是二者之重轻，系乎乐之有无也。今则袭用魏汉律所制《大晟》之乐，乃先儒所谓乱世之音者也，其可乎哉？

古者释奠、释菜，名义虽存，其仪注皆不可知。《唐开元礼》仿佛《仪礼·馈食》篇，节文为详。所谓三献，各于献后饮福，即尸酢主人、主妇及宾之义也。今惮其烦，唯初献者得行之，其可乎哉？呜呼，学校者，礼之所自出，犹河渚之宗瀛海也，犹山岳之祖昆仑也，今乃舛缪若是，则其他可知矣。礼固非士、庶人之所敢议，有人心者孰能默默以自安乎？

虽然，此姑言其略尔。若夫庙制之非宜，冕服之无章，器用则杂乎雅俗，升降则昧乎左右，如此类甚多，虽更仆不可尽也。或者则曰：“子之言信辨矣，建安熊氏，欲以伏羲为道统之宗，神农、黄帝、尧、舜、禹、汤、文、武各以次而列焉，皋陶、伊尹、太公望、周公、暨稷、契、夷、益、传说、箕子，皆可与享于先王，天子，公卿所宜师式也，当以此秩祀天子之学。若孔子，实兼祖述宪章之任，其为通祀，则自天子下达矣。苟如其言，则道统益尊，三皇不汨于医师，太公不辱于武夫也，不识可乎？”昔周有天下，立四代之学，其所谓先圣者，虞庠则以舜，夏学则以禹，殷学则以汤，东胶则以文王，复各取当时左右四圣成其德业者为之先师，以配享焉。此固天子立学之法也，奚为而不可也。

◇谥议

《传》曰，“物生而后有象，象而后有滋，滋而后有数”，数成而文见矣。是则文者固囿乎天地之中，而实能卫翼乎天地。品裁六度，叶和三灵，敷陈五彝，开道四德，何莫非文之所为？而所谓文者非他，道而已矣。故圣人载之则为经，学圣人者必法经以为文。譬之于木，经其区干者欤，文则其柯条者欤，安可以歧而二之也？自史氏失职，以训诂列之儒林，以辞章书之文苑，虽欲昭后世之弊，而失之古义益远矣。

有如长萝书院山长吴公先生，风裁峻明，才猷允茂，漱六艺之芳润，为一代之文英。纂述之勤，汗简日积，于《诗》《书》则科分脉络而标其凡，于《春秋》则脱略三传而发其蕴，于诸子则研核真伪而极其精，于三史则析分义例而严其断。藻绩所及，无物不华。汪如长江，峻如乔岳，激如雷电，和如春阳。其妙用通于造化，其变通莫拘，若应龙之不可羁。观其所志，直欲等秦、汉而上之。凡流俗剽窃无根之学，孱弱不振之章，皆不足闯其藩垣而逐其轨辙者也。呜呼盛哉！门人学子僉曰：经义玄深，非渊而何？文辞贞敏，非颖而何？于是私谥曰渊颖先生云。

门人金华宋濂等谨议。

泰和之气，缁盘薄于堪舆间，沛为甘泽，凝为卿云，发为三秀醴泉，产为祥麟威凤。及其钟于人也，为慈祥岂弟之君子，足以仪世而导俗，足以惇薄而还淳，其为邦家之华，道术之寄，盖甚不细也。

有若金华闻人先生，以惇庞之资，卓绝之识，屏去流俗凡近之见，期造正大高明之庭。言其植志，则以三德六行为本原，而凉偷之事弗为也；言其讲学，则以《四书》、《五经》为标准，而非圣之书不习也；言其攻辞，则以文字从职为载道之用，而斥钩章棘句为非学也；言其训人，则以真实不欺为凝道之端，而指出口入耳为小夫也。由其渊源深而培养厚，故其功用茂而运量宏。教铎所临，衿佩翕集，得诸观感之际，丕冒薰蒸之中。由是冲鬯其性情，由是陶熔其气质，粹矣成德之彦，归诸果行之功。若非硕学之敷施，曷收醇儒之效验如此也。以此观之，其守道之笃，独立弗迁，不亦凝乎？其光辉昭著，由内达外，不亦熙乎？谨用合辞，私谥曰凝熙先生。庶几可以景行先哲，而嘉惠方来云尔。

门人同里宋濂、吴履等谨议。

◇六经论

《六经》皆心学也。心中之理无不具，故《六经》之言无不该。《六经》所以笔吾心之理者也，是故说天莫辨乎《易》，由吾心即太极也；说事莫辨乎《书》，由吾心政之府也；说志莫辨乎《诗》，由吾心统性情也；说理莫辨乎《春秋》，由吾心分善恶也；说体莫辨乎《礼》，由吾心有天叙也；导民莫过乎《乐》，由吾心备人和也。人无二心，《六经》无二理，因心有是理，故经有是言。心譬则形，而经譬则影也，无是形则无是影，无是心则无是经，其道不亦较然矣乎？然而圣人一心皆理也，众人理虽本具，而欲则害之，盖有不得全其正者。故圣人复因其心之所有，而以《六经》教之。其人之温柔敦厚，则有得于《诗》之教焉；疏通知远，则有得于《书》之教焉；广博易良，则有得于《乐》之教焉；洁静精微，则有得于《易》之教焉；恭俭庄敬，则有得于《礼》之教焉；属辞比事，则有得于《春秋》之教焉。然虽有是六者之不同，无非教之以复其本心之正也。呜呼，圣人之道，唯在乎治心。心一正，则众事无不正。犹将百万之卒在于一帅，帅正则靡不从令，不正则奔溃角逐，无所不至矣，尚何望其能却敌哉！大哉心乎，正则治，邪则乱，不可不慎也。

秦汉以来，心学不传，往往驰骛于外，不知《六经》实本于吾之一心。所以高者涉于虚远而不返，卑者安于浅陋而不辞，上下相习，如出一辙，可胜叹哉！然此亦皆吾儒之过也，京房溺于名数，世岂复有《易》？孔、郑专于训诂，世岂复有《书》《诗》？董仲舒流于灾异，世岂复有《春秋》？《乐》固亡矣，至于小、大戴氏之所记，亦多未醇，世又岂复有全《礼》哉？经既不明，心则不正。心既不正，则乡闾安得有善俗，国家安得有善治乎？惟善学者脱略传注，独抱遗经而体验之，一言

一辞，皆使与心相涵。始焉则戛乎其难入，中焉则浸渍而渐有所得，终焉则经与心一，不知心之为经，经之为心也。何也？《六经》者所以笔吾心中所具之理故也。周、孔之所以圣，颜、曾之所以贤，初岂能加毫末于心哉，不过能尽之而已。

今之人不可谓不学经也，而卒不及古人者，无他，以心与经如冰炭之不相入也。察其所图，不过割裂文义，以资进取之计，固不知经之为何物也。经而至此，可不谓之一厄矣乎！虽然，经有显晦，心无古今，天下岂无豪杰之士，以心感心于千载之上者哉？

◇隋室兴亡论

昔周室暗弱，静帝幼冲，高祖以外戚之尊，入握朝权，都督诸军，遂假黄钺，开丞相府。当是时，宗藩大臣心志弗平，五王连谋，三方称乱，高祖咸得剪夷之，始有轻睨周鼎之心。自进爵隋王，加九锡，寻受周禅而即皇帝位。于是修明庶政，绥抚远夷，经营四海，至日昃不遑暇食。高綽、苏威、李德林之属调驭于内，杨素、韩擒虎、贺若弼之徒折冲于外，规模日盛，遂萌平陈之谋。张皇六师，直捣金陵，陈人胆破，叔宝敛手就擒，天下自是归于一统。东底大海，南抚交趾，西连且末，北极五原，莫不稟受正朔，愿为臣妾。开皇、仁寿之间，人物阜繁，号为极治。

及炀帝嗣位，藉承平之休运，慕秦皇、汉武之为人，治宫室而务侈靡，使绝域而勤远略，市武马而困蒸庶，御龙舟而般游无度。自以为日月所照，雨露所及，孰敢不臣。高句骊一岛夷，怒其不恭，亲总大兵一百十三万，分十二军并发。旌旗弥亘千里，近古出师之盛，未有之也。意谓狼噬玄菟之野，鸱张扶馀之境，电扫襄平之墟。未几麦铁杖死辽东，宇文述败萨水，而九军先后陷焉。曾不悔祸，益务兴戎。府库空竭，头会箕敛，而民益不堪命。由是盗贼蜂起，王薄发长白山，张金称聚河曲，林士宏据九江，杜伏威掠江淮，翟让出阳城。似此之类，不可胜计，而海内四分五裂矣。江都之幸，犹自沈湎声色，惟日不足。度其不免，乃欲摩颈自斫，卒致血溅御衣，而身亦随殒。非天下之至愚，孰能与于此哉！当其指麾群雄，叱吒之间，风骇云流，而混六合于一家，何其雄也。身死肉未及寒，而邦国荡覆，子孙诛戮殆尽，反不如弘农一布衣，时又何其削也。

君子论祸败之几，不起于炀帝之日，而基于高祖之时。何也？盖天下大物也，可以德持，不可以力竞。使高祖以德结人心，虽炀帝昏荒之甚，其败亡未必若斯之速也。夏有太康，殷有雍己、河亶甲，周有幽、厉，而宗祀不绝者，禹、汤、文、武之德未斩也。是故采章文物不足为之盛，金城汤池不足为之固，长枪大剑不足为之利，士马精强不足为之勇，玉帛充刃不足为之富。其足以赖而长存永治者，非德何以哉？惜高祖不可语此，徒以力竞也，悲夫！

◇河图洛书说

或问于宋濂曰：“关子明云，《河图》之文，七前六后，八左九右。《洛书》之文，九前一后，三左七右，四前左，二前右，八后左，六后右。邵尧夫云，圆者星也，历纪之数，其肇于此乎？方者土也，画州井地之法，其肇于此乎？是皆以十为《河图》，九为《洛书》。唯刘长民所传，独反而置之，则《洛书》之数为十，《河图》之数为九矣。朱子发深然其说，历指序其源流，以为濮上陈抟，以《先天图》传种放，放传穆修，修传李之才，之才传邵雍。放以《河图》《洛书》传李溉，溉传许坚，坚传范谔昌，谔昌传刘牧。修以《太极图》传周敦颐，敦颐传程颢、程颐。其解《易·大传》，大概祖长民之意。至于新安朱元晦，则又力诋长民之非，而遵关、邵遗说。且引《大戴礼·书》二九四七五三六一八之言，以证《洛书》。以为《大传》既陈天地五十有五之数，《洪范》又明言‘天乃锡禹《洪范九畴》’，则九为《洛书》，十为《河图》，夫复何疑。其说以经为据，似足以破长民之惑。临邛魏华父则又疑元晦之说，以为邵子不过曰圆者《河图》之数，方者《洛书》之文。且戴九履一之图，其象圆，五行生成之图，其象方，是九圆而十方也，安知邵子不以九为《图》，十为《书》乎？朱子发、张文饶精通邵学，而皆以九为《图》，十为《书》。朱以列子为证，张以邵子为主。《乾凿度》《张平子传》所载太乙下行九宫法，即所谓戴九履一者，则是图相传已久，安知非《河图》也？及靖士蒋得之著论，以《先天图》为《河图》，五行生成数为《洛书》，戴九履一图为太乙下行九宫。华父则又以为刘取《太乙图》为《河图》，诚有可疑。《先天图》卦、爻方位，缜密停当，乃天地自然之数，此必为古书无疑，乃仅见于魏伯阳《参同》。陈图南爻象卦数，犹未甚白。至邵而后大明，得之定为《河图》，虽未有明证，而仆亦心善之。则是华父虽疑元晦之说，而亦无定见也。新安罗端良尝出《图》《书》示人，谓建安蔡季通传于青城山隐者。《图》则阴阳相合，就其中八分之，则为八卦。《书》则画井文于方圈之内，绝与前数者不类。江东谢枋得又传《河图》于异人，颇祖于八卦，而坎、离中画相交，似于方士抽坎填离之术。近世儒者又有与《太极图》合者，即《河图》之说又有九、十，皆《河图》而有一合一散之异；《洛书》既曰书，而决非图之说。夫《图》《书》乃儒者之要务，若数者之不同何也？”

濂应之曰：“群言不定，质诸经。圣经言之，虽万载之远，不可易也。其所不言者，固不强而通也。《易·大传》曰：河出《图》，洛出《书》，圣人则之。《书·顾命》篇曰：《河图》在东序。《论语·子罕》篇曰：河不出《图》。其言不过如是而已，初不明言其数之多寡也。言其数之多寡者，后儒之论也。既出后儒，宜其纷纭而莫之定也。夫所谓‘则之’者，古之圣人但取神物之至著者，而画卦陈范，苟无《图》《书》，吾未见其止也。故程子谓观象亦可以画卦，则其他从可知矣。初不必泥其《图》之九与十也，不必推其即太乙下行九宫法也，不必疑其为《先天图》也，不必究其出于青城山隐者也，不必实其与《太极图》合也。唯刘歆以《八卦》为《河图》，班固以《洪范》‘初一’至次‘九六’十五字为《洛书》本文，庶几近之。盖《八卦》《洪范》见之于经，其旨甚明。若以今之《图》《书》果为河、洛之所出，则数千载之间，孰传而孰受之，至宋陈图南而后大显邪？其不然也

昭昭矣。”

或曰：“子之所言善则善矣，若郑康成据《春秋》纬文，所谓河以通干出天苞，洛以流坤吐地符。河龙图发，洛龟书感。《河图》有九篇，《洛书》有六篇者，将果足信乎？”

濂曰：“龟山杨中立不云乎？圣人但言《图》《书》出于河、洛，何尝言龟龙之兆？又何尝言九篇、六篇乎？此盖康成之陋也。此所以启司马君实及欧阳永叔之辨，而并《大传》疑非夫子之言也。”

或云：“杨雄《核灵赋》云，大《易》之始，河序龙马，洛贡龟书。长民亦谓，《河图》《洛书》，同出于伏羲之世。程子亦谓，圣人见《河图》《洛书》而画八卦。然则孔安国、刘向父子、班固以为《河图》授羲，《洛书》锡禹者，皆非欤？”

濂曰：“先儒固尝有疑于此，揆之于经，其言皆无明验。但《河图》《洛书》相为经纬，《八卦》《九章》相为表里，故蔡元定有云，伏羲但据《河图》以作《易》，则不必预见《洛书》而已逆与之合矣。大禹但据《洛书》以作《范》，则亦不必追考《河图》而已暗与之符矣。诚以此理之外无复他理也，不必置疑于其间也。”

或曰：“世传《龙图序》，谓出于图南。若《河图》由图南而传，当以《龙序图》解《河图》可也，而容城刘梦吉力辨其讹焉，何哉？”

濂曰：“《龙图序》非图南不能作也，是图南之学也，而非大《易》河出《图》之本旨也。八卦之设，不必论孤阴与寡阳也，不必论已合之位与未合之数也。”

或曰：“然则《易》之象数，舍《河图》将何以明之？”濂曰：“《易》不云乎：‘大衍之数五十，其用四十有九。’又曰：‘乾之策二百一十有六，坤之策百四十有四。’此固象数之具于《易》然也，不必待《河图》而后明也。”

卷五

◇体仁守正弘道法师金君碑（代黄侍讲）

吴之长洲，有为老子之学者曰金君，讳善信，字实之，家故儒也。曾大父曰。大父曰往。父曰焕，漳州路龙溪县尹。母沈氏、顾氏。龙溪之墓，故翰林侍讲学士揭公实为之铭。

君幼凝静，少长，好虚无之说，欲辞父母去而求师。父母不可，授以家事而羁縻之。君应酬少闲，辄取老子书反复玩味。久而曰：“老子之教，初不必毁形绝世，若今人之为也。吾党如莲花生污秽，外接世缘，内无所构斗，何必去父母哉？”既止不行，且纳妇有子矣。乃曰：“父母留我者，我无不尽其责。古之至人，虽不必草衣而木食，岩栖而穴处，然学必有师，我将从有道者就正焉。”时玄妙观有张雷师，生不识钱数，能以符篆捕逐鬼神。君甚敬之，由是冠其冠，而为之执弟子礼。已而，闻莫先生洞一者，嗜酒，醉辄诟骂人，虽王公不避，时时呼云役雷，狎褻如儿戏然。君知其有道者，则延致而尊事之。有所折辱，未尝为之动色。或毁其所甚爱之物，亦不以为意。先生知君信之笃，悉授以不传之秘，他弟子不得者，君尽得之。遂建仁寿观于城东北隅，日与其徒研覆妙旨。凡旁门小道，力排斥不少置。其言以为心神至虚，无所汨没，气定光出，诸阴销尽，诸阳自集。盖有形者阴，无形者阳，阳益胜阴，气益调精，我得清静，去道无难矣。知之不亲，见之不明，枯槁于山林，何益乎？盖其造道本末，可见者如此。

君初为子弟时，无私蓄。既壮，能使赀倍其旧。乡里有纠纷不可解，辄为揣摩，洞见底里，类使之以柔退，不争取胜。遇时之名流，必加敬礼，有不给则周之，未尝务遗世独立以为高。而其襟度特为冲旷，辟一室，植桂树若干本于其前，题曰“桂轩”。列一二古图画，徜徉其中，飘飘焉神仙人也，故贤士大夫多乐与之游。君年虽高，而视听步履如强壮。一日，呼左右谓曰：“吾死矣！”遂奄然而逝。非真有所得，恶能处生死之际若是哉？

君生于宋咸淳九年十二月十一日，卒于今至顺二年二月一日，年五十有九。以其年三月某日，奉道蜕葬武丘乡半塘之原，君所自营也。君妻温氏，事舅姑克尽妇道，教育其子若女，克尽母道，人莫不称之。子三人，大亨、大振、大谦。惟大谦为温氏出。女四人。孙男、女合若干人。葬后十七年，大谦始以建安陈方之状来征铭。

昔老子尝为周柱下史，周之旧典礼经无不知之，非弃绝人伦者也。至其以无为清静为教，汉人用之而天下以治，岂无益之学哉？老子远矣，今道家者流所宗汉天师张氏，既举贤良方正，节言极谏，其子若孙，或征为黄门侍郎，或辟为丞相掾，祚胤相承，逮今千有馀岁不绝。有能遵其轨范，无废人间事，而有以究夫道之所存，不亦善学老子者乎？是可铭也已。始，君受知嗣天师留国公，起为广德路道录，仍提

点仁寿观，畀之号曰体仁守正弘道法师。且以闻于朝，□再下玺书为之加护。予既备着君之道，至于出处之大概，亦不得而略也。铭曰：

《老子》有云：“修之于家，其德有馀。”

历世既久，袭讹踵伪。寢迷厥初，归洁其身。

长往不返，木石与居。有美一人，清风峻标。

列仙之儒，养生有道。不断外缘，神明内腴。

谓人一心，无挠无杂。漠然冲虚，涤除玄览。

抱一不二，方与道俱。惟是所存，久而愈晰。

百世不渝，有崇斯丘。表以石章，过者式诸。

◇官岩院碑

浦江县东南三十五里，有山穹然拔起于众峰之间者，曰康侯山，又曰官岩山。俗以其形蹲踞如狮子，又称之曰狮子岩。从岩趾斜入六百馀步，崖木回环，最号幽邃，有古招提在焉。梁大同间，比丘尼元净始建院岩北石洞前，号曰安和，后更名兜率。至唐会昌之季，毁于火，其故基至今犹存。咸通初，祖灯大师自越之上虞飞锡而来，遂缚禅岩内。会岁旱，独上绝顶祈请，捐身投崖下而卒。俄顷大雨，火化得五色舍利。民感之，就岩之西，为建今院。八年丁亥，因山赐额为官岩云。灯之事，备载洪遵郡志中，而比丘之经始，则出于县民蒋氏之所私纪。年世辽邈，莫考其详。

所可考者，宋大中祥符癸丑，重建释迦宝殿。天福己未，刻木为诸菩萨、护法神王诸像。景定庚申，妙空大师智印，尝出主杭之旌德显庆教寺，以衣盂之资，命其徒六人造经、钟二楼，暨圆通堂、方丈、三门两庑之属。复闻于朝，以奉仁烈皇后杨氏神御，院益增重。国朝廷祐丙辰，院僧宗胜建普贤大王阁。明年丁巳，宗尚悉易殿之楣楹，新其四檐，而加辟焉。复抔土益旧木像，礲石为床座而妥置之，使与殿称。

至顺壬申，景辉作潮音堂于殿之北墉。至正癸未，毕光宝阁成。越三年丙戌，集僧之堂又成。明年丁亥，香积之室又成。其费一出于众僧。唯阁之役颇殷，赖邑人姓洪君荣助之而始就。荣之二弟盛、兴，复为创鹫峰、潜碧两亭。自是院之規制，一如大伽蓝。四方人士，来观来游，但见穹楼杰阁，飞动于苍烟凉翠间，恍若登耆阇

崛山，亲逢如来法会之未散，莫不欢欣赞咏，得未曾有。比丘普安，曾不以是为既完，且谓自祥符癸丑至今，历三百四十有三年，其中更几世几人，始克致有于是，苟不图文刻诸贞珉，则后来者何以知其艰哉。乃以乌伤朱君烈所述颠末，走青萝山中而求濂为之记。

濂所居距岩不十里而近，一出户辄望见之。当天朗气清时，尝同二三子扪萝攀葛而上，俯瞰县北岩坑、仙华诸峰，如万马东行，或驻或跃，而浦阳江之水，蜿蜒蜿蜒，又如白龙南飞，一泻数十里，绕岩腹而去。周围原野，星罗棋布，诸池沼厕其中，直小瓠耳。方呼酒放歌，天风自东北起，四山鳞甲，一时皆动，同游或战掉不能留，诚天地间胜绝之地也，宜为有道浮屠之所都，而兴仆补坏，代不乏人也。濂因弗辞而为之记。系之以诗曰：

狮子之岩，下瞰巨江。

涵灵茹和，吐阴纳阳。（其一）

不有大雄，曷擅奇绝。

平地涌成，琉璃宫阙。（其二）

谁操化机，寂我鼓钟。

若龙若象，遁栖无踪。（其三）

有大导师，飞锡而至。

以清净身，化为甘雨。（其四）

我民咸言，盍报有年。

一弹指顷，楼阁现前。（其五）

历年四百，何以弗坠。

世有长材，愈作愈丽。（其六）

阳马四騫，栝棱高翔。

金浮翠流，辉辉煌煌。（其七）

观者如登，妙庄严域。

见种种光，暨种种色。（其八）

惟世间相，起灭弗停。

中不灭者，永劫犹存。（其九）

矧是有为，俱系虚妄。

当悟以心，毋取于相。（其十）

若事若理，本无二门。

苟涉分别，即非一真。（其十一）

我述我文，镌诸坚石。

后千万年，与山无极。（其十二）

◇渊颖先生碑

浦阳江之上，有大儒曰渊颖先生吴公。以精深玄懿之学，发沉雄奇绝之文，阖阴辟阳，出神入鬼，纵横变化，其妙难名。生虽弗克显融以伸其志，既没而言立，浩浩穰穰，其书满家，信一代之伟人，足以播芳猷于弗朽者也。

先生讳莱，字立夫，姓吴氏。其先毗陵人，一迁于番，再迁于睦，三迁婺浦江之新田。唐乾宁初，有讳公养者，又迁县西之吴溪，实德政乡尊仁里也。高祖讳闻，赠中奉大夫、福建道宣慰使、护军，追封渤海郡公。妣盛氏，追封渤海郡夫人。曾祖讳蕃，累赠资善大夫、太常礼仪院使、上护军，追封渤海郡公。妣沈氏，追封渤海郡夫人。祖伯绍，累赠翰林学士承旨、荣禄大夫、柱国，追封渤海国公。妣金氏，追封渤海国夫人。父讳直方，集贤大学士、荣禄大夫致仕。妣盛氏。

初，盛夫人怀娠始七月，翰林公忽梦西域神人飞空而来，直止夫人之寝，心异之。越翼日，先生遂生，因名曰来。夫人颇知书，年四岁，授以《孝经》《论语》《春秋穀梁传》。随口成诵。七岁善属文，有“奴仆命骚”之言。岩南先生方公凤，见而奇之曰：“此邦家材也。”取《南山有台》诗中语更今名。族父幼敏家素多书，先生时出与群童敖，私挟一编以归，尽夜读竟，又复往易。或以闻于幼敏，迫而观之，乃班固《汉史》也。幼敏指《谷永杜邳传》谓曰：“尔窃观吾书，能记是，当

不尔责。”先生琅然诵之，至终篇一字不遗。幼敏以为偶熟此卷，三易他编，其诵皆如初。乃尽出所藏书畧之读。岩南益异之，许以孙女妻焉，且授《易》《书》《诗》三经义，暨秦汉而下诗、文章大家。先生一览即悉其指趣。岩南退谓人曰：“明睿如吴某，虽汝南应世叔，政不足多也。”自是以来，先生博极群书，至于制度沿革、阴阳律历、兵谋术数、山经地志、字学族谱之属，尤无所不通矣。时朝廷将有事于东夷，即自奋曰：“此小丑耳，何必上勤王师，使某持尺书谕之足矣！”因撰疏论其事，会病不果上。

延祐间，贡举法行，有司以先生名上。豫章熊公朋来、巴西邓公文原，及吾郡胡公长孺，主去留士。此三数公，辈行老成，学术淹贯，自非博古该今，明体适用，咸惧不得在兹选，而先生与焉。于是东经齐鲁梁楚之郊，北抵燕。每遇中原奇绝处，辄瞪然长视，平冈灌莽，一望千里，昔人歌舞战争之地，壹皆前迎后却，毕在尘沙霜露中。遂与当涂李翼、馀姚方九思、临川傅斯正，贯酒高歌。天寒风急，毛发上竖，自谓绰有司马子长遗风。寻以论议不合于礼官，退归田里。出游海东洲，历蛟门峡，过小白华山，登盘陀石，著《观日赋》以见志。

还，寓同县陈士贞家。士贞之居，与龙湫五泄邻，榛篁蒙翳，似不类人世。先生日啸咏其中，畅然自得，或至莫忘返。游览之暇，不废纂述，重取《春秋》传五十馀家，各随言而逆其意，一以理折衷之。譬犹法家奏谏传逮，爰书既得其情，而曲直真伪无所隐。至若《繁露》《释例》《纂例》《辨疑》《微旨》《折衷》《权衡》《意林》《通旨》之类，皆有论著。复谓孟子乃亚圣之大才，司马迁不当使与邹衍、淳于髡、慎到、荀卿、墨翟、尸佼、长卢同传，因删去诸子，益以万章、公孙丑之徒，作《孟子弟子列传》。古今乐府不同，郭茂倩不当但取标题，无时世先后。就其所次，辨其时代，使各成家，名《乐府类编》。古之赋学专尚音律，必使宫商相宣，征羽迭变，自宋玉而下，唯司马相如、杨雄、柳宗元能调协之。因集四家所著，名《楚汉正声》。其他著述，若此者众，不能殫举也。四方学士，慕其声光，多负笈从之游。先生遇之，恒若抚子姓，羞服有不给者，周之。

监察御史许君克学行部浙东，以茂才荐署饶州路长芎书院山长。未行而疾作，裹风挟疹，血交衾，颜面壅黑，两胫罢屣，不可越户限。重纪至元六年，先生年四十四，栖迟衽席，愈不自振。忽梦作童汪跼赞，觉谓人曰：“汪跼殇者也，予自婴疾以来，何药不尝，而势革若此，今岁殆不起耶？”夏四月九日，竟卒于家。遗命治丧不用浮屠法。诸生胡邦翰、郑铭等，来相治后事。二子士谔、士谧，以至正九年十一月二十四日，奉柩窆乡之盍坞，去家南五里而近。及门之士，以其经义玄深而文辞贞敏也，私谥曰“渊颖先生”。郡太守、县大夫复各祠之于学宫云。

先生自少有大志，专思泽物，不欲以文士名。每慕张宣公为人，推明义利，虽一毫不苟取，表里一致。与人游欢然有恩，愈久愈固。身虽羸弱若不胜衣，双瞳碧色，烂烂如岩下电，见者改容。鉴裁精绝，人以古诗文试之，先生察其辞气，即知其为

某代某人所作。当其赋咏，捷如雨风。一日，于故人家见几上堆剡纸数十番，戏为长歌，顷刻而尽，属对严巧，文采缛丽，观者惊以为神，谓非人所能及。所著书，有《尚书标说》六卷，《春秋世变图》二卷，《春秋传授谱》一卷，《古职方录》八卷，《孟子弟子列传》二卷，《楚汉正声》二卷，《乐府类编》若干卷，《唐律删要》若干卷，文稿六十卷。别如《诗传科条》《春秋经说》《胡氏传考误》，未完。

夫自文气日卑，士无真识，往往倚人之论以为低昂。其推古之作者，则曰：“雄浑赡富，唯有汉之文为然。淳质雅奥，亦唯有汉之文为然。今之从事艺文者，如之何可及也？”呜呼，岂其然哉？苟以先生诸作，置之司马迁、相如、刘向、王褒之间，吾知其未必有愧也。第以数与时违，弗沾一命以至于死，不能显白于世。所幸雄篇巨册，彪炳烜著，有如日星，尚当藏诸名山，以俟后世之知扬子云者。铭曰：

大火焯焯，司于南辰，重明宣昭，神之伸也。有赫厥灵，郁纷轮囷，敷为至文，降于人也。斧藻交横，黼黻斯皇，变化凌厉，动无方也。云流森行，品汇咸亨，于煜其光，寂无声也。胡积之腴，不显其施，返于混茫，朱鸟之区也。骑箕之精，上为列星，发天之符，合地真也。石室之藏，雄文吐芒，鬼神啗卫，禁不祥也。泰华嶙峋，长河瀟沅，永世有耀，与之俱存也。

◇黄文献公祠堂碑

星辰之昭乎上者，天之文；河岳之列于下者，地之文；经纬乎两间而不昭至道者，人之文。人之文虽若有不同，或得之者，亦足以配二仪而常存，后万物而弗凋。盖以长庚之精，峨眉之神，皆降而为命世之神，所以能轧摩日月，扶植鸿化，以震荡乎一世。故虽其魄已丧，其神不亡，乘一气于太虚间，鼓舞变化，随雨露风霆而著形焉。尸而祝之，实有不得不然者矣。有若乌伤黄文献公，其殆庶几乎？

公之方妊，母夫人梦大星煜煜然坠于怀。及其生也，绣川之水为之一清。是盖星灵川祥所融凝而成者，故公遂以文章鸣一时。侍讲经筵，阐明圣学，掌宣皇制，黼黻太平。昭回云汉之章，衣被乎草木人文，化成之效，于斯为盛。是则公虽薨，而其耿耿不没者，固将游神太清，在帝左右。而祠之不设，非甚缺典欤？濠梁胡侯惟信来为县，刚明正直，不可干以私。行之既久，政通人和。屡谒公之墓下，凉絃动木，怅然而有遐思。即下令禁其樵采，复辑公之遗文，刻梓传世。侯犹谓未足以交神明，乃请于上官，筑祠于绣川之滨。堂庭穆如，门庑清谧，象设有严，丹雘焜耀。落成之日，侯具牲酒，盛服致祭。公之孙子，邦之群彦，咸从侯后。精诚格孚，契乎冲漠，焄蒿凄怆，如将见之。祭毕而燕，笾豆静嘉，肴核维旅，鸿休诞昭，秩秩雍雍。四方之士，来游来瞻，僉以为侯之为政，知所风厉，而公之灵爽，永有攸栖矣。

或者则曰：“人死则其气斯尽，古者祭乡先生于社，不过崇德报功为人劝尔。子曰‘其神不亡’，无乃涉于诞耶？”曰：“呜呼，是未知鬼神之情状者也。世之强夫志士，用物精多，尚能昭著灵响，庙食百世，况钟天地灵长之气而发为文章之英者乎？其不随世而磨灭者决矣。至若庸夫凡氓，其德不显，其鬼不灵，则当如此言尔。”

初，祠之成，同门友王君祎既为纪其岁月。公之子梓、从子耘、从弟鲁，暨甥刘某、陈某，谓侯是举有关于名教之重，而非私于一家，又请濂详文其事于石，以昭侯之善，与此祠相为终始。濂按《春秋》书事之法，辞有重复而不杀者，因窃取斯义而为之记。复系之以诗曰：

大星煜煜流光晶，川后敛淬若镜澄。

发为五色文章英，上骑日月薄太清。

呼吸雨露鞭风霆，在帝左右持文衡。

交龙降升藻火明，生色灿烂丹凤翎。

万物承被流华荣，一气阖辟不可名。

玄功敛迹归杳冥，其魄虽离神则形。

元元直与玄化并，有祠翼然妥幽灵。

阳乌高骞耸觚稜，庭宇沕穆森巨楹。

岁时奠祭输精诚，牲牷肥腍酒洁馨。

倏阳忽阴谁使令，有神来下风泠泠。

若乘玄麟紫霞辔，降尔百福响然凭。

邹鲁礼乐当洵兴，春秋报事垂千龄。

门人前史官金华宋濂撰

◇温忠靖王庙堂碑

岁在阙逢涒滩，斗杓直寅，其日，某家子、东家道士储祥曦，新作温忠靖王庙成。后十有一年，太史氏濂为之记曰：太虚之间，一降一升，而能橐籥于无穷者，非气母也耶？气母之所孕，其出无根，其入无门，而其应也甚神。人能察乎阴阳之变，而不凝滞于物者，其知鬼神之情状矣乎？

王姓温氏，名琼，字永清，温之平阳人。父民望，尝中明经甲科。年毫无嗣，与妻张道辉昼夜吁告上帝。一夕，张梦一神手擎火珠，自天门而来，谓曰：吾乃大火之精，将降胎为人。张觉，赤光被体中，犹喜喜然，因有妊。以唐长安二年五月五日午时生，其左腋有霆篆二十四，右半之。七岁，习禹步为罡。十四，通《五经》百氏及老、释家言。二十六，举进士不第，乃拊几叹曰：“吾生不能致君泽民，死当为泰山神，以除天下恶厉耳。”复制二十六神符授人，曰：“持此能主地上鬼神。”言已，忽幻药叉象，屹立而亡。蜀叶天师，后用其符除沴气之为人菑者，仿佛见王衣赭袍、握宝剑，乘追风骏下之。効名之家，遂皆祠王，以祈灵响焉。

王初封翊灵昭武将军正佑侯，其曰“正福显应威烈忠靖王”，则宋季之累加也。

王之事行，见于传记者如此。自荐绅先生言之，可谓怪神之极。殊不知气母之所孕，入奇出神，靡所不有。蜚龙感而异人生，玄象应而神迹著，盖不可一二计。惟夫偏鰲或足以病民，故必降刚明方直者而祛斥之。此亦天之恒道，非所谓怪也。古之圣神，体天以训民，铸鼎象物，使民知神奸，故入川泽山林，魑魅魍魉莫能逢之。奈何气漓俗微，御阴阳、通神明之术不传，方士之徒，遂得窃其机权而用之。世之昧者，不知出于古圣神遗法，咸归诸道家，往往鄙其谲诞不经。呜呼，是果谲诞不经者耶？非耶？系之以诗曰：

南离有赫大火神，下上六气凌三辰。灵龙乘輶辅以云，被发下降瘴海滨。帝出乎震物以伸，约束百鬼主地门。神往从之势翩幡，豹绦衫紫系玺巾。

七斗直剑火晕轮，岳祗渎鬼争骏奔。厉或凭人叱使泯，弼赞玄化归一钧。东嘉之山翠嶙峋，作宫翼翼鸾凤，牲牢充腍酒郁湔。挺然正气扶乾坤，山明泽媚日燕晷。

◇元故荣禄大夫陕西等处行中书省平章政事康里公神道碑铭（代黄侍讲）

至正元年五月二十有八日，故荣禄大夫、陕西等处行中书省平章政事康里公，以疾薨于京师之私第。享年五十有一。某月日，其子某，即奉柩葬于宛平县东安先茔之次。后十有六年，始奉门生杨迪所为状，不远五千里，俾某勒铭于神道之碑。某自退休以来，志念凋耗，疾病侵袭，凡以文来谒者，率皆谢绝。重念昔尝待罪太史，职在论撰，公之行能劳烈，实应铭法，又不敢以衰耄为辞，谨考次而铭之。

公讳回，字子渊，世为康里部大人族。康里，古高车国也。我太祖皇帝亲征而略定

其地，故其国人往往来效，勋庸以致显荣若公家，其一也。曾祖海蓝伯，赠光禄大夫、某官、柱国，追封河东郡公。妣蒙古某氏，追封河东郡夫人。祖燕真，赠推诚寅亮一德翊运功臣、太傅、开府仪同三司、河南江北等处行中书省左丞相、上柱国，追封晋国公，谥忠献。妣金氏，追封晋国夫人。考不忽木，昭文馆大学士、荣禄大夫、平章军国事、行御史中丞、领侍仪司事，赠纯诚佐理同德翊戴功臣、太师、开府仪同三司、上柱国，追封东平王，谥文贞。妣寇氏，追封鲁国夫人；王氏，追封鲁太夫人。

初，文贞尝从许文正公游，亲传其正学。施于有政，蔚为名臣。故公自幼习闻家庭之训，于经史精微、政治得失，多所研究。业既成，以大臣子宿卫禁中。成宗嘉其寅畏，从台臣之请，命公为集贤学士。以年幼辞不受。大德末，复用荐者言，擢公朝列大夫太常少卿。先是，膳肉之颁无法，临事多纷纭，有力者恒负之而去。公为立契，勘以定其数，小大百司依数致膳，朝廷为之肃然。转太常卿，进阶嘉议大夫。未几，改寺为院，升公为使。公辞。武宗正位宸极，人情未安，乃选藩邸旧臣出使四方，以布宣威德。唯公所历最远，复命最先。上悦，深被奖眷。盗发海滨，有梗漕运。丞相议设康里卫分镇其地，且命公为万户。公曰：“弭盗在用贤，不必设卫分屯，以虚糜廩粟。”丞相然之，事遂寝。

至大初，调大司农卿，公又以疾辞。台臣以风纪之司不振，奏选廷臣付以持节之任。公一日入侍，上问及之。公对曰：“中台，表也。诸道，景也。表正则景正。陛下宜慎简正人以镇中台，次用刚毅有为者以使诸道，则群有司知畏法矣。”上曰：“卿言得之。然非卿莫能胜其任。”即日除公山南江北道肃政廉访使。公至，振肃宪度，治劾暴强，风采凛凛。属部有妇人以杀夫系狱，狱已具。公疑其冤，重鞠之。乃其夫仇家所杀，立破械出妇，而坐仇家以刑。同列以贪墨相尚，而反恶公之独洁，语数侵公。公叹曰：“吾安能与若曹抗衡哉，宁谨避之耳。”遂去官。居亡何，皆以赃败，人服公之先见。

至大末，改江南诸道行御史台治书侍御史。时御史大夫怙权自尊，凡议事，自中丞以下皆侍立候颜色，莫敢相可否。公独坐与之辨，事有不直，每执法折之。大夫欲变干勒氏狱，及黜知印静甲，以用其私人，公咸力争其非。大夫衔公甚，及其还朝，仁宗问台臣优劣，丞以危言中公。上不答。大夫言之不已，上怒，唾其面出之。即遣中使赐以上尊，复迁淮西江北道肃政廉访使。庐州从事以受赇被逮，累讯不引伏。公一问，即吐实，曰：“某信有罪，所不即伏者，以诸使者与某无大相远，或迁延冀苟免耳。明公即至，烛下若日，尚何言？”遂伏其辜。会朝廷遣省臣奉使河南，僚佐有误射飞鸽系禁物者，即上之大官，奉使以其不敬，劾免之。公抗言曰：“彼误中禁物，已贡京师，复何罪？奉使代天子南巡，举贤黜邪，咨询民瘼，绝不见之事为。顾以执公手曰：‘微子渊多闻，吾几失对矣。’上愤先朝枋臣舞法，不及诛而毙，诏法司磔其尸以徇。公奏曰：‘斯人元恶，万磔莫赎。但时方春初，群汇发育，岂为戮一遗骸，以伤天地之和哉？’上称善。

上欲选校人材，丞相命百工各举所知。有以宦者子为言者，公曰：“君不见左意、杨复光之事乎？上重惜名爵，虽宰执官阶，各降一等，君乃欲进此鼠辈耶？”丞相闻公语，叱之使出。高丽嗣王兄弟弗睦，上欲废其国为郡县。公曰：“是不当废，宜遣使谕之，使改过自新。谕之不从，然后择其宗室之贤者而立之尔。”丞相偕公入奏，上不听。复叩头力争，久之乃允。留司徒以曹梦炎讼田受赂，上怒，欲赐之死。公曰：“受赂而按田不实，罪准枉法，论不至于死。”丞相入奏如公言。上疑其私，欲穷建斯议者。或遽进曰：“是回回参议也。”上素知公守法律，特释公不问，然怒司徒挠法，卒杀之。公见上。上曰：“朕虽不用卿言，知卿之忠也。”宠遇弥渥。湖广省臣尝出兵讨杀洞酋，及以贿败，上欲置之极刑。公曰：“赃罪应杖，律无置死之科，况有功可赎过乎？不然，适足快夷獠心，非御将之良术也。”卒从公议，得以不死。

会日食，上问其故。朝臣泛引汉、晋事，以天道悠远为言。公对曰：“日者，君象也，君不修德则天垂鉴戒。方今经理田赋，劳师边境，无罪杀杨朵儿只、萧拜住，皆足以致天变，唯陛下念之。”上韪其言。镇戍官犯法，旧从行中书总制者决罚，后改隶枢府，事多违忤。凡条具机务，以国书译为奏目，前是敷绎多剗切详致，后率简略不敢尽言。公皆请复其旧。公在中书，与议天下大事，刚正峭直，略无顾忌。至于进贤退不肖，正法术、厚风俗之属，与丞相言之尤力。丞相尝称公有经济才，且谓人曰：“吾以非才备位宰辅，每惭见子渊。”适有除拜，左右阉公在告，趋丞相以闻。丞相迟之。暨公起，示以铨目，公简去庸懦及有罪者十有二人。丞相顾左右曰：“吾所以迟迟者，为是故也。”丞相退朝，诸佐皆送至私第，习以为常。公曰：“是不过鼓为谄媚耳，均人臣也，于礼何稽乎？”独不往。丞相益贤之。

英宗崩，晋王践祚，时公在京城。俄有旨捕斩廷臣，公惧其有变，即夜宿中书，与大臣定谋。天初明，就其家执之，如缚狐兔，无一得脱者。泰定初，廷议及海漕事，公以廩积方饶，奏减粮数，以舒东南民力。上可其奏。拜太子詹事丞，进阶中奉大夫。公上疏言，太子国家之本，宜择正人如赞善王恂、谕德刘因者导辅，庶几他日可望三代之治。上命妙选东宫僚属，公举方正之士以闻。憊人有来位公上者，遂移疾而去，改山东东西道肃政廉访使。未上，升翰林侍讲学士、知制诰、同修国史。公与时相议不合，辞。迁江浙等处行中书省右丞，进阶资德大夫，以病免归。

晋王崩，明宗在北藩未至，中外危疑，群臣会议不决。公曰：“处变异于处常，神器久虚，非国家之福也。皇弟宜居摄，以防他变。”众论乃定。文宗立，拜荣禄大夫、宣政院使。公上言乞沙汰僧、道，以革游食之弊，其所有田，宜同民间征输。擢中书右丞。幸臣有以利啖公者，曰：“某氏珍宝田宅咸没入于官，吾属索之，宜无不得者。”公正色曰：“既入官，即府藏中物，尚可覬觎耶？况官食非贫，纵贫亦士之常也。”其人怒而止。太师太平王权势炽焰，炙手可热，公视之澹如，面折廷诤，謇謇不少贬。故大臣多不乐公者，谋出公于外，乃除今官。公度为时不容，力辞还第。顷之，闻明宗陟方，涕泗交颐，不能食。自是杜门读书，不出者凡数年。

。

今上皇帝入继大统，夙夜图治，方征用老成，而公薨矣，为震悼者久之，寻赐钞二万五千缗，以恤其家。

公先配史氏、王氏，俱前卒，无子，并封渔阳郡夫人。再娶崔氏，封齐国太夫人。子男五人：祐童，太中大夫、济宁路总管，兼管内劝农事，崔氏出也。孛蛮台，入备宿卫夫，及调；帖木烈思，中奉大夫、江南诸道行御史台治书侍御史；孛罗，奉训大夫、河间路献州达鲁花赤，兼劝农事，皆侧室蒙古乃蛮氏出也。脱脱木儿，国子生，侍姬高丽氏出也。某、某、某，皆先卒。女四人：长涌某，阶福建亳州翼万户廉和尚；次许某，阶江南行台御史中丞吴释，未婚而夭；次适宣寿；次适某，阶监察御史买买。孙男三人：完者不花，某阶某判官；太禧奴，至正甲午进士，将仕郎、太常礼仪院太祝；福寿，尚幼。孙女一人，元童，亦先卒。曾孙男二人：也先帖木儿、某，俱幼。

公敦默寡言笑，从幼至老，嗜学不倦。于书无所不读，而尤深于《易》，故其见于文章，不为崭绝深刻之辞，而理致自然渊永。人以善书、射称公，不知特其余事耳。公弟夔，字子山，亦以文学、政事致位二品，世号为双璧。公家法严峻，虽极寒隆暑，必正衣冠而处。子山旦夕燕见，不命之坐不坐也。训诸子动必由礼，以学业未成，不听其仕，故终公之身，无禄食者。家素贫，尝扈从上京，将发，成宗怜之，赐钞一万五千缗，公力辞。强之，乃受。在淮西，藩王有以米三百石为馈者，公谢弗受，王以为有父风。自赐第为势官所夺，终身僦屋以居，无微见于颜面。平生下士弗厌，虽布衣，遇之不异公侯。世有陷为人奴者，公为出金赎之，置于宾馆，卒成名儒。性不乐异端之说，仁宗以三教异同为问，公对曰：“释氏以明心见性为宗，道家以修真炼性为务，皆一偏一曲，足乎自己。至于儒者之学，则修己治人，以仁义化成天下，此所以万世不可易，而帝王所宜究心者也。”上为之嘉叹。公饮酒不过三觞，上知公贤，虽侍燕殿中，亦不夺其志。其见亲礼如此。晚以道之行止系于时，乃以“时斋”自号云。

某惟自古帝王，必有世臣之家敷布皇灵，式宣鸿化，以共底时雍之治。若汝南之袁、颍川之陈是已。公家自文贞左右两朝，殊绩奇勋，照耀简册。公之兄弟起而继之，峻跻华要，茂建丕猷，益有光于前人。至子若孙，复克纘承惟谨，或以长材出膺郡寄，或从科目入属奉常，而今治书侍御史，尤以功名自砥砺，所至辄烈烈有声，人以象贤称之。《诗》所谓“济济多士”，《书》所谓“世笃忠贞，服劳王家”者，非公家之谓与？嗟夫，躬亲俪美于前，而又使嗣人匹休于后，非盛德之士不能，公实有焉。螽之袁、陈，未足多让，泽流后裔，讵有既耶。是宜播之声诗，刻之乐石，使后世之士知我朝名臣有如此者，不亦扬休无极矣乎？铭曰：

圣王御天，万方骏奔。秉德宣猷，厥有世臣。

猗康里氏，远昭世序。迨于文贞，克膺帝辅。
公起承之，奕奕其昌。宿卫禁宸，日受龙光。
洵典秩宗，受牒以牒。五持使节，拜宪屡肃。
何奸不锄，何污不澄。严霜之下，恶草不生。
暨参庙论，正气莫夺。方之太阿，百铎不折。
上简主知，选贰宫端。袖中谏疏，言人所难。
乃候北门，乃莅南国。乃宣院政，乃登丞弼。
垂绅正笏，屹立龙墀。决定大疑，为国蓍龟。
金壬忌之，有芒在背。俾服大藩，出居于外。
公则夷然，归休于家。何以为娱，遗书五车。
皇明丽天，无物不被。将询黄发，以敷至治。
彼苍者旻，胡不睟遗。一鉴之亡，四国之悲。
公虽云亡，公多孙子。益伉其门，重圭叠组。
东安之原，马鬣其封。骏发尔祥，其来不穷。
河山带砺，勋在盟府。史臣勒辞，永诏千古。

◇元故朝列大夫知婺州路总管府事致仕赵侯神道碑铭（有序）

於乎！濂尚忍铭我赵侯也耶！初，侯未亡时，尝谓濂曰：“生平交友虽多，唯待制柳公、侍讲黄公相知为深，二公既已即世，吾子其高第弟子也，宜有以知我。我死，子必铭之。”濂辞不敢当。言未几，侯以执节不回遇害，而至于死。死后三月，其子友直复衰绖踵门，拜且泣曰：“先子将终时无他言，但以必得先生铭为请。先生若重辞，先子之目将不瞑于地下矣。”濂闻之，与之对哭失声。於乎，濂尚忍铭我赵侯也耶！虽然，侯不以濂为不肖，每以忘年交视之，至其没也，复使执笔以从二公之后，其知濂厚矣。纵不能文，可不具列群行，以白侯于不朽耶？谨按状：

侯名良胜，后更名大讷，字敬叔，姓赵氏。先世有属籍于宋，其讳元俨者，实熙陵之第八子，封周王，谥曰恭肃。恭肃生允良，封定王。定王生崇绛，赠太师、安康郡王，谥曰孝荣。孝荣生仲矿，奉国军节度使，封南阳侯。南阳生士翮，赠武节大夫，南渡初，自开封迁家睦州。武节生不玷，武义郎，因添差监婺州浦江县税务，复徙居浦江，为浦江人。武义生善近，训武郎。训武生汝迁，从义郎。从义生崇，会稽县尉。县尉生必班，累赠奉训大夫、庆元路昌国州知州、飞骑尉，追封浦江县男，则侯之父也。

侯少闾敏，通蒙古字学，遂以译曹掾起家，补泉州录事。泉为宝货之府，大商巨室，犬牙而居，侯不少徇。大盗弄兵宁都，焚城杀守，吏势张甚。州之无赖男子，帅众应之，遂谋来攻城。侯令沿河作大栅，以遏其冲。简强丁数百乘城，侯骑白马，奋呼后先，士气百倍。寇度不可攻而退。中书遣使者造海舟十五艘，期五十日成。官降钱不与材等，民相顾大惊，畏使者，不敢发一辞。侯独列民贫困状，请益之。民为侯生立祠。贾胡及恶少年，挟帅臣之威肆行市区，与文学掾分争，挝之出血。侯缚使赴狱。转兴化录事，官赋多隐弊，岁勒受役者代输。侯搜旧官书验之，则邻县民产也，民服罪。大姓数十家，倚权贵人久不应科繇，侯役之无所遗。屡以重势撼侯，侯不为动。浮屠镜、空争长，镜击死暗儿诬之。儿忽苏，空执送官。官受赂，出镜罪。部使者以其牒下侯，镜狱遂成。

越一年，摄莆田县事。县僧慧与子华竞，令人杀婴孩中子华，吏入子华死。侯廉得实，白其冤。亭民以兵器私斗诉官，互以计相倾，三年不决。侯悯其毁家，各傅以轻法。拜舞而去。改漳州路龙溪县尹。俗尚鬼，垒石作祠，以奉紫衣神。黠民将为奸利，必杀犬来祭。侯投神江中，移其石以修孔子庙庭。畚丁、洞獠杂居县境上，官稍侵之，辄执兵暴掠，至烦大军终年屯不解。侯调御有道，不敢为变。富民苏甲怙势杀人，行赇郡守，没其罪。侯抱案诣府，历斥其奸。守盛怒，陷侯以重罪。上官察非实，侯获免。税册多虚额，应役之家咸破。侯于实税中，十加一而均输之。桑门清、真共斗，清不胜，遂挝死人陷真，连坐者馀百。侯独正清以法，馀皆释之。侯秩满归，争遮道持金为谢。侯却去弗受，民为树碑柳营江上。奸胥利兴作，常藉为媒，遍侵间右民。侯曰：“吾不久当更，毋遗患后人。凡官廨悉新之，兴大役而民不知，咸以为神。或出远郊，父老携子弟聚观，各举手加额曰：“吾父母也。”其为人爱慕如此。

调泉州路永春县尹，仅四月，以昌国忧去官。未终丧，改福州路侯官县尹。不赴。俄迁温州路永嘉县尹。转运司以盐壅不行，计民口赋之，吏遂并缘为病。侯令富人买而售于民，民安而课登。旁州县列诉于府，请如侯法。瑞安何良伪为官书，指平民私贩盐，司逮捕急，民自杀者三人。事下侯治，徙良于汀州。巡逻小兵如良为者甚众，侯复痛惩乃已。州城枕大江，水暴岸善崩。侯出新意，并江数千尺，列植大木先障，以其芒杀浪势，次填沙土而甃以石，迄今不坏。古田赋重，耕者多远窜，侯命役人与田邻合耕而入其粟。亭户兵甲，侵官民田数千亩有奇，侯罪兵而复之。

陈孝子墓久不治，侯为建亭树表，以劝其俗。赈荒之粟积至五千斛，遇善岁不散，侯恐吏巧夺也，各呼主名给还。除温、台等处海运千户，未上，丁母夫人忧。

改知吉安路永新州，阶从仕郎，四转至奉训大夫。永新民素横，势出守吏上，每论役，甲乙相哗，数月不定。侯厘正版籍，列为十年，使之次第相承，素巧避者不能脱。苟有办集，又度其力薄厚为差，官赋视常岁辄早登。民以死状闻，官案验之，卒吏千馀从行，民逃匿，数里无烟火。侯与一二吏出，田井晏然。官每恶尸弗近，一听吏。侯忧吏奸，亲临场诘验，无难色。鹄湖、罗陂皆群盗渊藪，时出钞道，为过客患。昔尝置戍军，要莫能禁。侯出奇计，剪其渠魁八人，馀党奔溃。彭源险远，视罗陂夺攘尤甚。侯令巡检移镇其地，盗风为止。乡饮酒之礼久废，大比，侯率多士行之。盛冠衣，自南馆入学宫，正容耦进，先后不乱。舍菜已，宾主就位，献酬有节，揖拜有容，观者叹悦。在官二年，告老解印绶而归。将归，民怅怅如有所失，争诣省、宪二府乞留。侯固辞不可。百里之间，嗟惜赞颂之声交于道路，至有署侯爵号、事之如神明者。

侯既归，中书以闻，命以同知婺州路总管府事致其事，阶升朝列大夫。侯遂优游里闾，与宾朋过从，扶杖徒行，俨如布衣时。县大夫问政，直告以利害，匡救其失为多。至正壬辰，中原兵大作，蔓延江南。江浙行中书数遣大将统军来过，侯告之以恤民止杀，言多听。戊戌三月丙辰，睦州破。六月乙酉，兵入浦阳。侯仓黄未及避，有被甲持戟而入者，自称徐将军。闻侯有重名，以甘言诱之使降。侯曰：“吾为元朝老臣，唯有一死报国耳，毋多言。”徐知不能屈，去。继有至者，强其行以见主帅。侯曰：“吾老不能步。”复使之乘马，侯曰：“吾不能乘。”遂遇害。幸不死，创甚，至七月丁巳竟歿。越三日庚申，葬于县东五里之冈，士大夫莫不为之出涕。帅阉具侯死节，请褒赠于朝。文虽上，不报。

侯享年八十有一。母黄氏，县之士族，累封浦江县君。娶同邑张氏，生男子六人，友诚、友进、友淳、友恭、友年、友谅。友诚早卒。友淳福建行省宣使。女二人，永嘉县尉龙泉季某之子某、瑞安唐彦骥，其婿也。次娶永嘉许氏，忠简公景衡七世诸孙女，累封浦江县君。生男子一人，友仁。少房武林周氏，生男子二人，友保早卒，友闻去家为道士；河西张氏，生男子三人，友直、友端、友毅，皆业儒。友端早卒。侍姬李氏，生女一人，适朝列大夫、建德路同知总管府事吴薰之子桷，桷能文辞。孙男七人，季祐、季宝、季真、季道、季宁、季能、季明。孙女六人，皆未行。曾孙男一人，道贞。

侯局度精明，济之以廉刚，所至以锄强梗闻。吏卒畏威无敢出，乡元豪宿猾，咸相告引去。至于兴学校、治水利之事，尤加之意。学田夺于民间者，必复之。陂湖或不筑，躬视其成，虽大暑寒弗避。侯生平不识请谒，义所当为，虽尊官显人、势相统属者，有不暇逊。常自诵曰：“我有命在天，不以柔媚而得，不以刚直而失，男子之膝，可易屈耶？”君子韪其言。侯年既耄，宾客故人多勉侯为子孙计，何为久

自苦？侯笑曰：“吾在泉时，宝货俯地可拾，尚弗顾，今肯尔耶？”於乎，何其贤也！

士君子能建治功于隆平之日，而或不能保大节于危难之时，盖为政以及物者易，而杀身以成仁者难。侯自历官县州，以循良之吏著名，及至见危授命，又如严霜烈日，可畏可仰，不贤而能之乎？侯之家食尚若此，使当大藩之寄，其不能为城郭封疆死守乎？执德弗回，至死不变，在古者犹鲜能，况今人乎？贾子所谓“顾行而忘利，守节而伏义”者，非侯其谁也？是宜铭。铭曰：

天地正气，随时降升。明为日月，流为风霆。

我人得之，挺然自生。直养无害，与我道并。

在子死孝，在妇死贞，在臣死忠，弗挠弗倾。

苟无是焉，欲然不宁。言言赵侯，万人之英。

历仕州邑，以治剧称。大辄错节，不与刃争。

和而阳春，肃而秋刑。慑伏暴强，抚绥嫠嫠。

吏有师傅，民有父兄。迨于悬车，方洋里閤。

崇论竑议，有轰其听。镇晬遏浮，方藉老成。

太白吐芒，遭时抢攘。侯誓弗屈，竟死于兵。

忠精耿耿，上摩日星。非气之正，其何以能。

五里之冈，有山若城。巨碑巍巍，太史勒铭。

高风凛然，百世可征。

◇诗冢铭（有序）

番有奇男子曰鲁脩，学诗李存先生。先生以文雄江东，独才脩。脩有诗朋十人，皆缘情善赋。番数罹兵燹，脩惧其诗失传，埏埴为甕，刻瘞山中。瘞已，请太史宋濂勒铭其上。铭曰：

河清岳明，效坤之灵，何蕤绥兮。

鸟文龙章，于粲其英（叶），昌厥辞兮。

冥智敛真，返诸至神，蕤黄垆兮。

泄为醴泉，三秀千眠，合贞符兮。

番山可夷，番川可移，道如初兮。

◇陈彦正丹室铭

陈君彦正，家在浦阳大山间，实与龙湫五泄为邻。岩峦回互，林木荟翳，绝不类人世。彦正日走其下，当夜静月白时，辄登高危坐，冥然长思，欲求古仙人与游而不可得。每天风飏飏作声，辄以为王子乔、韩众辈，真蹑凤吹箫而来也。

如是者数年。一旦，有贝君一默者过之，谓曰：“子若是，甚无益也。子欲求之，盍学长生乎？一气孔灵，凝之者神。神之攸庭，黄房窈冥。绵绵若存，是为天根。子能有意于斯，古仙人不难致也。”彦正乐其说之美，乃稽首再拜，膝行而前曰：“某不敏，窃妄意浮游尘埃之外，不自期凡质之未易化也。先生不以为非而辱教之，愿终身服役为弟子。敢问其所欲者何先？”贝君复曰：“吾道贵清静，吾养神丹，鸡犬不可近。子盍别为丹室以处我？”彦正欣然从之，乃即所居之东若干步，作室一间。中设一榻，贝君与彦正对坐其中，而钥其所从之门，外不可入，内不可出。前留一窍，以纳浆食，后通一窦，以传便液。盖将专一心志，以绝外慕云。室既成，彦正录贝君之言以告濂曰：“子宜为我广而铭之。”

濂闻古仙人之往来，多在霍撞五岳、金庭洞阳、赤水仙都诸山，考之《九微志》可见已。五泄处越水之滨，固不足以附丽诸名山，而齐之谢元卿曾采药其中，后竟仙去。濂尝至其处，乘风放歌，便觉精神遐漂，驾灏气于溟滓莽苍之间。惜不得元卿辈与之共语，怅然而还。今闻彦正结室其旁，又得贝君为之依归焉，得无歆艳乎？因不辞彦正之请，而备书贝君之言，广其意而为之铭。铭曰：

天地构精，日月揜持。雌阴黄包，雄阳元施。

内有太虚，明灵所都。是谓规中，执神之机。

超乎群品，不分精粗。古之真人，日与之俱。

三华生津，五气布基。水虎敛魄，火龙藏珠。

金华先倡，白液后追。阖辟泥丸，天行空飞。

入火蹈水，不熬不濡。或婴霓幢，或翳凤舆。

杳然玄化，莫知所如。五泄之山，蛟龙所居。

下有隐者，山泽之臞。乃连曲房，乃列鼎炉。

浮游黄宫，神光舒舒。蚩君背剑，鬼伯执殳。

以嚙弗祥，以卫不虞。养尔神婴，出有入无。

定见金童，手持简书。致上帝命，召还玉枢。

尚慎旃哉，勿亟勿徐。我作斯铭，勒之座隅。

◇佛慧圆明广照无边普利大禅师塔铭

少林氏之道，七传至慧照大师而别为一宗。设三玄门，演畅宗乘，权实兼行，照用双至，四方从者，雷动海涌。逮乎宋季，其道浸微，惠朗钦公起而任之，竖大法幢，屹然为东南之标准。广济妙公亲承法印，据狮子岩，建立死关，鲜有升其门者。唯智觉本公深造阃奥，以大辨才通博无碍，慈泽普滋，遍一切处。其入室弟子以十数计，若今佛慧圆明广照无边普利大禅师，则其一人也。

师讳元长，字无明，一号千岩，越之萧山县许贤乡人。族姓董氏，世以书诗为业。父讳九鼎，母何氏，晚而生师。欲弃之，嫂谢氏鞠以为子。七岁即就外傅，诸书经目辄成诵。出入蹈矩循矱，有若成人。其父喜曰：“是子当以文行亢吾宗乎？”师之诸父昙芳，学佛于富阳法门院，欲乞师为嗣，谢氏不从。未几，师遭疾甚革，谢氏祷于观音大士曰：“佛幸我慈，俾此儿弗死，令服洒扫役终身。”祷已，师汗下而愈。遂使从芳游。时师年始十七，益求良师友摩切九流百氏之言。已而曰：“此非出世法也。”复从授经师学《法华经》。至“药王品”，问曰：“药王既然二臂，曷为复现本身耶？”授经师异之。

年十九，剃发受具戒，走武林，习律于灵芝寺。律师问曰：“八法往来，片无乖角，何谓也？”师曰：“胡不问第九法乎？”律师曰：“问律而答以禅，真大乘法器也。”会行丞相府饭僧，师随众入。本公亦在座遥见师即呼谓曰：“汝日用何如？”师曰：“唯念佛尔。”公曰：“佛今何在？”师方拟议，公厉声叱之。师遂胡跪作礼，求示法要。公以“狗子无佛性”之语授之。继往缚禅灵隐山中。雪庭传公召师掌内记，师下笔成章，五采交粲，见者叹服。俄弃归法门，随顺世缘，殆将十载。

○

一旦，忽喟然曰：“生平气志充塞乾坤，乃今作瓮里醢鸡耶？”复造灵隐，跣趺危坐，胁不沾席者三年。因往望亭闻鹊声有省，亟见本公，具陈悟因。公复斥之，师愤然来归。夜将寂，忽鼠翻食猫之器，堕地有声，恍然开悟，觉身跃起数丈，如蝉蜕污浊之中，浮游玄间，上天下地，一时清朗。披衣待旦，复往质于公。公问曰：“赵州何故云无？”师曰：“鼠餐猫饭。”公曰：“未也。”师曰：“饭器破矣。”公曰：“破后云何？”师曰：“筑碎方璧。”公乃微笑，祝师曰：“汝宜善自护持，复遁岩穴，时节若至，其理自彰。”师既受付嘱，乃隐天龙之东庵，耽悦禅味，不与外缘。有二蛇日来环绕座下，师为说三皈五戒，蛇矫首低昂，作拜势而去。师自是声光日显。笑隐公方主中竺法席，力荐起之。江浙行省丞相脱欢公，时领宣政院事，亦遣使迫师出世。师皆不听。

居亡何，诸名山争相劝请，师度不为时所容，与弟子希升杖锡逾涛江而东。至乌伤之伏龙山，见山形如青莲花，乃卓锡岩际誓曰：山若有水，吾将止焉。俄山泉溢出，作白乳色。师遂依大树以居，实泰定丁卯冬十月也。初，伏龙山有禅寺号圣寿，其废已久。当师入山时，乡民咸梦有异僧来，遂相率登孱颜、披蒙幕以访焉。见师晏坐不动，各持食饮之物献之。邑大姓楼君如浚、楼君一得，各为伐木构精庐以安师。寻因旧号，建大伽蓝，重楼杰阁，端门广术，辉映林谷。内而齐鲁燕赵，秦陇闽蜀，外而日本、三韩、八番、罗甸、交趾、留仇，莫不奔走膜拜，咨决心学。留者恒数百人，至有求道之切，断臂师前以见志者。师各随其根性而为说法，譬如一雨所施，小大根茎，悉获沾润。王公大臣，向师之道，如仰日月。名倾朝廷，三遣重臣降名香以宠嘉之。江淮雄藩，名宣让王，则下令加护其教；若镇南王，则亲书寺额，赐僧伽黎衣及“普应妙智弘辨禅师”之号。帝都亦再降旨，俾势家无有所侵陵，仍更号曰“佛慧圆鉴大元普济大禅师”。资政院又为启于东朝，命朝臣制令号并金法衣以赐焉。

至正丁酉夏六月十四日，师示微疾，索浴更衣，会众，书偈云：“平生饶舌，今日败阙。一句轰天，正法眼灭。”遂投笔而逝。春秋七十四，夏五十六。是日午时，其弟子德亨、德馨等用陶器函盖，奉全身瘞于青松庵。悲恸眷恋，声撼岩壑。太师中书右丞相脱脱公，建大寿元忠国寺，为皇太子祝釐之地，欲奏起师为住持，适有自江南来者，言师示寂，乃止。

师疏眉秀目，丰颐美髯，才思英发，超越丑夷。顷刻千偈，包含无量妙义。得其片言，皆珍袭宝护惟谨。《语录》若干卷，《和智觉拟寒山诗》若干首，皆刻梓行于丛林。世之论者，谓师践履真实，谈辨迅利，或无愧于智觉云。

濂初往伏龙山见师，师吐言如奔雷。时濂方尚气，颇欲屈之，相与诘难数千言，不契而退。越二年，又往见焉。师问曰：“闻君阅尽大藏教，有诸？”濂曰：“然。

”曰：“耳阅乎？抑目观也？”曰：“亦目观尔。”曰：“使目之能观者，君谓谁耶？”濂扬眉向之，于是相视一笑。自时厥后，知师之道超出有无，实非凡情之可窥测，因缔为方外之交垂三十年。其激扬义谛，往来尺牍之在篋衍者，墨尚湿也。虽缠于世相，不能有所证入，而相知最深，铭非濂为而孰宜为之？铭曰：

天目岩岩，中设死关。岂无来者，望门而还。

言言智觉，伏剑深入。师子长号，百兽咸蛰。

伊谁嗣之？惟千岩师。彼硕者鼠，爰契我机。

一锡行云，遁藏空谷。明珠自护，不受人触。

世虽不闻，灵蛇先知。矫首听法，为说三归。

我将辞名，文彩或露。足踏飞涛，一夕东度。

龙峰郁环，如青莲花。我栖其间，指树为家。

兆之所形，孰曰无象。有来粦粦，且饁且饷。

化被草莽，为梵王宫。金银琉璃，绚烂太空。

四方风动，无不稽首。师我檀度，愿垂摄受。

群聋正酣，昼夜沈冥。法音方震，万耳皆惊。

璨璨珠玑，喷落人世。神鬼莫窥，天龙交卫。

有宠自天，锡予便蕃。金衣宝薰，耀于祇园。

外护之严，罔敢干令。慧照之宗，于斯为盛。

乘化而逝，人天慕哀。妙相如如，初无去来。

既无去来，何有增减。太史勒铭。以昭元范。

◇惠香寺新铸铜钟铭

浦阳有大兰寺在白麟溪之滨者，曰香严，创建于东晋时。年代辽邈，所铸之钟，或成或坏，不能尽知。其可知者，宋宝元间，继隆大师实为之。隆尝走汴京，得中宫赐铜为助，而兵部侍郎胡公则力相其事。至庆历甲申，钟始成。越七十有八年，睦寇至，毁焉，时宣和辛丑之春二月也。普照大师子文，即帅其众而继为之。至甲辰冬十月，钟复成。

卷六

◇元故翰林待制承务郎兼国史院编修官柳先生行状

本贯婺州路浦江县通化乡胡塘里。曾祖蕴。妣童氏。

祖补之，宋迪功郎、嘉兴府崇德县主簿。妣金氏。

考金，宋忠翊郎、高邮军高邮县令，元赠奉训大夫、淮安路泗州知州、飞骑尉，追封浦江县男。妣俞氏，追封浦江县君。

先生讳贯，字道传，姓柳氏。其先出于有熊，至展禽仕鲁为士师，食采柳下，因以为姓。自后子孙浸盛，世家河东。宋建炎中，先生七世祖铸，始从赵忠简公鼎自河东迁杭。子森，复自杭迁婺之浦江。森三传至蕴，生崇德县主簿补之。崇德生高邮县令金，高邮，先生父也。

先生素有异质，虽未成人时，即不苟取。尝随高邮游神祠，拾人所遗金珠，可直万缗，密伺其求而还之。高邮惊异。甫及冠，遣受经于兰溪仁山金公履祥。仁山远宗徽国朱文公之学，先生刻意问辨，即能究其旨趣，而于微辞奥义，多所发挥。既又从乡先生方公凤，与粤谢公翱、栝吴公思齐游，历考先秦两汉以来诸文章家，大肆于文，开阖变化，无不如意。先生曾不自以为足，复裹粮出见紫阳方公回，淮阴龚公开，南阳仇公远，句章戴公表元，永康胡之纯、长孺兄弟，益咨叩其所未至。诸公皆故宋遗老，往往嘉先生之才，无不为之倾盖。隆山牟公应龙，得太史李心传史学端绪，且谙胜国文献渊源之懿，仪章、官簿、族系，如指诸掌。先生又往悉受其说。自是先生之学绝出，而名闻四海矣。

国朝大德四年庚子，先生年三十一，始用察举为江山县学教谕。至大元年戊申，迁昌国州学正。江山乃大山穷绝之境，昌国则邈焉云海岛屿中，先生皆以诗书变其俗。考满至京，中书左丞张公思明一见辄器重，俾诸子师事之。当时号为名公卿者，争相延誉，如恐弗及。吴文正公澂尝语人曰：“东阳柳君，卿云甘雨也，天下士将被其泽。”程文宪公巨夫以墨一丸授之，曰：“文章正印，今属子矣。”

延祐四年丁巳，先生年四十八，铨曹以士论所归，特除湖广等处儒学副提举。未上。六年己未，改国子助教，阶将仕佐郎。至治元年辛酉，升博士，转将仕郎。诸生敬之如神明，其后散之四方几千余人，去为良御史、名监司者甚众。泰定元年甲子，先生年五十五，迁太常博士，升征仕郎。时方承平，稽古礼文之事，次第并举。遇有所讨论，先生为权准古今，敷绎详致，廷议莫不多之。勋戚大臣请谥者三百余人，文移山积，先生为之质正定名，三月而毕。临江守李侯倜，为部使者所劾，他使者力辨其诬，后官至集贤侍讲，法应得谥。其子欲入金没临江事。先生辞之，卒

明其非罪。柄国者欲以其祖配享孔子庙，礼官承望风旨，唯恐有忤。先生毅然持不可，事遂寝。有神降于洛郡，长吏列上仪曹，请锡封爵，中书下其事。先生以为神奸能鼓民，不治将乱，请檄所部禁戢之。沅陵岁贡包茅四十馀甌，茅轻舟摇，押行吏多沈江死。先生建言请损其三之二，附他贡以输。浙东西每三岁更造漕舟，民甚苦之。舟一渗，辄弃不视。先生白相臣，建船司以修治之。其当新者，听给没入赃吏钱，毋病民。会有力沮者，不行。监察御史马公祖常荐先生堪任风宪，章再上，弗报。

三年丙寅，先生年五十七，以文林郎出为江西等处儒学提举。龙兴郡学久废不治，先生请宰府新之，延聘名儒孙辙为学者师，士风为之复振。他书院不籍于礼官者亡虑数十，其出纳布粟，从提举署主领一员司之。有力者常行货求檄，至则干没为奸。先生尽罢遣，分隶所在学官。提举朝夕膳，岁进米凡八十石，皆取于诸生饩廩中，先生谢不受，后来莫有敢追袭其弊者。黄冠师建三灵庙以侵学地，浮屠据东湖书院田二百二十亩而赢，先生皆为复之。葺汉先贤徐孺子墓，立宋高士苏云卿祠。古碑碣所纪有关于名教者，必访求而重刻之。凡可以扶世导民者，无不为也。丰城学徒挟奸以持校官短长，时主教者又不知以职自振，每用计相倾。先生各坐以其罪，闻者心服。南康仓吏坐飞粮，株连逮系者百馀家，省、宪二府檄先生献其狱。先生为钩擿隐伏，所平反者甚多。

满秩而归，杜门不出者十馀年。完庐数间，仅蔽风雨，而粥或不继，先生处之裕如也。先生虽居岩壑，海内仰之，犹如鲁泰山作镇海隅，莫不以其出处为斯文隆替之候。风纪行部，必过门承问而去。至正元年辛巳，先生年七十二，朝廷更化，征用老成。台阁近臣，有以先生名闻于上者，于是有旨以翰林待制、承务郎、兼国史院编修官，起先生于家。先生即冠带见使者，退谓人曰：“吾今幸亲禁近，得陈尧舜之道，以赞太平之治，死不恨矣。”会贡举法复行，江浙行中书留主文衡。二年壬午夏五月至官，仅七阅月，竟以一病不起，实冬十一月九日，而先生年七十三矣。省台枢府而下，皆来归赙，馆阁之士，至于洒泣。集贤大学士吴公直方，国子博士吴公师道，与经筵检讨危公素，共经纪丧事。御史中丞张公起岩，在成均为同僚友，至是哭之尤哀。冢孙颖奉灵而南还，诸公相与陈奠都门，见者皆咨嗟陨涕。

三年癸未冬十二月二十一日，与夫人盛氏合葬通化乡荆山之阡。盛氏累封浦江县君，先十二年卒。子男三，鹵、同、因。孙男三，、颖、穆。夭。女一。所著书，有文集若干卷，《金石竹帛遗文》若干卷，《近思录广辑》三卷，《字系》二卷，藏于家。

先生局度凝定，燕居默坐，端严若神。即之如入春风中，久与之处，未尝见疾言遽色。虽有桀骜者，瞻其德容，莫不气夺而意消。孝友本乎天性，季弟实，出为人后，遇之有恩，不翅在家者。生平以奖进人材为己任，谆谆劝诱，至老不倦。人有一善，播之惟恐不亟，士类咸乐归之。读书博览强记，自礼乐兵刑、阴阳律历、田乘

地志、字学族谱及老、佛家书，莫不通贯。国朝故实、名臣世次，言之尤为精详。善楷法，工篆籀，京兆杜公本谓其妙处不减李阳冰。为文章有奇气，春容纤徐，如老将统百万雄兵，旗帜鲜明，戈甲焜煌，不见有喑呜叱吒之声。若先生者，庶几有德有言，为一代之儒宗者矣。

先生既没，同门友戴良既著哀颂一篇，以泄无穷之悲。复恐先生之群行湮没，无以显白于来世，俾濂状之。濂虽不敏，受先生之教为深，因不让而搜罗缺逸，评鹭成章，以附家乘之后。虽言之不文，幸无愧辞。他日太常特为定谥，史官特为立传，尚有采于此云。谨状。

至正五年十月日，门人金华宋濂状。

◇元故集贤大学士荣禄大夫致仕吴公行状

曾祖讳闻，皇赠中奉大夫、福建道宣慰使、护军，追封渤海郡公。妣盛氏，追封渤海郡夫人。

祖讳蕃，皇累赠资善大夫、太常礼仪院使、上护军，追封渤海郡公。妣沈氏，追封渤海郡夫人。

父讳伯绍，皇累赠翰林学士承旨、荣禄大夫、柱国，追封渤海郡公。妣金氏，追封渤海国夫人。本贯婺州路浦江縣德政乡尊仁里，年八十二。

公讳直方，字行可，姓吴氏。初名佐孙，后避十世祖讳，而更以今名。其先出自毗陵。毗陵，吴之延陵，乃季子之采邑也。自时厥后，一迁于鄱阳，再迁于严陵，三迁于婺之浦阳。浦阳北鄙有里曰新田，去今县治二十馀里，吴氏之先祖家焉。其冢犹在大楼山之原。历三传，有一翁始生六子，其介子公养，唐乾宁初，又迁县西吴溪上。公养生伯胜，伯胜生文昌，文昌生承倚，承倚生佐，佐生崇，崇生子置，子置生嗣明，嗣明生元礼，元礼生景行，景行生玘，玘生宣慰公闻。世隐于农，而能以诵诗读书为务，委祉垂休，有自来矣。闻生太常公蕃，字衍之，以贤迁有无，稍出游梁、楚间。晚而无子，以二从兄迪功郎英之季子伯绍为之后。伯绍实承旨公，一名宝，字伯玉，公之父也。

公生四岁，渤海郡夫人没，七岁而渤海国夫人卒，十岁而太常公亦捐馆舍。公独与承旨公居。承旨公宽厚长者，强宗右姓时侵苦之，至夺其土田。承旨公莫能谁何，益衰削不振。公时虽在童孺，痛彻心髓，仰天自誓曰：“彼之陵轹我者，利其孤幼也。予稍长不能扬眉出一语向人，岂丈夫也哉！”遂自力于学。宗人幼敏家多纳名士大夫，乡先生方公凤、粤谢公翱、栝吴公思齐，咸寓与处。或谈名理及古今成败治乱，或相与倡酬歌诗，公每出侍侧，闻其言有会心处，辄记之终身不忘。入坐书塾

，凝然如痴也。至晚各散去，犹执卷呻吟弗辍。偶婴蛊疾，诸医不能疗，数至困殆。如是者十年，人为公危。有相者谓曰：“子貌广贵甚，疾且亡害，何不游学以畅其怀乎？能如吾言，病不药而自已。”公然之，乃入郡城，习吏事于帅阃。不数月，其疾果瘳。

闻钱塘为东南都会，而行中书莅焉，一时人物之所萃，复谋往游。居数年，而莫有用之者。公叹曰：“王侯将相，宁有种耶？吾殆俟时也，此而不遇，岂别无其地乎？”于是不告戚姻交友，直走京师，日与贵公卿接。所见益恢宏，而所守益凝定。第困于在下，而峻登枢要者又讳问布衣，只影翩翩于五千里外，恶衣菲食，或不能继。凡历二十有六年，而落魄益甚矣。其刚劲不屈之气，初不肯少贬以徇流俗。或悯公，劝其南归。公笑曰：“生为寄，死为弃，何分冀北与江南乎？”掉头去不顾。大德中，会有旨粉黄金为泥书《毗卢大藏经》，礼部选笔札端谨者充，公在选中。以劳当得一官，未几罢。延祐初，明宗在潜邸，用大臣荐，入备说书。已而出幸北藩，又罢去。泰定元年，奉省檄为上都儒学正。迨之官，已为代者所先。

时太师德王马札儿台留守滦京，闻公气宇恢廓，延而与之语，大悦，以为南阳诸葛孔明，亦不是过。因聘入宾馆，使教其二子。长则中书右丞相脱脱，次则御史大夫也先帖木儿。公遂留德王家。后德王日益贵显，事有难决者，必质问而后行，如卜蓍龟，无少爽者。德王益敬之，遇休沐日，必与公对语终日。德王曰：“吾与他儒生语辄欠伸思睡，今与君言，有若聆钧天广乐，终日而不知倦，君诚奇士哉！”语已，熟视公，连称“赛银”者再。赛银，华言所谓好也。元统二年，丞相方执法中台，以公在先朝有讲说之劳，言于上，命为江浙等处儒学提举。与对品阶，中官难之，拟授副提举，阶将仕佐郎。未及上。重纪至元二年，御史台改授将仕郎、海北广东道肃政廉访司承发架阁兼照磨，而公年已六十二矣。

三年，迁宣政院架阁管勾。四年，至官仅三月，升本院长史。公尽心弗懈，出纳惟允，中宫数有白金、束帛之赐。远国遣使，欲献群马以徼求厚价，同列以为利，争言之。公揣其道途所经，屡涉海洋，非二年不能到，纵到，马亦病死不能多，力却去之。六年，丞相之从父秦王伯颜方秉钧轴，恃其有定策功，专权自恣，悉变乱旧章，出入拥重兵以自卫。中外危疑，上深患之。丞相时为御史大夫，乃召之问计。丞相以谋于家为对。公曰：“大夫失言，几事不密，则害成矣。”丞相惊曰：“谋将安出？”公曰：“宜亟黜之，以谢天下。”丞相以亲嫌辞，公曰：“《传》有之，‘大义灭亲’，大夫知有朝廷耳，家固不宜恤。”丞相曰：“事不成，奈何？”公曰：“事不成天也，一死复何惜？即死亦不失为忠义耳。”丞相顿足曰：“吾意决矣。”乃入奏。久之，未敢动。适秦王侍皇太子出猎柳林，丞相欲发。公曰：“皇太子在军中，脱挟之以生他变，何处以之？”丞相悟，急白太后传旨，趣以归，闭京城自守。遣使持诏散遣诸军，出秦王为河南行省。丞相一反旧政，民大说。上多公协赞功，召对便殿，慰谕甚至。会内臣以玉盘进饌，辍以食公，特超一十馀阶，授公集贤直学士、亚中大夫。

七年，改本院侍讲学士，进阶中奉大夫。复召入龙光殿，锡以黄金束带。丞相亦自是进位台司，国有大事，上命必定于公。公亦慨然以泽被斯民为己任，有知无不言，言之丞相无不行，天下翕然。比后至元之治于前至元，公之功居多。然公谦抑，未尝与人言，故人不可知。所可知者，其与议中书时一二事而已。科举废已久，公力言丞相曰：“科举之行，未必人人食禄。且缘此而家有读书之人，人读书则自不敢为非，其有系于治道不小。”丞相因复奏之。二浙民食盐，病民为甚，其直渐增至数倍，民不堪命。公为言之，减其额而下其估。他如楮币铜钱相榷之宜，有司公田多科之扰，官寺建设之冗繁，江南雇役之长利，公咸一一建白，多已见于行事。拜集贤学士，阶资善大夫。

居亡何，以年及谢事，上章乞骸骨，遂以集贤大学士、荣禄大夫致仕，食俸赐终身。俄又赐田一千九百馀亩，寻谢不受。先是，御史言公躐进官阶，夺其诰命。至是，察官辨其诬，复之。公生于宋德祐乙亥十一月二十四日庚寅，薨于今至正丙申七月十二日庚寅，享年八十有二。以薨后一月，葬于德政乡后吴山徐坞承旨公之墓左，实八月十二日庚申也。公前娶盛氏，先十七年卒。后娶金、李二氏。金氏累封渤海国夫人。子男二：长莱，字立夫，九岁善属文，博通经史百家众流之言，蔚为儒宗文师。延祐庚申，以《春秋》预乡荐，后用御史察举为饶州路长芑书院山长，四方学者尊之，私谥曰渊颖先生，亦先十七年卒。次志道，崇文监丞、奉训大夫。孙男三：长士谔，婺州路金华县儒学教谕；次士谥；次存仁。曾孙男三，长中，次平，次弇。曾孙女一，申。

公读书欲通大义，务在力行，不屑为区区章句之学。其于《鲁论》“言忠信”及“事君能致其身”之语，尤深有契悟，终身言必思践。至于国家有急，辄欲忘躯徇之，而不以为难。经史格言，可以断大事、决大疑者，皆谨记之，故其临事未尝少惑。善评文词，词林宗工与公游者，以所草诏令示之，公为指其瑕疵，极中事情，人皆叹服。性尚风义，德王夫人薨，公年已八十，不惮鲸波之险，亲往京师行吊祭之礼，尤人情之所难。

公深沉有谋，绝不事表襮。人但见其坚凝醇笃，有若懦懦，不知遇事快利，若风鹞掠林、健帆挟舟以飞也。承旨公薨，墓碑未立，丞相欲为奏，敕词臣撰文以遗之。公曰：“先君隐约田间，少见于事为，若挟天子威命以弥文夸侈之，固无可，是非以诚遇先君也。”卒辞之。乃自叠巨石十五成为碑，大书所封官号，复列幼时辛苦艰难与其自誓之意，刻诸石阴，且谓人曰：“此吾所以酬素志也。”公家食将十年，跬步不妄出，终日正衣冠危坐，或至夜分，未尝有惰怠容。宾至则相与剧谈当世之务，玉贯珠联，闻者解颐。方岳重臣，仰慕声光，遣使执馈食之礼。州县大夫俯伏迎拜，惟恐不恭。四海之内，虽愚夫愚妇，亦皆能道公名字。而公初无自骄之色，遇乡党有如贫贱时。官府事一发不相涉，僭从或以恶言加人，辄缚致有司杖之。生平不惑于堪舆家诞诞无验之说，遗言随地而葬，但母使土亲肤。又以无大功业，不必乞铭于人，以为识者之所訕鄙。乃自序历官世第，而系之以辞曰：“余生

虽艰，非有所覬。漫游京华，旅食三纪。际时休明，偶膺禄仕。位跻极品，恩封三世。儒者之荣，于斯为至。报上一诚，如水东注。树碑自铭，以诏来裔。”人以为实录云。

夫天之生材，欲振之张之以昌大其支，必抑之敛之以培植其本。譬之于物，其荣腴流鬯于发生之日者，皆出于严冰霜雪摧折之余。盖养之不厚，则发之不茂，其势然也。公以惇庞宏硕之资，蕴康济经纶之具，司造物者特晦之于少龄，而显之于耄年，其意亦犹是尔。故公之施于用也，笃固而不摇，勇鸷而善断。虽职居散地，实密赞化机，一反掌之顷，国势奠安，权奸自是而屏迹，政治自是而康乂。古之所谓社稷臣者，于公殆庶几矣。然自圣元混一四海，垂及百年，大江之南，韦布之士，品登第一，而以劳烈自见者，豫章程文宪公文海，吴兴赵文敏公孟頫，长沙欧阳公玄，及公为四人。或以文章显融，或以政事著称，事固有殊，道则一也。其没而不返者，既皆有所论述，以表见于世，公其可独少乎？

公之子志道及其孙士谔，恪奉先戒，不敢乞铭于人，以濂尝受业渊颖先生之门，而志道又从濂学最久，因以事状惓惓为请。濂也不文，幸获受知于公，虽契家子姓，特容以宾礼见，义固不敢辞。谨采天下之人所尝言者，为文一通，附诸家乘之末。不敢抗之以为高，按之以从卑，惟务称其实而已。他时执史笔者，尚有考于斯焉。

至正丙申八月，将仕佐郎、新翰林国史院编修官宋濂述。

◇故翰林侍讲学士中奉大夫知制诰同修国史同知经筵事金华先生黄公行状

先生讳，字晋卿，姓黄氏。黄为婺名族，至宋太史公庭坚，族望尤著。太史之从父昉，生景圭，俱来浦江。景圭生琳，娶忠简宗公泽之女弟，始迁于义乌。琳生中辅，力学尚气节，当秦桧柄国，士有议己者辄捕杀，犹奋然题乐府太平楼上，“有剑欲斩佞臣头”之语，人至今诵之。晚以转运使荐，当得官，命垂下而卒。中辅生绍祖，绍祖生伯信，于先生为高祖，迪功郎、累赠朝散大夫。妣宗氏，忠简公四世诸孙女，累封安人。曾祖梦炎，淳祐十年进士，仕至朝散大夫、行太常丞，兼枢密院编修官，兼权左曹郎官，以朝请大夫致仕。妣陈氏，累赠宜人。继方氏。祖堦，方出也，以进纳恩补承节郎，入国朝弗仕，今累赠嘉议大夫、礼部尚书、上轻车都尉，追封江夏郡侯。妣徐氏，淳祐七年进士、奉议郎、两淮宣抚大使司干办公事彬之女，今追封江夏郡夫人。父铸，以朝请府君遗泽补将仕郎，今累赠中奉大夫、江浙等处行中书省参知政事、护军、追封江夏郡公。妣童氏，承信郎、监嘉兴府鲍郎盐场伯永女，今追封江夏郡夫人。初，迪功郎府君之外孙女王氏，归儒林郎、两浙西路提举、常平茶盐司干办公事应复，实生中奉府君，俾育之以为儒林公安吉宦家。嘉定十六年进士，朝奉郎伯虎，其父也。庆元二年进士，上中大夫、宝谟阁太府少卿晔，其大父也。

童夫人妊先生时，梦大星煜煜然坠于怀，历二十四月，以至元十四年冬十月一日始生。甫晬，即自免乳。徐夫人抱而育之。比成童，不妄逾户阈，授之以《诗》《书》，不一月皆成诵。迨学为文，下笔顷刻数百言。常著《吊诸葛武侯辞》，前大学内舍刘君应龟，朝请府君之外孙也，见而叹曰：“吾乡以文辞鸣者，喻叔奇兄弟尔，是子稍加工，不其与之抗衡乎？”因留受业。弱冠西游钱塘，前代遗老与巨公宿学，先生咸得见之，于是益闻近世文献之泽。暨还故居，从仙华山隐者方君凤游，为歌诗相倡和，绝无仕进意。其友叶君谨翁，力挽之出。大德五年，举教官。七年，举宪吏，就试皆中其选。已而复退隐于家。

延祐元年，贡举之法行，县大夫又强起先生，充贡乡闾。时古赋以太极命题，场中作者往往不脱陈言，独先生词致渊泳，绰然有古风，特置前列。二年，上春官，复在选中。及奉大对，惓惓以用真儒、行仁义为言，辞甚剴切。读卷者以其颇涉于激，缀之末第，奉上旨赐同进士出身。主选吏以为白身补官散阶，当下二等。上命特与对品阶，授将仕郎、台州路宁海县丞。仅逾再期，会有诏改盐法，江浙行中书承制迁两浙都转运盐使司石堰西场监运。事闻，命仍旧阶，居其职。阅四载，以功超一资，升从事郎、绍兴路诸暨州判官。至顺二年，用故御史中丞马公祖常之荐，入为应奉翰林文字，同知制诰，兼国史院编修官，进阶儒林郎。丁外忧，去官。服阕，转承直郎、国子博士。经六年之久，请补外，换奉政大夫、江浙等处儒学提举。至正三年春，先生始六十有七，不俟引年，亟上纳禄侍亲之请，绝江径归。俄有旨，命预修辽、金、宋三史。丁内忧，不赴。服除，以中顺大夫秘书少监致仕。居四岁，故湖广行省平章公朵尔直班，今中书左丞相太平开府公，力交荐之，被上旨著致仕。仍旧阶，除翰林直学士、知制诰、同修国史。七年夏六月，至上京，中书传旨，擢无经筵官，召见慈仁殿慰问良久。八年夏四月，升侍讲学士、知制诰、同修国史，同知经筵事，进阶中奉大夫。九年夏四月，洵上章求归田里，不俟报而行。上闻之，遣使者追及武林驿，敦迫还京，复供前职。十年夏四月，始得谢南还。行中书为言于朝，给以半俸终身。公牒已具，而未及上。十七年秋七月，今江浙左丞相金紫公达世贴睦迺，时方承制司黜陟之柄，移书起先生咨议省事。以疾力辞。

闰九月五日，薨于绣湖之私第，享年八十有一。学士大夫闻之，俱流涕曰：“黄公亡矣，一代文章尽矣。”门弟子刘涓、王、宋濂、傅藻等，咸来相治后事。以是月十八日，葬于县东北三里崇德乡东野之原，距嘉议府君之墓仅十步。娶王氏，嘉熙二年甲科进士、从事郎、昭庆军节度掌书记渊金之曾孙，文林郎、监沿江制置副使司造船场沂之孙，将仕郎桂之女，今累封江夏郡夫人，先一年卒，及是始合葬焉。子男一人，梓，用荫入官，初授忠显校尉、绍兴路同知馀姚州事。女一人，适惠州学正陈克让。俱先卒。孙男四人，瑄、琛、珣、珵。所著书，有《日损斋初稿》三卷，《续稿》三十卷，《义乌志》七卷，《笔记》一卷，传学者。

先生在宁海时，县地濒于盐场，而亭户恃其不统于有司，肆毒害民，民不敢正视。编氓之隶漕司泊财赋府者，亦谓各有所凭，横暴尤甚。先生皆痛绳以法。吏惧，以

利害白，弗顾也。有后母与僧通而鸩杀其夫者，反诬夫前子所杀，狱将成。先生变衣冠阴察之，具知其奸伪，卒直其冤，远近以为神明。巡兵捕盐贩者急，遂沉盐于河，帅众以拒。巡兵怒，乃取他私贩事以实之。民有在盗籍者，谋为劫夺，未行，邑大姓执之，以图中赏格，初无获财之左验。事皆久不决。先生为之疏剔，以其狱上，各论如本条，免死者三十余人。部使者董君士恒行县，廉知先生有治状，事悉诿焉。先生为黜其以贿败者上，百户一人、县吏二人、在官无禄者四十余人。愚民以婚田斗，竞往诉，咸下其状，多至数十百。先生录其当问者，即不当问者遣之。先生明习律令，世以法家自专者，有弗如也。凡经其论定，翕然畏服，不敢重有辞。岁大旱，祷于灵湫，有白龙蜿蜒见湫中，已而黑云四兴，大雨如注，县以有年。在石堰，视亭场为尤艰，居是官者，常以秤盘拆阅，及不能检防私鬻被谴。先生规措有法，无毫分入于吏议。

在诸暨，其俗素号难治。先生不加鄙夷，一导以善政，民多从化。捕盗司屋坏，撤而改作，无敢后期。巡海官舸，例以三载一新，费出于官而责足于民，有馀则总其事者私焉。先生适莅是役，撙节浮蠹，以馀钱还之，争欢呼而去。奸民以伪钞钩结党与，胁攘民财，官若吏听其诈，挟之以往。新昌、嵊县、天台、宁海、东阳诸县，株连所及百馀家，民受祸至惨。郡府俾先生鞠治，一问皆引伏，狱具，官吏除名，同谋者各杖之。有捕盗卒阴置伪钞板于良民家，乃白于官往索之，恶少年持挺从者近百人。先生遇于野，诘从吏曰：“弓卒额止三十，安得此曹耶？可缚送于州。”闻者遁走。有盗系钱塘县狱，游民赂狱吏私纵之，假署文牒，发兵来为向导，逮捕馀二千馀家。先生疑而讯焉，悉得其情，以正盗宜得重议，持伪文书来者又非州民，俱械还钱塘，诬者自明。奉省檄监税杭州，先生御之以宽，商旅四集，仅阅三月，增钱十二万缗有奇。

在成均，视弟子如朋友，未始以师道自居，轻纳人拜。而人来受学者滋益恭，业成而仕，皆有闻于世。时人欲增设礼殿配位四，配位合东坐而西向，学官或议分置于左右。同列不敢争，先生独面折之。其人恚甚，日坐堂上以危语相加。御史恶其无礼，逐去之，乃克如先生言。在禁林，会修本朝后妃，功臣传，先生为条陈义例，多所建明，士类服其精允。进讲经筵者三十有二。经筵无专官，曰领、曰知，咸宰执近臣。讲文之述，率属先生订定，非有关于治道之大者不敢上陈，其启沃之功为多。上嘉其忠，数出金织纹段赐之。

始，先生尝预考江浙、江西、上都乡试，江浙则三往而一主其文衡。至是被上旨考试礼部，寻又为廷试读卷官。前后所甄拔者，尽知名之士。先生天资介直，绝不事造请。逢覃官者一，减资者五，铨曹或失于收叙，亦不自言。在州县间，唯以清白为治，一钱不受于民，所至无圭田，月俸弗给，每鬻产以佐其费。及升朝行，挺立无所附，足不妄登巨公势家之门，君子称其清风高节，如冰壶玉鉴，纤尘不污。

先生性笃孝于亲，亲歿，营冢域于三釜山，有乳虎驯狎之异。山去所庐十里，月旦

望必展省，大暑寒不易。先世遗文岁久或有残缺，极力搜访，补缀成编。家居不谈米盐细务与公府短长，邑长吏来谒，乡邻有急，辄得片言为援，辄峻却之。尤不轻于荐引，或讥其绝物，先生谕曰：“公朝爵禄，将以待贤者，岂为吾私亲设哉？”先生贵而能贫，虽位至法从，萧然不异布衣时。又寡嗜欲，甫临强仕之年，即独榻于外，给侍于左右者二苍头而已。遇佳山水，则觴咏其间，终日忘去。其冲旷简远之情，使人挹之，鄙吝顿消。与人交，任真无钩距，不事矫饰以为容悦，而诚意独恳至。然刚中少容，触物或弦急霆震，若未易涯涘，不旋踵间，煦如阳春，曾不少留碍焉。

先生之学，博极天下之书而归至精，有问经史疑难、古今因革，与夫制度名物之属，旁引曲证，语蝉联不能休。至于剖析异同，谳决是非，多先儒之所未发。见诸论著，一本乎六艺，而以羽翼圣道为先务。然其为体，布置谨严，援据精切，俯仰雍容，不大声色。譬之澄湖不波，一碧万顷，鱼鳖蛟龙潜伏而不动，渊然之色，自不可犯。中统、至元以来，如先生者，二三人而已。故凡国家典册诏令，及勋贤当得铭者，必命先生为之。海内之士与浮屠、老子之流，以文为请者，日集于庭，力麾之而弗去。一篇之出，家传人诵，虽绝徼殊邦，亦皆知所宝爱。雅善真草书，人有得其片幅者，必藏弃以为荣。世之评议者，谓先生为人高介类陈履常，文辞温醇类欧阳永叔，笔札峻逸类薛嗣通，识与不识僉无间言。呜呼，先生生当六合混一之时，钟河岳英灵之气，积之既厚，所用亦宏。仁皇肇开科举之初，即以儒学自奋，历仕五朝，晚乃入侍今天子，掌述帝制，劝讲经帷，巍然独任斯文之重。天下学士，咸所师法，遂使有元之文章，炳耀铄铄，直与汉唐侔盛，先生之功固不细矣。至于出处大节，尤人所难能者。年未七帙而谢事，暨群公力荐起之，俄复控辞。上方眷待之深，再召还朝，未几又辞。其难进易退之风，真足以廉顽而立懦。揆之古圣贤之道，盖无愧也。若先生之所自立者，岂不绰绰可传于后哉！

先生之薨，在法当锡谥立传。某从先生游垂二十年，知先生为最深，因辑任官行事，为书一通，上于太常国史。然巨细详记，不敢效古书法为简严者，欲其事之白，以俟芟摭也。谨状。

至正十七年十月一日，门人金华宋濂状。

◇故凝熙先生闻人公行状

公讳梦吉，字应之，以讳行，姓闻人氏。相传出于汉太子舍人通，其后裔迁居于蜀。有讳韶者，为婺之金华县令，遂为婺人。县令生逸孙，以儒学教授温州。娶王先生诜之女，生子能传父经，为知名士，号桂山翁。翁生始三岁而教授君亡，王后去适项氏，翁鞠于其家，因从其姓。及长，娶刘侍郎诸孙女而生公，乃以公还氏闻人云。

初，乡先达定庵、鲁斋二王公，崇尚伊、洛之学，金鸣而玉应，宫奏而商宣，倡明道学，号为极盛。翁往来咨叩，而得之定庵者为最深。翁知公有异质，父子自为师友，昼夜饬厉之。公亦上承翁志，不出郊者十年。一日，有约游城南者，所藏黑履久弗御，革底为穿。故凡《七经》传疏，悉手钞成帙，义理所在，深体密察，微如蚕丝牛毛，剖析靡遗。积之既久，神会心融，训诂之说有分不定于一者，公别其是非，如辨黑白。四方学徒，或执诸经问辨，公为历陈众义而折衷之，不烦余力。譬犹屠牛，坦一朝解十二牛，而芒刃不顿，君子称之。

泰定丙寅，公以《尚书》举于乡。上礼部，不利。公无几微见于颜面，益进修弗懈。时有司以解额太严，不足厌士论，别选文理优者为副榜，公后连中焉。海右宪府知公学行，欲辟书吏，公辞。重纪至元初，山东李公綱持部使者节来浙东，知公不可吏，乃荐为校官。初授处学录，转衢之西安县学教谕、昌国州学正。名上铨曹，改泉州路学教授。某郡李君国凤，方经略江南，得承制专封拜。君尝从公游，知位不称其德，擢为福建等处儒学副提举，公力辞。朝廷寻以年久当升，除庆元路总管府知事。未上，以壬寅岁三月丁未卒于永康之寓舍，上距所生癸巳之年，凡七十载。娶胡夫人，无嗣，以弟之子亨、享为后。二女：长曰贞，适唐寿道，说斋之五世孙；次曰艮，适胡裕，夫人之侄也。以是年八月一日，权厝于合德乡之原，礼也。

公之学一以诚为本，涵养既驯，内外一致。故其气貌类玄文之玉，温润而泽，绝无纤瑕，而孚尹焕发于外者，煜如白虹，能令人爱恋弗厌。下帷讲授，前后授学者数逾二十，各随其资而裁辅之，多有跻仕者。性行恬冲，公卿之家意欲邀致，每避谢弗往。门庭之间，草积不剪，虽当铄金之暑、折胶之寒，正襟危坐，渊然若有思，终日未尝倾侧。其诲学者，必先道德，而后文艺，故于辞章若不经意。时而出之，文义深郁，亦粲然可观。江左名士邓某，以儒者之学自任，尤知爱公，谓公门弟子曰：“今时学子，德未能立，而溺志修辞，组织华彩，沽钓声誉，实德且病矣。如吾梦吉，诚高世之轨范哉！”人以为知言。

公既没，及门之士，以公执醇弗变而含和有耀也，私谥曰“凝熙先生”。仍告郡太守，祠公于学宫。前原道书院吴履，前进士仁和丞唐元嘉，从公为甚久，犹患粹行不昭于世，条而列之，俾濂铨次成书，楔梓以传。某实无似，曩因张教授继之拜公于函丈，公一见遇之如子侄。所以整摄其威仪，耄磨其问学者，无不至也。第以患难相仍，业不加修，有悖于公之所教，又安能道盛德之十一哉？虽然，不敢辞也，谨用刊落葩藻，直序事迹，以俟传儒林者。

◇跋清源国师所书栖霞碑（代黄侍讲）

唐摄山栖霞寺律大师碑，《华严疏》主清凉国师所书也。国师越之会稽人，飞来山宝林寺，实其得度故处。今住山同公，旧读裴相国所撰《妙觉塔铭》而知国师得二王之笔法，又闻赵魏公称国师字画之妙，而知相国之言为可征，每叹其书罕传于世

。今年春，出游吴中，始从报恩万岁寺住上人得此墨本，归而刻诸石，属余志于下方。

谨按：国师以大历三年受诏，入内译经，为润文大德。是年三月二日，律师示寂，而碑之建在明年三月十二日。今去之已五百八十年，睹其遗刻，法度森严，神采奋发，而国师之德容，犹可藉是想见也。国师世寿百有二，书此时甫三十有一。或者妄计，其晚岁安住毗卢华藏，必不复作如是游戏事。余窃不敢谓然，法身大士应化人间，于一毫端现诸万象，卷舒无碍，寂用常如，尘心交入，无非法果。览者毋徒弊弊焉索之于形迹之间，庶几目击而道存也。

◇跋郑生琴谱后

宋季言琴学者，多宗大理少卿杨公缵。缵淳祐中人，最知琴。一闻琴声，即能别其今古。每恨嵇康遗音久废，与其客毛敏仲、徐天民力求索之，历十馀年，始得于吴中何仲章家。缵因共定调、意、操，凡四百六十有八，为《紫霞洞谱》一十三卷。自时厥后，徐之弟子金汝砺，复深忧其学不传，乃取缵所未及者，五音各出一调一意一操，总为十五，名之曰《霞外谱》。而康之遗音，至是无馀憾矣。东白何君巨济，尝受学于徐之父子，而浦阳郑生瀛，又受学于何君。瀛因辑录手弹者，分正、外二调，为谱各一卷。虽不皆与汝砺所著者合，要其源委，有自来矣。近赵魏公号通音律，自谓学琴终身，不悟其趣。呜呼，琴亦难能也哉？瀛尚勉之，瀛尚勉之！

◇跋东坡所书眉子石砚歌后

右苏长公所书《眉子石砚歌》一卷，卷后题云“开府密国公家藏”。又有跋文一通，中引漳水野翁言甚悉，末但书“樗轩”二字，亦不著其名氏。郑君仲舒，以读者或未之知也，持以相示，俾濂得以详识之。

濂按苏公此歌，为胡閭作。傅藻述公纪年，其所为诗，岁月多可知，独在翰林日，莫能定其先后。盖公以元祐元年丙寅十月十二日，入翰林，知制诰，四年己巳二月，三上章乞越州。三月始得旨，以龙图阁学士、左朝奉郎知杭州。此歌之作，龙溪钱氏谓在元祐初年，其必有所考矣。“密国公”者，金之宗室，名，字子均，兴陵之孙，越王之长子，所谓“樗轩”，即其号也。能诗文，家藏法书名画几与中秘等，赵侍读、杨礼部、雷御史诸公，皆推重之。漳水野翁者，武宁军节度使酈琼之子，名权，字子舆，安阳人，故以“漳水”自称。亦能诗文，以门资叙宦不达，朝廷高其材，明昌初以著作郎召之。是两人者，皆尊尚苏学，故宝爱其书尤为至。观其所鉴赏之言，盖可见矣。然自海内分裂，洛学在南，川学在北，金之慕苏，亦犹宋之宗程，又不止宝爱其书而已。

呜呼，士异习则国异俗，后之论者，犹可即是而考其所尚之正偏，毋徒置品评于字

画工拙之间也。

◇跋重刻吉日癸巳碑

赵之赞皇，有“吉日癸巳”四字，在坛山崖石间，世传为周穆王书。宋皇祐四年九月，宋景文公自亳迁镇阳过赵，始遣人访得之今刘庄者，因凿移郡厅。笔力雄峭，有剑拔弩张之势。其“吉日”字，往往与周淮父卣、伯硕父鼎、齐侯钟诸款识合，实二千年奇迹也。欧阳文忠公家藏金石遗文甚多，其最远者，唯毛伯、伯冏二敦铭及此文而已。赵明诚继著《金石录》，独以笔画类小篆为疑。今用周宣王时《石鼓文》考之，其字形多如小篆，恐当时与古文科斗书兼行，至李斯始以此擅其名尔。明诚已信《石鼓》为周人之书，何独于此而疑之耶？濂既手摹刻于浦阳山房，恐人惑也，又不得不辩。

◇跋耶律文正王送刘阳门诗后

右《送刘阳门诗》一章，中书耶律文正王楚材之所作也。王生于金明昌元年庚戌，贞祐三年丁亥始归国朝。今诗后写云“庚子之冬”，则王年已五十一岁，其事太祖、太宗两朝，亦一十有五年矣。然不书曰某年，而直题以“庚子”者，盖是时政尚简实，未有所谓纪元之事也。距庚子不过二年，而王薨矣，此盖其晚年所作。字画尤劲健，如铸铁所成，刚毅之气，至老不衰，于此亦可想见。阳门诸孙师稷，来为浦江主簿，以此卷求题，因为疏其岁月如此。若王之大节，天下之人皆能诵言之，兹不复云。

◇跋葛庆龙九日登高诗后

江乘沈元督道士，持草书《九日登高》古诗一卷谒余。诗后不著氏名，但题“越台洞主”四字。道士怅然曰：“吾爱此卷甚，见当世巨儒多叩之，鲜有知者。闻公素称该洽，愿有以识焉。”

予恶足以语此？颇记谢先生言，越台洞主名庆龙，姓葛氏，庐山人。久居越中，能为诗。诗务出不经人道语，甚者钩棘不可句。每客诸公贵人，诸公贵人燕飧方乐，或为具纸，无问生熟，连幅十馀。庆龙睥睨其间，酒酣落笔，飒飒不自止，皆鹏海怒，起无际。然为人简躁，喜面道人过，一有所忤，即发泄无留隐。非知其磊落无他肠，多疏之。惟嗜闻音乐，又不甚解。居一室，杂悬药玉磬铃，醉后自扬扇撼之，闭目坐听，殷殷有声，至睡熟扇堕乃罢。晚尤落魄，依王主簿居。初，越台有石洞，樵猎过者必祝，以为有神。庆龙悦之，刻己像洞前，自称为飞笔仙人、越台洞主。死之日，遗言王主簿：“我死当葬我，葬我必于是洞。且用仪卫鼓吹为导，使樵猎祝我如祝山神。”庆龙初为浮屠，中更衣道士服，晚又入儒，人莫测其意。出语颇涉玄怪，恍惚不可辨。君子谓其为诗之仙鬼云。今观此卷，所作虽杂于幽涩，

而其奇气横发，直欲骑日月、薄太清，视争工于组织、纫缀间者，不翅猿鹤之于虫沙。有如庆龙，何可少也！何可少也？余故备道谢语，书而归之，使知庆龙非跼跼媚学辈可及，则其不为庆龙者，又可得耶？

◇跋何道夫所著宣抚郑公墓铭

右宋资政殿学士郑忠潜公墓志铭一通，秘监何耕道夫之所撰也。道夫，广汉人，故知公治蜀之事为悉。而公之行能劳烈，亦独于蜀为最著。

绍兴中，公为川陕宣抚副使，患蜀之困于漕运也，乃于关外四州，及兴州大安军，行营田之法。所营至二千六百十二顷，除粮种分给外，实入官十四万一千四十九斛。而金州垦田五百六十七顷，岁入万八千六十馀斛不与焉，志中所谓“移司益昌，以便馈运，继修营田之政”是也。蜀虽罢兵，而财用不足，岁计犹阙钱七百七十八万缗。公奏增印钱引四百万，复患无钱以权之，即利州铸钱岁十万缗，以救钱引之弊。率费二千，而得千钱。置官六人，兵匠五百人，岁用监官钱七万缗。四路称提钱十四万缗为铸本，其后增至十五万，蜀中因此优裕。宣总所桩，积钱五千馀万缗，其余苛赋，一切裁削，志中所谓“减科敛至七百万缗”是也。公在阆时，吴武顺璘以右护军都统制驻武兴，郭恭毅浩以枢密院都统制驻汉阴，杨襄毅政以宣司都统制居汉中，皆拥强兵自卫，势与大帅抗。莫敢吐一语相可否。公恩威并立，独能帖服之如犬羊。每入谒，必先庭揖，然后就坐，志中所谓“三大将拱手侧足，奉命惟谨”是也。

呜呼，公治蜀六年，而能俾财用足，横敛减，悍将服，其效乃章章如此，使久于其职，又将何如也？奈何天未厌乱，奸桧得秉钧轴，忌公不附己，而窜逐以死，悲夫！然公之见忌于桧，士大夫皆能诵之。至于道夫，亦为桧之所忌，则或者未必尽知之也。道夫尝为类省试第一。故事，榜首不赴大对者，赐进士及第，恩数视殿试第三人，盖优之也。桧方欲沮张魏公，而道夫对策，历论蜀人难进易退之节，有“高视天下窃笑”之语。桧嫉之，乃谕礼部，令奏但赐进士出身。道夫亦视之澹如，未尝一践贵人门。登第三十年，始召为仓部郎，累迁至祭酒。乡人赵温叔为相，雅欲相钩致，亦不肯就。及温叔罢，蜀人为所引者皆被逐，独道夫不染物议。使其居公之位，其尚肯屈志以附桧乎？虽职位不同，功绩遂异，道夫清峻之节，未必有愧于公也。然则公之墓志，非道夫为之，孰可为之哉？公之子德肖，不求之他人，而属之道夫，良有以也。

吾友彦渊氏，公之九世孙，以叶史君昌父所书此册求题，故濂以所闻，疏公治蜀之绩，而详及道夫之事。使览者知士大夫立身以名节自砥砺，有不随世而磨灭者，必将惕然自省也。道夫以淳熙辛丑春始拜朝请大夫、试秘书监之命，其秋辄求去，乃除知潼川府。今以“秘书”系衔，则志又作于是岁春、夏之间无疑。史君，公同郡人，果斋俞先生之高第弟子。虽南康之节不完，然字画尽佳。鲜于伯机谓其极善用

笔，至欲下拜，而此册尤其得意书，可宝也。因并及之。

至正十八年三月二十五日，里后学宋濂谨题。

◇跋匡庐社图

右《匡庐十八贤图》一卷，上有博古堂印识，不知何人所作。描法学马和之，人物布置则仿佛东林石刻，而韵度过焉。其二人相向立，一人戴黄冠，手触人袂，而扬眉欲吐言者，道士陆修静也；一人敛容而听之者，法师慧远也。其一人冠漉酒巾，被羊裘，杖策徐行，而萧散之气犹可掬者，陶元亮也。其一人蹑屣扞衣，笑指元亮者，毕颖之也。其一人执羽扇，宴坐芭蕉林下者，远之弟慧持也。其一人与持对坐，合爪竖二指者，僧跋陀也。其一人俯仰其手，操麈尾拂坐陀下者，宗少文也。其一人居持右，低首作礼而为貌甚恭者，僧昙顺也。其一人背披衣行，一人持铁如意，一人展卷读，一人美髯而反顾者，则刘程之、雷仲伦、周道祖也，馀则馀忘之矣。

又颇记程之《莲社文》云：“岁在摄提格七月戊辰朔，二十八日乙未，慧远命正信之士豫章雷次宗等，百有二十三人，集于庐山般若台精舍，修西方净土之学。”今所画止十八人，取著名于时者也。人数增减，相传有不同者，所记异辞也。或疑修静与远不共时者，盖晋有两修静，此正世称简寂先生也。当是时，晋室日微，上下相疑，杀戮大臣如刈草菅，士大夫往往不仕，托为方外之游。如元亮、道祖、少文辈，皆一时豪杰，其沈溺山林而弗返者，夫岂得已哉？传有之，群贤在朝，则天下治；君子入山，则四海乱。三复斯言，抚图流涕。

◇跋俞先辈所述富春子事实后

宋季时有孙君者，其先居富春，因自呼富春子。七岁而病瞽，遇异人，授以音律推五数、播五行之术。其于万物始终盛衰，恒于音决之。周垣未第时，坐于观桥市肆，厉声诟仆。孙君闻其声，往揖之曰：“状元何怒耶？”周以其给己，不答。后果擢进士第一。杨克斋同邓中山游虎林，会孙君亦至，杨戏君曰：“我何如人？”孙君曰：“公贵人也。”曰：“我食禄乎？抑白衣也？”曰：“公自庆元初类试，调泸州尉，浮沈久之，历知晋、果二州矣，何谓白衣？”杨大惊，复问曰：“吾禄止是乎？或未也？”曰：“不久即迁大理少卿，再典一大藩，却从方外之士游耳。”已而由理官以直宝谟阁，知重庆府，遂主管千秋鸿禧观以终。江子远，舍选出身，教授池州，负气好凌人，当路恶之，欲诬以罪。孙君曰：“不可，子远虽少，未易轻蔑。二十年后，必秉国钧也。”其后言辄验。程吉公集客，命孙君次第听其声。听已，历指曰，“此异时朝士也，此异时院辖也，此异时法从也，此异时执政也。”旁有韦布之士刘姓者，闻其语夸，笑之。孙君曰：“汝何人，乃敢尔耶？”或曰：“母相慢，此秘书丞刘公也。”孙君曰：“太白山老儒生耳，乌能入秘书？”众

一笑而罢。吉公籍记其言，无一人差者。其神奇往往类此。惜乎为史嵩之所忌，谪死远方。今去孙君未百余年，故老凋落殆尽，人罕有知其事者。伏观俞先生用中所述，犹可见前辈闻见闳肆，有非安于寡陋者所可企及。

如濂不敏，于先生无能为役，今因孙君六世孙朝可求题，遂以旧闻附于先生论著之后，以补其所未足焉。若夫孙君所言，赵录已讫，王元春典乡郡，李全贡玉柱斧，及诈假布囊四事，太史氏尝录之，今不敢渎告之也。孙君名守，字劳。先生谓为高荣，意其笔误，或别有依据云。

◇跋文履善手帖后

右少保文信公手帖，知赣州日六月所发。公自为贾师宪所忌，咸淳壬申，即援钱若水例上休致之请。明年癸酉，绍陵特起公提点湖南刑狱。又明年甲戌，改知赣州，公年始三十有九尔。守赣仅逾年，当德祐乙亥之秋，即帅勤王之师来赴临安。所谓六月，正甲戌之六月也。后一年丙子，宋亡。又二年戊寅，公在潮为王惟义所执。又四年壬午，公以忠死于燕。则国朝至元十九年也。距作此帖时，盖九阅寒暑矣。丙申春，客有以悦生堂兰亭本求跋者，上有师宪题记，余因斥去不暇顾。未几胡君忽出此卷相示，再拜起观，恍若见宝玉大弓于先王之世，谛玩不能释手。於戏，善恶之在人心，其不可磨灭者如此，虽千万世不易也，深可畏哉！

◇跋长春子手帖

右长春真人邱公与其弟子宋道安手帖。首言“吾宗承传次第，非一朝一夕”者，盖自东华少阳君得老聃之道，以授汉钟离权，权授唐进士吕岩、辽进士刘操，操授宋之张伯端，伯端授石泰，泰授薛道光，道光授陈抟，抟授白玉蟾，玉蟾授彭相，此则世所号南宗者也。岩授金之王鈇，鈇授七弟子，其一即公。余曰谭处端，曰刘处元，曰王处一，曰郝大通，曰马钰，及钰妻孙不二，此则世所号北宗者也。又言“全真之名，自知明君始”者，知明，哲之字也。咸阳大魏村人，凡三易名、字，初为中孚、允乡，再为世雄、德威，合今为三也。

大定丁亥闰七月十八日，知明抵宁海州，钰之夫妇首师事之，遂筑室于其南园，题曰全真庵。四方学者咸集，自是凡宗其道者，皆号全真道士云。又言“已至大雪山之阳，栖霞之事如何”者，栖霞，观名也。公以兴定己卯受诏，见我元太祖皇帝于祭蛮国，弟子十八大师皆从。庚辰二月入燕城，辛巳三月逾岭而北，七月至阿不罕山，留道安等九人立栖霞观。壬午四月，见止大雪山之阳。癸未五月，辞归。帖言已至雪山，则决在壬午岁夏秋所遗也。公虽寄迹老子法中，而心实欲匡济斯民，天道好生恶杀之言，未尝去口。是以上简帝知，宠赉优渥，金虎玉符，照耀林谷，亦可谓极外臣之荣矣。观是帖者，尚当如天书云篆，改瞻易视，毋徒弊弊焉置议于笔墨之间可也。公名处机，字通密，世居登州。初隐昆仑山烟霞洞，后主京师长春宫

，尝自号曰长春子云。

至正甲申三月乙卯日，濂记。

◇跋叶信公五帖后

东阳许仲文，以先世所藏西涧先生叶公镇之五帖示濂。濂颇记先生以咸淳壬申除少傅、右丞相兼枢密使，不拜，诏授少保、观文殿大学士、醴泉观使。甲戌十月，改知庆元府沿海制置大使，又不拜。未几，召为少师、太乙宫使。今第一帖、第二帖，以少保、观文等入衔，则壬申、癸酉所遗，正许君初权宁海令时也。第三帖言许君爱人、戢暴，及荐牍之事，虽不知为何时，当在许令莅官之日，计稍后于前二帖尔。第四帖，即前帖内幅。其第五帖，先生与弟竹友家书，末言许权今解印去，则最后者也。窃惟先生正位台司，屡挫权奸，直言峻行，无让古人。在田里时，乃独惓惓于一许令，令之神明之政，亦能上答先生之知。上不傲下，下能承上，虽当宋季，其气象犹非后世所及。令之子孙能宝藏五帖于兵燹之余，其亦贤者之泽哉？旅邸无书可稽，姑即旧闻疏之，不能保其无差舛也。令讳元沐，号东泉，景定壬戌方山京榜擢进士第云。

史官金华宋濂题。

◇跋三官祠记

右揭文安公所造曲阿《三官祠记》，凡七百有馀言，今藏道士白虚颢家。虚颢装潢成卷，俾予识其后。按汉熹平间，汉中有张修为太平道，张角、张鲁为五斗米道，其法略同，而鲁为尤盛。盖自其祖陵、父衡，造符书于蜀之鹤鸣山，制鬼卒、祭酒等号，分领部众。有疾者令其自首，书氏名及服罪之意，作三通：其一上之天，著山上，其一埋之地，其一沉之水，谓之天地水三官。三官之名，实昉于此也。夫至高者天，至厚者地，水纵大，亦两间一物尔，何得与天地抗哉？今并称之为三，是必有其说矣。公执文章政柄，呼喁一世，乃议不及此，而铺张鬼神之情状，一切归诸道家。公之立言，诚未易窥测哉！虚颢往南阳，见着绛帕头、鼓琴焚香者，幸以公文问之。

◇跋法华经

乌伤溪上有一居士，傅姓，权名，欲报母德无以自效。一旦，思惟如《妙法华》，实经中王，至诚归依，当得分愿。乃笔成卷，乃鸠众缘，楔于文梓，用广流通。无相居士欢喜赞叹，为说偈曰：

如来三轮不思议，五时演说度迷情。惟此《法华》真正门，独能废权而立实。四味

之粗皆已尽，一乘之妙乃圆融。从兹无二亦无三，是则名为最上乘。若曰小大不相即，不识何以摄群机。欲畅如来之本怀，舍此莫求真实义。粤自三译来震旦，塔庙在在放光明。譬如日月行中天，不分净秽皆照了。须知不假身外求，心佛众生元不别。常境如如本无相，常智寂寂亦无缘。三观三谛皆现前，不分后先与中外。居士欲报慈母德，缮书入梓以流通。一一毫端现诸佛，灿然说法遍十方。见闻无不起信心，共入毗卢华藏海。

◇跋戒环师首楞严经解后

《首楞严经》，其立题凡三：一名编如海妙莲华王十方佛母；一名悉怛多般怛罗，即白伞盖，无上宝印清净海眼灌顶章句；合今题而为三。其本指则五；以人法为名，常住真心为体，圆通妙家为宗，返妄归真为用，上妙醍醐为教。大概欲使众生开圆解，立圆行，登圆位，证圆果而已。若稽其何时所说，其在《法华》开权显实之后，《涅槃》扶律谈常之前乎？盖波斯琉璃之异代，持地耶输之所证，左右参验，诚足取信，所以长水璇、孤山圆、长庆蟠、泐潭月诸师，号为科判名家，未敢有易斯说者。

予在虎林，见五台沙门善摄解本，独判《楞严》在《盘若》之后，《法华》之前。心虽奇其说，而颇意其为一人之私言。今观温陵戒环师所论，正与善摄同。其谓阿难既于《法华》诸漏已尽，不应于《楞严》未尽诸漏，而经中言最后垂范，实《楞严》法会之最后，非临灭之最后者，尤发善摄之所未发。余窃自叹，玄理之在人心，虽南北之殊，风土颇异，而其不随物以变迁者，未尝不同。惜余儒家者流，弗悟健相分别之理，无以知其孰浅而孰深也。谨用识其立题本旨及异同之说于卷末，具金刚观察智者，当能有以决之。

◇跋金刚经后

先佛所说大部《般若》，合六百卷，凡四处一十六会，而此《金刚经》实当第二处、第九会，第五百七十七卷。姚秦鸠摩罗什，此云童寿天竺人，始用华言翻定。元魏菩提流支，陈真谛，随笈多，唐玄奘、义净，相继各有所译，号为六家。唯什本详略适中，甚得义趣，而梁萧统复分第为三十二，故今特盛行于世。其二十一分增多六十二字，即非什本，而后人据五译以钞入之尔。世之名僧达贤，铨释此经，殆且百家。独无著、天亲二论师，配一十八住，断二十七疑，允合先佛微妙第一真实了义。濂欲据之作集解一部，病于烽火未息，志莫能遂。因缮录成卷，置巾箱中，朝夕玩绎。庶几了空名相，洞明觉地。他日于一毫端现诸万象，破种种迷，成种种智，尚未为晚也。

◇非非子县解篇引

非非子庐于仙华山下，幼不嗜书，读《鲁论》未终篇，弃去。寻学炼金碧九还宝丹，斫丹房如方榻，中仅容坐，而述古仙人辞于四周。澄坐其间，身如槁木不动，或睡睫不能禁，辄下榻僵立达旦。如斯者七岁，凡堪舆气化之原，事物盈亏之数，神鬼幽显之秘，似不能越其范围。又久之，若有物鲠其中，芒角森然，胶刺肺腑，必吐去乃畅。于是濡毫著书，煜然成文，老生宿儒或有所未及。而其藻思之奋发，若山下出泉，涓涓而不断；若独茧之抽，愈出而愈不穷。既成书，自号之曰《非非子县解》云。金华宋濂读而疑之曰：“子自称为‘非非’，孰非之耶？以为人之非子耶，则子为非，而人为是。以为子之非人耶，则子为是，而人为非。非者固非，而非之者不尤非非耶？是故有是则有非，无非则无是。是其所非，非其所是。非其是是，是其非非。是是者固二，而非非者果能一耶？辟诸髹几焉，人以其文墨墨也，而不知其质皤也。皤者谓之白，如其墨墨者何？墨墨者谓之黑，如其皤者何？惟黑惟白，惟白惟黑。惟白而黑，黑非白乎？惟黑而白，白非黑乎？亡白白则黑黑有，有黑黑则白白无。欲白白而黑黑，宁黑白而白黑也。虽然，此犹以迹言也，吾本为白，而黑何加焉？吾本无黑，而白何形焉？是谓白黑忘矣，白黑忘而有无齐矣，有无齐而是非泯矣，是非泯而非非者绝矣。非非者绝，则天与人凝而合矣。此之谓葆纯，此之谓熙神，此之谓物冥，若是何如？”非非子笑曰：“始吾学道，物我而我物也，继而唯我我在，今则吾丧我矣。我我且不我，又何有非非者乎？子言良信也。”濂亦莞尔一笑，为系其说于篇端。

非非子郑姓，源名，婺浦阳人。生贵人家，能坚厉入道，大夫士服其操行奇劲云。

◇续志林小引

志以林名者何？言多也。所谓林者，豫章鼠梓，杉桂槲栎之属皆在焉。通曰林而不别言之何？明所志之不一也。所志不一，其言续者何？昔之君子尝掇以名书，续之所以继也。继则继矣，其不同者何？一以资多识，一以牖民衷，所以异也。文垂世行远者，彬彬然谐，彪彪然炳，斯可矣。子直而不婉，奈何？天，文之昭也；地，文之著也，人，文之烜也，我则不敢知。今之所书，其事核，其辞质，其理足为天下劝，如斯而已矣。吾闻古者左史记言，右史记事，职也。故国无小大，皆有之。子职非史也，其蠲而僭之何？史官失职久矣，国乎史，曷若家乎史？国私而家公也。使天下之人家得史之，人庶乎知法戒也，奚僭为？然则子所书皆善也，劝矣，如惩何？善恶备书，史也；舍恶录善，志也。善者劝，恶者惩矣，曷为而不可也？斯志也，其言或不能尽征者何？所见异辞，所闻异辞，所传闻异辞，信其信，疑其疑，可也。

◇般若波罗蜜多心经文句引

实际理地，不染一尘，固在于心明。万事门中，不离一法，必资于言解。此古今之通义也。昔我三界大师，从兜率天化成白象，贯日之精，降神于维罗卫国，苦行于

伽闍山中，得无上道，成最正觉。盖悯大地众生不知真性，染缠使以成有漏，逐色声以陷诸妄，汨没死生，弗能解脱。于是坐宝莲华师子之坐，演说无上甚深妙法，开顿渐之正门，垂权实之秘教。其第四时广宣诸《般若经》，而大部《般若》合六百卷。凡四处一十六会所说，显之以五蕴以总其纲，申之以十二处以核其变，广之以十八界以极其趣。小无不该，大无不统，诚所谓冥衢之灯烛，业海之方舟也。撮其枢要，实惟《心经》。是经凡三译，今世所传二百五十八言者，乃贞观间三藏法师玄奘所翻，撮须弥于一毫芒，敛溟渤于一涓滴，其神功浩浩乎不可思议。是以历代宝之如摩尼珠，为之注释凡百十家。溺教文者，曲引傍喻，自相疑难，其失也芜。尊禅义者，逐字为训，辞荒意幻，其失也鄙。务高深者，独研大旨，尽去微文，其失也简。安浅陋者，不知次序，前后失伦，其失也杂。殊不知了空法尘，聿依佛智，皆不出于是经。虽《法华》十万馀言，《华严》四天下，微尘数品，广略固殊，旨义无二。奈何以至精至微之典，而以小德小智之见轻测真乘，妄谈《般若》也哉！

如濂不敏，粤自壮龄，颇阅三藏诸文，于是不量芜陋，为之训解。芜者剔之，鄙者推之，略者补之，杂者一之，裁成《文句》一卷，总数千言。宿学之士，其亦何事于斯？庶以便初机者尔。

或者则曰：“三千性相，尽属空名，一实境界，诸念不立，何为执滞于教体之间哉？”是不然，渡巨河者必用筏以济，见明月者须假指以标。若欲废法观空，因空显性，何异采蘋于山陬，而求鱼于木末也，不亦偪乎！虽然，灵光独耀，迥脱根尘，体露真常，不拘文字。苟徒随语生解，其去一真薄伽梵地，盖益远矣。忘白马之旧驮，焚青龙之新钞，必有盖世人豪者兴，濂日望之。

至正元年正月朔日，幅巾男子金华宋濂引。

◇七儒解

儒者非一也，世之人不察也。

有游侠之儒，

有文史之儒，

有旷达之儒，

有智数之儒，

有章句之儒，

有事功之儒，

有道德之儒。

儒者非一也，世之人不察也。能察之，然后可入道也。

卷七

◇诸子辩（并序）

诸子辩者何？辩诸子也。通谓之诸子何？周、秦以来，作者不一姓也。作者不一姓，而其立言何人人殊也？先王之世，道术咸出于一轨，此其人人殊何？各奋私知而或盪大道也，由或盪大道也，其书虽亡，世复有依仿而托之者也。然则子将奈何？辞而辩之也。曷为辩之？解惑也。

《鬻子》一卷，楚鬻熊撰。熊为周文王师，封为楚祖者。书二十二篇，盖子书之始也。《艺文志》属之道家，而小说家又别出十九卷。今世所传者，出祖无择所藏，止十四篇。《崇文总目》谓其八篇已亡，信矣。其文质，其义弘，实为古书无疑。第年代久邈，篇章舛错，而经汉儒补缀之手，要不得为完书。黄氏疑为战国处士所托，则非也。序称熊见文王时，年已九十。其书颇及三监曲阜时事，盖非熊自著。或者其徒名政者之所记欤？不然何其称“昔者文王有问于鬻子”云。

《管子》二十四卷，齐大夫管夷吾撰。夷吾字仲，其书经刘向所定。凡九十六篇，今亡十篇。自《牧民》至《幼官图》九篇，为经言；《五辅》至《兵法》八篇，为外言；《大匡》至《戒》九篇，为内言；《地图》至《九变》十八篇，为短语；《任法》至《内业》五篇，为区言；《封禅》至《问霸》十三篇，为杂篇；《牧民解》至《明法解》五篇，为管子解；《臣乘马》至《轻重庚》十九篇，为管子轻重。予家又亡《言昭》、《修身》、《问霸》、《牧民解》、《轻重庚》五篇，止八十一篇，题云“唐司空房元龄注”。或云非也，尹知章注是书，非仲自著也。其中有绝似《曲礼》者，有近似老、庄者，有论伯术而极精微者，或小智自私而其言至卑污者，疑战国时人采掇仲之言行，附以他书成之。不然，毛嫪、西施、吴王好剑、威公之死、五公子之乱事，皆出仲后，不应豫载之也。朱子谓仲任齐国之政，又有“三归”之溺，奚暇著书？其说是矣。先儒之是仲者，称其谨政令，通商贾，均力役，尽地利，既为富强，又颇以礼义廉耻化其国。《裕如》、《心术》、《白心》之篇，亦尝侧闻正心诚意之道，其能一匡天下，致君为五伯之盛，宜矣。其非仲者，谓先王之制，其盛极于周。后稷、公刘、大王、王季、文、武、成、康、周公之所以制周者，非一人之力，一日之勤。经营之难，积累之素，况又有出于唐、虞、夏、商之旧者矣。及其衰也，而仲悉坏之，何仲之不仁也！呜呼，非之者固失，而是之者亦未为得也。何也？仲之任术立伯，假义济欲，纵能致富强，而汲汲功利，礼义俱丧，其果有闻正心诚意之道乎？周自平王东迁，诸侯僭王，大夫僭诸侯，文、武、成、康、周公之法，一切尽坏，列国尽然，非止仲一人而已也。然则仲何如人？曰：“人也，功首而罪魁者也。”曰：“齐之申、韩、鞅、斯之列，亦有间乎？”曰：“申、韩、鞅、斯刻矣，而仲不至是也。原其‘作俑’之意，仲亦乌得无罪焉？薄乎云尔。”

《晏子》十二卷，出于齐大夫晏婴。《汉志》八篇，但曰《晏子》。隋、唐七卷，始号《晏子春秋》。与今书卷数不同。《崇文总目》谓其书已亡，世所传者，盖后人采婴行事而成。故柳宗元谓墨氏之徒有齐人者为之，非婴所自著。诚哉是言也。

《老子》二卷，《道经》、《德经》各一，凡八十一章，五千七百四十八言，周柱下史李耳撰。耳字伯阳，一字聃。聃，耳漫无轮也。或称周平王四十二年，以其书授关尹喜。今按平王四十九年入《春秋》，实鲁隐公之元年。孔子则生于襄公二十二年。自入《春秋》，下距孔子之生，已一百七十二年。老聃，孔子所尝问礼者，何其寿欤？岂《史记》所言老子百有六十馀岁，及或言二百馀岁者，果可信欤？聃书所言，大抵敛、守、退、藏，不为物先，而一返于自然。由其所该者甚广，故后世多尊之行之。“视之不见名曰夷，听之不闻名曰希，搏之不得名曰微。”道家祖之。“谷神不死，是谓玄牝。玄牝之门，是谓天地根。”神仙家祖之。“吾不敢为主而为客，不敢进寸而退尺。是谓行无行。攘无臂，仍无敌，执无兵。祸莫大于轻敌，轻敌几丧吾宝。故抗兵相加，哀者胜矣。”兵家祖之。“道冲而用之或不盈，渊乎似万物之宗，挫其锐，解其纷，和其光，同其尘。湛兮似若存，吾不知谁之子，象帝之先。”庄、列祖之。“将欲翕之，必固张之。将欲弱之，必固强之。将欲废之，必固兴之。将欲夺之，必固与之。”申、韩祖之。“以正治国，以奇用兵，以无事取天下。”张良祖之。“我无为而民自化，我好静而民自正，我无事而民自富，我无欲而民自朴。”曹参祖之。聃亦豪杰士哉！伤其本之未正，而末流之弊，至贻士君子有“虚玄长而晋室乱”之言。虽聃立言之时，亦不自知其祸若斯之惨也。呜呼，此姑置之。道家宗黄、老，黄帝书已不传，而老聃亦仅有此五千言，为其徒者，乃弃而不习，反依仿释氏经教以成书。开元所列《三洞琼纲》固多亡缺，而祥符《宝文统录》所记，若《大洞真》，若《灵宝洞玄》，若《太上洞神》，若《太真》，若《太平》，若《大清》，若《正一》诸部，总四千三百五十九卷，又多杂以符咒、法篆、丹药、方技之属，皆老氏所不道。米巫祭酒之流，犹自号诸人曰“吾盖道家，吾盖道家”云。

《文子》十二卷，老子弟子所撰，不知氏名。徐广曰：“名鉞。”李暹曰：“姓辛，葵丘濮上人，号曰计然，范蠡师事之。”裴揆曰：“计然姓辛，字文子，其先晋国公子也。”孟康曰：“姓计，名然，越臣也。”蔡謨曰：“计然者，范蠡所著书篇名，非人也。谓之计然者，所计而然也。”颜师古曰：“蔡说谬矣，《古今人表》计然列在第四等。计然一名计妍，《吴越春秋》及《越绝书》并作计倪。倪与妍、然三音皆相近，故讹耳。”由是观之，诸说固辩矣。然是书非计然之所著也。予尝考其言，一祖老聃，大概《道德经》之义疏尔。所谓“体道者不怒不喜，其坐无虑，寝而不梦，见物而名，事至而应”。即“载营魄抱一”，“专气致柔”，“涤除玄览”也。所谓“上士先避患而后就利，先远辱而后求名，故圣人常从事于无形之外，而不留心于已成之内，是以祸患无由至，非誉不能尘垢”。即“知白守黑”，“知雄守雌”，“知荣守辱”之义也。所谓“静则同，虚则通，至德无为，万物皆容”。即“道常无为而无不为。侯王若能守，万物将自化”也。所谓“道可以弱

，可以强，可以柔，可以刚，可以阴，可以阳，可以幽，可以明，可以包裹天地，可以应待无方”。即“道冲而用之或不盈，渊乎似万物之宗”也。其他可以类推。盖老子之言弘而博，故是书杂以黄老、名法、儒墨之言以明之，毋怪其驳且杂也。计然与范蠡言，皆权谋术数，具载于书，绝与此异，予固知非著是书者也。黄氏屡发其伪，以为唐徐灵府作，亦不然也。其殆文姓之人，祖老聃而托之者欤？抑因裴氏“姓辛字文子”之说，误指为范子《计然》十五卷者欤？

《关尹子》一卷，周关令尹喜所撰。喜与老聃同时，著书九篇，颇见之《汉志》。自后诸史无及之者，意其亡已久矣。今所传者，以《一字》、《二柱》、《三极》、《四符》、《五鉴》、《六匕》、《七釜》、《八筹》、《九药》为名，盖徐藏子礼得于永嘉孙定，未知定又果从何而得也。前有刘向《序》，称盖公授曹参，参薨书葬。孝武帝时，有方士来上淮南王安，秘而不出。向父德治淮南王事，得之。文既与向不类，事亦无据，疑即定之所为也。闲读其书，多法释氏及神仙方技家，而藉吾儒言文之。如变识为智，一息得道，婴儿蕊女，金楼绛宫，青蛟白虎，宝鼎红炉，诵咒土偶之类，聃之时无是言也。其为假托，盖无疑者。或妄谓二家之说，实祖于此，过矣。然其文虽峻洁，亦颇流于巧刻，而宋象先之徒，乃复尊信如经，其亦妄人哉。

《亢仓子》五卷，凡九篇，相传周庚桑楚撰。予初苦求之不得，及得之，终夜疾读。读毕叹曰：“是讹书也，剿老、庄、文、列及诸家言而成之也。”其言曰：“近代以文章取士，则剪巧绮褻益至，而正雅典实益藏。”夫文章取士，近代之制，战国之时无有也。其中又以“人”易“民”，以“代”易“世”。世民，太宗讳也，伪之者其唐士乎？予犹存疑而未决也。后读他书，果谓天宝初，诏号亢桑子为《洞灵真经》，求之不获。襄阳处士王士元，采诸子文义类者，撰而献之。其说颇与予所见合。复取读之，益见其言词不类。因弃去不复省。《农道》一篇虽可读，古农家书具有之。或者谓可孤行，吾亦不知其为何说也。

《邓析子》三卷，郑人邓析撰。析操两可之说，设无穷之辞，当子产之世，数难子产之法。子产卒后二十一年，驷犇为政，杀邓析而用其竹刑。夫析之学，兼名、法家者也。其言天于民无厚，君于民无厚，父于子无厚，兄于弟无厚，刻矣。夫民非天弗生，非君弗养，非父弗亲，非兄弗友，而谓之无厚，可乎？所谓不能屏勃厉，全夭札，执穿窬、诈伪诛之。尧舜位为天子，而丹朱、商均为布衣。周公诛管、蔡，岂诚得已哉？非常也，变也。析之所言如此，真不法先王，不是礼义，而好治怪说者哉！其被诛戮宜也，非不幸也。

《鹖冠子》，楚人撰，不知姓名。尝居深山，以鹖羽为冠，著书四卷，因以名之。其书述三十变通、古今治乱之道，而《王鈇》篇所载楚制为详。立言虽过乎严，要亦有激而云也。周氏讥其以处士妄论王政，固不可哉？第其书晦涩，而后人又杂以鄙浅言，读者往往厌之，不复详究其义。所谓“天用四时，地用五行，天子执一，

以守中央”，此亦黄、老家之至言。使其人遇时，其成功必如韩愈所云。黄氏又谓韩愈猎取二语之外，余无留良者，亦非知言也。士之好妄论人也，如是哉！陆佃解本十九篇，与晁氏削去前后五卷者合。予家所藏，但十五篇云。

《子华子》十卷，程本撰。本字子华，晋人，曰魏人者，非也。《艺文志》不录。予尝考其书，有云：“秦襄公方启西戎，子华子观政于秦。”又稽庄周所载子华子事，则云“见韩昭僖侯”。夫秦襄公之卒，在春秋前，而昭僖之事，在春秋后。前后相去二百余年，子华子何其寿也？其不可知者一。《孔子家语》言孔子遭齐程子于郕。程子盖齐人，今子华子自谓程之宗君，受封于周，后十一世，国并于温。程本商季文王之所宅，在西周当为畿内小国。温者，周司寇苏忿生之所封。周襄王举河内温原以赐晋文公，温固晋邑也，孰谓西周之程、而顾并于河内之温乎？地之远迩，亦在可疑。其不可知者二。《后序》称子华子为鬼谷子师。鬼谷，战国纵横家也，今书绝不似之，乃反类道家言，又颇剿浮屠、老子、庄周、列御寇、孟轲、荀卿、《黄帝内经》、《春秋外传》、司马迁、班固等书而成。其不可知者三。刘向校定诸书，咸有《序》，皆渊恉明整，而此文独不类。其不可知者四。以此观之，其为伪书无疑。或传王搢性之、姚宽令威多作贗书，而此恐出其手，理或然也。然其文辞极舂容，而议论焕发，略无窘涩之态，故尤善惑人。人溺文者，孰觉其伪哉！

《列子》八卷，凡二十篇，郑人列御寇撰。刘向校定八篇，谓御寇与郑繆公同时。柳宗元云：“郑繆公在孔子前几百载。御寇书言郑杀其相驷子阳，则郑繆公二十四年，当鲁繆公之十年。向盖因鲁繆公而误为郑尔。”其说要为有据。高氏以其书多寓言，而并其人疑之，所谓“御寇者，有如鸿蒙列缺之属”，误矣。书本黄、老言，决非御寇所自著，必后人会萃而成者。中载孔穿、魏公子牟，及西方圣人之事，皆出御寇后。《天瑞》、《黄帝》二篇，虽多设辞，而其离形去智，泊然虚无，飘然与大化游，实道家之要言。至于《杨朱》、《力命》，则为我之意多，疑即古杨朱书，其未亡者剿附于此。御寇先庄周，周著书多取其说，若书事简劲弘妙，则似胜于周。间尝熟读其书，又与浮屠言合。所谓“内外进矣，而后眼如耳，耳如鼻，鼻如口，无弗同也。心凝形释，骨肉都融，不觉形之所倚，足之所履”，非大乘圆行说乎？“鲋旋之潘（合作番）为渊，止水之潘为渊，流水之潘为渊，滥水之潘为渊，沃水之潘为渊，沈水之潘为渊，雍水之潘为渊，汧水之潘为渊，肥水之潘为渊”。非修习教观说乎？“有生之气，有形之状，尽幻也。造化之所始，阴阳之所变者，谓之生，谓之死。穷数达变，因形移易者，谓之化，谓之幻。造物者，其巧妙，其功深，固虽穷难终。因形者，其巧显，其功浅，故随起随灭。知幻化之不异生死也，始可以学幻。”非幻化生灭说乎？“厥昭生乎湿，醯鸡生乎酒，羊奚比乎不筍久竹，生青宁，青宁生程，程生马，马生人。人久入于机，万物皆出于机，皆入于机。”非轮回不息说乎？“人胥知生之乐，未知生之苦”；“知死之恶，未知死之息。”非寂灭为乐说乎？“精神入其门，骨骸反其根，我尚何存？”非圆觉四大说乎？中国之与西竺，相去一二万里，而其说若合符节，何也？岂其得于心者，亦

有同然欤？近世大儒，谓华梵译师皆窃庄、列之精微，以文西域之卑陋者，恐未为至论也。

《曾子》，孔子弟子、鲁人曾参所撰也。《汉志》云十八篇，《唐志》云二卷。今世所传自《修身》至《天圆》，凡十篇，分为二卷，与《唐志》合，视汉则亡八篇矣。其书已备见《大戴礼》中，予取而读之，何其明白皎洁若列星之丽天也！又何其敷腴淳笃若万卉之含泽也！传有之：“有德者必有言。”信哉！“七十而从心”，“进学之序，七十免过”，勉人之辞，其立言迥然不同也。周氏不察而讥之，过矣。“君子爱日海学者也”，“一日三省，自治功也。”语有详略，事有不同也。高氏以辞费诮之，亦何可哉？或谓《大孝》篇有及乐正子春事，固出后人所辑，而非曾子所自著，则庶几也。

《言子》三卷。言子名偃，字子游，吴人，孔门弟子。近新昌王爚，裒《论语》书所载问答，而为此书。不知者，直谓为偃所自著，盖非也。大抵古书之存于今者，多出于后人之手。如《孔子家语》，谓为孔安国所录壁中之文，往往多钞《左传》《礼记》诸书，特稍异其辞耳。善读者，固不敢与之。世传贾谊《新书》，谓谊所作，亦不过因《过秦论》《吊湘赋》而杂以《汉书》中语足之，似非谊本书也。此犹有所附丽而然，古《三坟》书亡已久，宋毛渐特出之，《山坟》则言君臣、民物、阴阳、兵家，谓之《连山》；《气坟》则言归藏、生动、长育、止杀，谓之《归藏》；《形坟》则言天地、日月、山川、云气，谓之《乾坤》。与先儒所言《三易》大异。《阴符》古无是书，唐李筌特出之，以为黄帝所作，皆取兵家谲诞不经语，而文以奇涩之辞。又妄说太公、范蠡、鬼谷、张良、诸葛亮等训注，皆凿空扇虚以惑世，尤使人惊愕不止。是果何为者哉？予读言子之书，于是乎有感。

《子思子》七卷，鲁人孔伋撰。子思，伋字也。避孔子，不敢称姓，故曰子思子。然亦后人缀缉而成，非子思之所自著也。中载孟轲问牧民之道何先，子思子曰：“先利之。”轲曰：“君子之告民者，亦仁义而已，何必曰利？”子思子曰：“仁义者，固所以利之也。上不仁则不得其所，上不义则乐为诈，此为不利大矣。”他日，孟轲告魏侯以仁义，盖深得子思子之本旨。或者不察，乃遽谓其言若相反者，何耶？

《慎子》一卷，慎到撰。到，赵人，见于《史记·列传》，《中兴馆阁书目》乃曰浏阳人。浏阳在今潭州，吴时始置县，与赵南北了不相涉也，误也。《汉志》云四十二篇。《唐志》云十卷，不言篇数。《崇文总目》言三十七篇。今所存者，唯《威德》、《因循》、《民杂》、《德立》、《君人》五篇耳。《威德》篇曰：“立天子以为天下，非立天下以为天子也。立君以为国，非立国以为君也。立官长以为官，非立官以为官长也。”《民杂》篇曰：“大君者太上也，兼畜下者也。下之所能不同，而皆上之用也。是以大君因民之能为资，尽包而畜之，无取去焉。”《君人》篇曰：“君人者，舍法而以身治，则诛赏予夺，从君心出矣。然则受赏者虽当

，望多无穷；受罚者虽当，望轻无已。”皆纯简明易，类非刑名家所可及。到亦稷下能言士哉！庄周、荀卿称之，一则曰“慎到”，二则曰“慎到”，虽其术不同，亦有以也。

《庄子》十卷，战国时蒙人、漆园吏庄周撰。《内篇》七，《外篇》十五，《杂篇》十一，总三十三篇。其书本《老子》，其学无所不窥。其文辞汪洋凌厉，若乘日月、骑风云，下上星辰，而莫测其所之。诚有未易及者。然所见过高，虽圣帝经天纬地之大业，曾不满其一晒，盖仿佛所谓古之狂者。惜其与孟轲氏同时，不一见而闻孔子之大道。苟闻之，则其损过就中，岂在轲之下哉？呜呼，周不足语此也。孔子百代之标准，周何人？敢掊击之，又从而狎侮之。自古著书之士虽甚无顾忌，亦不至是也。周纵日见轲，其能幡然改辙乎？不幸其书盛传，世之乐放肆而惮拘检者，莫不指周以借口，遂至礼义陵迟，彝伦斲败，卒蹈人之家国，不亦悲夫！金李纯甫亦能言之士，著《鸣道集说》，以孔、孟、老、庄同称为圣人，则其沈溺之习，至今犹未息也。异说之惑人也深矣！夫《盗跖》、《渔父》、《让王》、《说剑》诸篇，不类前后文，疑后人所剿入。晁氏谓孔子没，道术散，老子始著书，周起而羽翼之。老子著书，在孔子未没之先。

《墨子》三卷，战国时宋大夫墨翟撰。上卷《亲士》、《修身》、《所染》、《法仪》、《七患》、《辞过》、《三辩》七篇，号曰“经”。中卷《尚贤》三篇，下卷《尚同》三篇，皆号曰“论”。共十三篇。考之《汉志》七十一篇，《馆阁书目》则六十一篇，已亡《节用》、《节葬》、《明鬼》、《非乐》、《非儒》等九篇，比今书则又亡多矣。墨者，强本节用之术也。予尝爱其“圣王作为宫室，便于主，不以为观乐”之言。又尝爱其“圣人为衣服，适身体、和肌肤，非荣耳目而观愚民”之言。又尝爱其“饮食增气、充虚、强体、适腹”之言。墨子其甚俭者哉！卑宫室，菲饮食，恶衣服，大禹之薄于自奉者。孔子亦曰：“奢则不逊，俭则固。”然则“俭”固孔子之所不弃哉！或曰，如子之言，则翟在所取，而孟子辞而辟之，何也？曰：本二。

《鬼谷子》三卷，鬼谷子撰。一名元微子。鬼谷子无姓名、里居，战国时隐颍川阳城之鬼谷，故以为号。或云王诩（诩一作诩）者，妄也。长于养性、治身。苏秦、张仪师之，受捭阖之术十三章，又受《转圆》、《脰箴》及《本经》、《持枢》、《中经》三篇。《转圆》、《脰箴》今亡。梁陶宏景注。刘向、班固录书，无《鬼谷子》。《隋志》始有之，列于纵横家。《唐志》以为苏秦之书。大抵其书皆捭阖、钩籍、揣摩之术。其曰：“与人言之道，或拨动之，令有言以示其同；或闭藏之，使自言以示其异。”捭阖也。“既内感之而得其情，即外持之使不得移。”钩籍也。“量天下之权，度诸侯之情，而以其所欲动之。”揣摩也。是皆小夫蛇鼠之智，家用之则家亡，国用之则国僨，天下用之则失天下，学士大夫宜唾去不道。高氏独谓其得于杨老阖辟、翦张之外，不亦过许矣哉！其中虽有“知性寡累，知命不忧”，及“中稽道德之祖，散入神明之颐”等言，亦恒语尔，初非有甚高论也。呜呼

，曷不观之仪、秦乎？仪、秦用其术而最售者，其后竟何如也？高爱之慕之，则吾有以识高矣。

《孙子》一卷，吴孙武撰，魏武帝注。自《始计》至《用间》凡十三篇。《艺文志》乃言八十二篇，杜牧信之，遂以为武书数十万言，魏武削其繁剩，笔其精粹，以成此书。按《史记》，阖闾谓武曰：“子之十三篇，吾尽观之。”其数与此正合。

《汉志》出《史记》后，牧之言要非是。武，齐人，吴阖闾用以为将，西破强楚，入郢，北威齐、晋，显名诸侯。叶适以不见载于《左传》，疑其书乃春秋末、战国初山林处士之所为。予独不敢谓然。春秋时列国之事，赴告者则书于策，不然则否。二百四十二年之间，大国若秦、楚，小国若越、燕，其行事不见于经传者有矣，何独武哉？或曰：“《风后握奇经》，实行兵之要，其说实合乎伏羲氏之卦画，奇正相生，变化不测。诸葛亮得之，以为‘八阵’。李靖得之，以为‘六花阵’。而武为一代论兵之雄，顾不及之，何也？”曰：“《兵势》篇不云乎：‘战者以正合，以奇胜。’战势不过奇正，奇正之变，不可胜穷。奇正相生，如循环之无端。《九地》篇又不云乎：‘用兵者，譬如率然。’率然者，常山之蛇也，击其首则尾至，击其尾则首至，击其中则首尾俱至。斯固风后之遗说也，曾谓其不及之，可乎？”呜呼，古之谈兵者，有仁义，有节制，至武一趋于权术变诈，流毒至于今未已也。然则武者，固兵家之祖，亦兵家之祸首欤！

《吴子》二卷，卫人吴起撰。起尝学于曾子。其著书曰《图国》、《料敌》、《治兵》、《论将》、《应变》、《励士》，凡六篇。夫干戈相寻，至于战国，惨矣！往往以智术诈谲，驰骋于利害之场，无所不用其至，若无士矣。起于斯时，对魏武侯则曰：在德不在险。论制国治军，则曰：教之以礼，励之以义。论天下战国，则曰：五胜者祸，四胜者弊，三胜者霸，二胜者王，一胜者帝，数胜得天下者稀，以亡者众。论为将之道则曰：所慎者五，一曰理，二曰备，三曰果，四曰戒，五曰约。何起之异夫诸子也？此所以守西河，与诸侯大战七十六，全胜六十四，辟土四面，拓地千里，宜也。较之孙武，则起几于正，武一乎奇，其优劣判矣。或者谓，起为武之亚，抑亦未之思欤？然则杀妻求将，啗臂盟母，亦在所取乎？曰：姑舍是。

《尉繚子》五卷，不知何人书。或曰魏人，以《天官》篇有“梁惠王问”知之。或曰齐人也。未知孰是。其书二十四篇，较之《汉志》“杂家”二十九篇，已亡五篇。其论兵曰：“兵者凶器也，争者逆德也，将者死官也，故不得已而用之。无天于上，无地于下，无王于后，无敌于前。一人之兵，如狼如虎，如风如雨，如雷如霆，震震冥冥，天下皆惊。”由是观之，其威烈可谓莫之婴矣。及究其所以为用，则曰：“兵不攻无过之城，不杀无罪之人。夫杀人之父兄，利人之货财，臣妾人之子女，此皆盗也。”又曰：“兵者，所以诛暴乱，禁不义也。兵之所加者，农不离其田业，贾不离其肆宅，士大夫不离其官府。故兵不血刃，而天下亲。”呜呼，又何其仁哉！战国谈兵者，有言及此，君子盖不可不与也。宋元丰中，是书与孙、吴二子，司马穰苴《兵法》，黄石公《三略》，吕望《六韬》，李卫公《问对》，颁行

武学，号为“七书”。孙、吴当是古书；《司马兵法》本古者《司马兵法》而附以田穰苴之说，疑亦非伪；若《三略》、《六韬》、《问对》之类，则固后人依仿而托之者也，而杂然浑称无别，其或当时有司之失欤？

《尹文子》二卷，周尹文撰。其书言大道似老氏，言刑名类申、韩，盖无足称者。晁氏独谓其亦宗六艺，数称仲尼，其叛道者盖鲜。呜呼，世岂有专言刑名而不叛道者哉？晁失言矣！仲长统序，称其出于周尹氏，齐宣王时居稷下，与宋鉞、彭蒙、田骈，同学于公孙龙。按龙客于平原君，君相赵惠文王。宣王死下距惠文王之立，已四十馀岁，是非学于龙者也。统卒于献帝让位之年，而序其黄初末到京师，亦与史不合。呜呼，《素问》以为黄帝所作，而有“失侯失王，脱营不医”之文，殊不知秦灭六国，汉诸侯王国除，始有失侯王者。《六韬》谓出于周之吕牙，而有“避正殿”之语，殊不知避正殿乃战国后事。《尔雅》以为周公所制，而有“张仲孝友”之言，殊不知张仲乃周宣王时人。予尝验古书真伪，每以是求之，思过半矣，又况文辞气魄之古今，绝然不可同哉！予因知统之序，盖后人依托者也。呜呼，岂独序哉！

《商子》五卷，秦公孙鞅撰。鞅，卫之庶孽，封于商，故以名书。《汉志》二十九篇。陈氏谓二十八篇。予家藏本二十六篇，其第二十一篇亡。鞅好刑名之学，秦孝公用之，遂致富强，后卒以反诛。今观其术，以劝耕、督战为先务。垦草之令，农战之法，至严至峻也。然不贵学问以愚民，不令豪杰务学诗书，其毒流至嬴政，遂大焚《诗》《书》百家语，以愚天下黔首，鞅实启之，非特李斯过也。议者不是之察，尚摘其“商、农无得余粟”，“贵酒肉，重租”之语，以为疵病，是犹舍人杀夺之罪，而问其不冠以见人，果何可哉？

《公孙龙子》三卷，《疏府》、《白马》、《指物》、《通变》、《坚白》、《名实》，凡六篇。《汉志》六十四篇，其亡已多矣。龙，赵人，平原君客也。能辨说，伤明王之不兴，疾名器之乖实，以假指物，以混是非，冀时君之有悟，而正名实焉。予尝取而读之，“白马非马”之喻，“坚白同异”之言，终不可解。后屡阅之，见其如捕龙蛇，奋迅腾，益不可措手。甚哉其辨也！然而名实愈不可正，何邪？言弗醇也。天下未有言弗醇而能正，苟欲名实之正，亟火之。

《荀子》十卷，赵人荀卿撰。卿名况，《汉志》避宣帝讳，作孙卿。刘向校定，除其重复者三十二篇，为十二卷，题曰《新书》。唐杨倞为之注，且更《新书》为《荀子》，易其篇第，析为二十卷。卿以齐襄王时游稷下，距孟子至齐五十年矣，列于大夫，三为祭酒。去之楚，春申君以为兰陵令。以谗去。之赵，与临武君议兵。入秦见应侯，昭王以聘。反乎楚，复为兰陵令。既废，家兰陵以终。乡先正唐仲友云：“向序卿事，本司马迁。于迁书有三不合：春申君死，当齐王建二十八年，距宣王八十七年。向言卿以宣王时来游学，春申君死而卿废。设以宣王末年游齐，年已百三十七矣。迁书记孟子以惠王三十五年至梁，当齐宣王七年，惠王以‘叟’称

孟子，计亦五十馀。后二十二年，子之乱燕，孟子在齐。若卿来以宣王时，不得如向言后孟子百馀岁。田忌荐孙臆为军师，败魏桂陵，当齐威王二十六年，距赵孝成王七十八年。临武君与卿议兵于王前，向以为孙臆，惊以败魏马陵疑年，马陵去桂陵又十三年矣。《崇文总目》言卿楚人，楚礼为客卿，与迂书、向《序》驳，益难信。”其论殊精绝。然况之为人，才甚高而不见道者也。由其才甚高，故立言或弗悖于孔氏；由其不见道，故极言性恶，及讥讪子思、孟轲不少置。学者其亦务知道哉？李斯虽师卿，于卿之学懵乎未之有闻。先儒遂以为病，指卿为刚愎不逊、自许太过之人，则失之矣。

《韩子》二十卷者，韩非所撰。非，韩之诸公子也，喜刑名法术之学，而归其本于黄老。与李斯同事荀卿。以书干韩王不用，乃观往者得失之变，作《孤愤》、《五蠹》、《内外储》、《说林》、《说难》五十五篇，计十馀万言。秦王见而悦之，急攻韩得非。斯自以不如非，忌之，谮于秦王。下吏，使自杀。非，惨激人也，君臣、父子、夫妇之间，一任以法，其视仁义蔑如也。法之所及，虽刀锯日加，不以为寡恩也。其无忌惮，至谓孔子未知孝、悌、忠、信之道；谓贤尧、舜、汤、武，乃天下乱术；谓父有贤子、君有贤臣，适足以为害；谓人君藏术胸中，以倡众端，而潜御群臣。噫，是何言欤？是何言欤？是亦足以杀其身矣！

《燕丹子》三卷。丹，燕王喜太子，此书载其事为详。其辞气颇类《吴越春秋》、《越绝书》，决为秦、汉间人所作无疑。考其事，与司马迁《史记》往往皆合。独乌头白，马生角，机桥不发，进金掷蛙，脰千里马肝，截美人手，听琴姬得隐语等事，皆不之载。周氏谓迁削而去之，理或然也。夫丹不量力而轻撩虎须，荆轲恃一剑之勇而许人以死，卒致身灭国破，为天下万世笑。其事本不足议，独其书序事有法，而文彩烂然，亦学文者之所不废哉。

《孔丛子》七卷，《中兴书目》称汉孔鲋撰。鲋该览六艺，秦并天下，召为鲁国文通君，拜太傅。及焚书令行，乃归藏书屋壁，自隐嵩山。陈涉起，聘为博士，迁太师。仕六旬，以言不用，托目疾退老于陈，而著是书。年五十七卒。则固非汉人矣。又称一名盘盂。《艺文志》有孔甲《盘盂》二十六篇，本注谓黄帝史，或谓夏帝时人。此书称子鱼名鲋，陈人，或谓之子鲋，或谓之孔甲。孔甲姓名偶同，又决非著《盘盂》者也。其殆孔氏子孙，杂记仲尼、子思、子上、子高、子顺、子鱼之言行者欤？其第七卷，则汉孔臧以所著赋与书，谓之《连丛》附于卷末。嘉祐中，宋咸为之注。虽然，此伪书也。伪之者其宋咸欤？王士元伪作《亢桑子》，而又自为之注，抑此类欤？近世之为伪书者，非止咸也。若阮逸、关朗《易传》，李靖《问对》，若张商英《素书》，若戴师愈《麻衣易》，亦往往不能迷明者之目，竟何益哉！今观是书《记问》篇所载，有子思与孔子问答语。子思年止六十二，鲁穆公同时人。穆公之立，距孔子之没七十年，子思疑未长也，而何有问答哉？兼之气质柔弱，不类西京以前文字，其伪妄昭然可见。或者谓其能守家法，不杂怪奇，历战国、秦、汉流俗而无所浸淫。未必然也，未必然也！

《淮南鸿烈解》二十一卷，汉刘安撰。安，淮南厉王长之子。招致苏飞、李尚、左吴、田由、雷被、七被、伍被、晋昌等八人，及诸儒大山、小山之徒，讲论道德，总统仁义，著《内书》二十一篇。《李氏书目》云：“第七、第十九亡。”《崇文总目》云：“存者十八篇。”今所传《原道》、《俶真》、《天文》、《地形》、《时则》、《冥览》、《精神》、《本经》、《主术》、《繆称》、《齐俗》、《道应》、《浚论》、《詮言》、《邱略》、《说山》、《说林》、《人间》、《务修》、《泰族》、《等训》，连卷末《要略》，共二十一篇，似未尝亡也。又有《中篇》八卷，言神仙黄白之术。又有《外书》三十三篇，《汉志》与《内书》同列于杂家。《中》《外书》馀皆未见。《淮南子》多本《文子》，而出入儒、墨、名、法诸家，非成于一人之手，故前后有自相矛盾者，有乱言而乖事实者。既曰武王伐纣，载尸而行，海内未定，故不为三年之丧。又曰武王欲昭文王之令德，使戎狄各以其贿来贡，辽远未能至，故治三年之丧，殡两楹以俟远方。三代时无印，周官所掌之玺节，郑氏虽谓如今之印章，其实与犀角虎人龙符旌诸节并用，不过手执之以表信耳。今乃曰“鲁国召子贡授以大将军印”，如是之类，不能尽举也。昔吕不韦相秦，亦致辩士，使人人著所闻集论，以为十二记、六论、八览，其说虽未纯，要其首尾以类，粲然成一家言，非淮南之杂也。古人论立言者，汉不如秦，秦不如周，信矣哉。

《扬子法言》十卷，汉扬雄撰。凡十三篇，篇各有序，通录在卷后。景祐初，宋咸引之以冠篇首。或谓始于唐仲友，非也。自秦焚书之后，孔子之学不绝如线，雄独起而任之，故韩愈以其与孟、荀并称。而司马光尤好雄学，且谓孟子好《诗》《书》，荀子好《礼》，扬子好《易》。孟文直而显，荀文富而丽，扬文简而奥。惟简而奥，故难知。其与雄者至矣。是《法言》者，为拟《论语》而作。《论语》出于群弟子之所记，岂孔子自为哉？雄拟之，僭矣！至其甚者，又撰《太玄》以拟《易》，所谓首、冲、错、测、摛、莹、数、文、掇、图、告之类，皆足以使人怪骇。由其自得者少，故言辞愈似，而愈不似也。呜呼，雄不足责也，光以二代伟人，乃胶固雄学，复述《潜虚》以拟玄，抑又何说哉？余因为之长叹。雄之事，经考亭朱子论定者，则未遑及也。

《抱朴子》晋葛洪撰。洪字稚川。著《内篇》二十卷，言神仙黄白变化之事；《外篇》十卷，驳难通释洪深。抱朴子溺方技家言，谓神仙决可学，学之无难，合丹砂、黄金为药而服之，即令人寿与天地相毕，乘云驾龙，上下大清。其他杂引黄帝御女，及三皇内文，劾召鬼神之事，皆诞褻不可训。昔汉魏伯阳约《周易》作《参同契》上、中、下篇，其言修炼之术甚具。洪乃时与之戾，不识何也。洪尝自言马迹山中，受《九鼎》、《金液》二经于郑君。郑君名隐，又得之葛仙公。元，洪从祖也。其后郑君知江南将乱，负笈持药，东投霍山，莫知所在。亦不识其仙欤？否也？洪博闻深洽，江左绝伦，为文辞虽不近古，纡徐蔚茂，旁引而曲证，必达己意乃已。要之洪亦奇士，使舍是而学六艺，夫孰御之哉？惜也！

《刘子》五卷五十五篇，不知何人所作。《唐志》十卷，直云梁刘勰撰。今考勰所著《文心雕龙》，文体与此正类，其可征不疑，第卷数不同为少异尔。袁孝政谓，刘书孔昭伤己不遇，遭天下陵迟，播迁江表，故作此书。非也。孝政以无传记可凭，复致疑于刘歆、刘勰、刘孝标所为。黄氏遂谓孝政所托。亦非也。其书本黄、老言，杂引诸家之说以足成之，绝无甚高论。末论九家之学迹异归同，尤为鄙浅。然亦时时有可喜者，《清神》章云：“万人弯弧以向一鹄，鹄能无中乎？万物眩曜以惑一生，生能无伤乎？”（《亢仓子》同）三复其言，为之出涕。

《文中子中说》十卷，隋王通撰。通字仲淹，文中盖门人私谥，因以名其书。世之疑通者有三。一云，《唐书》房、杜传中，略不及其姓名，此书乃阮逸伪作，未必有其人。按皮日休著《文中子碑》，谓通生乎陈、隋之世，以乱世不仕，退于汾晋，序述《六经》，敷为《中说》，以行教于门人。皮，唐人也，距隋为近，其言若此，果无是人乎？书果逸之伪作乎？一云，通行事于史无考，独《隋唐通录》称其有秽行，为史官所削。然史氏之职，善恶毕书以为世法戒，人有秽行，见诸简策者多矣，何特削通哉？一云，房、杜、李、魏、二温、王、陈辈，未必其门人。脱有之，何不荐诸太宗而用之。隋大业十三年五月，通已先卒，将焉荐之？刘禹锡作《王华卿墓志》，载其家世行事，有曰“门多伟人”，虽未可必其为房、杜诸公，要不可谓非硕士也。第其书出于福郊、福畴之所为，牵合傅会，反不足取信于人。如仁寿四年，通始至长安，李德林卒已九岁，而书有“德林请见”之语。江都有变，通不及闻，而书有“泫然而兴”之言。关朗在太和中见魏孝文。自太和丁巳，至通生之岁开皇四年甲辰，一百七年矣，而书谓“问礼于关子朗”，此最为谬妄者也。噫，孟子而下，知尊孔子者曰荀、扬。扬本黄、老，荀杂申、商，唯通为近正，读者未可以此而轻訾之。

《天隐子》八篇，不知何人所作。唐司马承祯为之序。承祯字子微，尝著《坐忘论》。此书言长生久视之法，与之相表里，岂天隐子即承祯欤？洪兴祖谓承祯得天隐子之学，岂或别有考欤？

《玄贞子》，两见《唐志》，一云十二卷，一云二卷。予所藏者《外篇》三卷尔，计必有《内篇》，而此非全书也。唐张志和撰。韦谔作《内解》。志和字子同，金华人。始名龟龄，年十六擢明经，以策干肃宗，特见赏重，命待诏翰林，授左金吾卫录事参军，因赐名。后坐事贬南浦尉，会赦还，以亲既丧不复仕。居江湖，自称烟波钓徒，著《元真子》，亦以自号。其书多偏曲之论，无足采。所可采者，其隐操亦卓卓云。

《金华子》三卷，刘崇远撰。或云崇远唐人，或云五代。人。仕至大理司直，其为人莫可考。其为书，录唐大中后事，盖驳乎不足议也。昔刘向采传记百家之言，撮其正词美义可为劝戒者，以类相从，为《说苑》、《新序》二书，最为近古。识者犹病其徇物者多，自为者少，况崇远乎哉？金华子，崇远所自号，盖有慕皇初平云。

《齐丘子》六卷，一名《化书》。言道、术、德、仁、食、俭“六化”为甚悉。世传为伪唐宋齐丘子嵩作。张来题其后，遂云：齐丘犬鼠之雄，盖不足道。其为《化书》，虽皆浅机小数，亦微有见黄、老之所谓道德，其能成功，有以也。呜呼，是书之作，非齐丘也，终南山隐者谭峭景升也，齐丘窃之者也。其云“能得一者，天下可以理”。老氏说也。“魂魄魅我，血气醉我，七窍囚我，五根役我”。释氏说也。“心冥冥兮无所知，神怡怡兮无所之，气熙熙兮无所为，万虑不能惑，求死不可得”。神仙家说也，非“浅机小数”比也。使齐丘知此，则何为不得其死也？其文高简，关尹子可亚也，实微有见于黄、老所谓道德者也。

《聾隅子》二卷，蜀人黄晞撰。晞，宋仁宗时人，著《欬欬琐微论》十篇，篇有小序。造文效扬雄、王通二氏，而造理不能逮。其谓“张良得圣人之安，萧何得圣人之变，刘向得圣人之力量”者，似不可哉？黄氏间采其语，谓二氏反有所不及，非知言也。然自五季以来，士习极陋，而文亦随之。入宋殆将百年，而犹未大振。晞独知辞赋戾乎治具，声偶甚乎倡优，确然立论，以成一家言。真豪杰士哉！真豪杰士哉！

《周子通书》四十章，本号《易通》，春陵子周子惇颐之所著也。自孟子没，孔子之学不传，千载之下，独周子得之，以授二程氏，遂大白于天下。安定胡宏有云：“一回万古之光明，如日丽天；将为百世之利泽，如水行地。”其论不亦至哉！第每篇之首，宏辄加以“周子曰”三言，而损其旧有篇名，失其旨矣。是书文虽高简，体实渊恣，诚可上继孟氏，非馀子比也，然莫知其师傅之所自。彼妄男子谓，同胡文恭公受学于鹤林寿涯师者，固为诡诞；而云传《太极图》于穆修，修传《先天图》于种放，放传于陈抟者，亦恐知周子未尽也。其殆不阶师授，超然独觉于千古之上者欤？

《子程子》十卷，一名《程子粹言》，乃程颐叔子书。盖其门人杨时变语录而文之者也。前有序，不著氏名。东阳厉髯翁云：“相传为广汉张栻作，序称得诸子高子家传，以其卷次不分，编类不别，因离为《论道》、《论学》、《论书》、《论政》、《论事》、《天地》、《圣贤》、《君臣》、《心性》、《人物》十篇，欲其统而要。非求类夫《论语》之书也。”予取观之，实皆叔子之言，而伯子之说附焉。辞极峻古，虽间有稍离真者，亦不远矣。览者尚慎择之哉！

至正戊戌春三月丙辰，西师下睦州。浦阳壤地与睦境接，居民震惊，多扶挈耄倪走傍县。予亦遣妻孥入勾无山，独留未行，日坐环堵中，块然无所为。乃因旧所记忆者，作《诸子辩》数十通，九家者流颇具有焉。孔子门人之书，宜尊而别之，今亦俯就其列者，欲备儒家言也。始之以鬻子，终之以周、程者，欲读者有所归宿也。其中疏剔舐排，亦窃自谓有一发之见。第以家当屡徙之余，书无片牒可以稽质，不能必其无矛盾也。夏六月壬午仅克脱稿，越三日乙酉，而浦阳平矣。余遂竭蹶趋勾无，惊悸稍定，俾仲子遂录之如右。於戏，九家之徒竞以立异相高，莫甚于衰周之

世。言之中道者，则吾圣贤之所已具；其悖义而伤教者，固不必存之以欺世也。於戏，邪说之害人，惨于刀剑，虐于烈火，世有任斯文之寄者，尚忍淬其锋而膏其焰乎？予生也贱，不得信其所欲为之志，既各为之辨，复识其私于卷末。学孔氏者，其或有同予一嘅者夫？

秋七月丁酉朔，金华宋濂记。

◇寓言（五首）

齐桓公因过葵丘，葵丘人掘地得铁剑以上。厄于土，蚀甚。桓公力耆之，命左右砺以密砥，沃以鸟膏，虽日切磨下上，而鳞然若痼痂者犹故也。持以示隰朋，隰朋曰：“是谓太白之精，西方之英，北斗上布，中炯外空。不用则已，用不留行。是盖诸侯之神物也。”复示开方，开方曰：“隰朋之言良是。昔我太公，尝得宝剑于渭之阳，名曰龙光。命太史占之，其繇有曰：‘金以至刚，象以武功，大启尔封，东海之邦，历年八百乃终。’迄今卒受国于齐。君之所获，与太公无异，是殆天欲昌齐伯业乎？昌之必自葵丘始。”管夷吾不言而出，桓公召而问曰：“寡人得宝剑，左右皆吾誉，子独无一言何也？”夷吾曰：“君暗而臣佞，臣尚何言？”桓公曰：“何故？”夷吾曰：“君势隆，则谄谀日至。谄谀日至，则危亡之道也。彼隰朋、开方者，岂不知三尺枯铁，冶锻之家皆有之，今敢面欺于君，是君有重势以临之也。古之贤王，好善而忘势者，果何为哉？”桓公足地曰：“微汝言，寡人不及此。势之所至，可畏哉！”

晋景朝出，见饭牛者且行且歌，意轩轩若自得。命韩厥呼而问之：“女衣才至骭，曾无袞绣之华。出牧于野，曾无文轩之载。女果何乐而行歌若是也？”饭牛者曰：“此吾所以乐也。吾岂欲异于人哉？顾袞绣之荣，适以囚吾身。文轩之美，适以械吾体。故绝去而弗求也。吾岂欲异于人哉？人过百龄，其速若一日耳。舞而婆娑，行而浩歌，寤而蕤蕤，寐而鱼鱼，以此优游卒岁，不亦安乎？生杀之柄弗累于手，安危之机弗系于心，朝夕所虑者牛之饥，得青刍一束，则吾事济矣，不亦足乎？既安且足，其视列车千乘，积粟万钟，皆外物也，泊然与化俱冥矣，不亦达乎？有此三者，而欲持以易彼，非惑欤？”韩厥曰：“女自谋则善矣，如苍生何？”饭牛者不答，笑去。

卫人有齐丘生者，年五十生一子，爱之，食寝非子在侧，弗安弗饱。偶渡河，溺死。齐丘像其貌而哭甚哀。其友子人丙晓之曰：“鲁人有爱狻猊者，狻猊产微，而中国不可得。乃使人貌之，而日视之，终不得一见之。尔之所哀，得无类是乎？”齐丘闻之，愈悲。子人丙之兄骂曰：“尔恶识死生之变哉？宜乎不尔听而愈悲也。”乃走告齐丘曰：“太虚之门，气有屈信，生生死死，一耳，尔容何力哉？古之达人，委之顺之，由之全之，不逆命，不沮化，不祈内福，不辟外祸，不知天之为人，人之为天也。且尔之死生，亦纵浪大化中，未知津涯，尚何暇恤尔之子哉？”齐丘

收泣谢曰：“喻之矣。”

商于子家贫，无犊以耕，乃牵一大豕，驾之而东。大豕不肯就轭，既就复解，终日不能破一畦。甯母先生过而尤之曰：“子过矣，子过矣，耕当以牛。以其力之巨，能起块也。蹄之坚，能陷淖也。豕纵大，安能耕耶？”商于子怒而弗应。甯母先生曰：“《诗》不云乎？‘乃造其曹，执豕于牢。’言将以为肴。今子以之代耕，不几颠之倒之乎？吾悯而诏子，子乃反怒而弗答，何也？”商于子曰：“子以予颠之倒之，予亦以子倒之颠之。吾岂不知服田必以牛，亦犹牧吾民者必以贤？不以牛，虽不得田，其害小。不以贤，则天下受祸，其害大。子何不以尤我者尤牧民者耶？”甯母先生顾谓弟子曰：“是盖有激者也。”

雍丘有北宫殖，操舟捕鱼蚌自给。夜宿河滨，忽获夜光之珠，明照百步外。雍丘之人，以北宫殖得奇宝也，争刺羊豕往贺之曰：“自若居雍丘，出则操舟，入则舍舟，其衣罔罔尔，其食扈扈尔，宋人之窶者，未有过于若也。若今一旦得奇宝，奇宝者世之所珍，何欲不饜哉？”宋大夫闻之，亦往贺曰：“宋君欲求照乘之珠，十枚既有其九。环宋国之疆而诏之，无有应者，不意若得之河滨也。若当笼以阿锡，贮以宝絨，吾挈若西献之，贵与富，弗须口也。”北宫殖将行，其父始还自秦。北宫殖具以告，其父哭曰：“予居雍丘十世矣，安于一舟。今以是珠献，必致贵富，贵富则骄，骄则暴，暴则乱，乱则危，危则大坏而后已。求如今日操舟，尚可得耶？吾安用是为也？吾安用是为也？”碎之。

◇萝山杂言（二十首）

濂自居青萝山，山深无来者，辄日玩天人之理。久之，似觉粗有所得，作《萝山杂言》。

君子之道，与天地并运，与日月并明，与四时并行。冲然若虚，渊然若潜，浑然若无隅，凝然若弗移，充然若不可以形拘。测之而弗知，用之而弗穷。唯其弗知，是以极微；唯其弗穷，是以有终。

至虚至灵者心。视之无形，听之无声，探之不见其所庖。一或触焉，缤缤乎萃也，炎炎乎赫也，莽莽乎驰弗息也。若不以畏为君，而欲轡之勒之，检之桢之，苞之涵之，是犹教猿学礼也，不亦左乎？

子不见婴儿乎？目不留采色，故明全；耳不留音声，故聪全；舌不留苦甘，故味全。君子则之，养其聪，晦其明，忘其味，是之谓通原。通原则几乎圣人，不用则已，用则为天下独。

《六经》皆故迹，新入之机不同。其机确确，其履濯濯。其机采采，其履昧昧。甚

哉其机也！人以文视经，斯缪已。善察机者，其以质视经乎？

绵绵棼棼，乃政之分。纯纯谥谥，乃政之一。是故圣人驯而弗扰，靖而弗逸，明而弗察，勤而弗烦。弗扰故民舒，弗逸故民宁，弗察故民宽，弗烦故民裕。四者有失，则天下受其害。

守正莫过于一，一故弗贰。弗贰则明，明则神，神则无不通，天下之能事毕矣。是故圣人之学贵一。

天下，一物也。譬之千钧，乌获能举之。力不获若，则或压焉，或僨焉，甚可畏也。然则举天下有要乎？曰，有，德以怀之，刑以威之。

阴阳相摩，昼夜相环，善恶相形，泉凤相峙，梁藜相茂，势也，亦理也。君子欲尽绝小人，得乎哉？

鸟之羽者两其足，兽之角者去其齿。天地生物，尚有不能，而况众人乎？故曰功有所不全，力有所不任，才有所不足。

行遇刃者必避，食逢鸩者必舍，惧害己也。丽色藏剑，厚味腊毒，则弗之察，愚矣！

鸡司晨，犬警夜，虽尧舜不能废。人有弃小善而弗采者，非道哉？

以文徼名，名必隳；以货徇身，身必亡。隳故无成，亡因有争。唯君子知名不可徼，身不可徇，是谓守素。守素则治，治乃昭，昭乃纯，纯乃诚。内修不暇，奚事外欲？

皦皦兮不缁，容容兮不知其所穷。如拥鉴，如持衡，随好恶轻重而应焉，其君子之心也哉？

天无言而生杀遂，伸兮则荣，屈兮则悴，亦何容力哉？故君子与天合德。

不察察以自恃乎？不默默以求全乎？不赫赫以鸷翔乎？不缩缩以雉伏乎？能纯一乎？能绝外诱乎？能山立而海受乎？如是者，谓之近道。

彼因气强，吾以义刚。彼因气弱，吾以仁柔。刚柔强弱之间，不容一发。知者行之，是谓得天；不肖者悖之，是谓失天。

人有奔走而求首者。或告之曰：“尔首不亡也。”指以示之，泠然而悟。学者之于

道，亦然。

世求圣人于人，求圣人之道于经，斯远已。我可圣人也，我言可经也，弗之思耳。

天下之事，或小或大，或简或烦，或亏或赢，或同或异，难一矣。君子以方寸心摄之，了然不见其有馀。

以术干禄者败，以财树家者祸，以势临人者辱，以安自恃者危，以学自眩者禽，以行自翹者伪，是六疾也。慈则和，俭则裕，勇则决，明则远，容则聚，是五懿也。去六疾行五懿，方有为于天下。

◇书客言（二首）

天台李某遇盗，官为购捕之。有刀镊工出簪珥粥诸市，市魁执送官。工具言私于李东邻女得之。官逮女问状，女战栗不能言。工曰：“尔母佯惧为也，尔左乳有瘢可验。”官覆之，信然。女悲，自刳死。死三月，始得真盗。初女童子时，常用工剃发，故知女瘢。工怨女嫁时不偿其劳，陷之。

黄岩少年尝游于博徒。一日，饮市上，市人携虚篋与博。不胜。驰而去。少年惭其给己，蹶至大泽中，杖之仆地。有一翁挟子过焉，意其病厥也，扶还其家。未至，而气绝。市人家缚翁父子入官，子哀恻不伏。翁谓子曰：“儿母用苦，吾老矣，自度在世无几，愿易儿也。”子闻之，辄自陈杀市人状甚悉。官用纵翁归，翁念儿冤也，自经死。

为说者曰：汉张释之为廷尉，天下无冤民。呜呼，今之从政者，其释之也哉？

◇琴谕

客有为予言，楚、越之交恒多山，山民齐氏者不识琴，问人曰：“何谓琴？”或告之曰：“琴之为制，广前狭后，圆上方下，岳首而越底，被之以丝，则铿铿然、泠泠然可听也。”齐悦曰：“是知琴也。”一日，适通都大邑，见负筑来者，亟趋视之，惊曰：“是不类广前狭后、圆上方下者耶？”反侧视之良久，又曰：“是不类岳首而越底者耶？”以指横度之，则亦有声出丝间，复曰：“是又不类铿铿、泠泠之可听者耶？”遂力致其人而归，师之三年，早夜不辍，自以为尽其技也。乡之告者偶过焉，闻其声，辄瞿然曰：“子习者筑也，非琴也。不然，何若是嘈杂淫哇也？”因出琴，鼓一再行。齐民闻之，蹙额曰：“子给我矣，子给我矣！澹乎若大羹玄酒，朴乎若蕢桴土鼓，不足乐也。予所嗜者异乎是，若鸾凤之鸣，若笙箫之闲作，若燕赵美人之善讴，吾不知子琴之为筑，吾筑之为琴也，请终乐之。”

嗟夫！琴之为器，人所易识。山民乃以筑当之，则夫误指乡愿为君子，日爱之而不知厌者，尚何怪乎？感斯言，作《琴谕》。

◇秦士录

邓弼，字伯翊，秦人也。身長七尺，双目有紫棱，开合闪闪如电。能以力雄人，邻牛方斗不可擘，拳其脊，折仆地。市门石鼓，十人舁弗能举，两手持之行。然好使酒，怒视人，人见辄避，曰：“狂生不可近，近则必得奇辱。”一日，独饮娼楼，萧、冯两书生过其下，急牵入共饮。两生素贱其人，力拒之。弼怒曰：“君终不我从，必杀君，亡命走山泽耳，不能忍君苦也。”两生不得已，从之。弼自据中筵，指左右揖两生坐。呼酒歌啸以为乐。酒酣，解衣箕踞，拔刀置案上，铿然鸣。两生雅闻其酒狂，欲起走。弼止之曰：“勿走也，弼亦粗知书，君何至相视如涕唾？今日非速君饮，欲少吐胸中不平气耳。四库书从君问，即不能答，当血是刃。”两生曰：“有是哉？”遽摘《七经》数十义叩之。弼历举传疏，不遗一言。复询历代史。上下三千年，纚纚如贯珠。弼笑曰：“君等伏乎未也？”两生相顾惨沮，不敢再有问。弼索酒被发跳叫曰：“吾今日压倒老生矣！古者学在养气，今人一服儒衣，反奄奄欲绝，徒欲驰骋文墨，儿抚一世豪杰，此何可哉？此何可哉！君等休矣！”两生素负多才艺，闻弼言大愧，下楼足不得成步。归询其所与游，亦未尝见其挟册呻吟也。

泰定末，德王执法西御史台，弼造书数千言，袖谒之。阍卒不为通，弼曰：“若不知关中有邓伯翊耶？”连击踣数人，声闻于王。王令隶人摔入，欲鞭之。弼盛气曰：“公奈何不礼壮士？今天下虽号无事，东海岛彝尚未臣顺，间者驾海舰互市于鄞，即不满所欲，出火刀斫柱，杀伤我中国民。诸将军控弦引矢，追至大洋，且战且却，其亏国体为已甚。西南诸蛮，虽曰称臣奉贡，乘黄屋左纁，称制与中国等，尤志士所同愤。诚得如弼者一二辈，驱十万横磨剑伐之，则东西止日所出入，莫非王土矣，公奈何不礼壮士？”庭中人闻之，皆缩颈吐舌，舌久不能收。王曰：“尔自号壮士，解持矛鼓噪，前登坚城乎？”曰：“能。”“百万军中，可刺大将乎？”曰：“能。”“突围溃阵，得保首领乎？”曰：“能。”王顾左右曰：“姑试之。”问所须。曰：“铁铠、良马各一，雌雄剑二。”王即命给与。阴戒善槊者五十人，驰马出东门外，然后遣弼往。王自临观，空一府随之。暨弼至，众槊并进。弼虎吼而奔，人马辟易五十步，面目无色。已而烟尘涨天，但见双剑飞舞云雾中，连斫马首堕地，血涔涔滴。王抚髀欢曰：“诚壮士！诚壮士！”命勺酒劳弼，弼立饮不拜。由是狂名振一时，至比之“王铁枪”云。王上章荐诸天子，会丞相与王有隙，格其事不下。弼环视四体叹曰：“天生一具铜筋铁肋，不使立勋万里外，乃槁死三尺蒿下，命也，亦时也，尚何言？”遂入王屋山为道士，后十年终。

史官曰：弼死未二十年，天下大乱，中原数千里人影殆绝，玄鸟来降失家，竟栖林木间。使弼在，必当有以自见。惜哉，弼鬼不灵则已，若有灵，吾知其怒发上冲也。

卷八

◇广薛季昶对张柬之语

神龙元年春正月，秋官侍郎张柬之、天官侍郎崔元晖、中台右丞敬晖、司刑少卿桓彦范、相王司马袁恕己，举兵讨武氏之乱。张易之、昌宗伏诛，中宗复位。洛州长史薛季昶，乘间言于柬之曰：“侍郎举义兵剪除奸雄，匡复帝室，使四海苍生，再见唐家日月，其事甚伟。而季昶无一言以为贺者，侍郎亦知其意乎？”柬之曰：“不知也。”

季昶曰：“仆亦谓侍郎不知也，侍郎若知，则其所设施当不止此。侍郎幸听仆，仆请披肝沥胆为侍郎言之：昔我高祖，提三尺剑起晋阳，辅以太宗之神武，将帅之忠烈，然后能缚世充于东都，戮建德于河朔，剪黑闥于山东，收李密于黎阳，诛萧铣于江陵。昼不得息，夜不得寐，蚊虻生于铠胄之间，盖出万死一生，百战而有天下。此无他，欲为贤子神孙，建万世不拔之业耳。今武氏以妾媵之微，黜夺帝位，断王皇后、萧淑妃手足，投酒瓮中。石诸宗室朝明堂，恣行杀戮。御则天楼大赦天下，革唐号为周，易服色，置社稷，立宗庙，身被袞冕，手秉大圭，自称曰天册金轮大圣皇帝，南面而朝群臣。自天地始分以至于今，未尝有也。侍郎竖义旗，以复辟为辞，但杀二张，而释武后弗图，譬舍豺狼而问狐狸，何以厌服天下人心？仆窃为侍郎弗取也。侍郎若听仆计，集百辟卿士，执武后献诸太庙，数其过恶，取太宗黄钺斩之，以谢天下。凡武氏之在中外者，无小大皆尽杀无赦，庶几少慰先帝在天之灵，而侍郎高义，亦不在伊尹、周公下，侍郎能留意乎？”柬之曰：“吾业与元晖等谋，亦尝如长史言。但武后倒持天柄二十有一年，生杀废置，皆自其手出。三公九卿，惟知有武氏；勇将精兵，亦惟知有武氏；万邦黎庶，亦惟知有武氏。脱有一人号于众曰：天后且尔，将何所置吾属乎？则吾作齑粉矣！”

季昶曰：“不然，武后负滔天之恶，海内虽畏其威，忠义之心，人孰无之？其专制之初，李司马起兵扬州，奋臂一呼，得胜兵十数万，山东豪杰皆蒸麦为粮，伸锄为兵，以俟南军之至。当时天下尚愤惋如此，况今日乎？侍郎朝玄武门而入，不过羽林兵五百人耳，诛二张如杀狐兔，无一人敢动者，则人情可知也。侍郎即诛武后，天下有不帖帖者，当使铁钩钩吾舌，悬于长安城上，以为乱言者之戒！”柬之曰：“汉之吕后，与武后无大相远。平、勃虽将南北军，未闻诛之。岂不以诛之为弗是耶？”季昶曰：“武后之罪，浮于吕后万万。吕后虽杀孝惠子，尽封诸吕为王，未尝敢移汉鼎。今武后肆行不道，赖皇天后土未绝唐祚，使侍郎得竭忠其间。不然，则天下非复唐有，欲持一卮酒滴献陵土且不可得，侍郎尚欲同之乎？”

柬之曰：“武后，母也。今天子，子也。以子罪母，纵快忿一时，如万世公义何？”季昶曰：“传有之：人臣无将，将则必诛。设有人焉，招纳亡命，而欲睥睨神器，侍郎必尽杀之乃已。是何也？乱臣贼子，决不可赦也。武后于唐大义已绝，不过

一乱贼耳。二三大臣为国家讨贼，宜从先帝之法，岂上所得预闻？当此之时，宗庙社稷为重，武后为轻，能杀之乃所以伸公义也。”柬之曰：“吾为唐家老臣，即旦暮死，恨无以借手见先帝于地下。今幸诛二凶，复国号曰唐，便当上章乞骸骨，归老故山，他固不识也。”

季昶见柬之不能听其言，气怒甚。目光如炬，大声谓柬之曰：“此事姑置之。二凶虽诛，诸武封建依旧，日夜切齿，恨不碎嚼侍郎之骨。况三思又得幸于上，傥白上罢政事，矫制杀侍郎等，若反掌耳，侍郎尚不知动念乎！”柬之曰：“大事已定，彼犹几上肉耳，夫何能为？上素勇烈，当使自诛之，以张天子之威耳。长史固不必过虑也。”季昶退，弹指叹曰：“唉，吾以柬之为天下人豪，故往告之。乃若是！乃若是！吾不知死所矣！”二月，上命三思为司空。五月，赐柬之等王爵，罢其政柄。二年六月，各贬为远州司马。未几，皆为三思所杀，如季昶言。

◇志释寄胡征君仲申

华容孝廉与广平文学，遇于神明之台。孝廉问曰：“予缔子交，已越二纪，其貌固狎，其志则未之闻也，子能为我扬榷古今而释之乎？”

文学曰：“走也不敏，长自岩穴。鹤毳编襦，土芝缁食。动趾踉跄，发辞謇吃。忽挟绁縲，去历都邑。见者大噱，指为木刻。错愕周章，无地寄迹。独孝廉暖我以温颜，前我以重席，迪我以三古之芳猷，期我以九能之至域。拜孝廉之赐厚矣，孝廉有问，敢对以臆。寓形霄壤，不翅蟻蠊。时幻岁迁，电灭鸟空。唯极所适，其乐则鸿。出游大泽，才气雄。鼻尖出火，耳后生风。金张前驱，许史后从。牵黄臂苍，箠矢韞弓。仰落双雕，俯扼长熊。毛血旁洒，尘坌四封。入据邃馆，庭实惟供。罍尊旁午，豆俎衡从。肉腴舍春，酎晕移童。器周八音，律合六同。部分立坐，筵布西东。绿华白台，南威紫冲。靨辅寄牙，瑰质姣容。歌喉撼尘，舞袖翩龙。其有事，固日新而弗足也。窃有志焉，孝廉能许之乎？”孝廉曰：“欲败度，纵败礼。古人所戒，子岂宜蹈之？愿闻其他。”

文学曰：“班生投毫，令名煌耀。终童请缨，其齿甚少。不有焰焰，孰潜其爝？非勒铭于燕然，必建标于粤徼。轩冕以之蝉联，绅笏以之夸袞。卫、霍拥令，樊、陈执纛。公子扫门，王孙媚灶。霜露系乎吹嘘，予夺视其愠笑。其锐也，若孟劳之出鲁橈；其重也，如天球之镇周庙。天下学士，挥汗为雨，联袂成帷，莫不仰遗光而企未照。其视处环堵、厄藜藿，击壶而越吟，倚柱而吴啸，卑卑南阳之耕，落落滋泉之钓，口心共语，影形相吊，不亦大有径庭乎？”孝廉曰：“功高者身危，位隆者名丧。此众人之所嗜，而君子之所慎也。”文学曰：“神封灵壤，作镇下方。会稽衡华，沂岱岳常。霍及医闾，分布九疆。总三条于中区，限两戒于外邦。他若沧涨荡浮，青瀚混茫。包天裹地，循环相通（叶汤）。其间怪伟，靡可数详。天孙岳长，水伯渎宗（叶庄）。昂宿宝符之贵，玄龟青鲤之章。金篋玉策之探，日月圭璧

之藏。或隐而晦，或露而彰。走将简徒，御戒楼航。濯足于咸池，晞发于搏桑。豁氛埃于人瑕，发忠信于天光。苍水之使，稷丘之君，庶一问之，勺鼎湖而想遗弓，履河洛而思圣勋也。”孝廉曰：“山川形胜，固足以廓子耳目，昌子文辞，然非至焉。子母徒取则于太史迁也，更请大之。”

文学曰：“去圣逾远，学术纷披。控名责实，礼度是师。上下有叙，隆杀异宜。苛察缴绕，弗失丝厘。贵俭兼爱，上贤右鬼。采椽不斫，型簋唯土。嗇然自守，与孔齐轨。权事制宜，诡行遁辞。移阴转阳，入神出奇。变化阖辟，千目莫窥。秉要执本，立为经制。法无常形，事无成势。洞究群情，为万物主。仪节或愆，峻刑弼之。肃如晨霜，犯者裂肌。仲、鞅、非、到，挟之以驰。因彼天时，以施教令。若仪若象，测度以定。纪纲载明，是谓大顺。食天所寓，邦本所资。山泽平地，相厥攸宜。八政之首，著于经彝。揣摩国纪，宣明帝治。或合或兼，本末毕具。凡有猷为，罔越宪制。若是喧浚，泣森讯雷。震撼乎四极，充斥乎九垓。皞皞乎海水起立而应龙天飞也，戈戈乎五兵杂陈而神授握机也，芒芒乎旷野万里而列井布棋也。走欲遍索其说而试之，不识可乎？”孝廉曰：“夫子没而微言绝，诸子百氏人人殊，未有能一之者也。”

文学曰：“戡定惟武，亦国之程。其书漫衍，四类是绳。阴阳权谋，伎巧势形。其目胪列，翻翻缤缤。九宫八门，六甲五神。军轨兵铃，星式雷经。金鸡玉狗，风角鸟情。制器尚精，动合神机。胄铠罗陈，戈戟交施。渠答距堙，鸢冥扶胥。象车雀杏，行马飞鳧。武衡大櫓，耳长殳。云火万炬，浑脱全躯。策全器良，其用益张。营察六形，旗按五方。天地定位，风云流行。龙虎腾趯，鸟蛇翼骧。正正奇奇，魏魏堂堂。赫赫葩，棱棱璜璜。以守则固，以击则扬。或追北于函谷，或喋血于太行。或徇地于临淄，或陷坚于昆阳。是亦英雄之壮观也，走窃乐之，不知饥渴之在己也。”孝廉曰：“兵者不祥之器，圣人不得已而用之。子服儒衣，谈儒书，又焉用尔为？”

文学曰：“粤厥轩辕，游心太初。上超鸿沕，下入渺弥。有窃其馀，亦神其躯。文宾履生，师皇马医。玉柱丹砂，骑鸣龙师。木羊葛由，神泉鹿皮。折足山图，赭衣服间。女丸素书，赤斧碧鸡。朱璜痕脱，元俗质虚。心存冲寥，迹入倏奇。五性既绝，九患亦除。三阶有严，七变无亏。身升紫宫，位纪琳书。阴隆伏骨，目炯四规。执东象之玉文，契九赤之班符。御躋虚之龙袂，服太极之麟芝。入火不爇，入水不濡。入石不阳，入木不拘。云卧天行，神潜灵飞。是盖与天为徒，又不特致治于无为也。当辟我石室，寢我世机。服我胎息，杀我虫尸。洗伐我毛髓，销解我肤肌。睹铜狄而摩挲，约令威而来归。不知能成其志否乎？”孝廉曰：“圣人不师仙，使其可为，则周、孔为之矣。”

文学曰：“荒荒遗文，或伪或真。学徒巧辨，或正或舛。先出者堙，后出者存。何老生怨尤，而异师是嗔？藏之名山，编简乃完。何传授有绪，而鱼鲁或残？汲冢一

后，虫书再睹。何怪言放纷，而弗齐于古？纬候相传，内学是尊。何列国宝书，而尽阅其文？僭辞窃义，聒俗簧世。日新月巧，动莫之制。衡错摘莹，方州部家。何立言艰深，而莫究津涯？始生终通，生育及资。何其象不一，而数皆九为？原荧昴冢，名性气体。何图指不殊，而重摹迭拟？触类而言，何莫非此？沾泚动喙，徒见其鄙。走将钩其庞鸿，掠其纤微，悬空明之金鉴，俾无遁于妍媸。能若是，是亦足矣。”孝廉曰：“此粗近之，然滞于传注。童习白纷，若华蝉死生其间，亦奚益哉？”

文学曰：“孟轲氏歿，世乏真儒。师师萌庶，伥伥奚归？孰廓我蒙？孰砭我愚？群言孔多，契真者谁？欲操腐觥，以泛具区。欲络盲象，以驾鼓车。纵有智巧，宁不殆而？呜呼噫鋌，一何寥乎！九圣之神，于昭于天。九圣之心，存之于文。又何昭乎，呜呼噫鋌！枿施盈室，何有芳荪？繁星烂宵，孰知朝暾？宁不使我怡怡而悵悵乎？帝降民衷，德与天一。胡不自贵，葩藻是溺？颠倒首足，淆混白黑。弃其瓚盘，宝厥瓦鬲。拊膺自伤，汨血交积。誓劓宿秽，以划末习。驾舂陵以为舟，鼓关洛而为楫。张武夷以为帆，期洙泗之可涉。夙兴夜寐，惶惶业业，凜然如上帝之在目睫。若是何如？”孝廉曰：“此仆素昔之所究心者也，幸与子同之。”

于是执手降台，相视而笑。笑已，继之以歌曰：真儒不生，世阴阴兮。擿埴索涂，愈幽深兮。炯其灵根，无古今兮。超彼九元，离浊氛兮。攀渊追騫，乘赤麟兮。文之兴丧，负以身兮。任重道远，何时而止兮。朝斯夕斯，相期于没齿兮。

◇颜率求鼎难

秦兴师临周而求九鼎。周王患之，以告颜率。颜率曰：“大王勿忧也，臣请正大义以却其军。”

率乃诣秦君，长揖言曰：“周之与秦，势虽若敌国，其分则君臣也。率闻君伐臣则有之矣，自非弑逆，未闻以臣伐君也。不知君之兴师而涉邦畿也何故？天子谨使使臣问诸左右。”秦君曰：“无他意也。寡人窃闻，九鼎，四海之厚宝也，诚愿得一观焉。然恐周之执事不察敝国之情，乃盛陈师卫，以备不虞耳。寡人人臣也，岂敢称乱？”

率曰：“率意君忘其为人臣也，今幸弗忘，甚善。率尝适蔡。蔡人有事其主者，其主有龙渊之剑，蔡人操刃与戟，逐而夺之。或谏曰：‘此汝主也，汝何得乃尔，独弗畏不义之名乎？’蔡人曰：‘吾见龙渊，不见主也。’彼犹不见主，故肆行而无忌憚。君今知为人臣，而兴师求九鼎焉，何也？君不闻齐、晋之事乎？齐地方千里，带甲数十万，天王尝赐太公履，东至于海，西至于河，南至于穆陵，北至于无棣，五侯九伯，皆得专征。迨桓公之兴，平宋折郑，帖服荆楚，威行诸侯，天下莫强焉，尚款款以尊周为事，未尝敢求九鼎也。晋地亦方千里，带甲亦数十万，掎以太

行之高，起以首阳之雄，迤以黄河之深，靡以大陆之广，所谓表里山河之固，晋实有之。文公藉累世之盛，侵曹伐卫，大战于城濮，而楚师败绩，列国畏威，无敢不从。然犹一曰尊王室，二曰尊王室，亦不敢求九鼎也。今君欲行霸术，不思法桓、文，而首惟不轨是图，率恐诸侯有以议君也。且君有不义者三：以臣帅兵而劫天子，不义一也；鼎乃先王重器，而敢睥睨之，不义二也；肆虎狼之威，志在丘墟宗庙，不义三也。六国怨秦之虐，日夜共谋洹水之上，恨无其名以兴师。设知君有尔，韩必遣三将军出宜阳；赵、魏与韩，唇齿之邦，必注强弓、跬劲弩助之；燕虽稍弱，势不能以独宁，四国合一，精兵当不下三百馀万；齐为山东大国，亦必驱其众，西向殽函；楚见诸侯并起，其雄吞之志益暴，又必急趋捣武关。君虽有百二之险，举六豹而啖一牛，不至血肉狼籍不止也。率窃为君危之。夫鼎者，又以昭夫德也，苟无其德，虽得之必亡之。昔夏之盛也，贡金九牧，铸鼎象物，百物而为之备。使民知神奸，用能协于上下，以承天休。桀有昏德，鼎迁于商。商纣暴虐，鼎迁于周。周德虽衰，天命未改。君尚可力求之耶？楚庄之强，君之所闻也，因伐六浑之戎，遂来问鼎之重轻。王孙满一言却之，辄俯首莫敢吐气者，岂力有不足哉？诚畏负不义之名也。君世有功于天王，今其所为，可不如蛮荆之长乎？为君之计，莫若告于众曰：‘寡人不敏，昧厥君臣大分，帅尔有众，欲观鼎于周。周之大夫，弗以寡人为不穀，肫肫然喻之。寡人虽至愚，亦已藏之中心矣。尔众宜解甲韬戈从寡人，寡人幸至于庙，当举觶自罚。复告于太史书之，以旌寡人之过。’君能如此，则改过不吝之成汤，又见于今日也，君德孰加焉？”秦君闻之，赧然谢颜率曰：“子之言良是也。”即日罢兵西还。（鼎，周鼎也，固借周天子立论。）

为说者曰：秦师求鼎之事虽急，使率以是大义折之，秦纵暴，必能退师，初不待陈臣思将兵以救之也。既不能然，复以八十一万人挽鼎诳齐，率真小人哉！呜呼，大义不明久矣，岂独率一人之为然哉？呜呼，大义不明久矣！

◇述玄（为张道士作）

天地之间，有玄玄之道焉。塞八区，宰六幕，茫乎大化，莫见其迹。窈冥忽荒之中，而有神以为之枢。其神何如？洞乎无象，漠乎无形，瞻之弗睹，聆之弗闻，履冰弗寒，炙日弗温。故巍然高而不知其际，邃然深而不知其止，恢然大而不见其外，藐然细而不见其内。其施之于用也，能覆能载，能阴能阳，能静能动，能柔能刚，能上能下，能圆能方，能舒能惨，能翕能张。毛者亦以之而趋，羽者亦以之而翔，甲者亦以之而出，鳞者亦以之而行。凡有血气者，莫不藉是以存。所谓不依形而立，不待力而强，不以生而存，不随死而亡者也。故古之圣人，能养而全之，守一处和，若蛰龟然。一故弗杂，和故弗戾，久而行之，其道乃至。盖惧其摇而散也，乃啬其精；恐其劳而汨也，乃定其神；虑其躁而失常也，乃宁其气而弗撓。精与气合，其神则凝，然后驾太清以为舆，指溟涬以为盖，倚日月以为轮，运六气以为辕，化莽苍以为马，直远游乎无穷之门，虽鬼神不能测其机，而况于人乎？人皆有之，而不能之者，则眼之精疲于五色，耳之精没于五声，鼻口之精散于臭味，四肢之精

削于运用。精既散矣，气随竭矣，神虽弗离，将安傅之矣？卒俯首就毙，如慕光之趋火，其亦可悲也欤！呜呼，混沦在上者谓之天，磅礴在下者谓之地，中立两间者谓之人。天地不死，而人皆死者，何也？不知有玄玄之道故也。因本黄、老氏余论，作《述玄》。

◇书白衢州

三衢沈君持正，来为乌伤文学掾。予谒之，持正盛称其守白侯之贤。予问之曰：“侯定科繇如何？”曰：“衢为州虽据东浙上游，厥田惟下下，入赋以斛计，仅三万三千有奇。豪有力者兼并，且善避役，役多在贫人。侯察其奸，令民自实田，以田定赋，一州服其平。”“侯律己何如？”曰：“侯清约甚，饮衢水外，一物不烦衢民。每旦徒行入府署，野夫不识，与争道，不问。廷有斗民，立为疏直枉，皆免冠叩头谢。长子自沔阳来，越旬即遣归。唯一童给侍朝夕，未几亦遣。”“侯驭吏若隶何如？”曰：“吏抱案立左右，唯侯言是裁，不敢以意出入之。隶人数不逾九，凡冒隶名巡聚落以病人者，悉罢去。去年春，藩府以善治闻，天子嘉之，遣使赐束帛，衢人咸为侯荣。”

予问已，顾谓二三子曰：“此南阳白景亮明甫也，明甫自征东行省译曹掾起家，四转而来为是州，甚有惠政。昔予闻兰溪吴德基言若此，今持正又盛称其贤，故予屡问之。持正言与德基同，则白侯之贤信已。使牧郡国者皆得如侯，则下民之瘼，庶几其有瘳乎！”

◇说玄凝子

玄凝子，密人。往来吴越间，人问姓名不答。迫之，以指就案画“玄凝”二字，人因称之曰玄凝子云。

初，凝年十三时，牧猪东海上，有道士佩剑过之，授药一丸，赤如火。吞之，即弃猪随道士去。涉瞿塘，上滟滪，入青城山，坐白龙洞中。洞前大雪高三四尺，凝居之若温。时下山敲冰，濯足涧中，戏折涧竹，窍而吹之，学凤凰鸣。道士闻之，笑曰：“孺子之呆，一至此乎？”未几，道士去三神山采药，凝欲从，不可。独处洞一年，或三月不食，即食不过黄精、石芝。尝芝鬼城下，有白虎向南行，凝往执其尾，跃上虎脊，趋一里所舍去。反，白月射洞底，秋风四鸣。因思故乡菊花酒且熟，遂还密。人见凝眼有碧焰，意其已仙，而凝弗是也。人见凝者，辄赠诗，运笔如风，字或类隸书鬼篆，不可识。俄道士复至，与饮琅琊台上。大醉，竟同去，不知所之。道士眉长八九寸，双目深髯，怒张如戟，人疑为古仙人云。

为说者曰：齐地自古多方士，争言有禁方，能神仙，而少翁、栾大尤善惑，虽汉武帝雄才，亦所不免。今凝固齐产也，岂其山川之灵有以致之欤？呜呼，使上之人有好

凝者，其不少翁、桀大也寡矣？先王之世，以左道惑众者，必拘杀于司寇。必有旨哉！必有旨哉！

◇删古岳渎经

维禹治水，三至桐柏山。惊风迅雷，石号水鸣。五伯拥川，天老肃兵。雄干持旄，龙鸿敕轩。阍不能兴，禹乃震怒。召集百灵，蒐命夔龙。桐柏千君，稽首请命，罔不惟寅。神令所射，激如欃枪。乃縻鸿蒙，乃囚章商，乃縶兜卢，皇威载扬。犁娄卒刈，势不敢争。彼无支祈，力逾九象（叶）。厥形肖猿，目有电光。量淮度江，办捷从衡。授之童律，童律莫当。授之乌木田，木田遂臧。授之庚辰，庚辰扼其亢。络以铁绳，慑如犬羊。系诸淮阴，龟山之旁。木魅水精，洞妖石祥。奔号万数，若有丧亡。淮流汤汤，入海既平。民用靖康，直达外方。至于陪尾，无壅弗通。率惟厥常，以昭于无疆。

世传元和九年，李公佐游洞庭，登包山，与隐者周焦君探林屋洞，得《古岳渎经》第八卷。今观其文，虽奇而未醇，窃意即公佐、焦君所造以玩世者。戏删润其辞，集古鼎文写之，以寄吴君浚仲。浚仲盖深于古学者也，铸罍器与方乳曲文大鬲争妍，其自知不可哉。（丙申冬十一月，濂志。）

◇兰亭觴咏图记

《兰亭觴咏图》一卷，相传为李公麟所画。观其运意状物，极有思致，似非公麟不能。

先画兰亭一所，俯临清流，上甚幽艳。四面皆帘，帘半卷。旁周栏楯，中设方几。几上研、墨各一，纸三二成轴，一布几间。有美丈夫坐几后，冠竹箨冠，服大布衣，右手操翰，冥然若遐思。疑羲之草序时也。后列二童，一侍侧，一吹火熬鼎。鼎水沸，将淪汤。前一童傍栏睨溪，溪中白鹅三，一去，一反顾，一飞起波面，厕二鹅间。溪上皆崇山峻岭，有水自中出，三级。水西置酒尊四，一童左手执袂，右入尊勺酒；一童执觴；一童执壶，夹左右立。尊前有案，列觴五，觴各有舟，如荷叶。二童执觴流于溪，一童伛立其后，举觴次第授之。旁有小艇，觴泊岸，触之使逝。又西有石磴，磴上覆舟一，列觴三，一童执壶注觴中，一童取酒盗饮。

次画郡功曹魏滂、右将军王羲之。滂左执卷，回顾羲之，伸右手欲受卷观。羲之左持卷，授滂未授，右执翰凝视，若将涂窜，然风流之状，犹可仿佛想见。次画散骑常侍郗昙，左右手展卷自诵。次画荣阳桓伟、余杭令谢藤。伟坦腹坐，左手掀髯，气甚豪，右执卷倚大带间。藤解襟盘礴，诗思久未属，握拳作欠伸势。次画侍郎谢瑰，左持卷当膺，右握翰抚膝上。次画王凝之、颍川庾友、王涣之。凝之袒两肩，左手垂砚侧，右执卷授友。友袒如凝之，方轴纸作卷，卷末纸参差，以掌齐之。涣

之袒如友，两手抱膝微吟。次画行参军事邱邱旄，袒裼如渙之，伸一足坐，举手取觞饮。

次画余杭令孙统、琅琊王友谢安、行参军曹茂、府主簿任凝。统翘左足，交两手著膝。安翘右足，左手压砚，令不动，右揩墨作汁。二人相向坐。茂两手执纸直垂，辗转轴之。凝袒衣，露左臂，压膝上，翘一足如统，旋首顾茂，目光炯然。次画左司马孙绰，敛衽危坐，若泊然无所为者。次画颍川庾蕴，年甚耄，坐久思起，右手据地，一童挟左臂扶之。次画行参军杨模，衣半袒，单足起立，屈一足，扬双袖向前，翩翩如舞。次画王献之、王肃之、镇军司马虞说、任城吕系、府主簿后绵。献之襟袖半敞，垂右手著地，左按膝。肃之困，睫不可擘，一手撚纸，作针刺鼻令嚏。说袒半衣，两手展卷读。系向说，右手据席，左绕出背后搁膝上，臂露者半，俯身就说作听状。绵足心并，翘一足，两手持卷夹膝，身微侧。次画参军孔炽，坦腹，仰面视霄汉，翘一足，左持卷枕膝，右据地。傍一童伏溪畔，以小艇致觞，欲饮炽。次画参军刘密，袒衣坐，左手执袂，右入水，微波动指间，前有觞泛流而下，欲取之，旁有覆觞流去。

次画王元之、永兴令王彬之、郡五官谢绎、王微之。元之展卷斜视，露左手，右不见。彬之与元之对，袒肩坐，伸手措卷。绎亦袒，垂左臂，右执翰压臂，臂痒，将搔之。微之左擎卷至颧，右操翰欲写未写。次画府功曹劳夷、行参军徐丰之。夷、丰之相向，夷左执觞，右手夹觞侧，若献丰之；丰之面仰视，揜袖至腕上，势粗甚，右手向身北取觞，似欲酬夷者。次画长岑令华耆，右执觞未饮，左撚髭旁睨丰之，洋洋有喜色。次画徐州西平曹华，右执卷，侧身欲读，左手隐。次画王蕴之、镇国大将军掾卞迪、司徒左西属谢万、彭城曹岩、任城吕本。蕴之箕踞坐，交臂两膝间，一握拳，一舒掌，掌覆拳背。迪半欹，举手迎觞欲取。万肩半坦，左按纸，右在肘下，侧目视迪。岩伸右足，左持觞顾本。本翘一足，屈臂拄膝，持翰贴耳上，头微仰，若苦吟者。

次画上虞令华茂、山阴令虞谷、中军参军孙嗣。茂袒肩，右执翰垂下欲掷，转首共谷语。谷袒衣与茂同，右持觞浮茂。嗣拊掌大笑，一足踞。次画陈郡袁峤之、行参军王丰之。丰之展卷仰首读，背微伛。峤之双掌相向舞，似对之击节者。次画二垂柳夹石桥，桥有扶阑，二童度桥上，一持器，疑贮觞者，一倚阑戟手指溪中。溪左右各一童，操小艇邀觞舟收之。其侧有覆觞二、舟两。别有一童出柳下，身半露。

自兰亭至石桥，溪水诘曲，流如龙奔。溪右二十人，溪左二十有二人。其中冠者十有二人，巾者三十人，衣皆褰加绅，各地坐，藉以方裯，或熊、虎皮，研纸墨笔各具。有诗者各系人傍，两篇成者十有一人，一篇成者十有五人，不成者十有六人。其状人人殊，诚可谓善画者已。今去永和癸丑，不翅千有馀年，计其一时人物之盛，清标雅致，浮动于左尊右俎间，犹可即此图以想见其事。然而俯仰今昔，时异世殊，崇山峻岭固不改于旧，而昔人果安在哉？后之人欲见，有不可得，徒想像于图

画中，亦足悲矣！噫，世间万事，往往如是，是何足深道？唯辞章劳烈，足以传世于无穷，其人虽死，犹不死也，如王、谢诸人是已。使公麟复生，尚得描貌之乎？

予见此卷于友人家，因借归记其事如右，时一观焉，则有不胜感慨者矣。

◇演连珠

连珠者，兴于汉章之世，班固、贾逵、傅毅咸受诏作之。其后陆士衡演之，司空徒、徐铉、晏殊、宋庠又从而效之。然其为体，不指说事情，必假喻以达其旨，而览者微悟，合于古诗讽兴之义，有足取者。作《演连珠》五十首。

盖闻忠臣殉国，不惜于躯命；烈士爱君，竟忘其首领。是以左轂之鸣，车右伏剑；越甲之至，雍门刎颈。

盖闻鹰鹯巢林，鸟雀为之不栖；松柏在冈，蒿艾为之不植。是以君子居乡，儉壬革面；正士立朝，奸雄敛迹。

盖闻志于贞节者，浮名不足以累其真；志于恬泊者，好爵不可以乱其性。是以子陵乐富春之耕，干木辞于陵之聘。

盖闻天矩有定，人谋莫移。或顺之而从吉，或反之而致凶。是以鹤颈固长，截之则恐，鳧颈虽短，续之则悲。

盖闻事贵审机，行当寡尤。《大易》慎辨早之戒，《春秋》严谨始之谋。微必驯于显极，鸿每事于纤求。是以蜃鬻一出，潜鱼尽怖；霜钟初动，巢鸟咸忧。

盖闻龙升云随，虎吼飙兴。丰泽剑飞，徠山东之冠履；晋阳戈指，集冀北之簪缨。是以气志吻契，精神合并。桑阴不徙而大功立，戎衣一御而四海平。

盖闻体微而劲者，或足以交戕；形庞而武者，或失于见制。小大每失于相形，刚弱乃拘于所畏。是以豺舌虽狭，而有杀虎之能；鼠牙虽尖，而有害象之技。

盖闻资地以成，恒丽形于名岳；向阳而集，唯藉饮于醴泉。物以类而方聚，德必均而可肩。是以五色神芝，肯鬯灵于朽壤；九苞彩凤，笑吓鼠之乌鸢。

盖闻外味不加，则形气日削；内养有道，则神明自腴。苟譬诸物，若契以符。是以脾析一停，摩牛即仆；中夷既涸，鱗刀成枯。

盖闻赏物在精，取财有道。毫发异观，天渊殊造。是以峯阳之桐，惟伯牙能知其良

；乌号之弓，必由基方领其妙。苟徒妄粥而暗投，曷若藏音而收耀。

盖闻旭日才升于上元，则沈霾斯屏；疾霆或振于后土，则魑魅潜惊。何则？大明足以著宣天德，大威足以通昭天声。是以两观之诛，尼父与政；三叔之乱，姬旦东征。

盖闻殷商久旱，有备而无虞；郑国屡菑，知警而弗复。是以阳德载乎气化，玄邈难知；治忽系乎人谋，昭明可究。

盖闻人畜木难，轻如尺布；家藏敝帚，重若千金。何权度之遽失，斯沈痼之已深。是以自珍而蔑人者，不行于匹妇；中虚而徇礼者，可化于百壬。

盖闻青霞白凤之文，奚关治化；黄马碧鸡之辨，颇类俳优。哀弥文之丧质，致末俗之效尤。是以六艺之科法，莫严于炎汉；三缄其口铭，式播于成周。

盖闻争雄角胜者，常贵于权谋；伐罪吊民者，必资于仁义。由王霸之或殊，遂正偏之顿异。是以汤、武之师，若日照而月临；桓、文之兵，如风飞而雷厉。

盖闻翔蝇饱偃溷之腴，如甘芳饵；艾豨处污蔑之窟，若寝文茵。缘局气而不变，乃反物而独称。是以锢于陋习，苦良易置；同乎衰世，妍丑奚分？

盖闻负道推公者，欲举善以同人；挟智自私者，恒患贤之压己。以其量之隘弘，验其人之臧否。是以五弓之陵，莫齐泰华之冈；一蹄之涔，难媲沧溟之水。

盖闻神秘启圣，龙图出河。生卦爻之参错，见阴阳之荡摩。弘参玄化，丕叶太和。是以桎于讖纬者，诬絺绣于轻缟；拘于术数者，量瀛海以元蠡。

盖闻大钧司播，何奇不有；通神广揽，厥识惟贞。若限一己之陋，将失百物之情。是以南徼流泉，人饮之而化蟒；西戎羊角，土种之以成形。

盖闻九圣有作，悬中天之两曜；七经垂训，烛万古之重冥。移橐埴以索涂，咸履矩而蹈绳。是以采章文物，因兹而昭焕；礼义廉耻，藉是以修明。

盖闻有感斯应，无暗弗章。或声音之相召，或物我之两忘。是以瓠巴援琴而鼓，则游鱼出听；曾子倚山而啸，则飞鸟下翔。

盖闻寰宇至博，当百工共理；庙社至重，非一士可图。是以尺薪不能温镬水，寸冰不足寒庖厨。

盖闻哲士穷机，必售其所嗜；纯臣强识，必揆其所当。是以文绣虽华，犬冒之而弃去；毛嫱虽美，鱼见之而深藏。

盖闻正色在廷，固资于謇谤；婉容而谏，尤贵于优柔。盛怒无逆鳞之批，易志有解颐之休。是以叔向善辞，故不杀搏鵩之竖；晏婴能讽，故卒出斩竹之囚。

盖闻士必因其才，则可以致使；器必称夫用，则可以致亨。若反是道，将毁于成。是以泗滨之梓，不能以为笛；云梦之竹，不足以为箏。

盖闻善事国者，不以私废公；善为臣者，不以怨弃义。是以解狐之引伯柳，上党则安；舅犯之举子羔，西河则治。

盖闻地随天偏，气因方异。既爽中和，则流隐翊。是以由首之山，曾雪常凝；寿麻之国，大暑倍炽。

盖闻志或不持，乱靡有定。甘于遂欲，如染饴飴之鼎；涩于从善，如蹈刀锯之阱。是以善妒者弗服秦室之木，善淫者不厌太仓之令。

盖闻玄黄载析，品象攸凝。兆人文以宣其用，义粒食以遂其生。是以鱼游翠舫，而录图至；天雨嘉粟，而帝农耕。

盖闻天兆既朕，神符有尚。叶二仪之沆缁，含三辰之融盎。有开必先，揆理无妄。是以赤龙感河而尧生，白气贯月而汤降。

盖闻处平则通，行危则蹇；厥志弗回，斯力乃衍。是以鱼升龙门，难于拾级；车上太行，难于薄险。

盖闻是非易轨，白黑倒置；势有不一，时随所值。是以齐女虽艳，反以丑闻；秦士虽贱，卒以贵遇。

盖闻唯气应时，其则弗爽；唯神体物，其用乃周。是以橐龠顺虚而鼓动，关键乘时而启抽。故人心或变，壮士歌而怨夫哭；物化有定，秦女悲而秋士忧。

盖闻善言物情者，否固有泰；能察人理者，诘或弗信。是以道不济而戎夷寒死，志不行而东郭长贫。

盖闻形采未彰者，竟忘其窳陋；事功未白者，谁察其隆高。是以髡饰自矜，临淄水始知其丑；威棱素敛，破昆阳始知其豪。

盖闻事贵适用，物宜近观。或滞恒而留变，终背易而由艰。是故寒者不贪双璧，而思短褐；饥者不愿千金，而美一餐。

盖闻九五飞龙，三灵叶瑞；大德有贞，至神攸馭。是以帝尧即政，景星出翼；成汤临宇，飞煌挟馭。

盖闻惟皇建极，为世彝制。变鹿豕之俗，则竭力以行道；出鱼鳖之民，则忘身而徇世。是以通河汉者，首无发而股无毛；赞天地者，心有经而膂有纬。

盖闻民既大安，则乐世如砥；策能戡乱，则目牛无全。是以勺酒郁摇，势在克殷之后；甲兵未动，胜居服夏之先。

盖闻中心弗妄，大信孚如。验千里之违应，在片言之是非。是以史佚正辞，以实桐叶之戏；晏子佯对，而发海枣之疑。

盖闻葆熙石室，任运陵局。左阖右开，以揽二仪之秘；仰观俯察，以尽万品之情。何则？行废安于否泰，动静视乎屯亨。是以虞舜大圣，犹礼于支父；神禹至治，犹优于伯成。

盖闻一馈七起者，文命之急士；一沐三握者，姬旦之下贤。是以庶绩用乂，灵贶斯甄。故自长而短人者，国必仆；自贤而愚人者，身必颠。

盖闻天人协合，上下盘魄。参神运之回旋，资气化于冲漠。是以君致尊而制命，则日月贞明；臣守卑而介道，则雨暘时若。

盖闻崇庠别方，鸿琐殊器。其性有差，其量则异。是以虾蟹之朋，莫希云龙之轨；燕雀之俦，难知鸿鹄之志。

盖闻明圣有作，问道无方。之具茨而事大隗，适东岱以奉中黄。是以下绥定于黎庶，上燮和于阴阳。故冲默之德，蟠乎无际；渊微之应，覃乎无疆。

盖闻善行兴邦，嘉言作则。法缘之以革奸，人依之而建德。是以闻一言之当，如得万人之兵；获一士之贤，如得千乘之国。

盖闻择食者在验其醇醜，观人者在察其邪良。是以乌喙虽可充肠，茹之则身灭；儉邪虽可任事，用之则国亡。

盖闻昭悬景于天，则暴威不作；鼓飞廉之气，则柔慝自退。是以白日扬光，雷车避藏；祥飙鼓籟，元云掩旆。

盖闻淡颜钝舌，不合于污世；戇楫痴步，取憎于流俗。宁采绿于涧阿，肯逐轨于朝曲？是以择林而遁者，甘西山之饿；知命不忧者，免穷途之哭。

盖闻至道玄妙，非气象可局；灵化潜融，非轨辙可制。若鱼兔之已得，则筌蹄之可离。是以协三才而贯十端，宰一心而统万汇。

◇序俞神君灵迹

神君姓俞氏，不知其名与州里所居，相传唐末时来勾吴，主上林里吴姬家，以播鼗粥笄珥为事。出言隐显不常，颇类神鬼语。或张盖行赤日中，必雨，否则，雨虽甚必霁。近枫桥十里所，有溪善溢，咫尺若千里，涉者告病。神君释芒屨掷之，后遂涸。性喜蓂柳幘，闲手植园蔬，一夕亦尽化为柳。人异之，呼为“柳仙人”云。阅三载，忽谓姬曰：“吾乃柳星之精，被谪来人间，期满当逝。即逝毋棺我，合二瓮瘞之山陬，他日庙食，勿用牺牲为荐，吾将利尔后人也。”姬从其言。瘞毕，土人畚山，火误延其家，时方长夏，俄有积雪数寸覆之。人益惊异，相呼作新庙，凡水旱及螟螣害稼，厉鬼为凶菑，咸奔走神君。

熙宁中，郡守以事谒庙下，举觞奠酒，且再拜。及兴，觞已竭。复勺，中分而亡其半，馀酒若墙峙弗倾。宣和间，方腊作乱，声摇浙东西，恶少年欲啸众从之，神君降于巫曰：“上帝檄吾帅九天神兵破贼，此曹宜速改，弗改，必令作齑粉。”未几，人自衢来，言贼闻潇潇风水声，疑有铁骑百万自天而下，咸弃戟遁，官军遂平之。

绍兴初，高宗驻蹕会稽，监察御史娄寅亮，衔上命请雨。致辞未毕，天大雷电，以风雨随至。神君于雨暘，若果司之者，他有祷辄应类此，而乌伤、大雄二事尤异。十三年夏不雨，诸暨县令辇神君像于大雄佛刹祈焉。始至，日焰焰欲然，少则片云当空，飞雪著瓦有声，雪止雨即澍。乌伤有数豪右田相环，约同请神君雨，一不从，曰：“吾田幸居中，岂有上下沾润而弗及者？”神君戏之，独弗雨其田。括士张溥随计上礼部，以梦卜得失。神君报之，验甚。由是远迩敬畏，尊之视天神，非斋戒不敢入。或御荤肉故慢神君者，多呕血死，盖神君不近腥秽。庙前有小涧，至今鱼鳖不敢入云。

史官曰：天历初，余在外姻贾氏家，见象土龙致雨弗验，即往号诸神君。居亡何，云滃然兴，转旋如车轮，雪花飞舞空中，已而大雨。明日又雨。而不号神君者，雨固弗及也。余窃神之。及来勾吴，闻荐绅先生缕述神君加详，因趋上林谒神君。祝史道予至瘞瓮处，有树二章，润泽若新沐，世传舁瓮之木所化，阴风犹冷冷动人。学者多疑于鬼神，若考神君之事，可不信乎？传言五星之精，能下化为人。呜呼，非独五星然也。

◇拟汉使谕郡国击邯鄲檄

惟高皇帝，提三千卒，起自丰沛。赤帟一挥，而天下底定。累洽重熙，至于孝平。皇帝藐在幼冲，委制新都侯莽。久秉国钧，遂致潜萌异图，僭奸天位。四海豪杰，怨怒切骨，至有枕戈待旦而弗寐者。义旗始竖，持剑之士，动以万数，不一二年，直捣长安，众共诛莽。天地为之开明，日月为之宣昭，神祇为之鬯舒，尔吏民之所共知。